

বোম্বাই চিত্র ।



শ্রীসত্যেন্দ্রনাথ ঠাকুর কর্তৃক

প্রণীত ।



কলিকাতা

আদি ব্রাহ্মসমাজ যন্ত্রে

শ্রীকালিদাস চক্রবর্তী দ্বারা মুদ্রিত ও প্রকাশিত ।

৫৫ নং অপর চিৎপুর রোড ।

বৈশাখ ১২৯৬ সাল ।

উৎসর্গপত্র ।

স্নেহাস্পদ

শ্রীযুক্ত রবীন্দ্রনাথ ঠাকুর

রবি,

মি এই গ্রন্থ-প্রকাশ বিষয়ে বিস্তর সাহায্য করিয়াছ—
র প্ররোচনায় ইহার জন্মলাভ, ইহার স্থানে স্থানে
র হস্তচিহ্ন বিদ্যমান । এই গ্রন্থখানি তোমার হস্তে সাদরে
করিতেছি, তুমি আমার এই স্নেহের উপহার গ্রহণ কর ।

বিষয়	পৃষ্ঠা।
দ্বিতীয় ভাগ	২৪৭
তৃতীয় ভাগ	২৫২
চতুর্থ ভাগ	২৬২

বিজাপুর

প্রথম ভাগ (সহর বর্ণনা)	৩১৯
দ্বিতীয় ভাগ (ইতিহাস)	৩০১
তৃতীয় ভাগ (ইতিহাস উপসংহার)	৩১৩

বোম্বাই সহর

প্রথম পরিচ্ছেদ (উপক্রমণিকা)	৩২৯
দ্বিতীয় পরিচ্ছেদ (ইতিহাস)	৩৩৬
তৃতীয় পরিচ্ছেদ (ইতিহাস অন্তঃসম্বন্ধ)	৩৫৬
চতুর্থ পরিচ্ছেদ (সম্প্রদায়)	৪০২
পঞ্চম পরিচ্ছেদ (জাতি)	৪১৭
ষষ্ঠ পরিচ্ছেদ (পুরাণ)	৪২৯
সপ্তম পরিচ্ছেদ (বাণিজ্য)	৪৪৭
অষ্টম পরিচ্ছেদ (ঘরবাড়ী)	৫৫৯
নবম পরিচ্ছেদ (মন্দির)	৪৬৮
দশম পরিচ্ছেদ (উৎসব)	৪৭৫
একাদশ পরিচ্ছেদ (এলিফান্টা)	৪৮২

সিংহলে ভ্রমণ বৃত্তান্ত

ভারতবর্ষীয় ইংরাজ

... ..	৪৮৯
... ..	পরিশিষ্ট।

শুদ্ধি পত্র ।

পৃষ্ঠা	পংক্তি	অশুদ্ধ	শুদ্ধ
৭০	১	আক্রমণ	আমদ্রণ
১১৩	তৃতীয় স্তম্ভ ৩	নবরা-ভ্রতার	নবরা, } ভ্রতার }
"	" ৯	বনেবী-দাজী	বনেবী, } দাজী }
১৩০	১৩	পহাড়	কহাড়
১৩৪	২১	খানাবশ	খানদেশ
৩৭৩	১৮	করে ত্রাণ রহে,	করে ত্রাণ, রহে ত্রাণ
৪৯৭	৫	দীপক }	দীপক বনে,
পরিশিষ্ট		বনে }	
৪০	৫	দূরীভূত	দৃঢ়ীভূত

বোম্বাই চিত্র ।



তুকারাম ।

প্রথম পরিচ্ছেদ ।

তুকারাম মহারাষ্ট্র দেশের এক জন সাধু পুরুষ ও প্রখ্যাত কবি । তিনি ১৫১০ শকাব্দে (খৃষ্টাব্দ ১৫৮৮) পুণা নগরীর অনতিদূর দেহু নামক গ্রামে জন্মগ্রহণ করেন । তুকারাম সেই সময়কার লোক, যে সময়ে মহারাষ্ট্রের জনপদ অনেক কাল মুসলমানদের আধিপত্যে অবসন্ন থাকিয়া স্বাধীনতা প্রত্যাহরণের জন্য সহসা উত্তেজিত হইয়া উঠে ও যবন-অধিকারের ভিতরে এরূপ রাজ্য প্রতিষ্ঠিত করে যাহাতে শতাব্দীর মধ্যে মোগল সিংহাসন সমূলে কম্পমান হইয়া ভগ্ন দশা প্রাপ্ত হয় । তুকারাম মহারাষ্ট্রাধিপতি শিবাজীর সমকালবর্তী লোক—যে দুই শত বৎসর মহারাষ্ট্রীয়গণ স্বাধীন রাজ্য উপভোগ করিয়াছিল, তাহার প্রারম্ভ কালের ধর্ম ও নীতির ভাব তুকারাম ও শিবাজীর গুরু রামদাস এই দুই কবির জীবনে প্রতিকলিত দেখা যায় ।

তুকারাম জাতিতে শূদ্র ও ব্যবসায়ে বণিক ছিলেন । তাঁহার পিতা মাতা বংশানুক্রমে পণ্ডুরপুরের দেব বিঠোবা বা বিঠল্লের

পরম ভক্ত ছিলেন ও তথায় তাঁহার সর্বদাই তীর্থ করিতে যাইতেন । এইরূপ জনশ্রুতি যে, বিশ্বম্ভর নামে তাঁহার কোন এক পূর্বপুরুষ বয়ঃপ্রাপ্ত হইলে তাঁহার মাতা তাঁহাকে চিরন্তন প্রথানুসারে পণ্ডরপুরে তীর্থযাত্রা করিবার উপদেশ দেন । সেই উপদেশক্রমে বিশ্বম্ভর মাসের মধ্যে দুই বার তথায় যাত্রা করিতে ত্রুতী হইলেন । এইরূপে ১৬ বার তীর্থ দর্শন করিবার পর একদা রাত্রিতে তাঁহার স্বপ্ন হয় যে, বিঠোবা দেব ও রুক্মাইদেবীর স্বয়ম্ভু মূর্তি দেখ্ গ্রামের এক আশ্রম বনে নিহিত আছে—তুমি গিয়া তাহা উদ্ধার কর—আর তোমার পণ্ডরপুরে তীর্থ পর্য্যটনে যাইতে হইবে না । পরে বিশ্বম্ভর তাহা উদ্ধার করিয়া দেখ্ গ্রামে ইন্দ্রায়নী নদী তীরে এক ক্ষুদ্র মন্দির প্রস্তুত করিয়া যথাবিধি সেই মূর্তিষয় প্রতিষ্ঠা করেন । সেই অবধি বিঠোবা-দেব বিশ্বম্ভরের কুল-দেবতা হইলেন ।

তুকারাম, বহ্নোজীর তিন পুত্রের মধ্যে মধ্যম পুত্র । তাঁহার মাতার নাম কণকাই । বহ্নোজীর বৃদ্ধাবস্থায় তিনি তাঁহার জ্যেষ্ঠ পুত্র সাওজীকে সংসারের ভার অর্পণ করিবার প্রস্তাব করেন কিন্তু সাওজী এক জন ভগবদ্ভক্ত পুরুষ, সংসারে বীতরাগ, কাজেই তুকারামের উপরেই কর্মকাজের সমস্ত ভার স্থাপ্ত হইল । তখন তাঁহার বয়স্ক্রম ১৩ বৎসর—কতক কাল পর্য্যন্ত তিনি সাংসারিক ব্যাপারে ব্যাপৃত থাকিয়া পিতামাতার সন্তোষ সাধন করিলেন । তাঁহার দুই পত্নী ছিল—রখুমাই ও জীজাই । কনিষ্ঠ পত্নীর স্বভাব কিছু ককর্শ ছিল ও তিনি তাঁহার স্বামীর বৈরাগ্য

ভাবের উপর কিছু বিরক্ত ছিলেন। কথিত আছে যে এক দিন তুকারাম কতকগুলি ইক্ষুদণ্ড উপহার পাইয়াছিলেন। আখের গোছা ঘরে আনিতে আনিতে পথিমধ্যে কতকগুলি বালক তাহার প্রার্থী হইল। তিনি একে একে বিতরণ করিতে লাগিলেন, পরিশেষে তাঁহার হস্তে একটি দণ্ড মাত্র অবশিষ্ট রহিল। গৃহে ফিরিয়া আসিয়া দেখেন যে গৃহিণী কোথা হইতে সকল কথার সন্ধান পাইয়াছেন। স্বামীর এইরূপ আচরণে জীজাই রাগান্বিত হইয়া সেই ইক্ষু-গাছটি কাড়িয়া লইয়া পতির পৃষ্ঠোপরি এমন সজোরে প্রহার করিলেন যে তাহা দুই খণ্ড হইয়া গেল। তুকারাম ঐ দুই খণ্ড ইক্ষু হস্তে লইয়া শান্তভাবে কহিলেন—
“প্রিয়ে, তুমি আমাকে এত ভাল বাস যে এই আখ-গাছটি একলা খাইতে ভাল লাগিবে না বলিয়া তাহা দুই খণ্ডে ভাঙ্গিয়া ফেলিলে!”

তুকারামের বিংশতি বৎসর বয়সে তাঁহার জ্যেষ্ঠ পত্নী রখু-মাইর মৃত্যু হয়। ঐ বৎসর সন্ত নামক তাঁহার একটি পুত্রও মরিয়া যায়। তৎপূর্বে তাঁহার পিতা মাতা ও ভ্রাতৃজায়ার মৃত্যুতে তিনি অত্যন্ত শোকগ্রস্ত হন—তাঁহার জ্যেষ্ঠ ভ্রাতাও তাঁহাকে ছাড়িয়া তীর্থ যাত্রায় চলিয়া গিয়া তাঁহার শোককে দ্বিগুণিত করেন। ইহার উপর দুর্ভিক্ষ ও অন্ন-কষ্ট, এই সকল কারণে তিনি সংসারের উপর বিরক্ত ও সর্বব্যত্যাগী হইয়া ঈশ্বরারাধনায় জীবন উৎসর্গ করিলেন। এইরূপে তাঁহার জীবনের পূর্বাবস্থা অতিবাহিত হইল।

তুকারামকৃত কবিতাবলী “তুকারামের অভঙ্গ” বলিয়া পরিচিত । তাহা মহারাষ্ট্রীয় প্রাচীন সাহিত্যের এক প্রধান অঙ্গ । ইহা হইতে কবির নিজ জীবনচরিত অনেকটা সংগৃহীত হইতে পারে । একজন সন্ন্যাসী তুকারামকে তাঁহার বৈরাগ্য অবলম্বনের কারণ জিজ্ঞাসা করাতে তিনি যে সকল অভঙ্গে সেই প্রশ্নের উত্তর দিয়াছিলেন তাহার কিয়দংশ নিম্নে উদ্ধৃত করা গেলঃ—

১৩৩৩

শূদ্র জাতি, সংসার চালাই ব্যবসায়,
 বিষ্ঠাল গৃহদেবতা, নমি তাঁর পায়ে ।
 এ সকল কথা কহা ভাল বড় নয়,
 শুধাইছ, সেই হেতু কহিবারে হয় ।
 মা বাপের মৃত্যু হ'লে পড়িয়া সংসারে,
 সহিহু কতই কষ্ট কহিব কাহারে ?
 ধন মান সঁপিলাম দুর্ভিক্ষের আসে,
 অন্নভাবে গৃহিণী মরিলা উপবাসে ।
 লজ্জায় শরমে শেষে হ'য়ে মর' মর,'
 ছুখে শোকে একেবারে হ'য়ে জরজর,
 ব্যবসায় দেখিয়া দারুণ লোক্‌সান,
 দেবতা মন্দিরে গিয়া কৈহু বাসস্থান ।
 এগারই দিনে আরম্ভিহু সঙ্কীৰ্ত্তণ,
 কিন্তু অধ্যয়নে তত নাহি ছিল মন ;
 সাধুদের গুটিকত পবিত্র বচন
 মুখস্থ করিয়া লৈহু করিয়ে যতন ।

অন্য কেহ যদি কভু গাইতেন গান,
 আমিও ভক্তির সাথে মিলাতেম তান ।
 লজ্জা দূর করি দিয়া, শুদ্ধ করি প্রাণ,
 সাধুর চরণামৃত করিতাম পান ।
 পর-উপকার সদা করিবার তরে
 শরীরের প্রতি মায়া দিহু দূর ক'রে ।
 বন্ধুদের অন্তরোধে দিলাম না কান,
 সংসারের প্রতি আর রহিল না টান ।
 অপরের পরামর্শ না আনি শ্রবণে
 সত্য অসত্যের সাক্ষী করিলাম মনে ।
 স্বপ্নে মোর গুরু-মন্ত্র করিয়া শ্রবণ
 ঈশ্বরে অচলা ভক্তি করিহু স্থাপন ।
 কবিত্ব প্রতিভা শেষে ক্ষুণ্ণ পেল মনে,
 অর্পণ করিহু হৃদি বিঠোবা চরণে ।
 নিষেধ * হইল শেষে কবিতা লিখায়,
 বড়ই আঘাত তাহে পাইহু হিয়ায় ।
 গ্রন্থ মোর ফেলি জলে, গেলাম মন্দিরে,
 দেবতা প্রসন্ন মোরে হইলা অচিরে ।
 সব কথা বিস্তারিয়া কহিবারে পাছে
 সময় বহিয়া যায়, এত কথা আছে ।
 এখন যে ভাব মোর দেখিছ সকল,
 ভবিষ্যতে কি হইবে জানেন বিষ্ঠল ।

* তুকারাম শূদ্র বলিয়া একজন ব্রাহ্মণ কর্তৃক তিনি কবিতা লিখনে নিষিদ্ধ হইয়াছিলেন । ইহার বিশেষ বিবরণ পরে প্রকাশিত হইবে ।

ভকতে না উপেক্ষা করেন নারায়ণ,
করুণা-সাগর তিনি জানিছু এখন ।
পাণ্ডুরঙ্গে বলালেন যে কথা সকল,
তাই একমাত্র মোর রহিল সম্বল !

১৩৩৪

আমি অতি হীন পাপী গুন সাধু সবে,
এত ভাল বাস মোরে কেন বল তবে ?
মনে জানিয়াছি গতি নাহিক আমার,
এক ভেবে কাজ করি, লোকে ভাবে আর ।
কিছুতেই পুরিল না অভাব যখন,
বর্তমান দশা তবে করিছু গ্রহণ ।
অবশেষে ফুরাইয়া গেল মোর ধন,
অবশিষ্ট যাহা কিছু কৈন্ত বিতরণ ।
দারা স্মৃত ভাইদের করিয়া বর্জন,
হইলাম হতবুদ্ধি বিষাদে মগন !
লোক মাঝে মুখ আর দেখাব না মনে,
কাটাই জীবন মম বিজ্ঞানে কাননে ।
পেটের জালায় মন হইল কঠিন,
পেটের জালায় হৈছু দয়া-মায়া-হীন ।
যে যা বলে ব'সে থাকি আপনার মনে,
না শুনে 'হাঁ' দিয়া যাই সবারি বচনে ।
পূর্ব পুরুষেরা মোর ছিলা ভক্ত অতি,
তাই আমি বিঠোবার করিগো আরতি ।
তুকা বলে "কারো কথা নাহি শুনি আর,
ভক্তদের এই গতি জানিয়াছি সার ।"

১৩৩৫

হে দেব যা কিছু মোর আছিল বিভব
 আমার ভালরি তরে নিয়াছ সে সব ।
 দুর্ভিক্ষের কালে যত পড়িয়াছি ক্লেশে,
 আমার ভালরি তরে হইয়াছে শেষে ।
 শোক পেয়ে তব প্রতি ভক্তি গেল দড়,
 সংসারের উপরে বিরাগ হল বড় ।
 ভালই যে পত্নী মম হইলা কর্কশা,
 ভাগ্য মোর লোক মাঝে এত যে দুর্দশা ।
 ভালই যে জগতে পাইলু উপহাস,
 গোমেঘাদি ধন ধান্য সব হল নাশ ।
 লোক-লাজ না রাখিলু হইল মঙ্গল,
 তোমারে করিলু হরি জীবন-সম্বল ।
 তোমার মন্দিরে আজি সঁপিলাম কাদা,
 তেয়াগিয়ে পুত্র জায়া সংসারের মায়া ।
 “ভাগ্য মোর” তুকা বলে “করিলু ধারণ,
 একাদশী ব্রত উপবাস জাগরণ ।”

উপরে তুকারাম তাঁহার স্ত্রীকে কর্কশা বলিয়া উল্লেখ করি-
 য়াছেন—নিম্নোদ্ধৃত কতিপয় শ্লোকে তাঁহার সেই স্ত্রীর প্রতি-
 মূর্তি পাঠকেরা অবিকল চিত্রিত দেখিতে পাইবেন ।

৫৬৬

আমারি বেলায় উনি যোগী,
 নিজের ত বাকী নাই স্তম্ভ,
 সব স্তম্ভ ঘরে আসে, শুধু
 আমারিত ঘুচিল না দুখ ।

ঘরে মোর অন্ন নেই ব'লে
 বল দেখি যাই কার দ্বার ?
 এই পোড়া সংসারের তরে
 আপদ সহিব কত আর ?
 অন্ন অন্ন কোরে রাত দিন
 ছেলে-শুলো খেলে যে আমায় !
 মরণ তাদের হয় যদি
 সকল বালাই ঘুচে যায় ।
 সকলি ঝোঁটিয়ে নিয়ে যান,
 তিল মাত্র ঘরে থাকা ভার ।
 ঘরে যে গোবর দিতে হবে,
 একটীও গরু নাই তার ।
 তুকা বলে, “দূর পোড়ানুখী,
 আপনি মাথায় নিলি ভার ।
 এখন তাহার তরে, নিচ্ছে
 কাদিলে কি হবে বল আর !”

৫৬৭

বোধ হয় এ পাষাণ,
 পূর্ব জন্মে ছিল মোর অরি ।
 এ জনমে স্বামী হোয়ে
 বৈর সাধিতেছে এত করি !
 কত দুঃখ স'ব আর,
 কত ভিক্ষা মাগি পর দ্বারে ।
 বিঠোবার মুখে ছাই—
 কি ভাল কোলেন এ সংসারে ?

তুকা বলে “জ্ঞী আমার
রাগিয়া কতই কটু ভাষে ।
কতু বা কাঁদিয়া মরে,
কতু বা আপন মনে হাসে ।”

৫৬৮

ঘরে ছুটা অন্ন এলে
ছেলেদের দেব কোণা খেতে ।

হতভাগা তা দেবে না,
সকলি পরেরে যা'ন দিতে !

তুকা বলে “অতিথিরে
যথনি গো দিতে যাই ভাত,

রাক্ষসীর মত এসে
হতভাগী ধরে মোর হাত ।

না জানি যে পূর্ব জন্মে
কতই করিয়াছিলি পাপ ।”

তুকা বলে “এ জনমে,
তাই এত পেতেছিস্ তাপ ।”

৫৬৯

থাবার কোথায় পাবি বাছা,
বাপ তোর থাকেন মন্দিরে—

মাথায় জড়ান্ তিনি মালা,
ঘরে আর আসেন না ফিরে ।

নিজের হলেই হল খাওয়া
আমাদের দেখেন না চেয়ে !

খর্ভাল বাজিয়ে তিনি শুধু
মন্দিরে বেড়ান্ গেয়ে গেয়ে ।

কি করিব বল্ দেখি, বাছা,
কিছুই ত ভেবে নাহি পাই ।

ঘরে না বসেন এক রতি,
চলে যান অরণ্যে সদাই ।

তুকা বলে “ঐধ্য্য ধর মনে
এখনো সকল ফুরায় নাই ।”

৫৭০

গেছে সে আপদ গেছে,
ঘরেতে থাকিবে তবু রুটি ।

যা হোক তা হোক কোরে
পেট ভরে খেতে পাব ছুটি ।

বোকে বোকে দিহু এলো,
জালাতন হহু হাড়ে মাসে,

তুকা বলে “যদিও সে
দিবা নিশি কত কটু ভাষে ।

তুকারে তুকার স্ত্রী যে
মনে মনে তবু ভাল বাসে ।”

৫৭১

ঘরে আর আসে না সে,
কোন পরিশ্রম নাহি কোরে
নিজে না কি খেতে পায়
রোজ রোজ স্নেহে পেট ভোরে ।

না উঠিতে শয্যা হতে
মিলি দল-বল-গুলা সাথে

করতাল বাজাইতে
আরম্ভ করেন অতি প্রাতে ।

থেয়েছে লজ্জার মাথা,
জ্যাস্তে তারা মড়ার মতন ।
ঘরে আছে ছেলে পিলে,
তাদের ত না করে যতন ।
দ্বী তাদের পোড়ে আছে—
হতভাগী লাজ-দুঃখ-ভরে
অভিশাপ দিতে দিতে—
মাথায় পাথর ভেঙ্গে মরে ।
“ভাগ্যে যাহা আছে তাহা,”
তুকা বলে “থাক সহ কোরে ।”

৫৭২

হেথা কেন আসে লোক-গুলা,
তাদের কি কাজ নাই হাতে ?
তুকা কহে “ঈশ্বরের তরে,
ব্রহ্মাণ্ড মিলিছে মোর সাথে ।
“ভাল মুখে দু চারিটা কথা,
না জানি তাহে কি ক্ষতি আছে !
“কোথাও যায় না যারা কভু,
ভালবেসে আসে মোর কাছে ।
“এও সে বাসে না ভাল হয়,
ভাগ্য কি বা আছে এর বাড়ি,
“সকল লোকের পাছে পাছে
কুকুরের মত করে তাড়া ।”

তুকারাম সংসারাত্মক হইতে অবস্থত হইয়া ভজন-পূজন-
কীর্তনে দিন যাপন করিতে লাগিলেন । প্রভু্যে স্নান করিয়া

বিঠোবার মন্দিরে গমন ও দেবপূজাদি সমাপন করিয়া অরণ্যে প্রস্থান—এই তাঁর নিত্য নিয়মিত কর্ম। দেহুর তিন ক্রোশ পশ্চিমে “ভাণ্ডারী” নামক পাহাড় তাঁহার প্রিয় আবাসস্থান ছিল। তথায় সমস্ত দিবস ধ্যান ধারণায় মগ্ন থাকিয়া সন্ধ্যার সময় দেহুতে ফিরিয়া আসিয়া বিঠোবার মন্দিরে ভজনাদি করিতেন। কিন্তু তিনি যে একেবারে গৃহধর্ম ছাড়িয়া দিয়াছিলেন তাহা বোধ হয় না। একবার তিনি ক্ষেত্ররক্ষণ কার্যের ভার লইয়া যে বিপদে পড়িয়াছিলেন তাহার বিবরণ এই—

এক দিন তিনি ইন্দ্রায়ণী-তীরে বসিয়া উপাসনা করিতেছেন এমন সময় তাঁহার নিকটে এক জন কৃষক আসিয়া উপস্থিত। সে তুকারামকে বলিল “তুকারাম শেট, মিছামিছি নিরুশ্মার ঞ্চায় ঘরে বসিয়া আছ, যদি আমার ক্ষেত রক্ষণ কর ত তুমি আধ মন করিয়া দানা পাইবে, তাহাতে তোমার পরিবারের ভরণ পোষণে সাহায্য হইবে—আর যদি কোথাও হরিনাম করিতে ইচ্ছা হয় তাহাও করিতে পারিবে।” তুকারাম তাহাতে স্বীকৃত হইলে তাঁহাকে ক্ষেত্ররক্ষণ কার্যে নিযুক্ত করিয়া ক্ষেতকারী গ্রামান্তরে চলিয়া গেল। তুকারাম ক্ষেত্ররক্ষণ কালে দেখিলেন যে, দানার লোভে ঝাঁকে ঝাঁকে পক্ষীদল আসিয়া শস্যক্ষেত্রে উপদ্রব আরম্ভ করিল। কিন্তু ক্ষুধার্ত প্রাণীকে তাড়াইয়া দেওয়া দোষের কার্য জানিয়া তিনি তাহাদের তাড়াইয়া দিতে বিরত হইলেন। তিনি ক্ষেত্র মধ্যে কাষ্ঠমঞ্চের উপর বসিয়া ধ্যানে মগ্ন, এদিকে পক্ষীরা অকুতোভয়ে শস্য খাইয়া

যায়। এইরূপে এক মাস চলিয়া গেলে ক্ষেতকারী প্রত্যাগত হইয়া দেখে যে তাহার ক্ষেত্র বিহঙ্গকুলের বাসস্থান হইয়াছে। ইহা দেখিয়া সে ক্রোধভরে তুকারামকে তাঁহার অনবধানতা জন্য বিস্তর তিরস্কার করিতে লাগিল, পরে গ্রামের পাঁচ জনকে একত্র করিয়া তাঁহাদিগকে সমস্ত বৃত্তান্ত অবগত করিল। তাঁহারা ক্ষেত্রকারীকে জিজ্ঞাসা করিলেন “তোমার ক্ষেত্রে কত মন শস্য উৎপন্ন হয়?” সে কহিল “ছুই খণ্ডী”। তাঁহারা তদন্তসারে ছুই খণ্ডীর মূল্য ক্ষেতকারীকে দণ্ডস্বরূপ লিখিয়া দিতে তুকারামের প্রতি আদেশ করিলেন। তৎপরে পঞ্চায়তের মধ্যস্থগণ নিজ চক্ষে ক্ষেত্র তদারক করিতে গিয়া যে দৃশ্য দেখিলেন তাহাতে অবাক্। দেখেন যে ক্ষেত্রটি শস্যে শস্যে ছাইয়া গিয়াছে। সেই শস্য সংগৃহীত হইলে তাহা হইতে ১৭ খণ্ডী দানা উৎপন্ন হইল। গ্রামবাসীরা বিচারে ধার্য্য করিলেন যে ছুই খণ্ডী মাত্র ক্ষেতকারীর কথা মত তাহার প্রাপ্য—অবশিষ্ট ভাগ তুকারামকে দিতে হইবে। কিন্তু তুকারাম তাহা গ্রহণ করিতে সম্মত হইলেন না। এক ব্রাহ্মণের নিকট উদ্ধৃত দানা গচ্ছিত রহিল। অবশেষে দেহুর মন্দির ভগ্নপ্রায় হইয়াছিল তাহার সংস্কারণ কার্য্যে তাহা ব্যয়িত হইল।

এই রূপে তাঁহার দিন যায়। এখনো পর্য্যন্ত তাঁহার জীবনের গতি নিরূপিত ও বিশ্বাসের স্থিরতা সম্পাদিত হয় নাই। মাঘ মাসের দশমী শুক্লপক্ষের রাত্রিতে তাঁহার এক স্বপ্ন হয়। তাহাতেই তাঁহার জীবন-স্রোত নিয়মিত হইল। সেই স্বপ্নে

দেবের মৃত্যুকাল শকাব্দ ১২৫৬ (খৃষ্টাব্দ ১৩২৮)। নামদেব ও তুকারামের সম্বন্ধে মহীপতি তাঁহার “ভক্তলীলামৃত” গ্রন্থে লিখিয়াছেন যে নামদেব শত কোটি অভঙ্গ রচনায় কৃতসঙ্কল্প হইয়া ৯৪ কোটি ৪৯ লক্ষ অভঙ্গ রচিয়া ইহলোক হইতে অবস্থত হয়েন, তিনিই নির্দিষ্ট সংখ্যা পূরণ করিবার উদ্দেশে তুকারাম হইয়া পৃথিবীতে পুনর্জন্ম গ্রহণ করেন। কথিত আছে যে তদনুসারে তুকারাম ৫ কোটি ১ লক্ষ ৪৪০০০ শ্লোক রচনা করেন কিন্তু প্রকৃত প্রস্তাবে তুকারাম-কৃত ৪,৬০০০ অধিক সংখ্যক অভঙ্গ প্রাপ্ত হওয়া যায় না। তুকারাম এই সকল অভঙ্গ অধিকাংশ বিঠোবা-মন্দিরে রচনা করিতেন। কবিতা রচনার উপযোগী আরও একটি বিজন স্থান তাঁহার মনোনীত ছিল—সে স্থানটি এখনো কোন ভ্রমণকারী দেখে দর্শনে গেলে তাঁহাকে “তুকার আশ্রম” বলিয়া দেখাইয়া দেওয়া হয়।

এই সময় “ভজন ও কথকতা” এই দুই দ্বার দিয়া তুকারামের কবিত্ব-শক্তি বিশেষ স্ফূর্তি পায়। ছন্দোময় বাক্যে ঈশ্বরের ভজনার নাম “ভজন”। এই সকল স্থলে ভজন-কর্তা স্বরচিত কবিতা অথবা সঙ্গীতাবলি গান করেন ও পরে শ্রোতৃ-বর্গ সমস্বরে সেই গানে যোগ দেন। এই সকল কবিতা ও গীতের অর্থ বুঝাইয়া ব্যাখ্যা করিবার রীতি নাই। এই রূপ ভজনের সময় তুকারাম হয়ত অগণ্য অগণ্য অভঙ্গ সদ্য সদ্য রচনা করিয়া গান করিতেন, তাহা কালক্রমে বিলুপ্ত হইয়া গিয়া থাকিবে। এই সকল অভঙ্গ লিপিবদ্ধ হইলে ইহাদের সংখ্যা

প্রবাদ-অনুযায়ী কোটি না হউক, নিদান-পক্ষে লক্ষেও পৌঁছিতে পারিত। তুকারামের অভঙ্গ জনসমাজে সমাদৃত ও প্রখ্যাত হইবার অপর এক উপায় “কথকতা”। মহারাষ্ট্রে দেশে ধর্ম-বিষয়ক বক্তৃতা ও ব্যাখ্যানের এক প্রধান সাধন কথকতা। ইহাতে কথক দেব-বন্দনাদি পাঠ করিবার পরে কোন একটি কবিতা কিন্না বচন অবলম্বন করিয়া বক্তৃতা আরম্ভ করেন। নানা গ্রন্থ হইতে উপদেশ প্রদান ও মধ্যে মধ্যে গল্প ইতিহাস ও কথাচ্ছলে শ্রোতৃবর্গের মনোরঞ্জন করত কবিতাটির মর্ম্ম তাঁহাদের হৃদয়ঙ্গম করিয়া দেওয়া কথকতার উদ্দেশ্য। সঙ্গীত কথকতার এক প্রধান অঙ্গ। কথক, কাব্য অথবা পুরাণাদি গ্রন্থ হইতে যে সকল কবিতা ও বচন পাঠ করেন তাহা শ্রোতৃগণ তাঁহার পশ্চাতে আবৃত্তি করেন। মহারাষ্ট্রে কথকেরা বহুমানা-স্পদ ও তাঁহাদের উপদেশ সাধারণ জনসমাজে ধর্ম্ম-প্রচারের বিশেষ উপযোগী। এই রূপ বক্তৃতা যতদূর ফলোপধায়ী হইতে পারে তুকারামের মুখে তাহার চতুর্গুণ ফল প্রসব করিত সন্দেহ নাই। কেন না তুকারামের বক্তৃতা কেবল মুখের নয়—তাঁহার হৃদয়ের গভীরতম প্রদেশ হইতে তাহা নিঃসৃত হইত। তাঁহার পবিত্র চরিত্র, অকৃত্রিম ঈশ্বর-ভক্তি ও বিনা মূল্যে উপদেশ প্রদান—এই সকল কারণে তাঁহার প্রতি লোকের শ্রদ্ধা বিশেষ রূপে আকৃষ্ট হইত।

তুকারামের কীর্ত্তি প্রচারের সঙ্গে সঙ্গে দুই লোকের বিষ-মুষ্টিও তাঁহার উপর নিপতিত হইল। কিন্তু তিনি যে সমূহ

কষ্ট ও যন্ত্রণা ভোগ করিয়াছিলেন তাহাতে তিনি মুহম্মান হইবার নহেন, প্রত্যুত অগ্নিপরীক্ষিত কাঞ্চনের আয় তাঁহার স্বাভাবিক সাধুতা, সরলতা, ক্ষমা, সহিষ্ণুতা, নিস্পৃহতা আরো অধিকতর প্রদীপ্ত হইয়া উঠিল। শূদ্ৰ হইয়া তিনি বেদোদ্বোধন করেন—গুরুর আয় ধর্মোপদেশ দেন—লোকেরা ভক্তিভরে তাঁহাকে দণ্ডবৎ প্রণাম করে—ইহা ব্রাহ্মণদের চক্ষে অসহ্য হইয়া উঠিল। লোকের দোষ কি, তাহারা ব্রাহ্মণ শব্দের যথার্থ অর্থ অনুসারে শূদ্ৰ তুকারামকেও ব্রাহ্মণের আয় সেবা করিতে লাগিল; এমন কি, তুকারামের জীবনের শেষভাগে এক উচ্চকুলের ব্রাহ্মণ-পরিবার, যাহারা গণেশের অবতারবিশেষ বলিয়া পরিচিত ছিলেন তাঁহারা, তুকারামের সহিত একাসনে আহার করিতেও সঙ্কুচিত হন নাই। এই সকল কারণে ব্রাহ্মণ জাতির মধ্যে কাহারো কাহারো ঘৃণা ও ঈর্ষা জলিয়া উঠিল ও তাঁহারা তুকারামের প্রতি বৈরসাধনে প্ররত্ত হইলেন। দেহু-গ্রামে মম্বাজী নামে এক জন গোঁসাই বাস করিতেন—তাঁহার হস্ত হইতে তুকারামের উপর অত্যাচারের প্রথম সূত্রপাত হয়। বিঠোবা-মন্দিরের পশ্চাৎভাগে মম্বাজীর একটি বাগান ছিল, তাহা তিনি কাঁটাগাছের বেটন দিয়া ঘিরিয়া লইলেন। একাদশীর দিন দেহুর এক উৎসবের দিন—সে দিন বিঠোবা-মন্দির লোকে লোকারণ্য হইয়াছে। তুকারাম দেহুর চরণে এই সকল কাঁটাগাছে লোকদিগের প্রদক্ষিণ-স্থান পর্য্যবসায় হইয়া গিয়া হইয়াছে, তাহা দেখিয়া তিনি স্বহস্তে তাহা উৎপাটিত করিয়া

স্থান পরিত্যক্ত করিয়া দিলেন । ইহাতে মন্মাজী ক্রোধাবিষ্ট হইয়া সেই সকল কণ্টক-যষ্টি দিয়া তুকারামকে উত্তম মধ্যম বিলক্ষণ প্রহার করিলেন । তুকারাম ঐ প্রহারকের প্রতি বিন্দু মাত্র কোপ প্রকাশ না করিয়া তাঁহার নিত্য নিয়মিত কৰ্ম্মে ব্যাপ্ত রহিলেন, যেন কিছুই হয় নাই । অবশেষে তিনি তাঁহার শত্রুর উপর জয়ী হইলেন । “অসাধুঃ সাধুনা জয়েৎ” এই উপদেশমত কার্য্য করিয়া সে জয় লাভ করিলেন । তুকারাম নিম্নলিখিত শ্লোকাবলীতে এই ঘটনার উল্লেখ করিয়াছেন ।

৩৫৫

ছাড়িব না ছাড়িব না, ছাড়িব না হে বিঠোবা

তোনারি চরণ ।

যতই যন্ত্রণা আসে, আনুক কি করিবে দে,

না হয় হইবে মরণ ।

শত্রুধারী আসি কেহ, থণ্ড যদি করে দেহ,

তবু নাহি ডরি ।

তুকা বলে “সাবধান, হোয়ে আছি আগুয়ান,

চিতে মোর শমগুণ ধরি” ।

৩৫৬

বেস বেস বড় ভাল, বিঠোবা হে কল্লৈ ভাল,

শাপে বর দান ।

ক্ষমাগুণ শেখাবারে, হানিলে এ দেহোপরে

কণ্টকের বাণ ।

কটু কাটব্য গালি, মোর পৃষ্ঠে দিলা ঢাঙ্গি,

তাহে পাই প্রাণ—

তুকাবলে “কৃপা করি সংহারিয়া ক্রোধ অরি
দিলে পরিত্রাণ ।”

৩৫৭

তরিমু তরিমু দেব তরালে আমায়,
অদৃষ্টে যা ছিল ভাল, তাই মোর তাই হল,
কি বলিব হায় !

যতনে সরল চিতে, কাঁটা তুলি নিজ হাতে,
পথের আটক ।

“কত সহি” তুকা বলে, “নাশি কিন্তু রিপদলে,
হৈমু নিকটক ।”

এরূপ সহিষ্ণুতার ফল অচিরেই ফলিল । মম্বাজীর ক্রোধানল
আপনাপনি নিবিয়া গেল ও তিনি তুকারামের প্রতি বিরক্তি
ভাব পরিত্যাগ করিয়া তাঁহার অনুরক্ত ভক্তের মধ্যে গণ্য হই-
লেন ।

পুণার নিকটবর্তী বাদোলী গ্রামস্থ রামেশ্বর ভট্ট নামক আর
এক জন ব্রাহ্মণ তুকারামের উপর অত্যাচার আরম্ভ করিলেন ।
তিনি তুকারামের বিরুদ্ধে নানা প্রকার অশ্লীল অভিযোগ উপ-
স্থিত করিয়া তাঁহার প্রতি গ্রামাধিকারীদিগের বিদ্বেষ জন্মাইয়া
দিলেন ও দেহুর পাটেলের নিকট হইতে তাঁহার গ্রামবহিস্কার-
ণের এক অনুজ্ঞাপত্র বাহির করিলেন । তুকারাম মহা বিপদে
পড়িয়া এইরূপে আক্ষেপ করিতে লাগিলেন ।

কি করিব কোথা যাব,

গ্রামে লই কাহার শরণ ?

গাঁয়ের মণ্ডল, করে গণ্ডগোল,
 কার কাছে ছুটি ভিক্ষা মাগি গো এখন।
 নিয়ম ভঙ্গ দোষে, দোবী করে রোষে,
 আদালতে নিয়ে চলি, বলিয়া শাসায়,
 মিলে লোকগুল, বুঝাইল ভুল,
 লাভে হতে ভিখারীর অন্ন মারা যায়।
 এহেন অসৎ সঙ্গে রহিব না আর—
 তুকা বলে “চল যাই, পাণ্ডুরঙ্গ দ্বার।”

রামেশ্বর ভট্ট তুকারামকে তাঁহার হীন জাতির প্রতি লক্ষ্য করিয়া বহুবিধ তাঁত্র ভৎসনা করিয়া কবিতা রচনা করিতে একে-বারে নিষেধ করিলেন। তুকারাম বিনীত ভাবে উত্তর করিলেন—
 “আমি অল্প স্বল্প যাহা কিছু রচনা করিয়াছি সকলই পাণ্ডুরঙ্গের আদেশে, কিন্তু দেখিতেছি ব্রাহ্মণের আদেশও আমার শিরোধার্য্য, অতএব আপনার আজ্ঞানুসারে এখন হইতে আমি কবিতা রচনায় বিরত হইলাম—যে সকল কবিতা আজ পর্য্যন্ত বিরচিত হইয়াছে তাহার কি করা যাইবে মহাশয় অনুমতি করুন।” রামেশ্বর ভট্ট তাঁহার রচিত গ্রন্থাবলী জলমগ্ন করিবার আদেশ করিলেন। তুকারাম অগত্যা তাহাতে সন্মত হইয়া দেহুতে গিয়া বিঠোবা দেবের নিকট সগস্ত বৃত্তান্ত নিবেদন করিলেন। তৎপরে তাঁহার গ্রন্থ দুই প্রস্তর ফলকের মধ্যে রাখিয়া কাপড়ে যত্নে বাঁধিয়া নিজ হস্তে ইন্দ্রায়ণী নদীতে নিক্ষেপ করিলেন। পরে লোকেরা আসিয়া বিদ্রূপ করিয়া বলিল “সন্ন্যাসিজি—আগে একবার তুমি খাতাপত্র নদীতে ডুবাইয়া

সংসার ডুবাইয়া দিলে—এখন আবার তোমার কবিতাগুলি নদীতে ডুবাইয়া পরমার্থও ডুবাইলে—তোমার একূল ওকূল দুকূল গেল।” এই সকল কথা তুকারামের বক্ষে বজ্রপাত তুল্য আঘাত করিল। তিনি অন্নপান পরিত্যাগ করিয়া বিঠোবা মন্দিরের প্রাঙ্গণে পড়িয়া রহিলেন ও যে পর্য্যন্ত তাঁহার প্রার্থনা পূর্ণ না হয় সে পর্য্যন্ত উঠবেন না নিশ্চয় করিলেন। এই রূপে ত্রয়োদশ দিবস অতিবাহিত হইল।

তাঁহার আসন্ন কাল উপস্থিত—শত্রুদের উল্লাসের আর সীমা রহিল না। তাহারা মনে মনে কত দর্প করিতে লাগিল—এবার আর এই শূদ্রটার মুখ হইতে বেদবাণী শুনিতে হইবে না। কিন্তু স্বয়ং বিঠোবা তুকারামের সহায়—তাঁহার অভঙ্গ সহজে বিলুপ্ত হইবার নয়। ত্রয়োদশ দিবসে তাঁহার গ্রন্থ নদীর উপর ভাসিয়া উঠিল ও লোকেরা তাহা তুকারামের নিকট আনিয়া উপস্থিত করিল। এই উপলক্ষে তিনি যে সকল শ্লোক রচনা করিয়াছেন তাহা নিম্নে প্রদর্শিত হইতেছে।

১১২২

অন্যায় করিহু ঘোর—

মরমে বিধিছে অনিবারে,

লোকের গঞ্জনা শুনে,

কত কষ্ট দিলেম তোনারে।

মোর তুখভাগী তুমি, মৃৎমতি দীন আমি,

অনাহারে অনিদ্রায় তের দিন রছি

মম হৃথে হৃথী ক'রি তোমারে, শরমে মরি—

তাই গো দ্বিগুণ জালা সহি ।

আমার মরণ দায় ফেলি তব শিরে,

কাজেই বাঁচাতে তাই হলো মৃন্মূর্রে ।

জল মধ্যে গ্রস্থ খানি ক'রে সংরক্ষণ,

তুকা বলে নিজ ভক্তে করিলে রক্ষণ ।

২২৪৩

কৃপানয়ী মা আমার অনাথ শরণ,

বালকের বেশে মোরে দিলে দরশন ।

প্রকাশি সগুণ মূর্তি শাস্ত কর চিতে,

আলিঙ্গন দিয়ে পরে তারিলে ভকতে ।

বন্ধুর সহায় দিয়ে, সাধু সঙ্গে মিলাইয়ে,

উদ্ধার করিলে মোরে সব হৃথ হতে ।

তুকা বলে “অশরণে, ক্ষমা কর গো জননী—

যাচি করপুটে ।

মরিলেও তোমারে মা, আর ক'হু ফেলিব না

এহেন সঙ্কটে ।

২২৪৪

সহিব অবোধে আমি সহস্র পীড়ন,

ফেলুক বিপদে ঘোর যতই দুর্জন ।

তোমায় আমার লাগি ফেলিব না দায়ে,

আমায় রেখ গো মাতা তব পদচ্ছায়ে ।

এবার করেছি দোষ আমি যে চণ্ডাল,

জলে আঙুলিয়ে গ্রস্থে রাখিলে কৃপাল ।

মন্দমতি সে সময়ে না কৈলু বিচার,

তোমারে ডাকিতে মোর কিবা অধিকার ।

জানি না আমি হে দেব কেমনে মহতে
 আমার এ ক্ষুদ্র ভার কহি গো বহিতে ।
 হবার যা হয়ে গেছে বৃথা এ শোচনা,
 তুকা বলে “জানিলাম ভবিষ্য-যোজনা” ।

২২৪৫

কি জানিবে পাণ্ডুরঙ্গ, তব অন্ত এ পামর,
 কি না তুমি কর দেব, যদি দৈর্ঘ্য ধরে নর ।
 আমি অতি মূঢ়মতি উতলা হইনু,
 তবু রূপানিধি তব আশ্রয় লভিনু ।
 দেবের তুমি হে দেব, জীবের জীবন,
 কেন তবে করি মোরা বৃথায় ক্রন্দন ।
 তুকা কহে সকাতরে—“পতিত এ জন,
 তব দ্বারে ধল্লা দিহু—অন্যায় কেমন ।”

২২৪৬

কেন এত ডাকিলাম হরি হরি করি,
 আঘাত কি করেছিল পিঠে তীব্র ছুরি ।
 রোয়ে তুমি দুই ঠাই জলে আর স্থলে,
 রক্ষণ করিলে গ্রন্থে তুকারে বাঁচালে ।
 মা-বাপে তাড়ানু হেরি একটু অন্তায়,
 তুমি কিন্তু কত সও কি বলিব হায় ।
 তুকা কহে “রূপাময় কেমনে বাথানি
 তোমা হেন হিতকারী—নাহি মোর বাণী ।”

২২৪৭

মা হতে মায়াবু তুমি, চাঁদ হতে তুমিহে শীতল ।
 তোমাতেই, আহা মরি, বাস করে প্রেম স্নানিশ্রল

ভূমিত পুরুষোত্তম, উপমা কোথায় ।
 তোমার নামের গুণে পাপী ত'রে যায় ।
 অমৃত স্নিগ্ধে নিজে তা হতে মধুর,
 তব সৃষ্টি পঞ্চভূত এই বিশ্বাকুর ।
 স্তব্ধ হয়ে নমে প্রভু তুকা তব পায়,
 অপরাধ ক্ষমা কর এই ভিক্ষা চায় ।

২২৪৮

ছুগুণ অন্যায়ী আমি কত আর ক'ব,
 বিষ্ঠল আশ্রয় দেহ, আর কি চাহিব ।
 জানি গো যে এ সংসার—ছত্তর ভয়াল,
 থাকিতে না পারি ইথে তিষ্ঠে ক্ষণকাল ।
 বাসনার যে তরঙ্গ করে কত রঙ্গ,
 সে কল্লোলে পড়ি যদি শাস্তি হয় ভঙ্গ,
 তুকা বলে “পাণ্ডুরঙ্গ, তুমিই ভরসা,
 বিরাজি হৃদয়ে মোর ঘুচাও দুর্দশা ।”

দেহতে এই সকল ঘটনা হইতেছে—এদিকে তুকা-বিশ্বেষী
 রামেশ্বর ভট্টের দুর্দশার পরিসীমা নাই । প্রবাদ এই রূপ যে,
 পুণার অনঘড় নামক ফকীরের একটা পাতকুয়া ছিল, রামেশ্বর
 ভট্ট এক দিন তাহার জলে স্নান করিয়া দেখেন যে তাঁহার শীতল
 হওয়া দূরে থাকুক—তাঁহার সর্ব্বাঙ্গ জ্বলিতেছে ; বোধ হইতে
 লাগিল যেন তাঁহার শরীর অগ্নিকুণ্ডে দগ্ধ হইতেছে—অনেক
 দিন এই রূপ দুঃসহ যন্ত্রণা ভোগ করিবার পর তাঁহার স্বপ্ন হইল
 যে তুকারামের নিকট ক্ষমা প্রার্থনা এ রোগের এক মাত্র ঔষধ ।
 তুকারামের গ্রন্থোদ্ধারের কথাও ঐ সময় তাঁহার শ্রবণ-গোচর

হইল। অবশেষে তাঁহার কৃতাপরাধের জন্য বিস্তর অনুতাপ করিয়া তুকারামের নিকট ক্ষমা প্রার্থনা করিলেন। তুকারাম তাহার এই উত্তর দেন—

১৭৫১

চিন্তাশক্তি হলে পরে শত্রু হয় মিত্র,
 বাঘে নাহি খায় সাপে না দংশায়, এমনি বিচিত্র।
 বিষ সে অমৃত, বিপদ সম্পদ, অনীতি সেও হয় নীতি।
 দুঃখ অমঙ্গল, প্রসবে শুভফল, অগ্নি-জ্বালা হয় প্রশমিত।
 প্রাণীতে প্রাণীর টান, ভাবে সবাই সমান,
 এই ত গো স্বাভাবিক রীতি।
 তুকা বলে “তোমা পরে তুষ্ট নারায়ণ,
 অল্পভবে তাহা তুমি বুঝিলে এখন।”

এইক্ষণ অবধি রামেশ্বর ভট্ট তুকারামের এক জন পরম ভক্ত শিষ্য হইলেন—বিদ্বৈষ অনুতাপে পরিণত হইল—যাঁহাকে শৃঙ্গ বলিয়া অবজ্ঞা করিতেন, তাঁহাকে দেবতা রূপে পূজা করিতে লাগিলেন। এক্ষণে তাঁহার বোধগম্য হইল যে “ভগবন্ত জনের কোন জাতি নাই—যেমন শালগ্রাম প্রস্তর হইয়াও পূজাহ, সেই রূপ ঈশ্বরানুরাগী পুণ্যাশ্রম প্রতি নীচ জাতির দোষ অর্শে না। দশগ্রন্থী বৈদিক পণ্ডিতেরা শাস্ত্র পুরাণ ভগবদ্গীতা প্রত্যহ পাঠ করেন কিন্তু তাঁহারা সে সকলের সার অর্থ গ্রহণ করিতে পারেন নাই। এই কলিযুগে ব্রাহ্মণেরা কর্মকাণ্ডের কুচক্র ও জাত্যভিमानে দুর্দশাগ্রস্ত হইয়াছে। তুকা সামান্য ব্যবসায়ী বণিক নহেন—তিনি বিঠোবার চরণদাস—তাঁহার ন্যায় জ্ঞানী ভক্ত ও

ত্যাগী পুরুষ আমি পৃথিবীতে আর কোথাও দেখি নাই*।” এই রূপ তুকার প্রতি রামেশ্বর ভট্টের ভাব আশ্চর্য্যরূপে পরিবর্তিত হইল ও তিনি যে সকল কবিতা জলমগ্ন করিতে আদেশ করিয়াছিলেন তাহা নিজ হস্তে লিপিবদ্ধ করিতে প্রবৃত্ত হইলেন।

নদী হইতে তুকারামের গ্রন্থোদ্ধার ও রামেশ্বর ভট্টের বৈর-মোচনের পর তুকারাম এই সমস্ত অত্যাচার হইতে এক প্রকার অব্যাহতি পাইলেন। তাঁহার পবিত্র চরিত্র ও অকৃত্রিম দেব-ভক্তির জন্য তাঁহার নাম মহারাষ্ট্রময় প্রচারিত হইল। তাঁহার স্মৃতিমহারাষ্ট্রাধিপতি শিবাজির শ্রুতিগোচর হওয়াতে তিনি তাঁহাকে স্বহস্তে এক পত্র লিখিয়া মহাসমারোহে রাজসভায় আমন্ত্রণ করিয়া পাঠাইলেন। এই স্থলে বলা উচিত যে শিবাজীর ধর্ম্মের প্রতি বিশেষ অনুরাগ ছিল ও তিনি রামদাসের শিষ্য বলিয়া প্রকাশ্যরূপে পরিচিত ছিলেন। কথিত আছে যে তিনি স্বকীয় রাজ্য রামদাসের হস্তে সমর্পণ করিয়া তাহা পুনর্বার তাঁহার নিকট হইতে গ্রহণ করত রামদাসের প্রতিনিধি রূপে শাসন কার্য্য আরম্ভ করেন—এই হেতু সন্ন্যাসীরা যে গেরুয়া বসন পরিধান করে মহারাষ্ট্রীয় জয়পতাকা সেই বর্ণের কাপড়ে প্রস্তুত হইত। তুকারামকে রাজত্ববনে আনা হইবার জন্য তাঁহার নিকট লোক জন অশ্ব রথ রাজ-ছত্র প্রভৃতি অনেক সরঞ্জাম প্রেরিত হইয়াছিল কিন্তু তুকারাম মহারাজের আমন্ত্রণ

* রামেশ্বর ভট্ট তুকারামের জ্ঞতি বিষয়ক যে কয়েকটি অভঙ্গ রচনা করিয়াছেন তাহাতে এই রূপ ভাব ব্যক্ত হইয়াছে।

স্বীকার করিলেন না—তিনি সেই সকল সরঞ্জাম ফিরাইয়া দিয়া
শিবাজী ও তাঁহার মন্ত্রীগণকে এক উপদেশপূর্ণ ছন্দোময় পত্র
লেখেন তাহা নিম্নে অনুবাদিত হইল ।

১৮৮৪

ভাল নাহি বাসি ছত্র ঘোটক মশাল,
ইথে কেন জড়াইছ আমারে ভূপাল !
ধন মান আড়ম্বর বড় ঘৃণা করি—
এ বিপদ হোতে মোরে রক্ষা কর হরি !

১৮৮৫

ভাল যা না বাসি তাই চাও সঁপিবারে,
এ সঙ্কটে কেন সদা ফেলিছ আমারে ?
সঙ্গী ও সংসার হতে অতি দূরে থাকি,
কথা নাহি ক'ব আর, রহিব একাকী ।
মান দম্ভ লোকাচার ঘৃণা করি অতি,
এসব তোমারি থাক্ হে পাণ্ডুরি-পতি ।

১৮৮৬

ব্রহ্মা এ ব্রহ্মাণ্ড রাজ্য করিয়া প্রকাশ,
বিচিত্র শক্তির তাঁর করিলা আবাস ।
পত্র প'ড়ে মনে হয় ভক্তি তব দড়,—
সুচতুর, বুদ্ধিমান গুরুভক্ত বড় ।
লোকের ভাগ্যের স্বত্র আছে তব হাতে,
“শিব” এই পুণ্য নাম সেজেছে তোমাতে ।
করি ধ্যান আরাধনা যাগ যজ্ঞ আর,
স্ববশে এনেছ তুমি হৃদয় তোমার ।

সাক্ষাৎ করিতে তুমি চেয়েছ রাজন,
উত্তরে মিনতি মম করহ শ্রবণ ।
হীনগ্রী, অরণ্যবাসী, আসক্তি-বিহীন,
বজ্রাভাবে মলিন-কায়, অশ্রুভাবে ক্ষীণ,
জীর্ণ হস্ত পদ অতি দেখিতে কুৎসিত,
আমারে দেখিয়া তুমি না হইবে প্রীত ।
তুকা বলে “এই মম মনের কামনা,—
মোরে দেখিবার কথা বোলোনা বোলোনা ।”

১৮৮৭

আমি যে তোমারে করি এতেক মিনতি,
জানিহ হরির রূপা আছে তোমা প্রতি ।
পাণ্ডুরঙ্গ পদে যার মন আছে লীন,
নহে সে রূপার পাত্র নহে দীন হীন ।
পাণ্ডুরঙ্গ রক্ষাকর্তা সহায় আমার,
ছাড়ি তাঁরে অন্য কারে নাহি মানি আর ।
তোমারে দেখিয়া তবে কি হইবে ফল,
সংসার বাসনা যবে ছেড়েছি সকল ।
বিসর্জন করি দিয়া সব বাসনায়
পেয়েছি নিবৃত্তি-গ্রাম অন্ন খাজনায় ।
পতিব্রতা যেই প্রেম রাখে পতি পরে
মন মোর সেই মত বিঠোবার তরে ।
বিষ্ঠলি সমস্ত বিশ্ব আর কিছু নাই,
তোমার মধ্যেও তাঁরে দেখিবারে পাই ।
তোমারে বিষ্ঠল আমি করিতাম জ্ঞান,
অস্তরায় হল তায় তব পত্রধান ।

রামদাস রয়েছেন সদৃশ অতি,
 মনস্থির এক মাত্র কর তাঁর প্রতি ।
 মন যদি ধায় তব ভিন্ন ভিন্ন দিশে,
 তাঁর পরে ভক্তি তবে স্থির হবে কিসে ।
 তুকা কহে "গুন ওগো বৃদ্ধির আগার !
 ভক্তি এক মাত্র হয় ভক্তের উদ্ধার ।"

১৮৮৮

যাইয়া তোমার কাছে কি হবে আমার,
 মিছামিছি কষ্ট শুধু হইবেক সার ।
 খাবার অভাব হয় খাব ভিক্ষা কোরে,
 বস্ত্র চাই ছিন্ন বস্ত্র আছে পথে পোড়ে ।
 শয্যা মোর পোড়ে আছে পথের পাশে,
 আকাশেরে বস্ত্র করি, করি পরিধান ।
 বল তবে আর করি কিসের প্রত্যাশ,
 বাসনা সে জীবনেরে করে শুধু দ্বাস ।
 রাজার প্রাসাদে যায় মানের আশায়,
 কহ দেখি মোরে, সেথা শাস্তি পাওয়া যায় ?
 মহতেরই তরে শুধু রাজার আশ্রয়,
 ক্ষুদ্র যে তাচার সেথা মান্য নাহি হয় ।
 বসন ভূষণ আদি আভরণ যত
 দেখা সে আমার পক্ষে মরণের মত ।
 এই কথা শুনি তব ঘোষ যদি হয়,
 তব হরি মোর পরে র'বেন সদয় ।
 হীনত্ব না ঘৃণে করি যজ্ঞ উপবাস,
 যত দিন মন রহে বাসনার দাস ।

ভুকা কহে লোক মাঝে তোমাদের মান,—
আমরা যে হরি-ভক্ত—দৈব-ভাগ্যবান ।

১৮৮৯

এই এক মাত্র যোগ করিও সাধন,
যাহা ভাল তাহা ঘৃণা কোরোনা কখন ।
যে কাজ করিলে হয় দোষ সংঘটন,
এমন কাজেতে মন দিওনা কখন ।
হুর্জন নিম্নকে যদি করে যুক্তি দান,
তাদের কথায় কভু দিয়োনাক' কান ।
রাজ্যের রক্ষক কেবা করিও নির্দ্বার,
পরীক্ষা তাদের করি বিচার অবিচার ।
কি জানাব রাজা তুমি জানিছ সকল,
শরণ লভয়ে যেন অনাপ হুর্জল ।
এই যে মিনতি মোর রাখ যদি মনে,
সম্ভট হইব তাহে কি ফল দর্শনে ।
কি সন্তোষ হবে বল সাক্ষাৎ হইলে,
দিন দিন আয়ুষ্কীর্ণ, কবে যাবে চ'লে ।
হুই এক কাজ মাত্র সার বোলে জানি,
আপনার ভ্রমে আমি রহিব আপনি ।
এই এক সার কথা জানহ কল্যাণ,
একই আত্মা সর্ব ভূতে রহেন সমান ।
আত্মারাম নিরঞ্জে রাখ সদা মন,
পূজ্য গুরু রামদাসে দেখহ আপন ।
ভুকা কহে “ধন্য ধন্য ভূমিহে ভূপতি—
ত্রিলোক ব্যাপিয়া রহে তব কীর্তি ভাতি ।”

১৮৯০

চতুর মান রক্ষক তুমি প্রতিনিধি,*

স্বত্বগুণনিধি তোমা করেছেন বিধি।

শুনহে মজুমদার লেখনী-নিপুণ

জানিবে পত্রের তুমি যত গুণাগুণ।

* সমস্ত রাজকার্য্য নির্বাহ করিবার জন্য শিবাজী আটজন কৰ্ম্মচারী নিযুক্ত করিয়াছিলেন।

পেশোয়া অর্থাৎ প্রধান মন্ত্রী। মোরেশ্বর ত্রিম্বল পিংলে (ডাকনাম মোরোপন্থ) শিবাজীর পেশোয়া ছিলেন।

মজুমদার।—ইনি রাজস্ব বিভাগের কৰ্ম্মচারী—ইহঁকে সমস্ত হিসাব-পত্র তদারক করিতে হইত, সুতরাং ইহঁার কার্য্যভার অতিশয় গুরুতর ছিল। কল্যাণী প্রদেশের সুবেদার আবাজী সোনদেও শিবাজীর মজুমদার ছিলেন।

সুগাঁস।—ইনি দফ্তরদার ও পত্রব্যবহার (Correspondence) বিভাগের কৰ্ত্তা। ইহঁাকে সমস্ত চিঠি পত্র দেখিতে শুনিতে হইত। সমস্ত দলিল দস্তাবেজ ইহঁার খাতায় লেখা থাকিত। ইনি পরীক্ষা করিয়া দেখিয়া দিলে তবে সে সমস্ত মঞ্জুর হইত। আনাজি দস্তো শিবাজীর সুগাঁস ছিলেন।

বান্ধানীস্—এই কৰ্ম্মচারীকে শিবাজীর নিজের দৈনিক বিবরণ ও চিঠি পত্র রাখিতে হইত। শিবাজীর গৃহরক্ষক সৈন্যদল ও গার্হস্থ্য সমস্ত ব্যাপারের তত্ত্বাবধান-ভার ইহঁার উপর। এই কাজে দস্তোজি পন্থ নিযুক্ত ছিলেন।

সর্ণোবৎ। অঝারোহী সৈন্যের অধ্যক্ষ ও ইয়েমজি কক পদাতিক দলের অধ্যক্ষ ছিলেন।

ডবীর—বৈদেশিক রাজকৰ্ম্মচারী। বিদেশীয় দূতগণের অভ্যর্থনা ও বিদেশীয় অপরাপর রাজকার্য্যের ইনি তদারক করিতেন। সোমনাথ পন্থ শিবাজীর ডবীর ছিলেন।

ন্যায়াধীশ অর্থাৎ বিচারপতি। নীরাজি রাওজি এবং গোমাজি নায়ক ন্যায়াধীশ ছিলেন।

ন্যায়শাস্ত্রী—স্মৃতি ও অন্যান্য শাস্ত্রের ব্যাখ্যা-কৰ্ত্তা। ধর্ম্ম, দণ্ড, বিজ্ঞান ও রাজ্য সন্থকীয় জ্যোতিষী গণনার ভার ইহঁার উপর ছিল। প্রথমে শঙ্কু উপাধ্যায়—পরে রঘুনাথ পন্থ শিবাজীর ন্যায়শাস্ত্রী হন।

পেশোয়া, স্ত্রীস, আর চিট্‌ নিস্‌, ডবীর,
রাজাজ্ঞা স্তম্ভ আর সেনাপতি বীর ।
তুমি হে পণ্ডিত রায় ভূষণ সভার,
বৈদ্যরাজ আদি সবে জান নমস্কার ।
তোমরা পত্রের অর্থ জানিয়ে অস্ত্রে,
বিচার-করিয়া তাহা বল নৃপতিরে ।
সাঙ্খিক প্রণয়ভরা দৃষ্টান্তের কথা,
যা কতিমু যেন তার না হয় অন্যথা ।
মহারাজে যথাস্থিত দিও এ সন্দেশ,
বাক্যের স্বরূপ অর্থ ক'য়ো সবিশেষ ।
ভয়ে ভয়ে বুঝাও হে যদি বিপরীত,
তাহা হ'লে তোমাদের হইবে অহিত ।
তুকা কহে “নমস্কার অপিকারিগণ—
জানাইবে মহারাজে, এই নিবেদন।”

ন্যায়াদীশ এবং ন্যায়শাস্ত্রী ব্যতীত উক্ত প্রত্যেক কন্মচারীকেই সেনা-নাগকতা করিতে হইত, এই জন্য সন্দেহ তাঁহারা নিজ নিজ কর্তব্য কাজে মনোযোগ দিতে পারিতেননা । এই হেতু তাঁহাদের প্রত্যেকের এক এক জন কারবারী অর্থাৎ সহকারী ছিল । প্রত্যেক বিভাগের প্রধান কন্মচারীর অধীনে আট জন কনিষ্ঠ কন্মচারী নিযুক্ত থাকিত । তাহাদের নাম—

- ১ দেওয়ান অথবা কারবারী ।
- ২ মজুমদার—হিসাব পত্র পর্যবেক্ষক ।
- ৩ ফর্ণবীস—ডেপুটি হিসাব-তদারককর্ত্তা ।
- ৪ সব্বনিস্—দফতরদার ।
- ৫ কর্কনিস (Commissary)
- ৬ চিটনিস—পত্র-ব্যবহার সম্পাদক ।
- ৭ জামদার—নগদ টাকা ভিন্ন আর সকল মূল্যবান সামগ্রী ইহার হস্তে থাকিত ।
- ৮ পোটনিস—খাতাশি ।

তুকারামের পত্র পাঠে শিবাজী কিছুমাত্র বিরক্ত না হইয়া বরং সম্ভবতঃই হইয়াছিলেন—এমন কি, তিনি নিজে সেই সাধুর আলয়ে গিয়া তাঁহার দর্শনেচ্ছু হইলেন। তখন তুকারাম দেহের নিকটবর্তী লোহ গ্রামে বাস করিতেছিলেন—মহারাজ স্বয়ং তথায় উপস্থিত হইয়া বহুমূল্য মণিমাণিক্য রত্নাদি আনিয়া তাঁহাকে উপহার দেন কিন্তু তুকারাম সে সমুদয় তুচ্ছ করিয়া ফেলিয়া দিলেন—বলিলেন “মহারাজ, রজত কাঞ্চন আমার চক্ষে মৃত্তিকা-সমান—এ সকল বস্তুতে আমার লোভ হয় না। আমাদের মোহ ও আশার অন্ত হইয়াছে—আমি হরির দাস, হরিই আমার আশ। মহারাজ, তুমি ভগবদ্রক্ত হইয়া প্রজাপালনে নিযুক্ত থাক, তাহা হইলে আমি কৃতার্থ হইব।”

শিবাজী তুকারামের নিম্পৃহতা ও দেবভক্তি দেখিয়া চমৎকৃত হইলেন। মহীপতি বলেন যে, মহারাজা তুকারামের সাধু দৃষ্টান্ত ও সংসর্গগুণে সংসারের প্রতি এরূপ বীতরাগ হইয়াছিলেন যে তিনি রাজকার্য্য পরিত্যাগ করিয়া অরণ্যবাসে কালযাপন করিতে লাগিলেন। শিবাজীর মাতাঠাকুরাণী জিজ্ঞাবাই এই বৃত্তান্ত শ্রবণ করিবামাত্র ব্যাকুল অন্তরে তুকারামের নিকট গমন করিয়া আপনার একটী মাত্র পুত্রকে সত্বপদেশ দ্বারা সংসারে ফিরাইয়া আনিবার জন্য বিস্তর মিনতি করিলেন। তুকারাম কহিলেন “ভয় নাই, তোমার মনস্কামনা পূর্ণ হইবে।” রাত্রিকালে সংকীৰ্ত্তনের সময় শিবাজী রাজা সমাগত হইলে অবসর বুঝিয়া তুকারাম তাঁহাকে উপদেশ দিলেন যে, যাহার যে ধর্ম্ম

তাহা পালন করা তাহার কর্তব্য—তদ্বিন্ন পরিব্রাণের অন্য উপায় নাই । তিনি বলিলেন ক্ষত্রিয়ের ধর্ম্মই প্রজাপালন, তাহা ছাড়িয়া মহারাজের সম্যাস-ধর্ম্ম অবলম্বন করা কখনই উচিত নহে । এই উপদেশ পাইয়া শিবাজীর বিষয়-বৈরাগ্য দূর হইল এবং তিনি তাঁহার মাতার সঙ্গে স্বরাজ্যে প্রত্যাগমন করিলেন ।

অনন্তর শিবাজী তুকারামের সহিত একবার পুণায় গিয়া সাক্ষাৎ করেন । তথায় এক দিন তিনি তুকারামের কথকতা শ্রবণ করিতেছেন এমন সময় চাকন-ভূর্গ-রক্ষক এক জন মুসলমান সরদার তাহার সন্ধান পাইয়া তাঁহাকে ধরিবার জন্য এক দল পাঠান সৈন্য প্রেরণ করেন । মুসলমান-ইতিহাসে এই রূপ কথিত আছে যে পাঠানেরা আসিয়া একত্রিত লোকের মধ্যে কে শিবাজী তাহা চিনিতে পারে নাই । শ্রোতৃবর্গের মধ্যে কোন এক জন লোককে পলায়নোদ্যত দেখিয়া শিবাজী-অনুमानে শত্রুদল তাহার পশ্চাতে ধাবমান হয় । এই অবসরে শিবাজী তথা হইতে অপসরণ পূর্বক তাঁহার সিংহগড় ভূর্গে গিয়া উপস্থিত হন । হিন্দুদিগের বিশ্বাস এই যে, তুকারামের পুণ্য ও প্রার্থনাবলে শিবাজী শত্রুর চক্রান্ত হইতে রক্ষা পান ।

তৃতীয় পরিচ্ছেদ ।

তুকারামের জীবন-বৃত্তান্ত লিখিবার এক সুবিধা এই যে, তাঁহার জীবনের অনেক গুলি ঘটনা তাঁহার স্বরচিত কবিতাবলীর মধ্যেই প্রাপ্ত হওয়া যায় । তিনি স্বকীয় জীবনচরিত নিজ হস্তেই

এক প্রকার লিখিয়া রাখিয়াছেন, কেবল উপযুক্ত বিষয় সকল বাছিয়া লইলেই হইল । ভুকারাম শত্রুর সহিত মিত্রবৎ আচরণ করিয়া কিরূপে ক্রোধ জয় করিয়াছিলেন তাহা আমরা দেখাইয়াছি—শিবাজীর নিমন্ত্রণ অগ্রাহ্য করিয়া তিনি আপনাকে নির্যোভ বলিয়া পরিচয় দিয়াছেন,—স্বর্জয় কামরিপু তাহাকে আক্রমণ করিতে ক্রটি করে নাই, কিন্তু সে সংগ্রামেও তিনি জয়ী হইয়াছিলেন, তাহার অভঙ্গেই তাহার নিদর্শন পাওয়া যায় । একটী তরুণবয়স্কা রূপবতী রমণী তাহার প্রতি আসক্ত হইয়াছিল । এক দিন বিরলে সে আপনার মনোগত অভিপ্রায় প্রকাশ করাতে ভুকারাম যে উত্তর দেন তাহা এই দুই অভঙ্গে দৃষ্ট হইবে—

স্বীকৃত চাহি না দেব শুক তরু এ দে —

এ পাবণ দেহ, তাহে স্বীকৃত কি দাজে ?

ভজন সাধন তাহে সব দুরে যায় ।

লালসা মজ্জলে পরে রক্ষা পাওয়া যায় ।

তাকানো সে মুখপানে দৃষ্টির সমান ।

কামিনী-লাবণ্য যেন ছুঃখের নিদান ।

তুকা কহে “সাপু হয় যদিও আগুণ—

কাছে গেলে দহিবে সে, এই তার গুণ ।”

৫২৪

পরস্মীকে দেবপত্নী কল্পিণী সমান—

এ দড় বিশ্বাস মোর, ইথে নহে আন ।

যাও মা কি দিব তোরে কিবা মোর আছে,

নিষ্কদাস আমরা গো কেন কষ্ট মিছে ?

এ তব হৃদশা হেরি হৃদি দহে হৃথে,
 ছি ছি ছি ওকথা আর আনিও না মুখে ।
 তুকা কহে “হে সুন্দরি, পতি যদি চাও,
 প্রণয়ী কতই পাবে, কেন তবে আমারে মজাও ।”

তুকারামের চৌদ্দ জন শিষ্য ছিল—তাহাদের মধ্যে অনেকেই রামেশ্বর ভট্টের ন্যায় প্রথমে তাঁহার বিদ্যেবী, অবশেষে তাঁহারে গুরুরূপে গ্রহণ করিয়া তাঁহার পদানত হইয়াছিল। এই শিষ্যবর্গের মধ্যে শিবাজী নামে লোহগ্রামবাসী এক জন কাংস্যকার ছিল। এই রূপ কথিত আছে যে, সে অত্যন্ত রূপণ ও তুকারামের একজন দ্রোহী ছিল, কিন্তু কালক্রমে সে এরূপ তুকাভক্ত হইল যে, সকল কাজকর্ম ছাড়িয়া সেই মধুর সহবাসে দিনপাত করাই তাহার এক মাত্র ব্যবসায় হইল। কাংস্যকারের স্ত্রী স্বীয় পতির এইরূপ ভাব পরিবর্তনে রুষ্ট হইয়া তুকারামকে এই অনিষ্টের প্রতিশোধ দিতে কৃতনিশ্চয় হইল। সে এক দিন তুকারামকে নিমন্ত্রণ পূর্বক আপনার গৃহে আনাইয়া স্নানের সময় এমন উষ্ণজল তাঁহার গাত্রে ঢালিয়া দিল যে তাহাতে তাঁহার সর্বশরীর দগ্ধ হইয়া গেল, এবং তিনি জ্বালা নিবারণের জন্য কাতর স্বরে বিঠোবার স্তুতি আরম্ভ করিলেন। এই অগ্নিপরীক্ষাকালে তুকারামের অসামান্য ধৈর্য ও সহিষ্ণুতা দেখিয়া কাংস্যকারপত্নীর কঠিন হৃদয়ও দ্রবীভূত হইল, এবং সেও তাহার পতির অনুবর্তিনী হইয়া তুকারামের সেবায় নিযুক্ত হইল।

তুকারামের প্রতি সময়ে সময়ে যে এই রূপ কত অত্যাচার আচরিত হইত, তাহার অসংখ্য উদাহরণ দৃষ্ট হয়, কিন্তু প্রায়ই অত্যাচারকারী দুষ্কদিগের অভীষ্ট সিদ্ধিতে কোন না কোন ব্যাঘাত জন্মিয়াছে। এক দিন তুকারামের সঙ্কীর্তন শুনিতে দুই জন পণ্ডিতাভিমानी সম্মাসী উপস্থিত হইলেন। তুকারামের হরিনামকীর্তন তাঁহাদের রুচিকর হয় নাই—তাঁহারা রোমপরবশ হইয়া মহারাজ শিবাজীর শিক্ষক * পৃণার দাদোজী কোণ্ডদেবের নিকট তুকার বিরুদ্ধে এই বলিয়া অভিযোগ উপস্থিত করিলেন যে দেখুন তুকারাম শূদ্র হইয়া বেদোক্ত কশ্মকাণ্ডের উচ্ছেদ সাধনে প্রবৃত্ত হইয়াছে—অজ্ঞ ভাবুক জনেরা তাহার উপদেশে মুগ্ধ হইয়া ধর্ম্মভ্রষ্ট হইতেছে, ব্রাহ্মণেরাও শূদ্রের পদে প্রণিপাত করিতে সঙ্কুচিত হইতেছে না, এ কি অন্যায় কথা—এখন

* দাদোজী কোণ্ডদেব মহারাষ্ট্রপতি শিবাজীর পিতা সাহাজীর একজন বিশ্বাসী ভৃত্য ও সূদক্ষ রেবেনিউ কর্মচারী ছিলেন। শিবাজী লিখন পঠনে কখনই নিপুণতা লাভ করেন নাই, এমন কি, তিনি নাম স্বাক্ষর পধ্যস্ত করিতেও অক্ষম ছিলেন। কিন্তু ধর্ম্মবিদ্যা, বল্লম চালনা, তলবার খেলা, অশ্বারোহণ প্রভৃতি ব্যাঘাম কার্যে তিনি বিলক্ষণ কৃতবিদ্য হইয়াছিলেন। তাঁহার শিক্ষকের তদাবধানে তিনি রাজকার্য্য ও শাস্ত্রোক্ত আচার ব্যবহারে কুশলতা লাভ করিয়াছিলেন। রামায়ণ মহাভারত ও পৌরাণিক ইতিহাসে তাঁহার বিশেষ উৎসাহ ও আনন্দ জন্মিত, এবং তিনি কথকতার অত্যন্ত প্রিয় ছিলেন, এমন কি, তাঁহার রাজস্ব প্রতিষ্ঠিত হইবার অনেক পরে একবার তুকারামের কথা শুনিতে গিয়া তিনি যে সমুদ্র বিপদে পড়িয়াছিলেন তাহা পূর্ণভাবে বর্ণিত হইয়াছে। দাদোজীর মৃত্যুর কএক দিন পূর্বে তিনি শিবাজীকে ডাকাইয়া তাঁহার রাজ্যের স্বাধীনতা সংস্থাপন—গো ব্রাহ্মণাদি রক্ষণ, প্রজাপালন ইত্যাদি বিষয়ের উপদেশ দেন—শিবাজীর জীবন ও চরিত্রে যে সে উপদেশের ফল ফলিয়াছিল ইহা নিঃসন্দেহ বলা যাইতে পারে।

তাহাকে ডাকাইয়া আনিয়া ইহার সমুচিত দণ্ডবিধান করুন । দাদোজী বিজ্ঞ ও চতুর ছিলেন ; তিনি ঐ দুই সন্ন্যাসীকে বলিলেন আপনারা তাঁহার সহিত শাস্ত্রালাপ করিয়া যদি বাদানুবাদে তাঁহাকে পরাস্ত করিতে পারেন তাহা হইলেই তাঁহার উচিত শাস্তি হইবে । এই বলিয়া তুকারামকে পূণ্য নিমন্ত্রণ করিয়া আনাইলেন । অনেক ব্রাহ্মণ পণ্ডিত একত্রিত হইলেন । সকলেই তাঁহাকে সমাদর সহকারে অভ্যর্থনা করিল । দাদোজী সন্ন্যাসীদের কথা না মানিয়া তুকারামের সহিত সাক্ষাৎ করত তাঁহাকে আদরের সহিত নগরে লইয়া আইলেন । তথায় সংকীৰ্ত্তন আরম্ভ হইল । সন্ন্যাসীরা কীর্তনে উপস্থিত ছিলেন । তাঁহারা তুকার ভাব ও ভক্তি দর্শনে প্রীত হইয়া অনুতপ্ত হৃদয়ে তাঁহার প্রতি অনুরক্ত হইলেন এবং দাদোজী তাঁহাদিগকে তীব্র তিরস্কাররূপ দক্ষিণা দিয়া বিদায় করিয়া দিলেন ।

ধর্মোপদেশাদিগের একটা রোগ এই যে প্রথম প্রথম তাঁহারা এক ভাবে ধর্মোপদেশ আরম্ভ করেন । কালসহকারে তাঁহাদের স্বর্গীয় ভাবের সহিত পৃথিবীর ধূলি মিশ্রিত হইয়া তাঁহাদের ভাব-পরিবর্তন লক্ষিত হয় । পৃথিবীর নামাক্তিত ধর্মনেতাদের জীবন-বৃত্ত পাঠে যতদূর জানা যায় তাহাতে এই দৃষ্ট হয় যে, প্রথমে তাঁহারা নিঃস্বার্থভাবে ঈশ্বরের প্রতি লক্ষ্য করিয়া ধর্মপ্রচারে ব্রতী হন, ক্রমে যেমন তাঁহাদের খ্যাতি প্রতিপত্তি বিস্তার হয় ও শিষ্যসংখ্যা বর্দ্ধিত হয়, তেমনি তাঁহারা তাঁহাদের উচ্চ লক্ষ্য হইতে ভ্রষ্ট হইয়া লোকদিগকেও বিপথগামী করিতে প্রবৃত্ত

হন। তাঁহাদের দৃষ্টি আপনার প্রতি নিপতিত হয়—তাঁহাদের অনুরাগপূর্ণ সরল চিত্তে অল্পে অল্পে ধূর্ততা ও ভণ্ডামি প্রবেশ করে—ঈশ্বরের সিংহাসন তাঁহারা নিজে অধিকার করিতে উদ্যত হন—ঈশ্বর হইতে লোকের হৃদয়-মন কাড়িয়া লইয়া আপনার দিকে তাহা আকৃষ্ট করিতে সচেষ্টিত হন। ধর্ম ও ঈশ্বরের নাম করিয়া আত্ম গৌরব বর্দ্ধন করা তাঁহাদের উদ্দেশ্য হইয়া উঠে! এই উদ্দেশ্য-সিদ্ধির নিমিত্তে নানা প্রকার প্রকৃতি-বহির্ভূত ঐন্দ্রজালিক ব্যাপার প্রদর্শন দ্বারা লোক সকলকে চমকিত করা তাঁহাদের এক প্রধান কার্য্য হইয়া উঠে। মৃককে বাচাল করা—অন্ধকে চক্ষুদান—ব্যাধিগ্রস্তকে আরোগ্য প্রদান—মৃত শরীরে প্রাণদান ইত্যাদি অদ্ভুত ক্রিয়ার অনুষ্ঠানচলে আপনাদিগকে ঈশ্বরের দূত অথবা ঈশ্বরের অবতার বলিয়া প্রতিপন্ন করিবার চেষ্টা করেন। পরে ইহাদের দেহত্যাগানন্তর মৃত্যুর ছায়াতে ইহাদের জীবনের ক্ষুদ্র ভাব, ক্ষুদ্র লক্ষ্য, ক্ষুদ্র কার্য্য ও একরূপ দাঁড়াবার ধারণা করে যে, শিষ্যবর্গ মিলিয়া মোহাবেশে অনায়াসে ইহাদিগকে দেবত্বে প্রতিষ্ঠিত করিয়া লন। এইরূপ পৃথিবীতে কত অবতারের সৃষ্টি হইয়াছে। বাহারা পবিত্র-চরিত্র প্রকৃত সাধুপুরুষ, তাঁহারা জানিয়া শুনিয়া এইরূপ ভণ্ডামি করিতে প্রবৃত্ত হইবেন এমন সম্ভবে না, কিন্তু যিনি যাহা বলুন—মানুষ দুর্ব্বল-হৃদয় অপূর্ণ জীব, তিনি প্রকৃত সাধু হইলেও লোকের শ্রদ্ধা অনুরাগ ও পূজা পাইলে মোহবশতঃ তাঁহার মস্তকও অনেক সময় ঘূর্ণিত হইবে তাহাতে বিচিত্র কি? এক্ষণে

জিজ্ঞাস্য এই, তুকারাম আপনাকে এইরূপ ঐশী শক্তি-সম্পন্ন জ্ঞান করিতেন কি না ? তাঁহার শিষ্যেরা তাঁহাকে অলৌকিক ক্ষমতাসম্পন্ন দেবতার অবতার বিশেষ জ্ঞান করিতেন, মহীপতি-রচিত তুকার জীবনবৃত্তে তাহার বহুতর নিদর্শন পাওয়া যায় । তুকারামের নিজের লেখায় তাঁহার দেবশক্তির কথার তাদৃশ উল্লেখ নাই—কিন্তু একেবারে নাই তাহা বলা যায় না । তুকারাম যে তাঁহার নিজের অলৌকিক শক্তিতে বিশ্বাস করিতেন না তাহা বোধ হয় না—তৎকালে ওরূপ বিশ্বাস না হওয়াই আশ্চর্য্য । বিঠোবার উপর তাঁহার পূর্ণ বিশ্বাস ছিল ও তিনি তাঁহার জীবনের সামান্য ঘটনাতেও ঈশ্বরের আদেশ দেখিতে পাইতেন—ইহার দৃষ্টান্ত তাঁহার অভঙ্গে অনেক পাওয়া যায় । স্বপ্নে তাঁহার ধর্ম্মদীক্ষা ও স্বপ্ন হইতে তাঁহার সরস্বতীর প্রসাদ উপলব্ধি হয় । নদী হইতে তাঁহার গ্রন্থোদ্ধার প্রভৃতি কএকটা ঘটনা কতকটা অলৌকিক বলিলেও বলা যাইতে পারে । তুকারাম যে ঘটনা বিশেষে ঈশ্বরের সাক্ষাৎ কর্তৃত্ব স্বীকার করিতেন তাহার স্পষ্টতর প্রমাণ তাঁহার অভঙ্গের আরো দুই এক স্থলে দৃষ্ট হয় । একটী অভঙ্গে একটী মৃত শিশুকে জীবন দানের কথা উল্লেখ আছে । মহীপতি এ ঘটনাটি এইরূপ বর্ণনা করিয়াছেন ।—

লোহগ্রামে সঙ্কীর্ভন হইতেছিল, এমন সময়ে একটি স্ত্রীলোক আপনার শিশুর মৃতদেহ আনিয়া তুকারামের সম্মুখে নিক্ষেপ করিয়া বলিল, তুমি যদি বাপু যথার্থই বিষ্ণুভক্ত হও তবে আমার

এই ছেলেটিকে বাঁচাইতে পারিবে । তুকারাম তৎক্ষণাৎ একটি অভঙ্গ রচনা করিয়া নারায়ণের স্তব করিলেন, সকলে দেখিয়া অবাক্—শিশুটি সজীব হইয়া উঠিল ।

সে অভঙ্গ এই—

২৩১৫

অচিন্ত্য তোমার শক্তি ওহে নারায়ণ,
নিজীবে করিতে পার তুমি সচেতন ।
তোমার অদ্বুত লীলা আগে শুনা গেছে,
প্রত্যক্ষ কেননা হবে আমাদের কাছে ।
কি সৌভাগ্য আমাদের তুমি প্রভু হবে,
আমরা তোমার দাস কি অভাব তবে ?
রূপাময় তুকার হে রাখ এ মিনতি
প্রকাশো এখনি তব অদ্বুত শক্তি ।

আর একটা ঘটনা এই । চিন্তামণিদেব নামক এক পূজারী ব্রাহ্মণ দেহুর অনতিদূর চিঞ্চবাদ গ্রামে বাস করিতেন । তুকা তাঁহার নিমন্ত্রণ পাইয়া তাঁহার সহিত সাক্ষাৎ করিতে যান । চিন্তামণিদেব তাঁহাকে যথেষ্ট অভ্যর্থনা করিয়া তাঁহার সহিত ভোজন করিতে বসেন । ভোজনের সময় তুকার আসন এক স্বতন্ত্র পংক্তিতে স্থাপিত হয় । ইহাতে তুকারাম ক্ষুব্ধ না হইয়া প্রস্তাব করেন, এই ভোজে গণেশ ঠাকুরের জন্য এক আসন পাতিয়া তাঁহাকে আহ্বান কর । চিন্তামণি উত্তর করিলেন দেবতাকে কিরূপে এই ভোজে আনয়ন করিবেন, এ ত আমার সাধ্য নয় । তুকারাম দুইটি আসন ও দুই পাত্র রাখিতে বলিয়া

গণেশ ও বিঠোবাকে আহ্বান করিলেন । তাঁহার আহ্বানে দেবতারা আসিয়া তাঁহাদের নির্দিষ্ট আসনে উপবিষ্ট হইলেন । মহীপতি বলেন তুকা আর চিন্তামণি ভিন্ন অপর কেহ দেবতাদের দর্শন পায় নাই—তাঁহারা কেবল দেখিতে পাইলেন যে ভোজ্য-পূর্ণ পাত্র ক্রমে আপনাপনি শূন্য হইয়া আসিতেছে ।

এই বিষয়ক অভঙ্গ—

২৮৮২

ওহে চিন্তামণিদেব করি নিবেদন,
গণেশ ঠাকুরে কর ভোজে নিমন্ত্রণ ।
দেব কহে ‘ওহে তুকা কি সাধ্য আমার,
গ্রাসিয়াছে দেখ মোরে ঘোর অহঙ্কার ।
প্রস্তুত হয়েছে অন্ন ভুড়াইয়া যায়—
ব্রাহ্মণেরা সমাগত জলিছে ক্ষুধায় ।’
তুকা কহে ‘তব পুণ্যে আনিব গণেশে,
“স্থির হও ধৈর্য্য ধর, দেখহ নিমেষে ।”

১৫৭১ শকে তুকারামের মৃত্যু হয় । তাঁহার মৃত্যু-বিষয়ে প্রবাদ এই যে তিনি বিষ্ণুর পুষ্পক রথে আরোহণ করিয়া সশরীরে স্বর্গারোহণ করিয়াছিলেন । মহীপতি বলেন যে তুকারামের অন্তর্ধানের কিছুকাল পূর্ব হইতে তিনি কথায় কথায় বৈকুণ্ঠ যাইবার অভিলাষ প্রকাশ করিতেন । তাঁহার শিষ্যদের প্রতি তাঁহার শেষ উপদেশ এই—

২৪৬০

গুন গুন যারা হরি ভক্ত,
রয়েছ এখানে ভাবুক যত,

তার্কিক সঙ্গ ছাড়িয়া দেও,
 বিঠোবা চরণ ধরিয়া রও ।
 মতের চক্রে ভ্রমিও না আর,
 ডুবিলে নরকে কহিছু সার ।
 কলির মাঝে তুকারাম দাস,
 বিদায় লইয়ে যান নিজ বাস ।

উপদেশ সমাপ্ত হইলে তাঁহার স্ত্রীকে বলিয়া পাঠাইলেন “আমি বৈকুণ্ঠে চলিলাম তুমি আমার সঙ্গে আসিতে চাও ত এস ।” তাঁহার স্ত্রী ও কথায় বিশেষ মনোযোগ না দিয়া উত্তর করিলেন “আমার পাঁচ মাস গর্ভ, ছোট ছোট ছেলে, ঘরে গরু বাছুর, সংসারধর্ম ছেড়ে এখন তোমার সঙ্গে কেমন করে যাই বল দেখি ।” তুকারাম মন্দির হইতে বাহির হইয়া চতুর্দশ শিষ্যের সহিত ইন্দ্রায়ণীর তীরে আসিয়া সঙ্কীর্তন আরম্ভ করিলেন । কীর্তন শেষ হইলে তুকার জন্ম আকাশ হইতে পুষ্পক বিমান অবতীর্ণ হইল—তুকারাম দেবতাদের সঙ্গে রথারূঢ় হইয়া অদৃশ্য হইলেন । চতুর্দিক হইতে জয়ধ্বনি উথিত হইল । মহীপতির গ্রন্থে এইরূপ বর্ণিত আছে ও ইহার আভাস তুকারামের কয়েকটি অভঙ্গে লক্ষিত হয় । কিন্তু তুকারামের অভঙ্গ যে সকল পুস্তকরূপে সংগৃহীত হইয়াছে তাহাতে গদ্যে এইরূপ লিখিত আছে যে “১৫৭১ শকে ফাল্গুন মাসের কৃষ্ণপক্ষের দ্বিতীয়া প্রাতঃকালে তুকারাম অদৃশ্য হন ।” দেখিতে নদী হইতে উদ্ধৃত যে গ্রন্থখানি তুকার বংশজ মধ্যে অদ্যাপি বিদ্যমান আছে তাহাতে তুকারামের মৃত্যু বিষয়ে এইমাত্র লিখিত আছে যে ১৫৭১ শকে

বিরোধীনাম সংবৎসরে সীমগা (ফাল্গুন) বদ্য (কৃষ্ণপক্ষ) দ্বিতীয়া, বার সোমবার তে দিবসী” প্রাতঃকালী” তুকোবানী” তীর্থাস প্রয়াগং কেল—শুভং ভবতু মঙ্গলং” অর্থাৎ ১৫৭১ শকে বিরোধী নাম সংবৎসরে ফাল্গুন কৃষ্ণপক্ষের দ্বিতীয়া সোমবার প্রাতঃকালে তুকারাম তীর্থ প্রয়াগ করিলেন—শুভমস্তু।”

তুকারামের এইরূপ অন্তর্ধান আর আমাদের কবি রামপ্রসাদ সেনের মৃত্যুর মধ্যে কতকটা সাদৃশ্য দেখা যায়।

তুকারামের আসন্ন কালে তাঁহাকে সর্বদাই ধ্যানমগ্ন দেখা যাইত। এই কালের একটা প্রবাদ আছে যে তিনি আলন্দীর মন্দিরে গিয়া দেখিলেন যে মন্দিরের প্রাঙ্গণে এক বৃক্ষতলে এক পাল পক্ষী চরিতেছিল। তাঁহাকে দেখিবামাত্র তাহারা উড়িয়া গেল। ইহা দেখিয়া তিনি বিসাদে মগ্ন হইলেন। তাঁহার মনে হইল যে এখনো আমার মনের মালিন্য অপনীত হয় নাই—এখনো জীবজন্তু আমাকে দেখিয়া শঙ্কিত হয়—যে অবস্থায় প্রাণী মাত্র আমাকে দেখিয়া ভয় পাইবে না আমি এখনো সেই নিকাম শান্তির অবস্থায় উপনীত হইতে পারি নাই। এই ভাবিয়া তিনি সেই বৃক্ষতলে শবের ন্যায় এরূপ নিশ্চেষ্ট ভাবে দাঁড়াইয়া রহিলেন যে বিহঙ্গদল তাঁহাকে অচেতন পদার্থ জ্ঞানে তাঁহার গায়ে আসিয়া উড়িয়া বসিল। তুকারামের এই সময়কার রচনাতে—সংসার মায়াময়—জীবব্রহ্মে অভেদ—এই বৈদান্তিক ভাব প্রকটিত দেখা যায়, এবং তিনি ঈশ্বরে লীন হইয়া সংসার হইতে অপমৃত হইবার ভাব ব্যক্ত করেন।

১৫৯০

সংসারের গায়ে মাখা যভেক ব্যসন,
 বিগুহ্ন হয়েছি চিতে করিয়ে কীর্তন ।
 নিষ্কলঙ্ক দেখি এবে এই ত্রিভুবন—
 ভেদাভেদ জ্ঞান ধুয়ে পেয়েছি চেতন ।
 করিব অখণ্ড এবে ব্রহ্মপুরে বাস,
 যেই স্থানে হয় সব পাপতাপ নাশ ।
 তুকা কহে “ভুলে সবে একান্ত নিরত—
 ব্রহ্মেতেই ব্রহ্মরস ভুঞ্জিব সতত ।”

তুকারামের অন্তর্ধানের চতুর্থ দিবসে তাঁহার বিয়োগক্লিষ্ট শিষ্যগণের নিকট তিনি আপনার স্মৃতিচিহ্ন স্বরূপ এক জোড়া মন্দিরা যাহা সর্বদাই তাঁহার হাতে থাকিত—একখানি বস্ত্র ও কতকগুলি অভঙ্গ প্রেরণ করেন । সেই দিনে দেহবাসিগণ হরি সঙ্কীৰ্তনে—ব্রাহ্মণ ভোজন প্রভৃতি উৎসবের কার্য্য মহা উল্লাসের সহিত অনুষ্ঠান করেন । দেহুতে এইরূপ প্রতি বর্ষে ফাল্গুনের পঞ্চমী ষষ্ঠীতে তুকারামের স্মরণার্থ উৎসবক্রিয়া মহা সমারোহে অনুষ্ঠিত হইয়া থাকে ।

তুকারাম তাঁহার মৃত্যুর অব্যবহিত পূর্বে যে সকল শ্লোকে আপনার অনুগত মণ্ডলী হইতে বিদায় লইয়াছিলেন তাহার কতিপয় শ্লোক নিম্নে উদ্ধৃত হইতেছে—

১

দাও গো বিদায় এবে যাই নিজ গ্রামে,
 এতকাল আছিলাম তোমাদের গ্রামে ।

আর কি কহিব বল মনে রেখো মোরে,
আর না ভ্রমিতে হবে সংসারের ঘোরে ।
বল সবে রামকৃষ্ণ বিষ্ঠালের নাম,
বৈকুণ্ঠে পৃথিবী ছাড়ি যায় তুকারাম ।

২

নিজ গ্রামে নিজ ধামে চলিহু এখন,
বিদায় দিয়েছে মোরে মিলে সাধুগণ ।
মোর সুখ-দুখ-মৰ্ম্ম করেছে গ্রহণ,
রূপাদৃষ্টি আমাপরে আছে বিলক্ষণ ।
সাজায়ে মিষ্টান্ন কত এসেছে লইতে,
বহুদিন পরে স্নাতে প্রবাস হইতে ।
সেই পথে তাকাইয়ে আছি নিশিদিন,
সেই দিকে চিত্ত মোর শঙ্কা ভয়হীন ।
তুকা কহে “আনিতে এসেছে লোক জন,
ডাকিছেন বাপ মায়ে দিতে আলিঙ্গন ।”
শিহরে অঙ্গ পুলক ভরে,

শুভ চিহ্ন সব আমার তরে ।
স্মরেছেন মোরে মা বাপে আহা—
দেখা যাক্ ভাগ্যে আছে কি তাহা ।
উৎকণ্ঠিত অতি হয়েছে হিয়া,
স্বলক্ষণ তাহে দিতেছে কহিয়া ।

তুকা কহে এবে কাজ হল শেষ,
আর কি থাকা যায় এখন বিদেশ ।

৩

বাহিরে ও ঘরে মোর আছ যারা যারা—
এই আশীর্বাদ—সুখে থাকগো তোমরা ।

গুরু পূজ্য লোক মোর রয়েছেন যত,
 প্রগতি তাঁদের মোর জানাইবে শত ।
 মধু অন্বেষণ তরে অলি যায় উড়ে—
 বজ্র ছিন্ন হলে পরে আর কি সে বুড়ে ?
 নদী যবে একবার সাগরেতে মিশে—
 তার সেই স্রোত আর ফিরাইবে কিসে ?
 এই সব কথা গুলি মনে জেনো সার—
 এই যে চলিল তুকা ফিরিবে না আর ।

৪

শঙ্খচক্র ধরি করে আইলেন হরি,
 কিবা শোভে কুণ্ডল মুকুটে আহা মরি ।
 মেঘশ্যামবর্ণ হরি পীতাম্বরধারী,
 কহিছেন ভয় নাই ; আর কিবা ডরি ।
 আমি গেলে সকলে কাঁদিবে উচ্চরবে—
 কিন্তু আর ফিরিব না মনে জেনো সবে ।
 “যে ছিল গ্রামের রত্ন সে ছাড়িল দেহ,
 মোদের সে বার্তা তবু জানালে না কেহ”—
 পাছে এই কথা বল ভয় করি তাই,
 পৃথ্বী ছাড়িবার আগে জানাইবু তাই ।
 লইয়া ধ্বজার বোঝা করি ভেরীরব—
 পণ্ডরী পুরেতে যায় হরিভক্ত সব ।

৫

তুকার পরীক্ষা হইল শেষ,
 বিশ্বয়ে পুরিল সকল দেশ ।

প্রত্যহ দেবতা ভজন গান,
এই মাত্র তার অনুর্তান ।
বসিল তুকা বিমানে চড়ি,
সাধুগণ দেখে নহ্নন ভরি ।
ভক্তি তরে দেব ক্ষুধিত প্রাণ—
তুকারে বৈকুণ্ঠে লইয়া যান ।

এই শেষ চরণের মূল অভঙ্গ পাঠকদিগের কোতূহল উদ্দেকের
জন্য দেওয়া যাইতেছে—

তুকা উত্তরলা তুকী । নবল ঝালৈঁ তিহী লোকী ॥ ১
নিত্য করিতো কীর্ত্তণ । হেঁচি ত্যাচৈঁ অনুর্তান ॥ ২
তুকা বৈসলা বিমানী । সন্ত পাহাতী লোচনী ॥ ৩
দেব ভাবতো ভূকেনা । তুকা বৈকুণ্ঠাসী নেলা ॥ ৪

বোধ হয় এই শ্লোক হইতেই তুকারামের স্বর্গারোহণ কল্পিত
হইয়াছে ।

তুকারামের জীবনরূত্তে যে সকল ঘটনা উল্লিখিত হইয়াছে
তাহাতে তাঁহার ইন্দ্রিয়-নিগ্রহ—বিষয় ত্যাগ—ধৈর্য্য ক্ষমা শান্তি—
তাঁহার অচলা দেবভক্তি প্রকাশ পাইতেছে । তুকারাম যে
বাস্তবিক এক জন ভগবদ্বক্ত সাধু ছিলেন তাহা তাঁহার জীবন-
পুস্তকে স্পষ্ট অক্ষরে লিখিত আছে । তাঁহার বৈরাগ্য কেবল
মুখের নয়—বৈরাগ্যের প্রকৃত অর্থ তাঁহার জীবনে ফলিত হই-
য়াছিল । তিনি স্বেচ্ছাপূর্ব্বক সর্ব্বত্যাগী হইয়া সম্যাসী হই-
য়াছিলেন । দুর্ভিক্ষ ও দারিদ্র্যকষ্টে প্রথমে তাঁহার সংসার
ত্যাগে প্রবৃত্তি জন্মে, কিন্তু পরে যখন তাঁহার যশঃসৌরভ মহা-

রাষ্ট্র মধ্যে বিস্তার পাইল—যখন লক্ষ্মী তাঁহার দ্বারে আসিয়া তাঁহাকে আহ্বান করিলেন, এবং স্বদুর্লভ রাজপ্রসাদ তাঁহার হস্তগত হইল, তখন তিনি সমুদয় প্রলোভন তুচ্ছ করিয়া কহিলেন—এ সকলে আমার কাজ নাই—আমি যে দুই একটা পদার্থ সার বলিয়া জানি তাহাতেই অনুরক্ত থাকিব।—“আপনার ভ্রমে আমি রহিব আপনি” এই নিশ্চয় করিলেন। তিনি পার্থিব ধনমানের প্রার্থী ছিলেন না—রাজ-সন্মান তাঁহার নিকট অকিঞ্চিৎকর বোধ হইত—তিনি জানিতেন “আমরা হরিভক্ত দৈব-ভাগ্যবান্।”

তিনি বলিয়া গিয়াছেন—

১

নম্রতা প্রভুর অমূল দান,
হয় না সহিতে ঈর্ষার বাণ ।
মহা পূরে ভাঙ্গে বৃক্ষের কায়,
কোমল লতিকা বাঁচিয়া যায় ।
সাগর তরঙ্গ আইসে ধেয়ে,
প্রণত হইলে যায় বহিয়ে ।
তুকা কহে দেখ ব্রহ্মস্বের ফল,
পায়ে পড়িলে ত চলে না বল ।

২

দীনতা নম্রতা দেহ গো হরি,
বড়স্বের মোরা ধার না ধারি ।
পিপীলিকা যেই ক্ষুদ্র প্রাণী,
সে পায় মিছরী টুকরা খানি ।

মহারত্ন ঐরাবতে
 জলে অঙ্কুশ আঘাতে।
 মহত যে জন হয়,
 কঠিন যাতনা সর,
 তুকারাম কহে শুন হে সার,
 মৃহ যে যত লঘু ভার তার।

তুকারামের শ্লোকাবলী মহারাষ্ট্রীয় বৈষ্ণবদিগের বেদ বলি-
 লেও অত্যাতি হয় না। কিন্তু শুধু বৈষ্ণবদিগের মধ্যে কেন—
 মহারাষ্ট্র দেশের সাধারণ জনপদের মধ্যে তাঁহার অভঙ্গ প্রখ্যাত
 ও আদরণীয়। তুকারাম যেরূপ ধর্মোপদেষ্টা, ঐহার জীবনে
 জীবন্ত ধর্ম প্রতিভাত ছিল—তিনি যেরূপ কবি, ঐহার লেখায়
 নীতি ও ভক্তি-সুধাপূর্ণ জ্বলন্ত বাক্য সকল আবাল বৃদ্ধবনিতা সক-
 লেরই হৃদয়গ্রাহী, তাঁহার প্রতি অনুরাগ যে কোন সম্প্রদায়-
 বিশেষে বদ্ধ তাহা নহে—তিনি মহারাষ্ট্রদেশের জাতীয় কবি।
 তাঁহার অভঙ্গ ব্রাহ্মণ শূদ্র কথক শ্রাবক সকলেরই মুখে। শিন্দে,
 হোলকর প্রভৃতি রাজপুরুষগণ তুকার অনুযাত্রী বলিয়া পরিচিত,
 ও মাসের মধ্যে নিয়মিত দিবসে সবান্নবে তাঁহার শ্লোক কীর্তন
 করা তাঁহাদের কর্তব্য কর্মের মধ্যে পরিগণিত। নিম্নতর শ্রেণীর
 মধ্যে তীর্থকরীগণ মহা উল্লাসের সহিত তুকার অভঙ্গ গান করিয়া
 থাকেন, তাঁহাদের সংখ্যা অল্প নয়—প্রতি বর্ষে আষাঢ় ও কার্তিক
 মাসে প্রায় লক্ষ লোক বিঠোবা দর্শনে পণ্ডুরীপুর যাত্রা করেন।

ঈশ্বরে ধ্রুব বিশ্বাস ও সেই বিশ্বাসানুযায়ী আচরণ, তুকার

উপদেশের দুই প্রধান অঙ্গ । ভক্তিমার্গকেই তিনি মোক্ষলাভের
প্রকৃত মার্গ জ্ঞান করিতেন । মুখে ধর্মভানকারী অন্তরে ঘোর
বিষয়ী যে সকল লোক কতকগুলি বাহাড়ম্বরকেই ধর্মসাধন
মানিয়া চলেন, তাহাদিগকে তিনি দেখিতে পারিতেন না ।
তিনি বলিয়াছেন—

কথা অতি মিষ্ট আর মন ভাল যার,
নেই বা রহিল গলে ফুলমালা তার ।
আত্মতত্ত্ব জ্ঞান লাভ করেছে যে জন,
নেই বা সে শিরে জটা করিল ধারণ ।
আসক্তি নাহিক যার পরজীর প্রতি,
ভঙ্গ যদি না মাখে সে কি তাহাতে ক্ষতি ।
নিন্দায় যে মুক আর অন্ধ পরধনে,
তুকা কহে সন্ন্যাসী কহিও সেই জনে ।

পুনশ্চ—

কি ফল পুঞ্জিয়ে বল পিতুল পাষণ,
ভাবহীন হয়ে যদি রহিলে অজ্ঞান ।
ভক্তিই মুখকারণ ভক্তিই তারণ,
ভক্তিই শাস্ত্রেতে কহে মোক্ষের সাধন ।
জপমালা কর্ত্তমালা কি করিবে বল—
বিষয়ের জপে যদি মগন কেবল ।
অন্ধরের অভিমানী হইয়ে পুণ্ডিত—
কি হবে যদি না তুমি সাধো জীবহিত ।
খোল করতাল ধরি গাও নিশি দিন,
কি ফল তাহাতে যদি অন্তরে মলিন ।

তুকা কহে “ভক্তি বিনা দেবসেবা করি,
বৃথা পণ্ডশ্রম খালি—পাইবে কি হরি ?”

এইক্ষণকার ধর্মপ্রচারকেরা তুকারামকে তাঁহাদের জীবনের আদর্শ করিয়া চলিলে অনেক শুভ ফল প্রত্যাশা করা যাইতে পারে। ত্যাগী শ্রদ্ধাবান্ শাস্ত্র দান্ত্র ক্ষমাশীল—ঈশ্বর-ভক্তিই তুকারামের সর্বস্ব ছিল—তাহাই তাঁহার জীবনের অন্ন পান—তাহাই তাঁহার উপদেশের সার—তাহারই গুণে মহারাষ্ট্রের আবালবৃদ্ধবনিতা সকলেরই নিকট তাঁহার অভঙ্গের এত আদর—এত গৌরব—তাহারই গুণে ঐ প্রদেশে তাঁহার নাম চিরস্মরণীয় হইয়া রহিয়াছে। তুকারামের অভঙ্গ হইতে ঈশ্বরভক্তিসূচক শ্লোক উদ্ধৃত হইল।

সন্তানে মায়ের হাতে কেবা দেয় আনি,
আপনি জননী তারে লন কোলে টানি।
কাজ যার তিনিই তা করিবেন, তবে
আমি কেন মিছামিছি মরি ভেবে ভেবে।
সন্তান না যদি চায় তবুও জননী,
রাখেন তাহার তরে মিষ্টান্ন আপনি।
সন্তান যখন রহে খেলায় ভুলিয়া,
কাছে গিয়ে লন তারে বুকেতে তুলিয়া।
পীড়া তার হলে তিনি ব্যস্ত হন কত—
তুকা তাই কহে “গুন বন্ধুগণ যত—
“এত যত্ন কেন তবে শরীরের প্রতি,
মা থাকিতে আঘাত না পাবে এক রতি।”

এই শ্লোকটিতে ঈশ্বরের মাতৃভাব সুন্দর রূপে ব্যক্ত হই-

য়াছে।—নিম্নের কয়েকটি শ্লোকে কবির ঈশ্বরনিষ্ঠা প্রকাশ
পাইতেছে।

নিজ হ'তে বাক্য কভু নাহি কহে নর,
প্রিয় ভগবন্ত যিনি তাঁরি সেই স্বর।
কোকিল যে করে সদা স্তম্ভুর গান,
অন্য জন তারে সেই শিখাইল তান।
প্রেমের উত্তর দিতে পারি যাহা আমি—
এ ক্ষমতা দিলা মোরে জগতের স্বামী।
তুকা কহে কে জানিবে তাঁহার শক্তি,
পশু খঞ্জ জনেরেও দেন তিনি গতি।

লইলু সর্বতোভাবে তোমার শরণ,
কায়মনোবাক্যে তব করিলু বন্দন।
হে দেব, অপর কিছু নাহি অভিলাষ,
তব পদে থাকে যেন বাঁধা তব দাস।
আমার হৃদয়পরে সেই গুরুভার—
তোমা বিনা ওহে নাথ কে করে উদ্ধার ?
আমি হে তোমার দাস প্রভু তুমি আর—
বহুদূর হইতে এসেছি তব দ্বার।
তুকা কহে ধন্য দিয়ে বসিলু এখন,
হিসাব দেখিতে হবে দিয়ে দরশন।

ওহে পতিত পাবন,
দীননাথ নারায়ণ,
তব রূপ হৃদি মাঝে
সদাই যেন বিরাজে,

ওহে ব্রহ্মাণ্ড নায়ক

ভক্ত-জন-প্রতিপালক ।

জীবের জীবন তুমি প্রাণাধার,

দেব দেব তুমি তুকা কহে সার ।

এই বর দান মাগি গো প্রভু,

যেন তোমা-হারা না হই কভু ।

তব গুণ গানে সঁপিয়া প্রাণ—

ভবের বিভব চাহি না আন ।

ধন মান যশ না চাহি কুপাল,

সাধু সঙ্গে যেন কেটে যায় কাল ।

ছাড়ি যায় যবে তুকা ভববাস—

হয় যেন স্ত্রী এ তব দাস ।

পতিত যে পাপী আমি লয়েছি শরণ,

পাণ্ডুরঙ্গ কর মোর লজ্জা নিবারণ ।

ভকতবৎসল তব অন্ত কেবা জানে,

তোমা বিনা কেবা তারে অভাগা এজনে ।

কত কষ্ট পায় আহা দ্রোপদী ভগিনী,

আপনার মত তারে রাখিলে আপনি ।

প্রহ্লাদে বাঁচালে স্তম্ভে হয়ে অবতার,

আমারে ভুলিলে তবে একি অবিচার ।

দারিদ্র্য ঘেঁরিল আসি স্নদাম ব্রাহ্মণে,

তুমি তারে পাণ্ডুরঙ্গ উদ্ধারো যতনে ।

তুকা কহে কায়মনে ধরিহু আধার,

পাপ নাশি তব দাসে দেওহে নিস্তার ।

এই দেব তব পদে করি হে মিনতি,
 রূপাঙ্গে হোক মোর দেহের বিস্মৃতি ।
 তোমার নিগূঢ় তত্ত্ব জানিবারে চাই,
 জীবনের সুখ শাস্তি নাহি অন্য ঠাই ।
 তোমার চরণ পানে বাধি নিজ ধাম,
 সন্তোষ পাইব চিতে লভিব বিশ্রাম ।
 লজ্জা কিম্বা ভয় আর কাম ক্রোধ অরি—
 বিনাশো জঞ্জাল সবে প্রভু রূপা করি ।
 তব পদে প্রভু তুকা এই ভিক্ষা চায়—
 সাধু সঙ্গে মিলাইয়ে তরাও তুকাই ।

পৌত্তলিকতা বিষয়ে তুকাকারামের উক্তি—

স্থানেতে আবদ্ধ ক'রে পূজি গো তোমাং,
 চৌদ্দ ভুবন কিন্তু অন্তরে লুকায় ।
 নাচায় ফিরায় তোমা লোকে দ্বার দ্বার,
 রূপ রেখা হীন কিন্তু তুমি নিরাকার ।
 তোমা লাগি আমরা গো গাই কত গীত—
 তুমি কিন্তু ওহে দেব শব্দের অতীত ।
 তোমা তরে আমরা গো পরি জপমালা—
 তুমি কিন্তু সৃষ্টি হতে রয়েছে নিরানন্দ ।
 তুকা কহে “এবে তুমি হয়ে পরিমিত—
 প্রসন্ন হইয়ে মোর সাধ কিছু হিত ।”

বৈদান্তিক মতের উপর তুকাকার উক্তি—

খণ্ডোবার ভিক্ষুক সে আছিল প্রথমে—
 ভাগ্যগুণে সেনাপতি হল ক্রমে ক্রমে—

তবুও ভিক্ষার ঝুলি ঘুচিল না তার,
 পুরাণো স্বভাব কভু নহে ঘুচিবার ।
 প্রথমে গণক ছিল, এমনি কপাল,
 ক্রমে ক্রমে রাজ্যের সে হইল ভূপাল—
 পাজি পড়া তবুও ত ঘুচিল না তার—
 পুরাণো স্বভাব কভু নহে ঘুচিবার ।
 প্রথমে ছিল যে দাসী, কে জানিত কবে
 সেই দাসী ভাগ্যগুণে পাটরাণী হবে—
 তবুও ত হীন কৰ্ম্ম ঘুচিল না তার—
 পুরাণো স্বভাব কভু নহে ঘুচিবার ।
 প্রথমে পাইল তুকা সাধুদের সঙ্গ,
 ক্রমে পাণ্ডুরঙ্গ সাথে হল এক অঙ্গ ।
 তবু তাঁর গুণ গান ঘুচিল না তার,
 পুরাণো স্বভাব কভু নহে ঘুচিবার ।

ভক্তের লক্ষণ—

সেই জন ভক্ত, যেই দেহেতে উদাস—
 সংসারে বিরাগ যার ছিন্ন আশাপাশ,
 বিষয় তাঁহার নাই বিনা নারায়ণ,
 মাতা পিতা নাহি চান নাহি ধন জন ।
 গোবিন্দ সহায় তাঁর হন পদে পদে,
 আঙুলে রাখেন তাঁরে জুড়ি বিপদে ।
 তুকা কহে এই জেনো ভক্তের লক্ষণ,
 সত্য কাজে সদা তিনি থাকেন মগন ।

—

সংসারের অনিত্যতা—

কোন জন দেখে জল বোয়ে মরে,
 স্নেহে শোয় কেহ খাটের উপরে ।
 কালের চক্র যেমন ঘুরে,
 লোকের কপাল তেমনি ফিরে ।
 কভু গুফ় রুটি বহু কষ্টে মেলে,
 কভু চর্য্য চোষ্য পাই অবহেলে ।
 কেহ পদব্রজে ঘুরিয়ে মরে,
 কেহ রথে বসে স্নেহে বিহরে ।
 কেহ রাজবেশে ভূষিত শরীর,
 কারো পুরাতন ধূলি মাখা চীর ।
 কভু বা দারিদ্র্য কভু ধনরাশ,
 কভু হীন সঙ্গ কভু সাধু সহবাস ।
 তুকা বলে এই কথা মনে জেন ঠিক,
 পৃথিবীর স্নেহ হুঃখ সকলি অলীক ।

ধর্ম্মনীতি ও ঈশ্বর বিষয়ক আর কয়েকটি শ্লোক উদ্ধৃত
 করিয়া এই প্রস্তাবের উপসংহার করা যাক ।

সেই পাপ, মনে যদি রহিল সংশয়,
 পাপ পুণ্য দুই সে মনের ধর্ম্ম হয়—
 ভাল চিন্তা পুণ্য অতি জানিও গো সবে,
 বীজ যদি ভাল হয় ফল ভাল হবে ।
 তুকা কহে “মনেরে রাখিও গুহু সত্ব,
 সেই অতি ভাল কাজ, সেই সার তত্ত্ব ।
 ধন্থ ধন্থ সেই প্রাণী ক্ষমা যার আছে,
 ধৈর্য্যবল ধরে যেই সকল প্রসঙ্গে ।

পর-গুণদোষ-চর্চা নাহি যার ঠাই—
 অহঙ্কার গর্ব শূন্য যে জন সদাই ।
 অস্তর বাহির যার সমান নির্মল,
 পুণ্যতোয়া গঙ্গাসম হৃদয় কোমল ।
 তুকা কহে হেন জন দোসর আমার—
 শ্রুণু তাহার পদে শত শত বার ।

সন্তপ্ত পীড়িত জনে যে দেখে আপন,
 দীন হীন করে যেই হৃদয়ে ধারণ ।
 নিজ দাস দাসী পরে
 পুত্রের বাৎসল্য ধরে,
 সেই সাধু, সেই তীর্থ দেবের বসতি,
 তার গুণ বাখানিব হেন কি শক্তি ।
 তুকা কহে “সাক্ষাৎ সে ভগবন্ত মুরতি ।”

সহপায়ে ধনরাশি করি উপার্জন
 ভাল কোরে বুঝে সুঝে কোরো বিতরণ ।
 কটু বাক্য না কহে যে পরহিতে রত,
 পরস্মীরে দেখে যেই জননীর মত—
 জীবজন্তু সবাপরে অতি দয়ীবান্,
 মরুভূমে তৃষাতুরে করে জল দান ।
 সদা শান্ত, নাহি করে পর অপবাদ,
 গুরু জন সাথে কভু না করে বিবাদ ।
 সে লভে উত্তম গতি নাহি পায় ছুথ,
 পরম সৌভাগ্য তার ভুঞ্জে সদা সুখ ।

তুকা কহে আশ্রমের রত্ন তারে মানি,
এ হতে তপস্যা আর কি আছে না জানি ।

সংসারের ধারি না ধার,
হরির জন সে সখা আমার ।
ব্রহ্মানন্দে কাল যায়
বিষয়ে কি মন তৃপ্তি পায় ।
না আসে চিন্তা স্বপনেও কভু,
নিশি দিন যায় সুখেতে প্রভু ।
তুকারাম কহে “এষে ব্রহ্মরস,
কি বলিব আহা কেমন সরস ।”

কৃপাময় যিনি তাঁরে না কর স্বরণ !
একাকী জগত যিনি করেন পোষণ ।
উত্তাপে শুকালে তরু, দিয়ে বারিধার
কে করে তাহাতে বল জীবন সঞ্চার ।
কে বল মায়ের স্তনে যতনে ঢালিয়া,
পান হেতু হৃৎক দেন আগেতে ভাবিয়া ।
তুকা কহে জান তাঁর নাম বিশ্বস্তর,
ভক্তি ভরে তাঁর ধ্যান কর নিরস্তর ।

সবাই বলে গো দেব আমি তব দাস,
তুমিই রাখিবে মোরে এই মম আশ ।
অনাথের নাথ তুমি পতিত পাবন,
এই নাম জপি আমি কাটাব জীবন ।

ভজন পূজন মোর মুখেই কেবল,
অন্তরের কথা প্রভু জানিছ সকল।
তুকা কহে তুমি ওহে করুণার সিন্ধু,
ভবপাশ নাশো মোর ওহে দীনবন্ধু।

প্রবাস পত্র।

সিন্ধু-কাহিনী।

ভাই,—

তুমি আগাকে আমার বোম্বাই প্রবাসের বিবরণ লিখিতে অনুরোধ করিয়াছ কিন্তু কি লিখি কোথায় আরম্ভ করি তাহা আমি ভাবিয়া পাই না। প্রথমে কোন এক নূতন দেশে আসিয়া উপস্থিত হইলে অনেক নূতন ছবি চ'খে পড়ে—নূতন ভাব মনে উদয় হয়। লোকদের চালচলন রীতিনীতি সম্বন্ধে অনেক কথা বলিবার থাকে। কিন্তু আমার চক্ষে এদেশের নূতনত্ব নাই—আমি এখানকার একজন প্রাচীন বাসেন্দার মধ্যে গণ্য হইতে পারি। বিশ বৎসর ধরিয়া আমি এ প্রেসিডেন্সিতে কাজ করিতেছি, ইহার এক সীমা হইতে সীমান্তর পর্য্যন্ত প্রদক্ষিণ করিয়াছি। জন্মভূমিই যে আপনার দেশ তাহা নহে, যে প্রদেশে জীবনের অধিকাংশ ও সারভাগ কাটাইয়াছি, যে লোকদের মধ্যে এত কাল বাস করিয়াছি ও যাহাদের কার্যে আমার

শরীর ও মনের সমুদয় শক্তি ব্যয় করিয়া কৰ্মক্ষেত্রের প্রান্ত-
 ভাগে আসিয়া পৌঁছিয়াছি—সেই দেশ ও লোকদিগকে আপ-
 নার বলিয়া বরণ করাই স্বাভাবিক । আমি ত বোম্বাইকেই
 নিজের দেশ মনে করি—এ দেশ আমার হাড়েমাসে জড়িত—
 তাই মনে হয় যেন নূতন কিছুই লিখিবার নাই, সকলি পুরাণো
 কথা । তবে এখানে দেখিয়া শুনিয়া আমার যে জ্ঞান লাভ
 হইয়াছে তাহা আগড়ম্বাগড়ম্ব বকিয়া যাইতে পারি—তা যদি
 তোমার ভাল লাগে ।

ভাষা অনুসারে এ প্রেসিডেন্সি সামান্যতঃ চারি ভাগে বিভক্ত
 হইতে পারে, গুজরাট, মহারাষ্ট্র, কর্ণাটক ও সিন্ধু দেশ । শেষ
 থেকে আরম্ভ করিয়া সিন্ধুদেশের কথা পাড়া যাক । সিন্ধুদেশ
 ব্রিটিশ রাজপরিবারের নবোঢ়া বধু—ইহা ব্রিটিশ রাজ্য-ভুক্ত হই-
 বার পর এখনো অর্দ্ধ শতাব্দী অতিবাহিত হয় নাই । ম্যাপে
 দেখিলে এ প্রদেশ বোম্বাই প্রেসিডেন্সির অন্তর্গত মনে হয় না—
 পঞ্জাবের অঙ্গ বলিয়াই প্রতীয়মান হয় । মধ্য মধ্য সিন্ধুদেশকে
 পঞ্জাবের সহিত যোগ করিবার প্রস্তাবও শুনা যায়, কিন্তু বোধ
 করি সিদ্ধিদের তাহা ইচ্ছা নহে—তাহারা বোম্বাই গবর্ণমেন্টের
 অধীনে স্থখে আছে । এ দেশের ভাষা সিন্ধি । মারাঠী গুজ-
 রাতীর সঙ্গে তাহার সৌসাদৃশ্য দেখা যায়—সংস্কৃতই এ সকল
 ভাষার আদ্য-জননী । কিন্তু আশ্চর্য্য এই যে ইহার লিখন
 পদ্ধতি উর্দু—সংস্কৃতমূলক নহে । অক্ষর অনায়াসে দেবনাগরী
 হইতে পারিত—সিন্ধি ভাষায় যত শব্দ আছে নাগরীতে তাহা

সহজে লিপিবদ্ধ করা যাইতে পারে ।—কতকগুলি অতিকঠোর শব্দ আছে তাহার মধ্যে কেবল কোন রূপ রেখা কিম্বা বিন্দুর প্রয়োজন । আমরা যেমন ড ও ঙ র মধ্যে বিন্দু দিয়া প্রভেদ নির্দেশ করি, কতকগুলি সিদ্ধি-অক্ষর সম্বন্ধে সেইরূপ কোন সঙ্কেত ব্যবহার করিলেই হইল । তুমি জিজ্ঞাসা করিতে পার, দেবনাগরীর পরিবর্তে উর্দু অক্ষর কেন চলিত হইল ? ইহার উত্তর, সরকারের হুকুম । যখন ইংরাজেরা সিন্ধুদেশ অধিকার করে তখন সেখানে লেখা পড়ার চর্চা ছিল না । বণিকদের হিসাবপত্রে এক প্রকার নাগরীর অপভ্রংশ ব্যবহৃত হইত কিন্তু তা ছাড়া বর্ণাঙ্করের প্রচার ছিল না । যখন ব্রিটিস আদালত সকল স্থাপিত হইল তখন কোর্টের একটা ভাষা ঠিক করা ও তাহার সঙ্গে সঙ্গে অক্ষরের সৃষ্টি করা আবশ্যিক হইল । এই সময়ে কোন্ এক মহাপুরুষের মনে হইল যে উর্দুই উপযুক্ত অক্ষর—ক্রমে তাহাই প্রচলিত হইল । আমি যখন সিদ্ধি ভাষা শিখিতে আরম্ভ করি তখন ভাষা শিখিতে যত না কষ্ট হউক তাহার লেখা অক্ষর লইয়া তাহার সহস্রগুণ গোলযোগ উপস্থিত হইত । উর্দু হাতের লেখা পড়িয়া উঠা সহজ নয়—দেবনাগরী হইলে কেমন সহজে লিখিতে পড়িতে শিখিতাম । সিদ্ধি শিখিবার সময় এই অক্ষর প্রণেতার উপর কতবার আমার মনের ঝাল ঝাড়িয়াছি তাহার ঠিক নেই—মনে করিয়াছি—আঃ এই আনাড়ীর হাতে না গিয়া যদি শম্ভার হাতে সিদ্ধি অক্ষর চালাইবার ভার থাকিত !

এখানে যত দেশ দেখিয়াছি তাহার মধ্যে সিন্ধু দেশ আমার চক্ষে বিশেষ নতুন ঠেকিয়াছিল । অন্যান্য স্থান হইতে উহার ভাব গতিক অনেক ভিন্ন । প্রথমতঃ বর্ষার অভাব । নদী, নালা, খালের জল হইতেই প্রায় সমস্ত কৃষিকার্য্য নির্বাহ হয় । ইন্দ্র বর্ষণ করেন না—পৃথিবীই স্বীয় নীর দিয়া তাহার অভাব পূরণ করেন । বৃষ্টি হয় না বলিয়া পাকা ঘর বাড়ি নির্মাণ করিবার আবশ্যক হয় না, যেমন তেমন খড় মাটির ঘর বাসযোগ্য করিয়া নিতে পারিলেই হইল । কালে ভদ্রে যদি কখন ইন্দ্রদেবের প্রসাদে বর্ষার আধিক্য হয় অমনি শুনা যায় সহরের অর্দ্ধেক বাড়ী ভুমিসাৎ হইয়াছে । সিন্ধুদেশের আবহাওয়ায়, বিশেষতঃ উত্তর অঞ্চলে, শীতোষ্ণের আতিশয্য যেমন ঠাণ্ডা তেমনি গরম । গ্রীষ্মকালে ছাতের উপর কিস্বা বাহিরে খোলা জায়গায় শয়ন করিলেও পাখার আবশ্যক হয় ও জলসিঞ্চন করিয়া বিছানায় প্রবেশ করিতে হয় । শীতকালে তেমনি বিপরীত ঠাণ্ডা, ঘরের ভিতরেও অগ্নিসেবন ব্যতীত চলে না । সিন্ধুদেশে প্রকৃতির শোভা-সৌন্দর্য্য বিরল । ভাগ্যি সিন্ধুনদী আছে তাই রক্ষা, নতুবা ওদেশ মানুষের বাস যোগ্য হইত কিনা সন্দেহ । আমরা যখন হাইদ্রাবাদে ছিলাম তখন সিন্ধুনদী আমাদের একমাত্র বেড়াইবার স্থান ছিল । সন্ধ্যাবেলা নদীর ধারে গিয়া বায়ুসেবন করা আমাদের নিত্য নিয়মিত কার্য্য ছিল । মরুভূমির মধ্যে যেন সেই একমাত্র আরামের স্থান বোধ হইত আর মধ্যে মধ্যে নদীর উপর নৌকা করিয়া বেড়ান যাইত । সিন্ধু নদীর ভাব

অনেকটা গঙ্গার মত—গঙ্গানদীর ন্যায় প্রশস্ত। ইহা দেখিলে আমার দেশ মনে পড়িত, মনে হইত যেন গঙ্গার বুকের উপরেই ভাসিয়া বেড়াইতেছি। সিন্ধু নদীতে পল্লা বলিয়া একরকম মাছ পাওয়া যায়, তাহা আমাদের ইলিস। জেলেরা কলসী ভাসাইয়া মজার রকমে এই মাছ ধরে। এ মৎস্য অতীব সুখাদ্য বলিয়া প্রখ্যাত। আমার একজন সিন্ধি চাকর ছিল তাহার কাছে এক গৎ শুনিতাম মনে আছে—

পল্লা মছী খানা

সিন্ধু মূলুক ছোড়কে নহি যানা।

নদী ও খালের তট প্রদেশ ভিন্ন অন্যত্র গাছ পালা প্রায় দেখা যায় না। চতুর্দিকে বালুময় ক্ষেত্র ধূ ধূ করিতেছে। এই সকল স্থানে উটের উপর দিয়াই গতিবিধি ও এদেশে উট অনেক কাজে লাগে। জলের কল—তেলের ঘানি উট দিয়াই চালিত হয়। উটই মরুমাগরের জাহাজ। সমুদ্রের উপর যেমন জাহাজের দোলা খাইয়া আনাড়ী নাবিকযাত্রীর ওষ্ঠাগত প্রাণ হয় তেমনি যাহার অনভ্যাস উষ্ট্র-বাহকের ঝাঁকানিতে তাহার রক্ত-হৃৎ দধিতে পরিণত হয়। শিক্ষিত উট, ভাল মাছ, অভ্যস্ত আরোহী এই তিন একত্র হইলে উটে চড়ায় আরাম আছে সাহস করিয়া বলা যাইতে পারে। এক বিষয়ে মরুভূমির উপযোগিতা তোমার সহজে মনে হইবে না। তাহা বলি শুন। বালির উপর সহজে পায়ের দাগ বসে—ইহা চোর ধরিবার এক উৎকৃষ্ট উপায়। আমি যখন শীকারপুরে কাজ করিতাম তখন গরুচুরি

মকদ্দমা রাশি রাশি আমার কাছে আসিত । পশুহরণ সিন্ধি-
 দেব এক রোগ । এমন দিন নাই যে ঘোড়া, গরু, উট, মেঘ,
 মহিষ, প্রভৃতি লুণ্ঠের মকদ্দমা উপস্থিত না হইত । কিন্তু তাও
 বলি ‘যেমন কুকুর তেমনি মুগুর ।’ গ্রামে গ্রামে যে সব চোঁকী-
 দার আছে তাহাদের নাম ‘পগী’ । পদচিহ্ন দেখিয়া চোরামাল
 গ্রেপ্তার করা তাহাদের কাজ । মনে কর কোন এক গ্রাম হইতে
 একটা উট চুরী গিয়াছে । অমনি সেই গ্রামের পগী অপহৃত
 উটের পদচিহ্ন ধরিয়া চোরের সন্ধানে বাহির হইল । সেই পদ-
 চিহ্ন যদি সে তাহার সমীপবর্তী গ্রামে দেখাইয়া দিতে পারে
 তাহা হইলেই তাহার দায়িত্ব হইতে সে খালাস । তারপর
 শেযোক্ত গ্রামের উপর জবাবদিহি পড়িল । এই গ্রামের লোকেরা
 পগী সঙ্গে করিয়া সেই চিহ্ন ধরিয়া বাহির হয়—এইরূপে চোরের
 আড্ডায় গিয়া চোরামাল ধরিতে পারিলে তাহাদের পরিশ্রম
 সার্থক । আশ্চর্য্য এই যে অনেক স্থলে এই উপায়ে চোরামাল
 ধরা পড়ে—পগীরা এ কাজে এমনি নিপুণ যে প্রায় তাহারা শূন্য
 হস্তে ফিরিয়া আসে না । তাহাদের দক্ষতার প্রমাণ চোরামাল
 হস্তগত হওয়া—মাল ধরা না পড়িলে তাহাদের কথায় বিশ্বাস
 করা যায় না । অনেক সময় পদ-চিহ্ন দেখাইয়া তাহারা অন্য
 গ্রামের লোকদের উপর অপরাধ চাপাইয়া আপনারা দোষমুক্ত
 হইতে প্রয়াস পায়, কিন্তু বিজ্ঞ বিচারকের কাছে ওরূপ প্রযত্ন
 সফল হয় না ।

শীকারপুরের নামে মনে পড়িল যে সিন্ধুদেশ শীকারের এক

প্রশস্ত স্থান। স্থানে-স্থানে যে বনজঙ্গল আছে সেখানে হরিণ, বরাহ, নেকড়েবাঘ প্রভৃতি বনজন্তু পাওয়া যায়। কোন কোন জলাভূমিতে নানা পক্ষী পাখালীও দৃষ্টিগোচর হয়। আমি মাঝে মাঝে শীকারে বাহির হইতাম কিন্তু বড় বাঘ কখন দেখি নাই— একবার আমার সামনে একটা হায়েনা আসিয়াছিল। সিঙ্কীরা সকল রকম বাঘকেই ‘সিংহ’ বলে। কিন্তু আসল পশুরাজ সিংহ এ সকল বনে দৃষ্ট হয় না। আমাদের দেশের কেঁদো বাঘ Royal Tiger এখানে আছে কি না সন্দেহ। এই সকল শীকার করিতে গেলে অনেক কুলি সংগ্রহ করিতে হয়। শীকারি-গণ বন্দুক-হস্তে ভিন্ন ভিন্ন স্থান অধিকার করিয়া বসেন, কুলিরা এক চক্র বাঁধিয়া হাঁকাহাকি ডাকাডাকি আরম্ভ করে। সেই চীৎকার ধ্বনিতে যত জীবজন্তু, শস্ত্রধারী শীকারীদের দিকে ধাবিত হয়—এই অবসরে যার যেমন সুবিধা বন্দুক ছুড়িয়া শীকার আদায় করিতে হয়। যে বনে ব্যাঘ্র সঞ্চারণ করে, সেখানে হয় কোন বৃক্ষের উপর কিম্বা উচ্চ মঞ্চের উপর বসিয়া বাঘ মামাকে প্রতীক্ষা করিতে হয়। সিঙ্কীরা অত্যন্ত শীকার-প্রিয়, শীকার-পুরে থাকিতে মধ্যমধ্যে প্রায়ই আমার শীকারের সঙ্গী জুটিত। একবার আমরা দলেবলে মঞ্চর নামে একটা বৃহৎ সরোবরে শীকার করিতে গিয়াছিলাম। সেখানে বুনো হাঁস প্রভৃতি নানা জাতীয় পক্ষী পাওয়া যাইত। আমরা এক একবার বোটের উপর হইতে শীকার করিতাম। মঞ্চরে একজন বৃদ্ধ সিঙ্কী আমাদের যথোচিত আতিথ্য করিয়াছিল—আমরা বেস আমোদে

ছিলাম। একবার মনে আছে আমরা একটা জায়গায় চকা-চকির ঝাঁকের মধ্যে আসিয়া পড়িলাম। সংস্কৃত কাব্যে চকা-চকির কথা পড়িয়া তাহাদের সঙ্গে এমন সখ্যবন্ধন হইয়া গিয়াছে যে গুলি ছুঁড়িতে হাত উঠিল না। সে বেচারীদের মধ্যে গুলি চালাইতে গিয়া ‘মা নিষাদ প্রতিষ্ঠাং ত্বং’ আকাশবাণী আমার কণ্ঠকূহরে প্রবিষ্ট হইয়া আমার অন্তরাত্মাকে দগ্ধ করিল। সে যাহা হউক, আমার ভারি দেখিতে ইচ্ছা করে চখা-চখির বিচ্ছেদ বর্ণনা কতদূর সত্য। তাহা বাস্তবিক ঘটনা অথবা আমাদের সংস্কৃত কবিদের কল্পনা মাত্র। সত্যই কি বিধাতার এমনি কঠোর নির্বন্ধ যে সন্ধ্যা হইলেই চখা-চখী বিযুক্ত হইবে—চখা যদি এ পারে থাকে চখী ওপারে গিয়া বসিবে। চখা বলে—‘চখী মই আঁউ’ চখী উত্তর দেয় ‘নহী নহী চখা।’ আবার চখী বলে ‘চখা মই আঁউ?’ চখা উত্তর দেয় ‘নহী নহী চখী’ এইরূপে কি সমস্ত রাত্রি গত হয়?

আমি কি করিতেছি—শীকার হইতে কবিতায় গিয়া পড়িলাম। আবার পক্ষ সংযত করিয়া নিম্নদেশে অবতরণ করা যাক। ইংরাজেরা সিন্ধুদেশ অধিকার করিবার পূর্বে তাহা আমীরদের রাজ্য ছিল। আমীরেরা বড়ই শীকারভক্ত ছিল। তাহাদের হাতে রাজ্য থাকিলে এতদিনে সিন্ধুর সমস্ত প্রদেশ ‘শীকার গাঁ’য়ে পরিণত হইত। কথিত আছে তাহাদের এমন কঠোর শাসন ছিল যে রক্ষিত বনের কেহ একটা বরাহ বধ করিলে তাহার প্রাণদণ্ড হইত। এখন আর সে কাল নাই।

এই আমীরদের রাজ্যের খয়েরপুর এখন অবশিষ্ট আছে—আলি-মোরাদ তাহার রাজা। তদ্ব্যতীত আমীরদের আত্মীয় স্বজনের মধ্যে এক্ষণে কেহ ব্রিটিস গবর্ণমেন্টে কাজ করিতেছেন কেহ বা পেন্সন ভোগ করিতেছেন। এক জন মীর সাহেব আমার বন্ধু ছিলেন। তাঁহার সঙ্গে কখন কখন শীকারে যাইতাম। তিনি শীকারে বিলক্ষণ মজবুত—উড়ন্তপক্ষী তাঁহার গুলি খাইয়া পড়িত। এই মীর একজন মাজিষ্ট্রেট ছিলেন। একটা খুনী মকদ্দমাতে তিনি একবার এক কারখানা করিয়া বসিয়াছিলেন। মকদ্দমা সেসনে কমিট হইলে যে সকল জিনিশ প্রমাণ স্বরূপ নথির সঙ্গে পাঠাইতে হয়—যাহাদের এদেশের চলিত ভাষায় ‘মুদামাল’ বলে, তাহার মধ্যে বুদ্ধিমান মাজিষ্ট্রেট মৃত ব্যক্তির মুণ্ডচ্ছেদ করিয়া সেসন কোর্টে কাটা-মুণ্ড পাঠাইয়া দিয়াছিলেন। তাহা দেখিয়া সেসন-জজ ক্রোধান্বিত হইয়া মাজিষ্ট্রেটের বিরুদ্ধে রিপোর্ট করেন। এই অতি বুদ্ধির কাজ করিয়া বেচারী মীর-সাহেব ভারি বিপদে পড়িয়াছিলেন।

সিদ্ধুবাসী অধিকাংশ মুসলমান। এসব দেশে যেমন হিন্দুদের মধ্যে মুসলমান ও-দেশে তেমনি মুসলমানদের মধ্যে হিন্দু। হিন্দুদের আচার ব্যবহার অনেকটা মুসলমানী ধরণে গঠিত। তাহারা আমিষ-ভক্ষণ ও সুরাপানে পরাঙ্মুখ নহে। ‘আমিল’ নামে হিন্দুদের প্রধান জাতি কায়স্থ—তাহাদের বেশভূষা ও শাশ্রুজাল মুখশ্রীতে মুসলমানদের সঙ্গে প্রভেদ বুঝা দুষ্কর। প্রথমে যখন সিদ্ধু-হাইদ্রাবাদে আমার কন্ম হয় তখন হিন্দুদের কয়েক

জন প্রধান প্রধান ব্যক্তি আমাকে আক্রমণ করিয়া লইয়া যান। আমরা এক সঙ্গে এক মেজে বসিয়া পানভোজন করি—তাহাতে আমার কিন্তু আশ্চর্য্য বোধ হইল। কেন না হিন্দুদের ওরূপ জাতেজাতে মেলা-মেশা সচরাচর দেখা যায় না। শেষে উহার কারণ বুঝিতে পারিলাম। হাইদ্রাবাদে এক ব্রাহ্মসমাজ আছে, ন—রায় একজন উৎসাহী ব্রাহ্ম ও সমাজের এক প্রধান নেতা। তাঁহার যত্নে কতক জন সাহসী যুবা দলবদ্ধ হইয়া হিন্দুসমাজের বিপক্ষে খড়্গ-হস্ত হইয়াছেন—মাঝে মাঝে দুই দলে গোল-যোগ উপস্থিত হয়। যাঁহারা সাহস করিয়া আমার সঙ্গে একা-সনে আহার করিয়াছিলেন তাঁহারা যে সামাজিক শাসন হইতে একেবারে অব্যাহতি পাইয়াছিলেন তাহা নহে। শুনিলাম তাহার জন্য তাঁহাদের নাকি শেষে অনেক জ্বালা যন্ত্রণা ভোগ করিতে হইয়াছিল।

মুসলমানদের রাজত্ব যেখানে প্রতিষ্ঠিত সেখানেই অবরোধ প্রথার কড়াকড় নিয়ম দৃষ্ট হয়। সিন্ধুদেশে তাহাই দেখিলাম। স্ত্রীলোকেরা অন্তঃপুরেই রুদ্ধ—সূর্য্য চন্দ্রও তাহাদের রূপ দেখিতে পায় না। চন্দ্রের কথা ঠিক হইল কি না জানি না কিন্তু ইহা সত্য যে অন্তঃপুরে সূর্য্যদেবের প্রবেশ নিষিদ্ধ। আমি কতমাস ওদেশে ছিলাম কোন ভদ্র সিন্ধি মহিলার সঙ্গে আমার আলাপ পরিচয় হয় নাই। ন—রায় মহাশয় ঘন ঘন আমাদের কাছে আসিতেন—আমার সঙ্গে একত্রে বসিয়া আহারাদি করিতেন কিন্তু তাঁহার পরিবারের মধ্যে কখন আমাদের

আমন্ত্রণ করেন নাই। এই প্রসঙ্গে একটা ঘটনা মনে হইল। মহাত্মা মিশ কার্পেণ্টার যখন দ্বিতীয়বার ভারতবর্ষে আগমন করেন তখন আমরা সিন্ধু দেশেই ছিলাম। তিনি হাইদ্রাবাদে আমাদের বাটীতে কতক দিন বাস করিয়াছিলেন। সিন্ধুরা তাঁহার আতিথ্য সৎকারের জন্য অনেক করিয়াছিল। স্কুলের ছাত্রেরা মিলিয়া এক নাটক অভিনয় করিল, তাহাতে এক কবিতা পাঠিত হয়—তার ধূয়া মিশ মেরি কার্পেণ্টার—তাহা যেন এখনো আমার কর্ণে আসিয়া বাজিতেছে। মিশ কার্পেণ্টারের উপর সিন্ধিদের এমন ভক্তি, এত আদর, এত যত্ন যে ন—রায় মহাশয় তাঁহাকে নিমন্ত্রণ করিয়া আপনার স্ত্রীর সহিত তাঁহার সাক্ষাৎ করাইয়া দেন। ইহাতে তাঁহার সন্তানের বিলক্ষণ পরিচয় দেওয়া হইয়াছিল। যে অন্তঃপুর এমন আটে ঘাটে বদ্ধ যে আমার স্ত্রীও তাহাতে প্রবেশ করিতে পারেন নাই, তাহার মধ্যে একজন ইংরাজ মহিলাকে ডাকিয়া অভ্যর্থনা করা সামান্য সাহসের কৰ্ম্ম নহে। আজ তবে এইখানে শেষ করি—আর এক সময় বোম্বাই সহরের বর্ণনা করিবার ইচ্ছা রহিল।

সিন্ধু-কাহিনী ।

দ্বিতীয় পত্র ।

সিন্ধুদেশ আর বাঙ্গলাদেশ কি তফাৎ ! বাঙ্গলার হাস্যময়ী প্রকৃতির ক্রোড়ে বাস করা যাহাদের অভ্যাস তাহাদের কাছে সিন্ধু কি নীরস কি শুষ্ক—যে দিকে চাও বালুময় ক্ষেত্র, চক্ষের আরাম আদবে নাই । কিন্তু মরুভূমির মধ্যেও স্তভদ্র হরিত-ক্ষেত্র নেত্রগোচর হয় । সিন্ধুদেশেও স্থানে স্থানে ভূমি উর্বরা ও শস্য-শালিনী । শীকারপুরের জমি সারাল মন্দ নয় । এই মরুভূমিতে যে এত বড় বড় গাছ—ফলের গাছ, ছায়াতরু জন্মিতে পারে তা সহজে বিশ্বাস হয় না । এ সকল বৃক্ষের বয়স অধিক নয়, কুড়ি বৎসরের মধ্যে কর্তৃপুরুষদের যত্নে এই ফেঁসন গাছে গাছে ভরিয়া গিয়াছে । আমরা যে বাড়ীতে ছিলাম তার কমপৌণ্ডের বাগানে আম খেজুর ও অন্যান্য ফল ফুলের গাছ ছিল । আঙ্গুর পর্য্যন্ত জন্মিত । দ্রাক্ষালতার জন্য চাল বাঁধিয়া দিতে হয়, আমরা তাহার নীচে চলিয়া বেড়াই-তাম । ছুংখের বিষয় যে তাহার ফল ভক্ষণ করিতে পারি-লাম না, আঙ্গুর পাকিবার আগেই আমার অন্যত্রে বদলি হইল । অনেক সময় এইরূপ হয়, এক জায়গায় জিনিস পত্র কিনিয়া ঘরকন্না গুছাইয়া বসিয়া নিয়াছি এমন সময় বদলির হুকুম ; অমনি তল্লিতল্লা বাঁধিয়া দূরে যাইতে হইল । সর্ব্বিসের প্রারম্ভে এইরূপ অস্থির পঞ্চমে অনেক ঘুরিয়া বেড়াইতে হয় । কলে-

ক্টর কি জিলাজজ কি এরূপ একজন swell হইয়া দাঁড়াইলে আর কোন ভয় নাই, তখন একস্থানে স্থির হইয়া বসা যায় । কোন কোন জজ কিস্বা কলেক্টর এই রকম একটা জায়গা দখল করিয়া ঘরবাড়ী ফাঁদিয়া বসেন আর সেখান হইতে নড়িতে চান না । তাই বলিয়া সিন্ধুদেশ ছাড়িতে আমার যে বড় কষ্ট হইয়াছিল তা নয় । ঐ সৃষ্টিছাড়া বিজন গহনে বাস করা নির্বাসন বলিলেই হইল, সিন্ধু হইতে গুজরাটে গিয়া যেন হাঁপ ছাড়িয়া বাঁচিলাম । আমরা যখন প্রথমে সিন্ধুদেশে যাই তখন বোম্বাই হইতে পথে ব্রিটিস-ইণ্ডিয়া ষ্টীমারে করিয়া করাচী-বন্দরে উপস্থিত হই, সিন্ধু ছাড়িয়া যাইবার সময় রেলগাড়ি করিয়া উত্তর-পূর্ব মুখে চলিলাম । মুলতান লাহোর হইয়া আশ্বালা ফেসন পর্যন্ত গেলাম, তথা হইতে কতক ডাকের গাড়ী কতক ঝাঁপানে করিয়া সিমলার পাহাড়ে চড়া গেল । সিমলা কি চমৎকার জায়গা, তার আবহাওয়া কি চমৎকার ! কিন্তু যাহা দেখিবার আশা ছিল তাহা হইল না । কাল্পনিক সিমলা ও বাস্তবিক সিমলায় অনেক তফাৎ । সিমলা হইতে হিমালয়ের তুষার-মণ্ডিত পর্বত-শ্রেণী দৃষ্টিগোচর হয় না । সেই দেবতাত্মা হিমালয়—

পূর্বাপরৌ তোয়নিধী বগাহ্য

স্থিতঃ পৃথিব্যা ইব মানদণ্ডঃ

কল্পনায় যাহা মুদ্রিত আছে তাহার অনুরূপ ঠিক দেখিলাম না । বাড়ী ঘর ছয়ার,—মানুষের কারিগিরিতে তাহার দেবত্ব

ঘুটিয়া গিয়াছে । সিমলায় ৩৪ দিনের অধিক থাকিতে পারি নাই—আর বেশী সময় ছিল না । মনে কর আমি সেখানে সপরিবারে গিয়াছি—পরিবার রাখিয়া নিজস্থানে একাকী গমন করিতে হইবে । হাতে ঐ সময়—উহার মধ্যে বাড়ী ঠিক করা—দুইটি স্কুল ঠিক করা—একটা ছেলেদের স্কুল একটা বালিকাবিদ্যালয়—সব গুছাইয়া দিয়া যাইতে হইবে—ইহাতেই বুঝিতে পারিতেছ পাহাড়ের শোভা দর্শন করিবার আমার কত অল্প অবসর ছিল । তাড়াতাড়ি করিয়া দিল্লীতে দুই এক দিন থাকিয়া মোগল সম্রাটদের কীর্তিকলাপ যত পারিলাম দেখিয়া লইলাম, পরে রাজপুতানা লাইন দিয়া আমার গম্যস্থানে উপনীত হইলাম ।

সিন্ধী কুলকামিনীদের কথায় মনে করিও না যে বোম্বাইয়ের সর্বত্রই এই দুর্ব্বিষহ অবরোধ প্রথা প্রচলিত । যে ভাগে মুসলমান আধিপত্য প্রবল অথবা মুসলমান আদর্শে সমাজ গঠিত সেই সকল প্রদেশে এই প্রথা বন্ধমূল । যেখানে হিন্দুরা আপনার স্বাধীনতা বজায় রাখিয়া চলিতে পারিয়াছে সেখানে অপেক্ষাকৃত স্ত্রীস্বাধীনতা প্রত্যক্ষ হয় । সে স্বাধীনতার দৌড় যে বড় বেশী তা নয় । ইংরাজ-সমাজে স্ত্রী পুরুষের মধ্যে যে রূপ মেশামিশি তাহা তত দূর যায় না, আবার আগন্তুক দেখিয়া কুলস্ত্রী ঘোমটা দিয়া ঘরের মধ্যে লুকাইবে,—তেমন সঙ্কোচ ভাবও দৃষ্ট হয় না । পর পুরুষের সঙ্গে স্ত্রীলোকের কথা কওয়া দুষ্ট নহে । নিমন্ত্রিত ব্যক্তি উপস্থিত থাকিলেও

গৃহিণী অল্প পরিবেশন করিতে কুণ্ঠিত হয়েন না। পারসী স্ত্রীদের স্বাধীনতা ইহা অপেক্ষাও এক মাত্রা অধিক—তাহার কারণ তাহারা ইউরোপীয় সমাজের আদর্শ গ্রহণ করিতে সমধিক তৎপর। বিজাতীয় রীতি নীতি গ্রহণ করিতে তাহাদের বিশেষ কোন বাধা নাই। প্রথমত ভারতবাসীদের নিকট তাহারা নিজেই বিদেশী। তাহারা কয়েক শত বৎসর মাত্র এ দেশে আসিয়া বাস করিতেছে। এখানকার কোন জাতির সঙ্গে তাহারা বিবাহসূত্রে মিলিত হয় নাই। এদেশের উপর তাহাদের ততটা মমতা প্রত্যাশা করা যায় না। অতীতের বল তাহাদের উপর তত আক্রোশ করে নাই, দেশাচারের অভেদ্য শৃঙ্খল-বন্ধন তাহাদের উপর নাই। আর এক কথা তাহাদের মধ্যে জাতিভেদ প্রথা নাই সুতরাং ভিন্ন জাতিদের সঙ্গে মেলা মেশা তাহাদের পক্ষে সহজ। সাগর পাব হইয়া ইংলণ্ড যাইতে হইলে জাতি যাইবার ভয়-রূপ কোন দৈত্য আসিয়া তাহাদের সম্মুখে দাঁড়ায় না। আশ্চর্য্য এই, পারসীদের এই ক্ষুদ্র দল, ভারতবাসীদের মধ্যে এক বিন্দু বলিলেই হয়, আর জাতিভেদের নিয়ম বহির্ভূত হইয়াও তাহারা আপনাদের স্বাতন্ত্র্য রক্ষা করিয়া চলিতেছে, বিবাহ বন্ধনে অন্য কোন জাতির সঙ্গে মিশাইয়া যায় নাই। সে যাহা হউক, হিন্দু সমাজের তুলনায় তাহাদের সমাজ পরিবর্তন ও উন্নতিশীল বলিতে হইবে। আচার ব্যবহার বিষয়ে ইংরাজ অনুকরণে পারসীরা বিলক্ষণ মজবুত। পারসীরা যখন প্রথমে ভারতবর্ষে

আসে তখন তাহারা হিন্দু মুসলমান উভয় জাতির মনোরক্ষা করিয়া চলিতে বাধ্য হয় । তাহাদের চালচলন দেশীয় অনু-
 করণে ক্রমে অনেক পরিবর্ত হইল । হিন্দুদের অনুরোধে
 গোমাংস বর্জন করিতে হইল । মুসলমানদের যাহা ‘হারাম’
 তাহাও তাহাদের বর্জনীয় । তাহাদের পরিচ্ছদেও তেমন
 বদল—পুরুষদের পাগড়ী, স্ত্রীদের সাড়ী অনেকটা গুজরাটী ধর-
 ণের অনুকরণ । পারসীদের কথা (Motto) এই, যখন যেমন তখন
 তেমন । ইংরাজ-রাজ্য হইয়া অবধি তাহাদের সামাজিক নিয়ম
 ক্রমে ইউরোপীয় ধরণে গঠিত হইতে দেখা যাইতেছে ।
 পাশ্চাত্য সভ্যতার বলে তাহাদের মধ্যে স্ত্রীস্বাধীনতা ক্রমে
 প্রস্ফুটিত হইতেছে । প্রথমে বোম্বাই আসিয়া আমার চক্ষে
 যাহা নূতন ঠেকে তাহা স্ত্রী-স্বাধীনতা । এই বিষয়ে কলিকাতা
 ও বোম্বাই মধ্যে ভয়ানক প্রভেদ । কলিকাতায় ভদ্র স্ত্রীগণ
 সকলই অন্তঃপুরে রুদ্ধ, বাহিরে কোথাও একটা কুলস্ত্রীর মুখ
 দেখিবার যো নাই । বোম্বায়ে পথে বাটে যেখানে যাও ভদ্র
 মহিলা চ’খের সামনে পড়ে । গবর্ণমেণ্ট-হৌসের অভ্যাগতের
 মধ্যে—বিদ্যালয়ের ছাত্র পারিতোষিক বিতরণ-উপলক্ষে সম-
 বেত জনতা-সমূহে দেশীয় স্ত্রী পুরুষ সম্মিলিত দেখিবে । বাগান,
 বন্দর, ব্যাণ্ড বাজিবার স্থান প্রভৃতি নগরের প্রকাশ্য স্থানে
 সন্ধ্যা-বায়ু সেবনের জন্য দেশী ও ইংরাজ স্ত্রীপুরুষ একত্রিত
 হয়, হিন্দু ও পারসী মহিলারা চিত্র বিচিত্র সাড়ীতে সজ্জিত
 হইয়া সেই সকল স্থানের শোভা সম্পাদন করে ।

বলিতে কি, অস্তঃপুরপ্রথা আমার নিতান্ত অনিষ্টকারী কুপ্রথা বলিয়া মনে হয়, তাহাতে অবলাদের নিজের স্ব-স্বাস্থ্যের হানি, সামাজিক হানি। সমাজের অর্দ্ধাঙ্গ অবরুদ্ধ ও বিকল হইলে অপরাধ কীরূপে সুশিক্ষিত, সুস্থ, সবল হইবে বল? সে দিন পুনর বালিকা বিদ্যালয়ের ইট-পত্তন কালে বিশ্বের গভর্ণর স্যর জেম্‌স—তঁাহার বক্তৃতার মধ্যে এ সম্বন্ধে বেশী ছ এক কথা বলিয়াছেন—অনুবাদ না করিয়া নীচে তাহা তুলিয়া দিলাম। * যদি আমাদের দেশের স্ত্রীলোকের অবস্থা উন্নতি করিতে চাও তবে আপাতত বোম্বায়ের আদর্শ গ্রহণ করিতে পার। আমাদের অনেকের ভয় হয় স্ত্রীলোকের বাহিরে গেলে তাহাদের কোন বিপদ ঘটিতে পারে, আমাদের দেশের একজন সম্ভ্রান্ত লোকের সঙ্গে আমার এই বিষয়ে কথা হয়। তিনি বলেন “আমাদের পুরুষেরাই আপনারা আপনাদের রক্ষা করিতে অপারক, ঘরের মেয়েকে কি করিয়া বাহিরে লইয়া যাইবে, যদি কেহ তাহাকে অপমান করে কীরূপে রক্ষা করিবে।” তাহার উত্তর—এ ভয় কেবল কল্পনা মাত্র, ফলে ওরূপ ঘটনা অতি বিরল। এ মুসলমান রাজ্য নয় যে অত্যা-

* But the custom of secluding your women is not sanctioned by antiquity and it is a custom which not only degrades them, but reduces them to abject slavery. You cannot degrade your wives and the mothers of your children from their rightful position in this life without degrading your race to a slavery, that is sure to act injuriously on yourselves.

চার-ভয়ে কুলকামিনীদিগের গৃহ-রুদ্ধ থাথা আবশ্যক, ইহা ইংরাজরাজ্য, স্ত্রীলোকের সম্মাননা যাহার প্রধান ধর্ম । ওরূপ আশঙ্কা যে অমূলক তাহা আমার নিজের দৃষ্টান্ত হইতেই দেখিতেছি । প্রথমে যখন আমি বোম্বায়ে আমার স্ত্রীকে সঙ্গে করিয়া আনি তখন আমাকে কত লোকে কত প্রকার বিভীষিকা দেখাইয়াছিল, কিন্তু কাজে দেখিতেছি সে সকল কিছুই নয় । আমরা স্বামী স্ত্রীতে প্রকাশ্য ভাবে এতদিন বিদেশে ঘুরিলাম, কই আমাদের ভাগ্যে ত কখন কোন বিপদ ঘটে নাই । কেবল আমার উপদেশ এই যে, বাহিরে যাইতে হইলে রীতিমত ভদ্রবেশ পরিয়া যাওয়া আবশ্যক । ‘জেনানা’ পক্ষপাতীর প্রতি আমার আর একটা কথা বলিবার আছে । যদি বল আমরা আত্মরক্ষায় অক্ষম তবে নিদান-পক্ষে আমাদের কি তাহা শিক্ষা করা উচিত নহে । ইহা কি দেখিতেছ না যে স্ত্রী-স্বাধীনতার প্রসাদে আমাদের সে শিক্ষা লাভ হইতে পারে ? এ জাতীয় কলঙ্ক দূর হইতে পারে ? ভারতমহিলা বল বিদ্যা ও স্বাধীনতা উপার্জন করিলে তাহার আভা পুরুষ-সমাজে প্রতিফলিত হইবে ইহা ত ধরা কথা—ইহার ভূরি ভূরি প্রমাণ এ দেশের ইতিহাসে পাওয়া যায় । শুদ্ধ তাহা নহে । আর এক দিক দিয়া দেখ, স্ত্রীরক্ষণের ভার আমাদের হাতে পড়িলে আমাদের বল ও সাহস দায়ে পড়িয়া বৃদ্ধি হইবে কি না ? আমরা নিজে অনেক সময় অকাতরে অত্যাচার সহ্য করিয়া যাই—কেহ একগালে চড় গারিলে আর একগাল তাহাকে ফিরাইয়া দিই,

কিন্তু স্ত্রীর প্রতি অপমান সহ্য করে এমন কাপুরুষ অতি অল্প। স্ত্রীকে কোন বিপদ হইতে রক্ষা করিতে হইলে যে দুর্বল সেও সবল হয়—ভীরুও অভয় হয়। অবলাকে অন্তঃপুর-রুদ্ধ নিতান্ত ‘অবলা’ করিয়া রাখিলে কখনই আমাদের জাতীয় ভীরুতা দূর হইবে না।

এদেশের হিন্দুদের আচার ব্যবহার বর্ণনা করিতে গেলে সর্ব্বাঙ্গে জাতিভেদ প্রথার উল্লেখ করিতে হয়। আমি যত দূর দেখিতে পাই এখানে জাতিভেদের নিয়ম কিছু কড়াকড়। এই হেতু এদেশে হিন্দুদের মধ্যে ইউরোপ-যাত্রীর দল অতি অল্প, কেহ সাহস করিয়া সাগর-পার হইলে শেষে জাত লইয়া তাহাকে মহা বিব্রত হইতে হয়। আমাদের দেশে হিন্দু-সমাজের ওদিকে অত তীক্ষ্ণ-দৃষ্টি নাই—ইংলণ্ডফেরতা বাঙ্গালী তাহার জাতির মধ্যে সহজে প্রবিষ্ট হইতে পারে। কিন্তু কোন গুজরাটি কি মহারাষ্ট্রা-হিন্দু বিলাত হইতে দেশে ফিরিয়া আসিলে জাতে উঠিবার জন্য মহা হান্সাম বাধিয়া যায়—একটা প্রকাশ্য প্রায়শ্চিত্তের আবশ্যক হয়। সেদিন এইরূপ একটা ঘটনা হইয়া গিয়াছে; পণ্ডিত শ্যামাজী কৃষ্ণবর্মান্নার নাম অবশ্য শুনিয়াছ। তিনি প্রোফেসর মনিয়র উইলিয়ম্‌সের সহিত বিলাত যাত্রা করিয়া অক্সফোর্ডের বেলিয়ল কালেজে অধ্যয়ন করেন। তিনি সংস্কৃতে একজন কৃতবিদ্য পণ্ডিত ছিলেন, কিন্তু যখন এদেশ হইতে যান তখন লাতিন গ্রীকের ক অক্ষর জানিতেন না। অথচ অল্পকাল মধ্যে ঐ দুই কঠিন ভাষার প্রথম পরীক্ষায়

উত্তীর্ণ হইলেন। তিনি তাঁহার বিদ্যা বুদ্ধি পাণ্ডিত্যে ইংলণ্ডে বিশেষ প্রতিষ্ঠা লাভ করিয়াছেন। ১৮৮১ খৃষ্টাব্দে যে Oriental congress বসিয়াছিল তাহাতে তিনি ভারতবর্ষের প্রতিনিধি স্বরূপ প্রেরিত হন। অক্সফোর্ডে অধ্যয়ন সমাপন করিয়া তিনি আইন শিক্ষা করেন ও বারিস্টার হইয়া সম্প্রতি ফিরিয়া আসিয়াছেন। দেশে আসিয়াই তিনি রতনমের দেওয়ানের পদ পাইয়াছেন—ইহাতে তাঁহার বন্ধু বান্ধব সকলেই আহ্লাদিত হইবেন সন্দেহ নাই। কিন্তু আমি যাহার জন্য পণ্ডিতবরের কথা পাড়িলাম তাহা এই, তিনি একটা ভীষণতার কার্য্য করিয়া অনেককে নিরুৎসাহ করিয়াছেন। তাঁহার জাতির লোকের অনুরোধে তিনি নাসিকে গিয়া শিরোমুণ্ডন ও পঞ্চগব্য ভক্ষণ করিয়া প্রায়শ্চিত্ত করিয়াছেন। পবিত্র গোদাবরীতে স্নান করিয়া ইউরোপ প্রবাসের পাপ প্রক্ষালন করিয়াছেন। ইহাতে নানাদিক্ হইতে নানান্ কথা উঠিয়াছে। তিনি যে এতদূর অবনতি স্বীকার করিবেন তাহা আমাদের মনে হয় নাই। দুই বৎসর পূর্বে তিনি ভারত প্রত্যাগত হইয়া আপনার সহধর্ম্মিনীকে বিলাতে সঙ্গে লইয়া যান তাহাতে বোধ হইল জাতিভয়ে তিনি বিচলিত হইবার পাত্র নন। এক্ষণে দেখা গেল তাহার সম্পূর্ণ বিপরীত। জাতভায়াদের কঠোর শাসনে নতশির হন না এমন সাহসী হিন্দু-যুবা এদেশে কেহ আছে কি না সন্দেহ। প্রথমে যখন একজন গুজরাতী ব্রাহ্মণ এদেশ হইতে ইংলণ্ডে গমন করেন তিনি ফিরিয়া আসিলে তাঁহার জাতিবর্গের মধ্যে

মহা হুলস্থূল বাধিয়া যায় । প্রায়শ্চিত্ত করিয়াও শেষে তিনি পার পাইলেন না । তাঁর জাতি দুই দলে বিভক্ত হইল, এক দল তাঁহার পক্ষ এক দল বিপক্ষ । কিন্তু এ অনেক দিনের কথা । এক্ষণে জিজ্ঞাস্য এই, ২০, ২৫ বৎসরের মধ্যে কি এ সম্বন্ধে কিছুই উন্নতি হয় নাই ? এখনো কি জাতির এমন কঠোর শাসন যে তাহার ভয়ে আপনার মত ও বিশ্বাস জলাঞ্জলি দিতে হইবে ? কোন হিন্দুর কি এতটুকু সাহস নাই যে আপনি যাহা সত্য বলিয়া জানেন, যাহা কর্তব্য জ্ঞান করেন, তাহা অকুতোভয়ে অবলম্বন করিতে পারেন—আপনার আন্তরিক বিশ্বাস অনুষ্ঠানে পরিণত করিতে পারেন ? বহুরূপীর মত একবার ইউরোপীয় সভ্যতার সং সাজিয়া নৃত্য করা আবার তাহা পাপ বলিয়া ফেলিয়া দেওয়া এই কি সত্য-নিষ্ঠ সাহসী পুরুষের কার্য্য ।

জাতিভেদের ণ্মায় বাল্যবিবাহ আর চির-বৈধব্য-প্রথা হিন্দু সমাজের ললঙ্ক স্বরূপ নির্দেশ করা যাইতে পারে । কিন্তু চির-বৈধব্য-প্রথা যে এখনকার সমস্ত হিন্দু-জাতির মধ্যে প্রচলিত তাহা নহে । এমন অনেক জাতি আছে যাহার মধ্যে বিধবা-বিবাহ নিষিদ্ধ নহে । ব্রাহ্মণ ও ব্রাহ্মণদের দৃষ্টান্তে যাহার চলন সেই সকল জাতির মধ্যেই এই প্রথা দৃষ্ট হয় । এই প্রথার আনুষঙ্গিক এক ভয়ানক কুৎসিত নিয়ম আবহমান কাল চলিয়া আসিতেছে—সে কি না বিধবার মস্তক মুণ্ডন । আমাদের বিধবাদের অনেকগুলি নিয়ম পালন করিতে হয়—উপবাস, একসন্ধ্যা আহার, অলঙ্কার পরিহার, কিন্তু ভাগ্যক্রমে শিরো-

মুগুন-প্রথা তাহার উপর নাই । এদেশীয় বিধবাদিগের সে সব ত আছেই তাহার উপর এ অত্যাচার সহ্য করিতে হয় । ভবিষ্যতে বিধবা-স্ত্রীর যে-সকল জ্বালা যন্ত্রণা অদৃষ্টে আছে পতি-বিয়োগের পরক্ষণেই নাপিতের হাতে কেশচ্ছেদন তাহার পূর্বাভাস । স্ত্রীলোকের পক্ষে এ যে কি ভয়ানক যন্ত্রণা তাহা আমরা সহজে কল্পনা করিতে পারি না । আমার বিবেচনায় এ অপেক্ষা সহমরণ অনেক গুণে ভাল ছিল, মুহূর্তের মধ্যে সতীর সকল কষ্টের অবসান হইত । শিরোমুগুন কিম্বা মুগুচ্ছেদন যদি কোন রমণীর এ ছয়ের একটি বাছিয়া লইতে হয় তাহা হইলে বোধ করি সে বেচারী শেষোক্ত দণ্ডই ঘাড় পাতিয়া লয় । স্ত্রীলোকের যা অমূল্য আভরণ—যে ‘রূপের নিগড় কি অমরে কিবা নরে না বাঁধে কাহারে’—সেইটী হরণ করিতে পারিলেই নির্ভীক হওয়া গেল—আর তাহার রূপলাবণ্যের কোন গৌরব রহিল না—তাহার সতীত্বের প্রতি আঘাতের কোন শঙ্কা রহিল না এই উদ্দেশ্যেই এই নিষ্ঠুর নিয়ম সৃষ্টি হইয়া থাকিবে । আশ্চর্য্য এই যে, যে সকল জাতির মধ্যে বিধবাবিবাহ চলিয়া আসিতেছে তাহারাও ব্রাহ্মণদের দেখাদেখি ঐ কঠোর রীতি অবলম্বন করিতে প্রস্তুত । কুদৃষ্টান্তের এমনি বল ! সে দিন দেখিলাম আমার এক কায়স্থ বন্ধু, রায় বাহাদুর, আপনার পরিবারস্থ এক তরুণবয়স্কা বিধবা কন্যার শিরোমুগুনে স্বচ্ছন্দে অনুমোদন করিলেন । স্বচ্ছন্দে বলাটা ঠিক হইল না—জাতির অনুরোধে বলা উচিত, কিন্তু তিনি এক জন শিক্ষিত নব্যদলের লোক হইয়া

এরূপ স্থলে এ অনুরোধ এড়াইতে না পারিলেন ত আর কি হইল ? সমাজসংস্কার-আশা আর কোথায় রহিল !

বাল্য-বিবাহ আর এক বিষম রীতি। শুধু বঙ্গদেশে নয় ভারতের সর্বত্রই ইহার গরলময় ফল প্রত্যক্ষ করা যায়। কন্যাকে অত ছোট বয়সে পিতা মাতা গৃহ হইতে বিদায় করিয়া যে কি স্বর্গ-সুখ লাভ করেন তাহা আমি ভাবিয়া পাই না। পুত্রের বিদ্যা শিক্ষা তাহার স্বাধীন বৃত্তি উপার্জনের উপায় করিয়া দেওয়া—এ সকল গুরুতর কর্তব্য ছাড়িয়া দিয়া সর্বত্র তাহার বিবাহ দিতেই গুরুজনেরা ব্যস্ত। এদেশে বালক বালিকার বিবাহ পুতুলে পুতুলে বিয়ের মতন। একজন গাইকওয়াড় ছিলেন তিনি পায়রার বিয়ে দিতে বড় ভাল বাসিতেন—তাঁহার সভাসজ্জন নিমন্ত্রণ করিয়া খুব ধুমধামে কপোত কপোতীর বিবাহোৎসব অনুষ্ঠান করিতেন—এই সব বালক বালিকার বিবাহ অনেকটা সেইরূপ। এদেশে দশ বার বৎসরের বালক ও সাত আট বৎসরের বালিকাকে সচরাচর উদ্ভাহ-শৃঙ্খলে বদ্ধ হইতে দেখা যায়। এইরূপ বাল্যবিবাহ হইতে হিন্দুসমাজের যে কত অনর্থোৎপত্তি হইতেছে বলা যায় না। আমি বলিতেছি না যে আমাদের দেশে বাল্যবিবাহের উপযোগিতা আদর্শে নাই—কিন্তু দেখিতে গেলে অনর্থের ভাগই অধিক তাহার কোন সন্দেহ নাই। বালিকা প্রসূতি,—স্কুলের ছাত্রের উপর বৃহৎ পরিবার পোষণের ভার,—নিবীৰ্য্য রুগ্ন সম্ভান সম্ভতি, শিক্ষার ব্যাঘাত, দারিদ্র্য, অকাল জন্ম, অকাল মরণ, অকাল পকতা, অকাল জীর্ণ

দশা, এই সকল অনিষ্ট কাহার' চ'থে আঙ্গুল দিয়া দেখাইয়া দিবার আবশ্যক করে না, তাহা আমাদের সমাজে জাজ্বল্যমান প্রকাশিত রহিয়াছে। কেহ বলিতে পারেন যে গ্রীষ্মপ্রধান দেশে মানুষের শরীর মনের শক্তি-সকল অকালে পরিপক্ব হয় এই জন্য তরুণ বয়সে বিবাহ দেওয়াই আবশ্যক হইয়া পড়ে। কিন্তু তাহার ত একটা সীমা প্রকৃতিতে নির্দিষ্ট আছে, দুষ্কপোষ্য বালক বালিকারা কখন বিবাহের উপযুক্ত হইতে পারে না। চিকিৎসা-শাস্ত্র হইতে আমরা জানিতেছি যে অমুক বয়সের পূর্বে আমাদের শরীরের পূর্ণতা লাভ হয় না সেই পূর্ণ বয়সের পূর্বেই বিবাহ দেওয়া স্ত্রী পুরুষ উভয়ের পক্ষেই অনিষ্টকারী—সে বিবাহের ফল অমঙ্গল এ কথা কেহই অস্বীকার করিতে পারেন না।

এক্ষণে কথা হইতেছে এ রোগের ঔষধি কি? এ সকল অনিষ্ট নিবারণের উপায় কি? মালাবারি নামক প্রসিদ্ধ পারসী লেখক বালবিবাহ ও বলাৎকার-বৈধব্য বিষয়ে এক প্যাম্ফ্লেট লিখিয়াছেন, তাহা লইয়া সংবাদপত্রে অনেক বাদানুবাদ চলিতেছে। এখন প্রশ্ন এই যে বাল্যবিবাহ নিবারণের জন্য কোন আইন করা বিধেয় কি না? অনেকে ইহার বিপক্ষে মত দিবেন সন্দেহ নাই, তাঁহারা বলিবেন দেশাচার সংশোধনের জন্য গবর্ণ-মেণ্টের শরণাপন্ন হওয়া অন্যায়। কিন্তু আমি দেখিতেছি ইহার পক্ষেও অনেক কথা বলিবার আছে। সমাজের সুখশান্তি-রক্ষণ—অনিষ্ট নিবারণ এই উদ্দেশ্যেই আইন প্রবর্তিত হয়—

তাহাতে কখন যদি ব্যক্তিগত স্বাধীনতার খর্ব্বতা হয় তাহার উপায়ান্তর নাই। এই স্বাধীনতাটুকু হরণ করা সমাজের উপকারের জন্যই অনেক সময় আবশ্যক হয়। আমাদের দেশের অনেক সামাজিক কুরীতির উপর আইনের হস্তক্ষেপ করিতে হইয়াছে নহিলে তাহার উচ্ছেদসাধন কঠিন হইত। দ্রুণহত্যা—নরবলি—সহমরণ প্রভৃতি এদেশের চিরন্তন প্রথা-সকল আইন দ্বারা নিবারিত হইয়াছে, তবে এটা হয় না কেন? যে সকল বিষয়ে অপ্রাপ্তবয়স্কদিগের হিতাহিত নির্ভর করে অনেক সময় আইন তাহার উপর হস্তপ্রসারণ করেন। যে রীতি অনুসারে বালক বালিকা চিরকালের জন্য অকাট্য বন্ধনে বদ্ধ হইতেছে, যাহার উপর তাহাদের চিরজীবনের সুখ দুঃখ নির্ভর, তাহাতে রাজার নিয়ম হস্তক্ষেপ করিতে পারিবে না এমন কখনই হইতে পারে না। আইন দ্বারা বিবাহের একটা বয়স নির্দিষ্ট হওয়া কি ভাল নয়! পুরুষের ধর ১৮ বৎসর মেয়েদের ১৫ বৎসরের নীচে বিবাহ নিষেধ এরূপ নিয়ম বিধিবদ্ধ হওয়া কি নিতান্ত অন্তায়? কেহ বলিতে পারেন এরূপ করিতে গেলে ধর্ম্মের উপর হস্তক্ষেপ করা হয়। কিন্তু আমাদের কোন্ শাস্ত্রে বাল্যবিবাহ অনুমোদন করে? পুরাতন আৰ্য্যদিগের যে চতুরাশ্রমের নিয়ম ছিল—ব্রহ্মচর্য্যের পর গার্হস্থ্য—তাহা কি আমরা ভুলিয়া গিয়াছি। অধ্যয়নের বয়সে দারপরিগ্রহ করিয়া কখন সংসারের ভার গ্রহণ করিবার রীতি ছিল না। মেয়েদের অধিক বয়সে বিবাহ দিবার যে সামাজিক প্রতিবন্ধক আছে পুরুষদের সম্বন্ধে তাহা কিছুই

নাই । অতএব নিদান পুরুষের বিবাহের একটা বয়স সহজে ঠিক করা যাইতে পারে—মেয়েদের বয়স পরে আপনা হইতেই নিয়মিত হইবে । মালাবারি মহাশয় প্রস্তাব করিয়াছেন যে ইউনিবর্সিটি হইতে অবিবাহিত ছাত্রদের অনুকূলে কোন বিশেষ নিয়ম প্রচারিত হউক । তিনি আরো বলেন, ষাঁহাদের হাতে চাকরি বিতরণের ক্ষমতা আছে তাঁহারা বিবাহিত কর্মপ্রার্থীদিগকে বাছিয়া লইতে উদ্যত হউন তাহা হইলে ক্রমে বিবাহ করিবার নেশা ছুটিয়া যাইবে । এ সকল প্রস্তাব যুক্তিসঙ্গত বোধ হয় না । বিদ্যার চাবি, ধনের চাবি অবিবাহিতের হাতে—লক্ষ্মী সরস্বতীর প্রসাদ আইবড়র প্রতিই মুক্তহস্তে বিতরিত হইবে আর বিদ্যার দ্বার বিবাহিত পুরুষের প্রতি রুদ্ধ হইবে, স্ত্রী পুত্র কন্যা-ভারাক্রান্ত-পুরুষ কর্মের অভাবে শুকাইয়া মরিবে এ নিয়ম নিতান্ত অন্যায় । সে যাহা হউক আমাদের সমাজ সংস্কারকেরা চেষ্টা করিলে এ কুরীতি উৎপাটনে কতক পরিমাণে কৃতকার্য হইতে পারিবেন সন্দেহ নাই, আমাদের শিক্ষিত যুবকেরা মিলিয়া যদি এক সমাজ বন্ধন করিয়া অমুক বয়সের আগে বিবাহ করিব না, এইরূপ প্রতিজ্ঞা করেন তাহা হইলে আপনা হইতেই ক্রমে বিবাহের নিয়ম পরিশুদ্ধ হইয়া আসিবে । এবিষয়ে তোমার কি বক্তব্য জানিতে ইচ্ছা করি ।

প্রবাস পত্র ।

(তৃতীয় পত্র)

আমি গতবারের পত্র বাল্যবিবাহে শেষ করিয়াছিলাম এবার তাহা হইতে আরম্ভ করি । আমার লেখা শেষ হইবার পর ফাল্গুন মাসের ভারতীতে বাল্যবিবাহ শীর্ষক প্রবন্ধ পাঠ করিলাম । লেখক মহাশয় বাল্যবিবাহের বিপক্ষ দলের প্রতি প্রাণপণে অস্ত্রচালনা করিয়াছেন । কিন্তু আমার বোধ হইল তিনি ত্রীফ লইয়া ব্যারিষ্টরের মত একপক্ষে কথা কহিতেছেন—তর্কের জন্য তর্ক করিতেছেন—নিরপেক্ষ ভাবে ঐ প্রথাটির দোষগুণ বিচার করেন নাই । তাঁহার চক্ষে বাল্যবিবাহের সকলি মধুময়, সুধাময়, সৌন্দর্য্যময়—তাহাতে দোষের লেশ মাত্র নাই । একপক্ষের কথা শুনিয়া কোন বিষয়ের প্রকৃত মীমাংসা করা দুঃসাধ্য তাই আমি আমার পক্ষের আরো দু একটি কথা বলিতে চাই ।

আমাদের দেশে বাল্যবিবাহ সর্বত্র প্রচলিত কিন্তু প্রচলিত বলিয়াই তাহার গুণ মানিয়া লইতে হইবে তাহা আমি স্বীকার করি না । নানান কারণে এই রীতিটি হিন্দু সমাজে প্রবেশ লাভ করিয়াছে । ভ্রান্তমত ও বিশ্বাসের প্রভাবে ইহা ধর্ম্মের মতে একপ্রকার জড়িত হইয়া পড়িয়াছে । কন্যা-ধর্ম্ম প্রাপ্ত হইবার পূর্বে কন্যার বিবাহ দিতেই হইবে, নহিলে জাতি কুল মান লইয়া সর্বনাশ উপস্থিত—এই সংস্কার হিন্দু সমাজে

যতদিন থাকিবে ততদিন বাল্য-বিবাহও রাজত্ব করিবে। গুজ-রাটে একজাতীয় চাষা আছে তাহাদের নাম কড়ুয়া কুনবী, তাহাদের মধ্যে এক অদ্ভুত প্রথা এই যে, দ্বাদশ বৎসর অন্তর তাহাদের বিবাহ কাল উপস্থিত হয় তখন বালক বালিকার বিবাহ দিবার জন্য মা বাপ আকুল হইয়া পড়েন, কেন না সে সময়টি চলিয়া গেলে বার বৎসরের মধ্যে আর বিবাহের লগ্ন নাই স্বতরাং এ জাতির মধ্যে এই নিয়মটি বাল্যবিবাহের প্রবর্তক। ইহাদের মধ্যে অনেক সময় দুগ্ধপোষ্য বালক বালিকার বিবাহ ঘটনা শ্রুত হওয়া যায়। এইরূপ অনেক কারণে বাল্যবিবাহ হিন্দুসমাজে স্থান পাইয়াছে কিন্তু আমার মতে এ কাল-সর্পকে প্রশ্রয় দিলে আমাদের কোনমতে রক্ষা নাই—কালক্রমে আমাদের সমাজ প্রলয়-দশা প্রাপ্ত হইবে।

রসিক বাবু বাল্যবিবাহের বিরুদ্ধে আপত্তি সকল যুক্তি দ্বারা খণ্ডন করিতে চেষ্টা পাইয়াছেন কিন্তু তাহাতে যে কৃত-কার্য্য হইয়াছেন তাহা বোধ হয় না। বাল্যবিবাহে দম্পতীর শরীর মন রুগ্ন হইয়া পড়ে এ বিষয়ের দোষটা তিনি দম্পতীর অভিভাবকের স্কন্ধে চাপাইতে চান। তাহার অর্থ স্পষ্টাক্ষরে এই বুঝা যায়—বিবাহ ও বিবাহের পরিণতি—এ দুই স্বতন্ত্র রাখা উচিত—তাহা হইলে এ প্রথার দোষের ভাগ পরিত্যাগ করিয়া গুণের অংশ গ্রহণ করা হয়। কিন্তু এ কেবল কথার কথা, কাজে এরূপ নিয়ম হওয়া অসম্ভব। মহারাষ্ট্র ও অন্য কোন কোন দেশে এই রীতি আছে বটে যে মেয়ে বড় না হইলে

পিতৃগৃহ হইতে পতিগৃহে প্রেরিত হয় না। যে দেশে এই রীতি প্রচলিত সে দেশে বাল্যবিবাহের দোষ অনেকাংশে পরিহার হয় কিন্তু বাঙ্গালা দেশে এ নিয়ম নাই। যেখানে বিবাহের পরেই বৌমাকে শ্বশুরালয়ে বাস করিতে হয় সেখানে ওরূপ ব্রতরক্ষা সূকঠিন। বালদম্পতী বিবাহপাশে বদ্ধ হইয়াও অবিবাহিতের ন্যায় থাকিবে এরূপ নিয়ম জারী করা সহজ, এ নিয়ম পালন করা সহজ নহে। বর্তমান সমাজে তাহা হওয়া একপ্রকার অসম্ভব। গৃহকর্তা অন্ধ অথবা দেখিয়াও দেখেন না; আর তাঁহারই বা দোষ কি? দিনের বেলায় ত নবদম্পতীর কথা কহিবার অধিকার নাই—রাত্রিকালেও কি তাহারা ছুই এক দণ্ড মিলিবার সুযোগ পাইবে না? ফলে দাঁড়ায় এই, নিয়ম পালন অপেক্ষা নিয়ম উল্লঙ্ঘনই অধিক প্রচলিত হয়।

More honored in the breach than in the observance।

অল্প বয়সে বিবাহ করিলে স্বামী স্ত্রী উভয়েরই যে শিক্ষার ব্যাঘাত হয় তাহার দৃষ্টান্ত আমাদের সমাজে রাশি রাশি পড়িয়া আছে। ‘বৌ ধরেই বই ছাড়ে’ অনেক পুরুষের এরূপ ছদ্দশা দৃষ্টিগোচর হয়, আর স্ত্রীশিক্ষার ত কথাই নাই। আমাদের বালিকাগণ বড় জোর ১১, ১২ বৎসর পর্য্যন্ত স্কুলে কি গৃহে পাঠাভ্যাস করিতে সক্ষম—বিবাহের পর অধিকাংশ বালিকাই মাফার পণ্ডিতের সংশ্রব ত্যাগ করিতে বাধ্য। ইহাতে আর বিদ্যা শিক্ষা কি হইবে? যে স্ত্রী ভাগ্য-বশতঃ শিক্ষিত স্বামীর হস্তে পড়ে—এমন স্বামী যিনি গুরুগরি পর্য্যন্ত স্বীকার করিয়া

স্ত্রীকে আপনার যথার্থ সঙ্গিনী, সহধর্মিণী করিতে উৎসুক তাঁহারই শিক্ষা লাভ ঘটে নতুবা সংসারে প্রবেশ করিয়া বালিকা পূর্বপাঠ সকলি ভুলিয়া যায়—তাহার পূর্বশিক্ষার ফল সর্বৈব ব্যর্থ হয় । এদেশের স্ত্রী বিদ্যালয়ের সঙ্গে যাঁহার কিছুমাত্র সম্পর্ক আছে তিনি ইহার প্রমাণ পদে পদে জাঙ্ঘল্যমান দেখিতে পান—বাল্যবিবাহ স্ত্রীশিক্ষার যে ভয়ানক শত্রু তাহা বিলক্ষণ বুঝিতে পারেন ।

বাল্যস্ত্রী-প্রসূত সন্তান রুগ্ন ও ক্ষীণকায় হয় এ কথা লইয়া যে তর্ক উঠিতে পারে তাহা আমি জানিতাম না । তর্কবলে আমরা সত্যকে মিথ্যা, মিথ্যাকে সত্য বলিয়া বুঝাইয়া দিতে পারি কিন্তু সে জাহ্নুকারের ভেক্কীর মত চ'খে ধাঁদা দেওয়া মাত্র—প্রকৃতির নিয়ম তাহার বিপরীতে সাক্ষ্য দেয় । ফল ফুল পাকিবার নির্দিষ্ট সময় আছে । পশু পক্ষীর যৌবনের বয়স নিরূপিত আছে, তাহার সীমা তাহারা উল্লঙ্ঘন করে না, মানব-দেহও প্রকৃতির নিয়মাধীন । তাহার পরিপক্বতার বয়স নির্দ্ধারিত আছে । অকালপক্ব ফল যেমন স্বস্বাদু হয় না অকালপ্রসূত সন্তানও সেইরূপ ক্ষীণমনঃকায় হইয়া ভূতলে অবতীর্ণ হয় । এক্ষণে জিজ্ঞাস্য এই, প্রাকৃতিক নিয়ম অনুসারে কোন্ বয়সে স্ত্রী পুরুষের বিবাহ দেওয়া উচিত ? পাঠকদিগের স্মরণ থাকিতে পারে, বিবাহের নূতন আইন প্রচলিত হইবার পূর্বে মহাত্মা কেশবচন্দ্র সেন এই বিষয়ে কতকগুলি দেশীয় ও ইউরোপীয় ডাক্তারের মত জিজ্ঞাসা করেন—ডাক্তার নর্ম্মাণ চেবার্ন্স, ডাক্তার

কোরার, ডাক্তার মহেন্দ্রলাল সরকার—ডাক্তার আত্মারাম পাণ্ডু-রঙ্গ প্রভৃতি বিচক্ষণ ডাক্তারেরা বিবাহের বয়স সম্বন্ধে সেই সময় আপন আপন অভিপ্রায় প্রকাশ করিয়াছেন । এদেশের আবহাওয়ার গুণাগুণ, দেশীয়দের শরীর-প্রকৃতি তাঁহারা যেমন ভাল বুঝেন আমরা তেমন বুঝি না । এই সকল বিষয় বিচার করিয়া তাঁহারা কি বলিয়াছেন ? তাঁহারা বলেন যে পুরুষের ২০ বৎসরের নীচে—মেয়ের ১৬ কিম্বা ১৭ বৎসরের আগে বিবাহ দেওয়া উচিত নয় । ১৬ জন ডাক্তারের মত লওয়া যায় তাহার মধ্যে কেবল একজন (ডাক্তার চন্দ্র) এদেশে স্ত্রীলোকের বিবাহের বয়স ১৪ বৎসর নির্দেশ করিয়া বলেন । এই সকল পণ্ডিতের মত এই যে স্ত্রীলোক স্ত্রীধর্ম প্রাপ্ত হইলেই যে সন্তান ধারণের উপযুক্ত হইল তাহা নহে । আরো দু তিন বৎসর অতীত হইলে তবে তাহাদের প্রসবের উপযোগী অঙ্গ প্রত্যঙ্গ পূর্ণতা প্রাপ্ত হয় । ইহা হইতে প্রমাণ হইতেছে যে আমাদের দেশের বিবাহের নিয়ম প্রাকৃতিক নিয়মের বিরোধী । যে সকল স্থানে দ্বিতীয় বিবাহের পর স্বামী স্ত্রীর একত্র সহবাসের রীতি আছে সেখানেও বাল্য-বিবাহের দোষ সম্পূর্ণরূপে নিরাকৃত হয় না কেন না এই সময় হইতেই যে স্ত্রীলোকের বিবাহের বয়স তাহা নহে । তাহাদের শরীরের পূর্ণতা, যৌবনের বিকাশ আরো অধিককাল সাপেক্ষ ।

বালক বালিকা অপ্রাপ্ত-বয়সে স্বামী স্ত্রীর আয় একত্রে সহ-বাস করিবে ইহা প্রকৃতি ও বিজ্ঞানের নিয়মের সম্পূর্ণ বিপরীত ।

তবে এত অল্প বয়সে বিবাহ দিতে পিতা মাতার এত আগ্রহ কেন? অপ্রাপ্ত-বয়স্ক পুত্র কন্যার উপর এইরূপ অধিকার খাটাইয়া কি তাঁহারা ভাল কাজ—মা বাপের উপযুক্ত কাজ করেন? যে বয়সে সম্ভাব্য স্বাধীন ইচ্ছা পরিষ্কৃতিত হয় নাই—নিজের মতামত দিবার ক্ষমতা জন্মে নাই সে বয়সে চির-জীবনের মত তাহাকে উদ্ধাহশৃঙ্খলে বদ্ধ করিয়া কি তাঁহারা সুবিবেচনার কার্য্য করেন? আমি একথা বলিতেছি না যে পুত্র কন্যার বিবাহে পিতা মাতার অধিকার নাই—মতামত দিবার ক্ষমতা নাই—হস্তক্ষেপ করিবার আবশ্যক নাই। আমি বলি নিদান এতটুকু বয়স পর্য্যন্ত অপেক্ষা করা উচিত যে বয়সে দম্পতী আপনারা জানিয়া শুনিয়া বিবাহ করিতে পারে—বিবাহে আপনাদের ইচ্ছানিচ্ছা প্রকাশ করিতে পারে। যে বয়সে তাহারা বিবাহের মৰ্ম্ম বুঝিতে ও নিজ নিজ মত ব্যক্ত করিতে অসমর্থ সে বয়সে তাহাদের বিবাহ ঘটাইয়া দেওয়া অন্যায়। এ কথা সত্য বটে যে আমাদের সমাজে বিবাহের স্বাধীন ক্ষেত্র নাই, স্ত্রী পুরুষের স্বয়ম্প্রণয়ের (Courtship) সুবিধা নাই—বাপ মায়ের ঘটকালী ব্যতীত চলে না, কিন্তু তাহার অর্থ ইহা নহে যে বিবাহকালে আসল পাত্র পাত্রীর মুখ বন্ধ থাকিবে তাহাদের নিজ মতামতের কোন প্রয়োজন নাই। স্বাধীন ইচ্ছাতেই মনুষ্যের মনুষ্যত্ব। কন্যার উপর পিতামাতার যতই অধিকার থাকুক না কেন তথাপি দেখিতে হইবে যে সে স্বাধীন ইচ্ছা-বিশিষ্ট জীব—ঘটী বাটীর মত ব্যবহারের জিনিস নহে। তাহার

স্বাধীনতাটুকু যতদূর বজায় রাখা যাইতে পারে তাহা কর্তব্য । যে সামাজিক নিয়ম তাহার প্রতি একেবারেই লক্ষ্য করে না অথবা যাহার প্রভাবে তাহা সমূলে বিনষ্ট হয় সে নিয়ম কদাপি হিতাবহ হইতে পারে না ।

আমি বলিয়াছি অপ্রাপ্তবয়স্কের উপর রাজবিধির মমতা অধিক । যেখানে অপ্রৌঢ় বালক বালিকার অনিষ্ট আশঙ্কনীয় সেখানে রাজনিয়ম হস্তপ্রসারণ করিতে কুণ্ঠিত নহে । তাহার এক দৃষ্টান্ত মনে হইতেছে । মনে কর যদি কোন বারনারী তাহার অপ্রাপ্তবয়স্ক কন্যাকে নিজ বৃত্তিতে নিয়োজিত করে তাহা হইলে সে দণ্ডনীয় হয় কি না ? এদেশে ‘নায়িকা’ নামে একদল বারনারী আছে তাহারা দেবমন্দিরে নৃত্যাদি কার্যে নিযুক্ত । তাহাদের ঘরে কোন সুন্দরী ছোট মেয়ে থাকিলে তাহারা কখন কখন প্রকাশ্যভাবে তাহাদিগকে আপনাদের ব্যবসায় দীক্ষিত করে, কিন্তু এরূপ করিয়া অনেক সময় তাহারা পীনল কোডের গ্রাসে পতিত হয় । এই প্রকার দীক্ষার বিশেষ বিধান ও অনুষ্ঠান আছে, তাহার নাম ‘সেজ’ বিধি । সে অনুষ্ঠান বিবাহের ভড়ং মাত্র—বরের ঠিকানায় একটা খড়্গ কি ছুরিকা প্রতিষ্ঠিত হয়—তাহার উপর ফুলের মালা রাখিয়া পুরোহিত মন্ত্র পাঠ করে ও মেয়ে তাহাকে পতিত্বে বরণ করে । সেই অবধি দেবতার কার্যে ও কুল-ধর্মে তাহার জীবন উৎসর্গীকৃত হইল । বোম্বাই হাইকোর্টের রিপোর্টে (ষষ্ঠ খণ্ডে, Crown cases page 60) এ সম্বন্ধে এক মকদ্দমা দেখিতে পাইবে । আমি কারওয়ারে

থাকিতে এইরূপ মকদ্দমা মাঝে মাঝে আমার কাছে আসিত । আসামীর বক্তব্য এই—এ আমাদের চিরস্তন প্রথা—মেয়েকে আমাদের কুলধর্মে দীক্ষিত করাতে দোষ কি ? কিন্তু দেশাচার কুলাচার সত্ত্বেও আইনের অনুশাসন এই যে অপ্রোচা বালিকার উপর এরূপ অত্যাচার দণ্ডনীয় । আইন যদি এস্থলে দেশাচারের উপর হস্তক্ষেপ করিতে পারিল তাহা হইলে অজ্ঞান বালিকার হিতসাধন উদ্দেশে কি আরো কতকদূর অগ্রসর হইতে পারে না ? আমরা অনেক সময় দেখিতে পাই পিতা আপন অল্পবয়স্কা কন্যাকে পঞ্চ সতীনের ঘরে বিসর্জন দিয়া তাহাকে চির জীবনের মত অশুখী করিতেছেন, অর্থলোভে আপনার অষ্টম-বর্ষীয় দুহিতাকে পলিতকেশ বৃদ্ধ বরের হস্তে অকাতরে সমর্পণ করিতেছেন ইত্যাদি,—এরূপ স্থলে কি রাজদণ্ড হস্ত উত্তোলন করিবে না ? বাল্য বিবাহ হইতে যে সকল মহা অনিষ্ট উদ্ভূত হইতেছে তাহা নিবারণের জন্য সমাজ যখন নিশ্চেষ্ট অথবা সমাজ যখন আপনার মস্তক আপনি ছেদন করিতে উদ্যত তখন আমার বিবেচনায় রাজ-নিয়মই তাহার উদ্ধারের একমাত্র উপায় । আমি বিবাহ সম্বন্ধে দুইটি মূলতত্ত্ব স্থির করিয়াছি, আমার মতে তাহা অখণ্ডনীয় ও সর্ববাদীসম্মত বলা যাইতে পারে । প্রথম এই যে, দম্পতী যোগ্য বয়সে জানিয়া শুনিয়া ইচ্ছাপূর্বক বিবাহ করিবে ।

দ্বিতীয়, স্ত্রী পুত্র ভরণ পোষণের সামর্থ্য বুঝিয়া পুরুষ দার-পরিগ্রহ করিবে ।

আমাদের দেশের বিবাহ প্রণালী এ দুই মূল-সূত্রের উপরেই কুঠারাঘাত করে—তাহার ফল দাম্পত্য অসুখ,—দুঃখ দারিদ্র, হীনবীৰ্য্য সন্তান সন্ততি।

বিবাহের বিষয়ে অনেক বলা হইয়াছে এখন আর কোন কথা পাড়া যাক্। সংসারের দুই দিক আছে এক উজ্জল হাস্য-ময়, অপর দুঃখশোকসমন্বিত অন্ধকার। একদিকে মহোল্লাস অন্যদিকে হাহাকার। বিবাহের অভিনন্দন হইতে মৃত্যু শোকের ক্রন্দন হঠাৎ মনে উদয় হইল। আমাদের বিবাহ যেমন অনেক সময় পুতুলে পুতুলে বিবাহের ন্যায়—বিবাহের ভাণ মাত্র, তেমনি গুজরাটে একটা রীতি আছে তাহা শোকের ভাণ—পেশাদারী শোক প্রকাশ। মৃত ব্যক্তির জন্য শোক করিতে হইলে একদল স্ত্রী ভাড়া করিয়া আনা হয়, তাহারা বুক চাপড়াইয়া মহা আৰ্ত্তনাদ আরম্ভ করে। পথে ঘাটে এইরূপ শোক-ভাণকারিণী বিলাসিনী দেখিতে পাইবে—দেখিলে মনে হয় যেন কাহার কি সর্ব্বনাশ উপস্থিত হইয়াছে। কিন্তু তাহাদের তালে তালে বক্ষাঘাত—অশ্রুহীন-বিলাপধ্বনি ও কৃত্রিম ভাব-ভঙ্গী দেখিয়া শীঘ্রই সে ভ্রম দূর হয়। যেমন কৃত্রিম আমোদ তেমনি কৃত্রিম বিলাপ—সংসার কৃত্রিমতায় পরিপূর্ণ।

এ দেশের আচার ব্যবহার বর্ণন উপলক্ষে পান ভোজনের রীতি জানিতে তোমার কৌতূহল হইতে পারে। আহার বিষয়ে এখানকার ব্রাহ্মণ ও উচ্চ জাতিদের মধ্যে মৎস্য মাংস পরিহার্য্য তবুও মাংসাশী জাতির সংখ্যা কম নয়। কোঙ্কণ

ও কানাড়ার সমুদ্র তটবর্তী ধীবর ও অন্যান্য নীচজাতীয় লোক মৎস্য-ভোজী। বাঙ্গালীদের মত মাছ ভাত তাহাদের উপ-জীবিকা। মহারাষ্ট্রী শূদ্রদের মধ্যেও আমিষভক্ষণ নিষিদ্ধ নহে। সেনবী নামক একজাতীয় ব্রাহ্মণ আছে তাহারা আপনাদিগকে গোড় ব্রাহ্মণ বলিয়া পরিচয় দেয়—তাহারা মৎস্যজীবী। কিন্তু অন্য ব্রাহ্মণদের দেখাদেখি তাহাদের অনেকে নিরামিষ ভোজন ধরিয়াকে অথচ উচ্চ শ্রেণীর ব্রাহ্মণেরা তাহাদিগকে ব্রাহ্মণের মধ্যেই গণ্য করে না। তাহাদের নাম ও আচার ব্যবহার দেখিয়া বোধ হয় যে আসলে তাহারা গোড় ব্রাহ্মণ—বঙ্গদেশ হইতে এদেশে আসিয়া বাস করিয়াছে। গুজরাটবাসীগণ প্রায়ই নিরামিষাশী দেখা যায় তাহার কারণ সে দেশে জৈনদের বাস। যেখানে জৈনধর্মের প্রাচুর্য্য সেখানে জীবহিংসা নিষেধ, অহিংসা পরমোধর্ম্য। গুজরাটে মুসলমানদের ভারি দুর্দশা, কোন কোন গ্রামে হিন্দুদের দৌরাংয়ে কশাই টিকিতে পারে না, দায়ে ঠেকিয়া মুসলমান ভায়াদের মাংস ত্যাগ করিতে হয়, ইংরাজ বাহাদুরেরাও শীকার করিতে গিয়া এক এক সময়ে গ্রাম্য জন-পদ কর্তৃক তাড়িত হইয়া বিপদগ্রস্ত হন। সামান্যতঃ বলিতে গেলে বোম্বাইবাসী রুটিখোর, বাঙ্গালীর মত ভাতজীবী নয়। কিন্তু এ নিয়মের অপবাদ আছে। কোঙ্কণ কানাড়া প্রভৃতি যেখানে বর্ষার প্রাচুর্য্য বশতঃ প্রচুর ধান জন্মে ভাতই সেখানকার লোকদের জীবনের অবলম্বন। তদ্ব্যতীত বাজরী, জওয়ারী গম প্রভৃতি যেখানে যেরূপ শস্য জন্মে সেখানে তাহা সাধারণ

লোকের মধ্যে প্রচলিত । গুজরাত ও সিন্ধুদেশ^১ বাজরী-প্রধান দেশ—আমি এক্ষণে যে প্রদেশে বাস করিতেছি (সোলাপুর ও বীজাপুর) সেখানে জওয়ারীই শ্রমজীবী জনগণের আহার । তবে ইহা স্বীকার করিতে হইবে যে ভাত সকল স্থানেই উপা-দেয়, ধনী ও উচ্চ জাতীয় লোকদের ভাত ও বরণ (ডাল) ভিন্ন চলে না । অথচ এই সকল হিন্দুদের আহার প্রণালী ঠিক আমাদের সঙ্গে মেলে না । আমাদের যেমন তিক্ত হইতে আরম্ভ করিয়া ‘মধুরেণ সমাপয়েৎ’ একটা খাবার নিয়ম, এখানে সেরূপ দেখা যায় না । মিষ্ট ঝাল কি লোস্তা যখন যাতে অভিরুচি,—তাহা গ্রহণের কোন নিয়ম নাই । মনে কর লুচী ক্ষীর হইতে আরম্ভ করিলে, পরে ঝাল তরকারী চাটনির সোপান হইতে ডাল ভাতে গিয়া পড়িলে, আবার হয়ত স্বাদ বদলাইবার জন্য মিষ্টানের পুনঃ প্রবেশ । মিষ্টে অরুচি হইলে টক ঝাল—ঝালে অরুচি হইলে আবার মিষ্ট; ঝালের মুখ মিষ্ট করিয়া আবার লোস্তায় আসিয়া উপস্থিত । কোন মহারাষ্ট্রী কিস্বা গুজরাতি-হিন্দুর বাড়ী নিমন্ত্রণ হইলে কখন কোন্টা খাইতে হয়—কোথা হইতে আরম্ভ, কোথায় গিয়া শেষ কিছুই ভাবিয়া পাই না—মহা বিপদ ! খাদ্যসামগ্রীর মধ্যে তরকারী অনেক থাকে তাহা ঝাল প্রধান—মসলার মধ্যে হিঙ্গের গন্ধ আর সব ছাড়াইয়া উঠে—মিষ্টান্নে জাফরাণ । নানা রকম চাটনী—বিকট মসলার তরী তরকারী—আম্বলের জায়গায় ‘কড়ি’, সে এক প্রকার মসলাওয়ালা টক দধির ঝোল, আর ‘ত্ৰীখণ্ড’ যাহা

মহারাষ্ট্রীদের পরম উপাদেয় সামগ্রী মধ্যে গণ্য তাহা জাফরাণ ও মিষ্ট দধি দিয়া প্রস্তুত,—এতদ্ব্যতীত পূরণ পুরী—সাখর ভাত প্রভৃতি মিষ্টান্ন—এই সব এদেশীয় হিন্দুদের আহার। মিষ্টান্নের ব্যাপার আর সব আমাদেরই মতন, কেবল দেখিতে পাই এদেশের লোকেরা ছানা তৈয়ার করিতে জানে না, সুতরাং সন্দেশ রসগোল্লা প্রভৃতি ছানার মিষ্ট নাই। কোন বাঙ্গালী ময়রা এ দেশে এই সকল জিনিসের দোকান খুলিলে বোধ করি অনেক লাভ করিতে পারে। আমার ত বিশ্বাস বোম্বাই এ বিষয়ে বাঙ্গালার কাছ হইতে নূতন শিখিতে পারে। আহারের সময় এ দেশে পটুবস্ত্র পরিবার নিয়ম আছে সে বস্ত্রের নাম সোলা। বলা বাহুল্য যে সোলাধারী হিন্দুর পিঁড়ে আসন—কদলী-পত্র বাসন ও প্রকৃতিদত্ত অঙ্গুলীই কাঁটা চামচ—এ সকল বিষয়ে আমাদের দেশ হইতে এখানে কিছুই প্রভেদ নাই।

আহার প্রণালীর উপর যাহা বলা হইল তাহা এ দেশীয় হিন্দু রীতি—পারসীদের সম্বন্ধে ও সব ঠিক খাটে না। অন্যান্য সামাজিক প্রথার ন্যায় আহার পদ্ধতিতেও তাহারা ইউরোপীয় আদর্শ গ্রহণ করিতেছে। ভূ-আসন ও কদলীপত্রের পরিবর্তে ক্রমে তাহারা মেজ চোঁকী ও চীনের বাসন ব্যবহার করিতে শিখিতেছে। মুসলমানের মত পারসীরাও মাংসপ্রিয় কিন্তু পারসীদের মাংস রান্না অপেক্ষাকৃত সাদাসিধে, ঘি মসলায় ছড়াছড়ি যায় না। হিন্দুদের মধ্যে স্ত্রী ও পুরুষ স্বতন্ত্র আহার করে—স্বামীর আহার সমাপ্ত হইলে স্ত্রী কখন কখন তাহার

পাতের প্রসাদ পায় । পারসী পরিবারেও স্বতন্ত্র আহারের নিয়ম, কিন্তু এক্ষণে অনেক কৃতবিদ্য পারসী মহিলাদের সঙ্গে একত্রে বসিয়া আহার করেন—ইহা উন্নতির লক্ষণ বলিতে হইবে । পরিবার মধ্যে স্ত্রী পুরুষ পরস্পর বিচ্ছিন্ন থাকিবার নিয়ম অস্বাভাবিক ও নিন্দনীয়—তাহাদের মধ্যে যতই প্রণয় ও সম্ভাবে মেলা মেশা হয় ততই ভাল ।

আহারের পর পরিচ্ছদের বিষয় কিছু বলা যাইতে পারে । এদেশীয়দের আমাদের সঙ্গে যে যে বিষয়ে পরিচ্ছদের অমিল তাহা এই । প্রথম মেয়েদের কাপড় । মহারাষ্ট্রী স্ত্রীগণ কোন-রূপ শিরোবেষ্টন ব্যবহার করে না—খোলা মাথায় চক্রাকার খোঁপা, তার উপর ফুলের মালা ও স্বর্ণাভরণ । নাকে মুক্তা-গুচ্ছ নথ । মহারাষ্ট্রী মেয়েদের সাড়ী পরিবার ধরণ একটু আলাদা, সাড়ী তার উপর আবার মাল-কোচা । সামনের দিকটা দেখিতে মন্দ দেখায় না কিন্তু পিছনে মালকোচার বাঁধন স্পষ্ট ধরা পড়ে । মেয়েদের উপর এ পুরুষবেশ আমাদের চক্ষে অদ্ভুত চৈকিতে পারে, কিন্তু কাপড়ের দোষ গুণ অনেকটা অভ্যাসের উপর নির্ভর । এক কাল ছিল যখন মহারাষ্ট্রী বীর-সেনাদের অস্বারোহণে সৈন্য সহ এক স্থান হইতে স্থানান্তরে যাতায়াত করিতে হইত, তখনকার কালের পক্ষে মালকোচাই উপযুক্ত বেশ । এখানকার স্ত্রীলোকদের অঙ্গাবরণ আমার বেশ পসন্দ হয়—এদেশে তাহাকে ‘চোলী’ বলে আমরা তাহাকে কাঁচুলি বলি । কি মহারাষ্ট্রী কি গুজরাতি, মেয়েরা সবাই এই

চোলী ধারণ করে। কারওয়ারে থাকিতে একজাতীয় পাহাড়ে মেয়ে দেখিয়াছিলাম তাহারা কড়ির মালা ধারণ করে। বিবাহের বয়স হইতে আরম্ভ করিয়া প্রতি বৎসরে এক একটা মালা যোগ করিয়া দেয়। ইহাতে তাহাদের বয়স গণিবার বেস সুবিধা হয় কিন্তু অধিক বয়সে সেই মালার ভার দুঃসহ হইয়া পড়ে।

এখানে পুরুষদের মধ্যে শিরোমুগুন ও শিখা ধারণ রীতি। সুতরাং কদর্য নেড়া মাথা ঢাকিবার জন্য উষ্ণীয় ধারণ প্রয়োজন হয়। এই প্রথাটিই এ দেশে আসিয়া লক্ষ্মির বাঙ্গালীর চক্ষে বিশেষ নূতন ঠেকে। বিদেশীগণ বাঙ্গালা ও ভারতের অন্য স্থানে এই পার্থক্য সহজে লক্ষ্য করিয়া থাকে। কেহ বলে খোলা মাথা অসভ্যতার লক্ষণ, কিন্তু তাহাদের প্রাচীন রোমকদের দৃষ্টান্ত দেখান যাইতে পারে। তাহাদের টোঙ্গা ও মুক্তশির আমাদের বেশ হইতে বড় ভিন্ন নহে। বাঙ্গালীর খোলা মাথায় যেমন কৃত্রিম কোন শিরস্ত্রাণ নাই তেমনি প্রকৃতির শোভন আবরণ বিদ্যমান। এ দেশে শিরোমুগুনের রীতি সুতরাং পাগড়ী না পরিলে চলে না। বাহিরে পথ ঘাটে সমগ্র পাগড়ীওয়ালা মাথা। পাগড়ীর গঠন ও আকৃতি-অনুসারে জাতি ও বর্ণ লক্ষিত হয়। মুসলমানদের জরির বাঁধা মোগলাই পাগড়ী,—মহারাষ্ট্রীদের খেত কিস্বা লোহিত বর্ণ রথচক্র,—গুজরাতীদের লালরঙ্গের গজমুগু—পারসীদের ত্রিকোণ বিশিষ্ট লম্বাটুপী, সিন্দিদের বিপর্যস্ত ইংরাজি ছাট।—এইরূপ লম্বা,

গোল, কোণবিশিষ্ট নানা ধরনের পাগড়ী দেখা যায়। এই সকল চিত্র বিচিত্র শিরোভূষণ নগরবাসী পথিকদের মধ্যে বিচিত্রতা সম্পাদন করে। কলিকাতায় ঘরে বাহিরে সর্বত্রই আটপোরে ভাব—বোম্বাই পোষাকী সहर।

পারসীরা একজাতীয় গুজরাতি বণিকের লম্বা পাগড়ী গ্রহণ করিয়াছে তাহা কতকটা তাহাদের 'জাতীয় টুপি'র অনুরূপ। পারসী স্ত্রী পুরুষ সকলেই শিরদ্বাণ ব্যবহার করে। তাহাদের বিশ্বাস এই যে খোলা মাথায় অহরিমান (সয়তান) সহজে প্রবেশ লাভ করে। পারসী রমণীগণ সচরাচর স্ত্রী, সুরেখ ও গৌর-বর্ণ। তাহারা গুজরাতি মেয়েদের ন্যায় রঙ্গীন রেশমী সাড়ী ধারণ করে কিন্তু মাথায় একটা রুমাল বন্ধনে তাহাদের মুখশ্রী নষ্ট। দেখিতে বিশ্রী কিন্তু রুমালের একগুণ এই যে মাথার সাড়ী চুলের তেলে ময়লা হয় না। মহারাষ্ট্রদের মাথার রথ-চক্রের কথা বলিয়াছি তাহার বিস্তৃতির উপর মানমর্যাদা নির্ভর করে—যত বড় লোক তত বড় পাগড়ী। এই ভার মাথার উপর চাপাইয়া কেমন করিয়া যে তাহারা তাহাদের নিত্য-নিয়মিত কার্য্য করিতে সক্ষম হয় তাহা ভাবিয়া উঠা দুষ্কর। তাহাদের অভ্যাস নাই এই ভার মাথায় রাখিলে অল্প সময়ের মধ্যে তাহাদের অবসন্ন হইয়া পড়িতে হয় সন্দেহ নাই। যদি আমার মত জিজ্ঞাসা কর—আমি বলি আমাদের খোলা মাথার নিয়ম অনেক গুণে ভাল। কিন্তু খোলামাথা ত আটপোরে পোষাক, বাহিরে পরিবার বেশ কি? এর উত্তর দেওয়া সহজ

নহে । এখন যেমন দেখা যায় কেহ বলিতে পারে যে বাঙ্গালীর কোন জাতীয় পরিচ্ছদ নাই, যাহার যেমন রুচি সে সেইরূপ কাপড় ব্যবহার করে । কোন প্রকাশ্য স্থানে যাও নানা ধরনের পাগড়ী ও পরিচ্ছদ দৃষ্টিগোচর হইবে । কিন্তু এবিষয়ে উপদেশ দেওয়া বৃথা, কালসহকারে আপনা-আপনি একটা সাম্য দাঁড়াইবে সন্দেহ নাই । অনতিবিলম্বে দেখিতে পাইবে যে স্ফর্গঠন অথচ লঘু 'বাবু' পাগড়ীর ফ্যাশন উঠিয়াছে অন্যান্য জাতিরা তাহার আদর্শ গ্রহণ করিতে তৎপর ।

পারসীদের পরিচ্ছদ অন্যান্য বিষয়ের ন্যায় এখনো ইউরোপীয় ধরণে পরিবর্তন হয় নাই । নীচের ভাগ যেমনই ইউরোপীয় দেখিলে তাহার বাহককে চিনিবার কোন গোল হয় না । তা ছাড়া পারসীর জাতীয় পরিচ্ছদ 'সদরা ও কুস্তি' । সদরা একটা মলমলের জামা ও 'কুস্তি' বাহান্তর সূত্রের কটিবন্ধ, প্রত্যেক জরতোস্তবাদীর ইহা ধারণীয় । জন্ম অবস্থায় সদরা স্ফুট মঙ্গল বসন রূপে ব্যাখ্যাত । কুস্তি তিন বেড়ে কটিদেশ প্রদক্ষিণ করিয়া চার গ্রন্থিতে আবদ্ধ । প্রত্যেক গ্রন্থি বাঁধিবার সময় এক এক মন্ত্র উচ্চারণ করিতে হয়, প্রথম মন্ত্র, ঈশ্বর এক ও অদ্বিতীয়, দ্বিতীয় জরতোস্ত ধর্মই সত্য, তৃতীয় জরতোস্ত ঈশ্বরের দূত, চতুর্থ সদাচারণ করিবে ও পাপ পরিহার করিবে । এই চারি মন্ত্র পাঠ করত সদরা ও কুস্তী পরিধান করিয়া পারসী জরতোস্ত ধর্মে দীক্ষিত হয় ।

প্রবাস পত্র ।

(চতুর্থ পত্র)

আমি পূর্বপত্রে পারসীদের রীতিনীতি কতক কতক বর্ণন করিয়াছি, এবার এক পারসী পরিবারকে রঙ্গভূমিতে অবতরণ করা যাক্ । বোম্বাই গিয়াই এই পরিবারের সঙ্গে আমার প্রথম আলাপ । আমার কন্ঠস্থলে যাইবার পূর্বে আমি কয়েক মাস সস্ত্রীক ইহাদের বাটীতে বাস করি । বাড়ীটা বড়সড়, দোতালা, ইংরাজি ধরণে সাজান ও কতকগুলি মূল্যবান্ তৈল-রঙ্গের চিত্র-ফলকে অলঙ্কৃত । বৃদ্ধ মা—জী গৃহকর্তা, তাঁর দুই কন্যা তাঁহার গৃহপ্রদীপ । একজন পারসী ভৃত্য—তাহার নাম জিলা । জিলাকে জরির কাপড় পরাইয়া সাজ সজ্জা করাইয়া দিলে চাকর মনিবে বড় তফাৎ জানা যায় না । মনিব অপেক্ষা চাকর স্ত্রী ও এক হাত উচ্চ । মা—জী যেমন আকারে খর্বকায়, স্বভাবেও তাঁর কতকটা তেমনি ছেলেমানুষি জাঁকের ভাব, ঐ ক্ষুদ্র দেহটি আত্মশ্লাঘায় পূর্ণ । কোন কোন লোক আছে সে নিজের চক্ষে নিজে মস্ত লোক—সারাদিন মুগর্বে পুচ্ছ ফুলাইয়া বেড়ায়, সময় অসময় নাই অবাধে আপনার গুণগান করিয়া যায়, শ্রোতা তাহা গলাধঃকরণ করিতেছে, কি শুনিয়া মনে মনে হাসিতেছে সে দিকে লক্ষ্যপ নাই ; মা—জী ঐ ধরণের লোক ; বড় বড় ইংরাজ ও রাজা রাজড়ার পরিচিত বলিয়া আপনার পরিচয় দিতে তাঁর বড় আমোদ, ইউরোপের সমুদায় মুকুটধারীর

সহিত তাঁহার গলাগলি ভাব এই ভাবে অনেক সময় তিনি তাঁহার ইউরোপ ভ্রমণের গল্প করিতেন। আমাদের দেশে কিছুই নাই, যাহা আছে সমস্তই খারাপ—ইউরোপীয় সভ্যতাই আমাদের একমাত্র আদর্শ ও অনুকরণীয় এই তাঁর উপদেশের ধূয়া। তাঁহার কথায় যদি তোমার প্রতীতি না জন্মে তাহা হইলে কোন্ লর্ড তাঁহাকে কোন্ পত্র লিখিয়াছিল, তিনি তাহার কি উত্তর দিয়াছিলেন, কোন্ কালে তাঁর কোন্ পামফ্লেট ছাপা হইয়াছিল এই সব পাজিপুঁথি বার করিয়া তোমাকে বুঝাইতে চেষ্টা করিবেন—অবশেষে ‘ছেড়ে দে মা কেঁদে বাঁচি’ বলিয়া তোমাকে অগত্যা তাঁহার মতে মত দিতে হইবে। মানুষ গুণদোষে জড়িত—দোষ ধরিতে গেলে কাহার না ধরা যায়, মা—জীর অনেক সদগুণও আছে—উদার সাদাসিদে সরল অন্তঃ-করণ। এ দিকে যেমন ইংরাজভক্ত তেমনি আবার ইংরাজের সঙ্গে যুদ্ধ করিবারও ক্ষমতা প্রদর্শন করিয়াছেন। তিনি যখন ছোট আদালতের জজ ছিলেন, তখন গবর্ণর সর বার্টল ফ্রেয়ার কোন এক সংবাদ পত্রের রিপোর্ট দৃষ্টে তাঁর কাজের দোষ ধরিয়া তাঁহাকে অপদস্থ করিলেন। মা—জী শীঘ্র ছাড়িবার পাত্র নন, এ দেশে কোন প্রতিকারের সম্ভাবনা না দেখিয়া এই ব্যাপারটি তিনি পার্লামেন্ট সভা পর্যন্ত লইয়া গিয়া আপনি দোষমুক্ত হইলেন—শুধু তা নয়, ক্ষতিপূরণ হুকুম পকেটে করিয়া দেশে ফিরিয়া আসিয়া নিজ কোর্টের উচ্চতর আসন অধিকার করিয়া লইলেন। মা—জী একটি পারসী বালিকাবিদ্যালয় প্রতিষ্ঠা

করিয়া যুবরাজ-পত্নী আলেক্জান্দ্রার নামে তাহার নামকরণ করিয়াছেন। এটি তাঁর বিশেষ যত্নের ধন—তাঁর বৃদ্ধ বয়সের একমাত্র অবলম্বন। লোক দেখাইবার এই একটা জিনিশ পাইয়া মা—জী হাতে এক কাজ পাইয়াছেন, নতুবা পেন্সন লইয়া নিষ্কর্মার ন্যায় জীবন যাপন করিতে বাধ্য হইতেন। কোথায় ব্রিটিশ রাজ পরিবার—কোথায় বড় লাট সাহেব—কোথায় পোর্তুগীস গবর্নর জেনেরল কোন একজন বড় লোক বোম্বায়ে এলে হয়, অমনি মা—জী তাঁহাকে ধরিয়া আপনার স্কুল পরিদর্শনার্থ লইয়া যাইতে ব্যস্ত। ঈশ্বরের রূপায় স্কুলটি এখন ভাল চলিতেছে—ছাত্রী সংখ্যা শতাধিক, তাহার প্রায় সকলেই পারসী বালিকা—দুজন মাত্র হিন্দু কন্যা। হিন্দুরা এই বিদ্যালয়ে মেয়ে পাঠাইতে চান না তার এক কারণ মনে হয় যে এখানে দেশীয় ভাষা শিক্ষার কোন ব্যবস্থা নাই, কেবলি ইংরাজি শিক্ষা। পারসীদের মাতৃভাষা যে গুজরাতি, তাহা শেখান হয় না কেন? এ প্রশ্নের সন্তোষকর উত্তর ভবিয়া পাওয়া দুষ্কর। বোধ করি ইহা ইউরোপীয় সভ্যতার উপর প্রতিষ্ঠাতার অপার অনুরাগের ফল।

কিন্তু ইউরোপীয় সভ্যতার খাতিরে স্বল্প মা—জী তাঁহার জরতোস্তী প্রার্থনামালা আৰুতি করিতে শৈথিল্য করেন না। প্রত্যহ সকালে তিনি দুর্জয় জন্ম ভাষায় বীজ বীজ করিয়া “মনস্নী গবন্নী কোনস্নী” কত কি মন্ত্র পাঠ করিতেন—সে ছবি আমার মানসপটে এখনো জ্বলন্ত দেখিতেছি।

মা—জীর ছুই কন্যারত্নের গুণের কথা কি কহিব, তাঁহাদের

সহাস্য সুন্দর মূর্তি আমাদের হৃদয়ে চিরমুদ্রিত থাকিবে—তঁাহাদের যত্ন শুশ্রূষা কখনই ভুলিতে পারিব না । আমার স্ত্রীর সেই প্রথম দূর প্রবাস । অন্তঃপুর-কারাগার হইতে সহস্রা স্বাধীন সমাজের পূর্ণ আলোকে পড়িয়া পিঞ্জরের পাখীকে মুক্ত আকাশ, মুক্ত বাতাসে ছাড়িয়া দিলে যেরূপ হয়, তিনি সেইরূপ কতকটা খতমত খাইয়া গিয়াছেন—এই ছুই পারসী ভগিনীর সংসর্গে তিনি অনেক অংশে সেই পরিবর্তনের ধাক্কা সামলাইতে পারিয়াছিলেন । মেয়ে দুটি বয়স্কা কিন্তু উভয়েই অবিবাহিতা । বড়টির তখন Courtship চলিতেছে । আমরা থাকিতে থাকিতে তঁাহার পিতা সাহেবী ভোজ দিয়া ‘উনবিংশ শতাব্দীর সভ্যরীতি’ অনুসারে মহা ধুমধামে কন্যার বিবাহোৎসব সম্পন্ন করেন । এখন তিনি অনেকগুলি ছেলে মেয়ে লইয়া সুখে সংসার যাত্রা নির্বাহ করিতেছেন, তঁাহার স্বামী কসদজী কামা পারসী মণ্ডলীর মধ্যে পুরাতত্ত্ববিৎ পণ্ডিতবর বলিয়া বিখ্যাত । কনিষ্ঠা সিরিণবাই ইংরাজি ভাষায় বিলক্ষণ ব্যুৎপন্ন—লোকজনের সঙ্গে কথাবার্তায় সামাজিকতায়, গৃহকার্যে সুদক্ষ । ছুঃখের বিষয় তঁাহার শরীর নিতান্ত অপটু কিন্তু ঐ রুগ্ন শরীর লইয়া বৃদ্ধ পিতার সেবা শুশ্রূষা, ভগিনীর গৃহকার্য্য পর্য্যবেক্ষণ, বালিকা বিদ্যালয়ের তত্ত্বাবধান প্রভৃতি কর্তব্য সাধনে যথাসাধ্য কালাতিপাত করিতেছেন । তঁাহাদের অশেষ আতিথ্য সৎকার লাভে তঁাহাদের বাটীতে যতটুকু সময় সুখে কাটাইয়াছি, তজ্জন্য কৃতজ্ঞতা প্রকাশ করিয়া এই পত্র শেষ করি ।

প্রবাস পত্র ।

বোম্বায়ে নামকরণ ।

গর্ভাধান হইতে অন্ত্যেষ্টিক্রিয়া পর্য্যন্ত যে ষোড়শ বৈদিক সংস্কার বিধিবদ্ধ আছে, তাহার মধ্যে নামকরণ পঞ্চম সংস্কার । জাতকর্মেণ্ডের পর নামকরণ—সন্তান জন্মিবার দ্বাদশ দিবস পর্য্যন্ত সামান্যতঃ ইহার সময় নির্দিষ্ট । সকল বর্ণের মধ্যে সময়ের একই নিয়ম নাই ; ব্রাহ্মণদিগের মধ্যে দ্বাদশ দিবস, ক্ষত্রিয়দের ত্রয়োদশ, বৈশ্যদের ষোড়শ, শূদ্রদের দ্বাবিংশ দিবস নামকরণের নির্দ্ধারিত কাল । আর কার্য্যগতিকে এই কালের ব্যতিক্রমও ঘটিয়া থাকে ।

গুজরাটী ব্রাহ্মণদের মধ্যে জাতকর্মে-প্রথা এক্ষণে প্রচলিত নাই, মহারাষ্ট্রী ব্রাহ্মণদের মধ্যে কেহ কেহ তাহা অনুষ্ঠান করিয়া থাকে, কিন্তু নামকরণ সাধারণ হিন্দুজাতির মধ্যে প্রচলিত । তাহা যে শাস্ত্রের বিধানানুসারে সম্পন্ন হয়, কেবল তাহা নহে, লৌকিক ব্যবহারে তাহা ভিন্নরূপ ধারণ করিয়াছে ।

আশ্বলায়ন গৃহ সূত্রের মতে সন্তান ভূমিষ্ঠ হইবার দ্বাদশ দিবসে কিম্বা প্রথম মাসের অন্ত কোন দিবসে, অথবা প্রথম সংবৎসরে পিতা পুত্রের নামকরণ করিবেন । পিতা যদি বিদেশে গিয়া থাকেন, তবে তথা হইতে প্রত্যাগমন করিয়া নামকরণ করিবেন । নিম্নলিখিত মন্ত্র পাঠ করিয়া পুত্রের তিনবার মন্তক আশ্রাণ করিবেন ।

অঙ্গাদঙ্গাং সম্ভবসি হৃদয়াদধিজায়সে ।

অত্ৰা বৈ পুত্রনামাহসি স জীব শরদাং শতম্ ॥

ককারাদি বর্ণের প্রথম দ্বিতীয় অথবা চতুর্থ বর্ণ নামের আদিতে ও বিসর্গান্ত হ্রস্ব স্বর অন্তে থাকা বিধেয়, প্রতিষ্ঠাকাম ব্যক্তি দ্বি অক্ষর নাম রাখিবেন ; ব্রহ্ম-বর্চস্-কাম চতুরক্ষরের নাম রাখিবেন ; পুরুষের নামে যুক্তাক্ষর মিলিত থাকিলে হানি নাই, কন্যার নামের আদিতে যুক্তাক্ষর না থাকে, এইরূপ নাম রাখিবে, যথা স্ত্রুদা, স্ত্রুদ্রা, বস্তুদা, যশোদা, সাবিত্রী, স্ত্রমঙ্গলা, কলাবতী ইত্যাদি । পারক্ষর গৃহ সূত্রের মতে পুরুষের নাম তদ্ধিতান্ত হওয়া বিধেয় নয় (দৈবদত্তিঃ উপমন্যবঃ ইত্যাদি ।) স্ত্রীর নাম তদ্ধিতান্ত হইবার বাধা নাই, যথা, গান্ধারী, কৈকেয়ী, জানকী ইত্যাদি । ব্রাহ্মণের উপাধি শর্মণ, ক্ষত্রিয়ের বর্ষ্মণ, বৈশ্যের গুপ্ত, শূত্রের দাস ।

গোভিলীয় গৃহ-সূত্রে নামকরণ-প্রথা এইরূপ লিখিত আছে ।

কুমারকে শুদ্ধ বসন পরিধান করাইয়া মাতা বামভাগে উপ-বিষ্ট পিতার হস্তে তাহাকে দিবেন । তৎপরে পত্নী পৃষ্ঠদেশ হইতে পতিকে পরিক্রমণ করত তাঁহার সম্মুখে দণ্ডায়মান হইবেন । পতি “যজ্ঞে স্ত্রীসীমে” “যথা যন্ন প্রমীয়েত পুত্রো জনিত্র্যা অধীতি” প্রভৃতি বেদমন্ত্র পাঠ করিয়া পত্নীকে কুমার প্রত্যর্পণ করিবেন । পরে “যদদশ্চন্দ্রমসীত্যাদি” মন্ত্রে চন্দ্রমার অর্চনা করিয়া পুত্রকে আশীর্ব্বাদ করিবেন ও যথোক্তপ্রকার হোমাদি অনুষ্ঠান করিয়া পুত্রের নামকরণ করিবেন ।

কালক্রমে এই বৈদিক প্রথার অনেক পরিবর্তন ও রূপান্তর হইয়া আসিয়াছে ।

সংস্কার-পদ্ধতি প্রয়োগে নামকরণ পদ্ধতি নিম্নলিখিত প্রকার ।

একাদশ কিন্না দ্বাদশ দিবসে পিতা সন্তানের দীর্ঘায়ু ও কল্যাণ উদ্দেশে নামকরণ সঙ্কল্প করিবেন । হোম ক্রিয়া ইচ্ছা-ধীন । নিম্নলিখিত নাম হইতে নাম নির্বাচিত হওয়া উচিত ।

১	২	৩	৪	৫	৬
কৃষ্ণ	অনন্ত	অচ্যুত	চক্রী	বৈকুণ্ঠ	জনার্দন
৭	৮	৯	১০	১১	১২

উপেন্দ্র যজ্ঞপুরুষ বাহুদেব হরি যোগীশ পুণ্ডরীকাক্ষ

চৈত্র হইতে ফাল্গুন পর্য্যন্ত এক এক মাসের এক এক অধি-ষ্ঠাত্রী দেবতা,—চৈত্র-প্রধান কৃষ্ণ, বৈশাখ-প্রধান অনন্ত ইত্যাদি । এই হেতু যে মাসে সন্তান জন্মে সেই মাসের অধিষ্ঠাত্রী দেবতার নামে তাহার নাম রাখিতে হইবে । চৈত্রে জন্মিলে তাহাকে কৃষ্ণের নাম দেওয়া বিধেয় ।

অপিচ গৃহ-দেবতা কি কুল-দেবতার নাম হইতেও সন্তানের নাম দেওয়া যায়, যথা শঙ্কর, মহাদেব, গোবিন্দ, গণেশ, গোপাল, বামন ইত্যাদি ।

সংস্কার-পদ্ধতিতে নাম রাখিবার আর এক প্রথা নির্দিষ্ট আছে ।

একটী কাংশ পাত্রে স্বর্ণ লেখনী দ্বারা চতুর্বিধ নাম লিখিত হইবে । যথা

- ১। কুলদেবতার নাম (রাম, কৃষ্ণ, বিঠোবা ইত্যাদি) ।
- ২। মাসের অধিষ্ঠাত্রী দেবতার নাম (কৃষ্ণ অনন্ত ইত্যাদি) ।
- ৩। রাশির নাম ।
- ৪। কুলাচার-অনুযায়ী নাম ।

রাশি নাম স্থিরীকৃত হইবার নিয়ম এই ;—মেঘ, বৃষ প্রভৃতি রাশি ২৭ নক্ষত্রে বিভক্ত । প্রত্যেক রাশির জন্য পৃথক্ পৃথক্ অক্ষর নির্দিষ্ট আছে—মেঘ রাশির অ, ল, ই—বৃষভে র, ব, উ—মিথুনে ক, ছ, গ ইত্যাদি । মেঘ রাশিতে জন্ম হইলে অ, ল, অথবা ইকারাদি নাম রাখা যায় যথা, অনন্ত, ললুভাই, ঈশ্বর ।

উল্লিখিত প্রকারে কাংশ-পাত্রে নাম লিখিত হইলে মাতা শিশুকে দক্ষিণ ক্রোড়ে বসাইবেন ও পিতা শিশুর দক্ষিণ কর্ণে নাম উচ্চারণ করিয়া “তদন্তু মিত্রাবরুণ” মন্ত্র পাঠ করিবেন ও পুরোহিত আশীর্বাদ করিয়া কৰ্ম্ম সমাপন করিবেন ।

এই সকল নিয়মে ও বৈদিক অনুষ্ঠানের মধ্যে অনেক প্রভেদ প্রতীয়মান হইবে । কুলদেবতার নাম ও রাশি-নাম রাখিবার প্রথা বৈদিক কালে প্রচলিত ছিল না । অবতার-বাদ হিন্দু-সমাজে প্রবিষ্ট হইবার পর এই সকল নাম প্রচার হইয়াছে, ইহা সহজেই প্রতীতি হয় । কি মহারাষ্ট্রদেশে কি গুজরাটে পুত্র কন্যার নাম প্রায়ই দেবদেবীর নাম হইতে গৃহীত । বৈদিক নাম প্রায় বিলুপ্ত হইয়াছে । মুসলমানদের অনুকরণে দৌলত-রায়, হুসুমতরায়, খুসালরায়, মহতাবরায়, ন্যামতরায় প্রভৃতি কতকগুলি নাম পারস্য ভাষায় সংরচিত দেখা যায় ।

আমি গুজরাট হইতে লিখিতেছি । এ প্রদেশে নামকরণ পদ্ধ-
তিকে ‘বারা বলিয়া’ অথবা ‘বারসা’ (বার বাসর) বলে ; ইহাতে
বিশেষ কোন অনুষ্ঠানের আড়ম্বর নাই ; নামকরণ কার্য্য স্ত্রীদের
দ্বারাই সম্পন্ন হইয়া থাকে । সন্তানের নাম রাখিবার ভার বিশেষ
রূপে তাহার ফোঁই অর্থাৎ পিসিমার হস্তে সমর্পিত, ও এই উপ-
লক্ষে তিনি তাঁহার ভ্রাতার নিকট হইতে উপহার প্রত্যাশা করেন ।

গুজরাটে নামকরণের প্রথা এইরূপ,—

চারি জন বালক যাহাদের উপনয়ন হয় নাই, অথবা চারি স্ত্রী
একখণ্ড রেশমের কাপড়ের চারি কোণ ধরিয়া দাঁড়ায়, পরে
মাতা সন্তানকে তাহাতে রাখিয়া দেন । বালকেরা অথবা স্ত্রীগণ
সেই ঝোলা ছুলাইতে ছুলাইতে এই শ্লোক আবৃত্তি করে,—

ঝোলী পোলী পীপল পান

ফোঁইয়ে পাড়ুঁ (অমুক) নাম

(পিসি রাখে অমুক নাম)

পরে মিস্ত্রী পরিবেশন হইয়া ক্রিয়া সমাপ্ত হয় । ব্রাহ্মণ-
দের সচরাচর দুই নাম থাকে ; এক ডাকনাম, এক রাশি নাম ।

মহারাষ্ট্রীয়দের মধ্যে কতকগুলি নাম কেবল পরিবার ও
আত্মীয়দের মধ্যেই ব্যবহৃত হইয়া থাকে । জন-সাধারণের মধ্যে
তাহারা এক নামে পরিচিত, আপনাদের মধ্যে তাহাদের আর
এক নাম ব্যবহৃত হইয়া থাকে—যথা

কৃষ্ণরাও

নানা সাহেব

ভীমরাও

তাত্যা সাহেব

খণ্ডেরাও

ভাউ

গণপতরাও

বাল।

এইরূপ অপ্পা, অম্মা প্রভৃতি আরো কতকগুলি ঘরাও নাম আছে। গুজরাটীদের মধ্যে এইরূপ নান্নু, মণু, মোটা-ভাই বলিয়া কতকগুলি নাম শ্রবণ করা যায়। অনেক সময় পিতাকে পুত্রেরা বাবার পরিবর্তে হয়ত মোটা-ভাই বলিয়া সম্বোধন করে। মাতাকে 'মা' না বলিয়া 'মোটী-বেন' বলিয়া ডাকে। জ্যেষ্ঠ ভ্রাতা ও জ্যেষ্ঠা ভগিনীর জন্য দাদা দিদির অনুরূপ কোন নাম নাই।

মহারাত্রী গুজরাটী ও বাঙ্গালা ভাষায় সম্বন্ধসূচক নামাবলী পাঠ করিয়া পাঠকগণ এই তিন ভাষার সৌসাদৃশ্য অনেকাংশে উপলব্ধি করিতে পারিবেন।

বাঙলা	গুজরাটী	মহারাত্রী
বাপ }	বাপ	বাপ
পিতা }	পিতা	পিতা
মা }	মা	আই
মাতা }	মাতা	মাতুলী
ভাই	ভাই	ভাউ
ভগিনী }	বেন	বহিন
বোন }		
খুড়তুতা }	পিত্রাই	চুলত ভাউ
ভাই }		
কাকা	কাকা	কাকা

বাঙলা	গুজরাতি	মহারাষ্ট্রী
কাকী	কাকী	কাকী
স্বামী	ধনী } বর }	নবরা-ভ্রতার
স্ত্রী	বায়ড়ী	বায়কো
বড় ঠাকুর	জেঠ	জেঠ
দেওর-ঠাকুরপো	দেৱ	দীর
ননদ	ননদ	ননদ
শালা	শালা	মেহমনা
ভাজ	ভোজাই } ভাবী }	ভাউজাই
ভগিনীপতি } বোনাই }	বনেবী	বনেবী-দাজী
সতীন	সোথ	সবত
ভাগনে	ভানেজ	ভাচা
ভাগনী	ভানেজ	ভাচা
মামা	মামা	মামা
পিসি	ফোই	ফোই
মাসী	মাউসী	মাউসী
বউ	বহু	হুন
জামাই	জমাই	জাঁবই
ঠাকুর দাদা	দাদা	আজা

বাঙলা	গুজরাতি	মহারাষ্ট্রী
দিদিমা	দাদী	আজী
পোত্র	পোত্র	নাতু
নাতী		
ভাইপো	ভতুজ	পুতনা

জ্যেষ্ঠা ও মূল, এই দুই নক্ষত্র অশুভ বলিয়া পরিগণিত । এই দুই নক্ষত্রে পুত্র কি কন্যা জন্মিলে জননী আপনাদের মৃত্যু আশঙ্কা করেন । এই অমঙ্গল নিবারণ হেতু সেই নক্ষত্রের নামে সন্তানের নাম রাখিবার নিয়ম আছে । জ্যেষ্ঠাতে জন্ম হইলে নাম জেঠা কিম্বা জেঠী, মূলনক্ষত্রে জন্ম হইলে নাম মূলজী, মূলশঙ্কর অথবা মূলী রাখা হইয়া থাকে । যদি অনেক সন্তান মৃত হইয়া দৈববশাৎ এক সন্তান বাঁচিয়া থাকে, তবে তাহার নাম জীবা কি জীবী রাখা হয় । যে গৃহে বালকের সংখ্যা এত অধিক যে, তাহাদের যত্ন নাই, তথায় হয়ত ধুলা, কচরা, জুঠা, পুঁজা, প্রভৃতি অবল্ল-মূচক নাম শ্রুতিগোচর হয় ।

এদেশে নাম রাখিবার সময় পুত্রের নামের সঙ্গে পিতার নাম যোগ করিয়া দিবার এক রীতি সর্বত্র প্রচলিত । মহারাষ্ট্রী, গুজরাটী পারসী সকলেরই মধ্যে এই রীতি দৃষ্ট হয় । যথা—পিতার নাম সারাভাই—পুত্রের নাম ভোলানাথ সারাভাই—পৌত্রের নাম ভীমরাও ভোলানাথ । পারসীদের মধ্যেও এই-রূপ—পিতার নাম খরসদ্-জী, পুত্রের নাম মানকজী খরসদ্-জী, পৌত্রের নাম জাহাঙ্গীর মানকজী । অনেক স্থলে এই স্বনাম ও

পিতৃ-নাম ভিন্ন জাতি-সূচক নাম কিম্বা মর্যাদা-সূচক কোন উপাধি দৃষ্ট হয় না। বঙ্গ-বাসীদের মধ্যে যেমন বন্দ্য, চট্ট, মিত্র, দাস প্রভৃতি জাতি-সূচক নাম ব্যবহৃত হয়, এখানে সেরূপ নিয়ম নাই। তবে মহারাষ্ট্রীয়দের মধ্যে অনেকেরই কুল-পদবী থাকে—যথা গোড়বোলে (মিষ্ট ভাবী,) কড়কড়ে, জোসী মুনসি, তর্খড্‌কর ইত্যাদি। ইহা অপরিবর্তনশীল বংশগত নাম।

গুজরাটে ‘জী’ ও ‘ভাই’ শব্দান্ত নামই অধিক প্রচলিত, কায়স্থ ও বণিকদের মধ্যে দেবতার নামের শেষে দাস শব্দ সংযুক্ত করিবার রীতি আছে, যেমন জগজীবন দাস, লক্ষ্মণ দাস, নরোত্তম দাস ইত্যাদি। এক প্রদেশে রণছোড় নামক এক নাক্ষত্রভাব দেবতা আছে, অনেকে সেই নাম ধারণ করেন। একজন নব্য সম্প্রদায়ের গুজরাটী কায়স্থ, ঐ নামের উপর চটিয়া আপনার পুত্রের নাম ‘রণজিৎ’ রাখিয়াছেন, ইহা উন্নতির লক্ষণ বলিতে হইবে। মহারাষ্ট্র দেশে বিঠোবা-নামক দেবতা-বিশেষ প্রসিদ্ধ আছে, এই হেতু মহারাষ্ট্রীদের মধ্যে “বিঠোবা” “বিঠল রাও” অনেকের এই নাম শ্রুত হওয়া যায়।

স্ত্রীলোকের নাম দেবী ও অধিকাংশ নদী হইতে গৃহীত হয় ; যথা, পার্বতী, লক্ষ্মী, উমা, দুর্গা, রেবা, যমুনা। সীতা চির-ছুঃখিনী বলিয়া কন্য়ার ঐ নাম রাখিতে বঙ্গবাসীরা যেরূপ কুণ্ঠিত, এখানে সেরূপ ভাব দেখা যায় না। সীতা, জানকী প্রভৃতি নাম এখানে অত্যন্ত প্রচলিত। এতদ্ভিন্ন পুষ্প কিম্বা স্বর্ণ মাণিক্য হইতে কন্য়ার নাম প্রদত্ত হয়। মোতী, মোনু, জহর,

রত্ন, চম্পক, চমেলী এ সকল নামও প্রচলিত । বিবাহিতা স্ত্রী পতি-গৃহে নামান্তর গ্রহণ করেন । বিবাহের দিন কন্যা পতি-গৃহে উপস্থিত হইলে গৃহ-দেবতার সম্মুখে দম্পতী উপবিষ্ট হইলেন । বরের মাতা তাহার বধূর যে নাম রাখা স্থির করেন, তাহা এক পাত্রে চাল রাখিয়া তাহার উপরে অঙ্কিত করেন । পরে বর কন্যার কাণে কাণে সেই নাম বলিয়া দেন । জ্যেষ্ঠা পুত্র-বধূর নাম সচরাচর লক্ষ্মী রাখা হইয়া থাকে, কিন্তু তাহার বিশেষ কোন নিয়ম নাই, তবে এই মাত্র বলা যাইতে পারে যে, স্বামীর নাম অনুসারে স্ত্রীর নাম রচিত হয় । স্বামীর নাম মহাদেব হইলে স্ত্রীর নাম পার্বতী, শঙ্কর হইলে উমা, কৃষ্ণ হইলে রাধা, বিঠোবা হইলে রুক্মা, রাম হইলে সীতা । কন্যার নাম যদি আবড়ী (আতুরী) থাকে, তবে আত্মারামের সঙ্গে বিবাহ হইলে তাহার নাম রাধা হইতে পারে, কেননা কৃষ্ণের আর এক নাম আত্মারাম । গুজরাটে অনেক সময় অবিবাহিতা কন্যার প্রতি ‘কুমারী’ ও বিবাহিতা স্ত্রীর প্রতি ‘বধূ’ শব্দের প্রয়োগ হয় ।

যথা, পার্বতী কুমারী—পার্বতী বধূ

রুক্মিণী কুমারী—রুক্মিণী বধূ

বাই-শব্দ মর্যাদা-সূচক—স্ত্রীদের নামের প্রথমে কি শেষে ইহা যুক্ত হয় ; যথা,—সোনু বাই, আনা বাই, ছুর্গা বাই, বাই রতন, বাই মানক ইত্যাদি ।

পারসীরা তাহাদের পারস্যদেশীয় পুরাতন বীরপুরুষদের

নাম সচরাচর ধারণ করে, যথা রোস্তুম কাইখসরু (Cyrus) জমসদ, জহাঙ্গীর, খুরসদ, দোরাব, সোরাব ইত্যাদি। এই সকল নামে গুজরাটের প্রথা-অনুসারে জী কিন্না ভাই যোগ করিয়া দিলে পারসী নাম সম্পূর্ণ হয়। এতদ্ব্যতীত কতকগুলি হিন্দু নামও তাহারা ব্যবহার করিয়া থাকে, রতন-জী, পদম-জী, ডোসা-ভাই, দাদা-ভাই, আদর-জী, জীবন-জী ইত্যাদি। পারসী জ্রীগণ হিন্দু জ্রীর নামানুযায়ী নাম ব্যবহার করিয়া থাকে। কিন্তু কতকগুলি পারস্য নামও প্রচলিত আছে যথা সিরীন—পরো-চিস্তা ইত্যাদি।

পারসীদের মধ্যে কতকগুলি হাস্যকর পদবী ও উপাধি দৃষ্ট হয়, তাহা অনেক স্থলে তাহাদের পূর্বপুরুষদের অবলম্বিত ব্যবসা হইতে কল্পিত বোধ হয়। তাহার দৃষ্টান্ত—বোতল-ওয়ালা—দারুখানা-ওয়ালা—ঘাস-ওয়ালা। এই সকল নামের মধ্যে দুইটি নাম বোম্বাই মধ্যে বিশেষ প্রসিদ্ধ—বোতল-ওয়ালা ও রেডিমণি (নগদ পয়সা-ওয়ালা)। সর্ জমসদজী জি জি ভাই প্রসিদ্ধ নাইটের পদবী বোতল-ওয়ালা। প্রবাদ আছে যে প্রথম সর্ জমসদজী বোতল বিক্রয়ের ব্যবসা আরম্ভ করেন ও ক্রমে বাণিজ্য-কার্যে প্রভূত অর্থ উপার্জন করিয়া তাহার সন্ধ্যায় দ্বারা ব্রিটিশ নাইটের উপাধি প্রাপ্ত হইলেন। অপর এক জন পারসী নাইটের উপাধি Ready money (নগদ-কড়ি) কিন্তু ইনি ভারত-নক্ষত্রের নাইট, ইহার নাম সর্ কাওয়াসজী জহাঙ্গীর, ইনিও উদারতা ও বদান্যতায় নাইট পদবী পাইয়াছেন। এমন কোন

হিতকর বিষয় নাই, যাহাতে ইহাঁর দান প্রকাশ না পায়, ইহাঁর দান দেশ-কাল-পাত্র-সাপেক্ষ নহে । সকল জাতির জন্যই ইহাঁর ধনাগার মুক্ত রহিয়াছে । ইংলণ্ড-বাসীদের দারিদ্র্য-মোচনই বল—স্বদেশের কল্যাণ-সাধনই বল, ইহাঁর নগদ টাকা সর্বত্রই কার্য্যে আইসে ।

বঙ্গদেশ ও বোম্বায়ের মধ্যে তুলনা করিলে দেখা যায়, বঙ্গদেশে নাম-রাজ্য অপেক্ষাকৃত সুবিস্তীর্ণ । বঙ্গ-বাসীর মধ্যে দেব-দেবীর নামেরও অভাব নাই—দ্বারকানাথ, গোপীমোহন, গোকুলকৃষ্ণ, নবগোপাল, শারদা, বরদা, লক্ষ্মী প্রভৃতি তাহার উদাহরণ । তন্মিন্ন প্রকৃতির মনোহর সুন্দর পদার্থ হইতে আমরা অনেক সময়ে নাম গ্রহণ করি—এদেশে প্রায় সেরূপ নাম শুনা যায় না, যেমন চারুচন্দ্র, নবীনচন্দ্র, হেমচন্দ্র, শশীন্দ্র, নীলকমল, ইত্যাদি । কতকগুলি নাম গুণ বাচক—যথা সত্য, করুণা, প্রতাপ, মনোমোহন ; আর কতকগুলি নাম রাজা অথবা বীর-সংজ্ঞক—যথা রাজেন্দ্র, দেবেন্দ্র, শূরেন্দ্র, মহীন্দ্র, নরেন্দ্র, এ সকল নাম এ প্রদেশে প্রচলিত নাই । স্ত্রীলোকের নাম তুলনা করিয়া দেখিলেও বঙ্গাঙ্গনাদের প্রাধান্য দিতে হয় । বঙ্গাঙ্গনাদের নামে বিচিত্রতা ও অতিমাধুর্য্যের পরাকাষ্ঠা সকলকেই স্বীকার করিতে হইবে, সৃষ্টির সমুদয় মধুর পদার্থ হইতে সেই সকল নাম সংগৃহীত । সৌদামিনী, উষা ;—নলিনী কুমুদিনী মালতী প্রভৃতি নানা জাতীয় পুষ্প ; ঋতু-প্রধান বসন্ত ও শরতের অধিষ্ঠাত্রী কুমারী ; স্নানলতা, দয়া, করুণা প্রভৃতি গুণসমূহ ; স্বর্ণ হীরা মুক্তা

মণি মাণিক্য এ সকলই বঙ্গাঙ্গনাদিগের নামের কল্পতরু-
স্বরূপ । নামের সঙ্গে গুণের যোগ থাকা যদি স্বাভাবিক হয়,
তবে বঙ্গস্ত্রীদিগের মত রূপগুণসম্পন্ন নারীরত্ন কোথায় পাওয়া
যাইবে ?

প্রবাস পত্র ।

বোম্বাই সহরের গান বাজনা ।

ভূমি আমাকে এদেশের গানবাজনা কিরূপ জিজ্ঞাসা
করিয়াছ—আমার যা মনে হয় বলি । বাঙ্গালীরা যেমন গান
বাজনা ভক্ত আমি যতদূর দেখিয়াছি এদেশের লোকেরা তেমন
নয় । বাঙ্গালী আমোদপ্রিয় সৌখীন জাতি, আমাদের দেশে
ভদ্রলোকদের মধ্যে যতটা সঙ্গীতের চর্চা এদেশে সেরূপ দেখা
যায় না । আমার একজন মহারাষ্ট্রী বন্ধু বলিতেছিলেন তিনি
কলিকাতায় গিয়া দেখিলেন বাঙ্গালীরা অত্যন্ত তামাক ও সঙ্গীত
প্রিয়—যে বাড়ীতে যাও একটা হুঁকা ও তানপুরা । হুঁকা তাঁর
চক্ষে নূতন ঠেকিয়াছিল কেন না এদেশে উচ্চ জাতীয় হিন্দুদের
মধ্যে তামাকের বড় আদর নাই । কোন কোন স্থানে আফিম
চলিত—কিন্তু ভদ্রসমাজে ধূমপান অতি বিরল । তানপুরা
ছড়াছড়ি দেখিয়া প্রতীতি হইল বাঙ্গালীরা সঙ্গীতরসজ্ঞ । তাই
বলিয়া এমন মনে করিও না যে এদেশে গীতবাদ্যের চর্চা বা

মর্যাদা আদবে নাই, তবে আমার মনে হয় যে সঙ্গীত-বিদ্যা প্রায়ই পেশাদারী লোকদের মধ্যে বদ্ধ। ভদ্রলোকের মধ্যে গান বাদ্যে হুনিপুণ অতি অল্পলোকই দেখা যায়।

সামান্যতঃ বলা যাইতে পারে গীতের আদর্শ হিন্দুস্থানী খেয়াল ধ্রুপদ। এই সাধারণ নিয়ম—স্থানে স্থানে রূপান্তর দৃষ্ট হয়। মহারাষ্ট্রীদের মধ্যে সাকী, দিগ্ধি, অভঙ্গ প্রভৃতি কতকগুলি জাতীয় ছন্দের গান শোনা যায় আর ‘লাওনী’ নামক একপ্রকার টপ্পা আছে তাহাই খাঁটি দিশি জিনিস। আমাদের দেশের খেলকর্তাল সমেত সঙ্কীর্ভনের মত উৎসাহোদ্দীপক সমবেত ধর্ম সঙ্গীত শ্রুত হওয়া যায় না। এদেশে ধর্ম প্রচারের অন্যতর উৎকৃষ্ট প্রণালী ‘কথা’। একটা ধর্মশিক্ষা নীতিসূত্র—তার ব্যাখ্যা—পরে গান ও উপন্যাসছলে তাহার শাখা প্রশাখা বিস্তার করিয়া দেখান—এই হচ্ছে কথা। পুরাণাদি গ্রন্থ হইতে হৃদয়গ্রাহী উপন্যাসাবলি বিবৃত করিয়া বলা বাঙ্গালা দেশের কথকতা—কথা একটু আলাদা ধরনের জিনিস। কথার আদ্যোপান্তে একটা ভাবসূত্র এখিত থাকে—সেইটি বিস্তার করিয়া শ্রাবকদের মনে মুদ্রিত করাই কথার উদ্দেশ্য। এই স্থলে যে সকল কবিতা ব্যবহৃত হয় তাহা তুকারাম প্রভৃতি মহারাষ্ট্রীয় প্রাচীন কবিদিগের কাব্যখণি হইতে সংগৃহীত। আমি একবার ‘কথা’ শুনিয়াছিলাম তাহাতে বিনয়ের মাহাত্ম্য, ঔদ্ধত্যের পরাভব সুন্দররূপে বর্ণিত হইয়াছিল। যে বিষয়টি অবলম্বন করিয়া কথা হইয়াছিল তাহা তুকারামের এই অভঙ্গ,

লহানপণ দে গা দেবা

মুগী সাথরেচা রবা ।

ঐরাবতী রত্ন থোর

ত্যালা অঙ্কুশাচা মার ॥

এই কবিতাটি কি তোমার স্বশ্রাব্য বলিয়া বোধ হইল ?
থোর মার—দেবা রবা—এ কি অদ্ভুত মিল ! এই শ্লোকটির
অনুবাদ নিম্নে লিখিয়া দিতেছি—

হে দেব দেও নত্ৰপণা

পিপীলিকা পায় মিষ্টকণা,

ঐরাবত বৃহত বারণ

তার শিরে অঙ্কুশ তাড়ন ॥

‘কথা’ প্রসঙ্গে কবিতার মাঝে মাঝে এক একটা গান আসে।
গানের ধূয়ায় উপস্থিত শ্রোতৃবর্গ কথকের সঙ্গে সমস্বরে যোগ
দেন—অবশেষে কথক মহাশয়ের বন্দনাদি হইয়া কথা ভঙ্গ হয়।

আমি এই মাত্র বলিলাম গানবাজনা পেশাদারের মধ্যে বদ্ধ
কিন্তু এ নিয়মের একটা বিপরীত দৃষ্টান্ত মনে হইতেছে।
গুজরাটে গরবা বলিয়া এক প্রকার সঙ্গীত সর্বসাধারণের মধ্যে
প্রচলিত। ভদ্র ঘরের স্ত্রী পুরুষ ইহাতে যোগ দিতে কুণ্ঠিত হন
না। আশ্বিন মাসে নবরাত্রি উৎসবের আরম্ভ হইতে পূর্ণিমা
পর্য্যন্ত এই গরবা গানের ধূম লাগিয়া যায়। আহমদাবাদ
সুর্ঘাট বরদা প্রভৃতি গুজরাটের প্রধান প্রধান সহরে কুলস্রীগণ
গরবা গান করে। নাগর ব্রাহ্মণ গুজরাটী ব্রাহ্মণদের মধ্যে

শ্রেষ্ঠ বলিয়া গণিত, সুরাটের নাগর রমণীগণ গরবা গানের জন্য বিখ্যাত । এই গানের প্রধান বিষয় রাধাকৃষ্ণের প্রেম । বিবাহ প্রভৃতি গার্হস্থ্যের অনুষ্ঠান উপলক্ষে কখন কখন নাগর রমণীগণের গরবা গান হয় । যাঁহারা তাহাদের মধ্যে সুরগায়ক, বন্ধুবাঁচীতে গান গাহিবার জন্য তাঁহাদের নিমন্ত্রণ হয় । গরবা একজনেও গাইতে পারে কিন্তু সচরাচর একদল মিলিয়া গায় । গরবা গাইবার রীতি এই—একদল গায়িকা চক্র বাঁধিয়া ঘুরিয়া কর-তালি দিতে দিতে গান আরম্ভ করে । আরম্ভের সময় প্রধান গায়িকা দুই এক তান ধরে পরে তাহাতে আর সকলে যোগ দেয় । প্রতি পংক্তি কিন্না চরণ ছবার করিয়া গীত হয় । এমনও হইতে পারে যে কেবল ধূয়াতে সকলে সমস্বরে যোগ দেয়, অবশিষ্ট অংশ প্রধানা কর্তৃক সঙ্গীত হয় । কিন্তু এ বিষয়ে বর্ণনা করিয়া ভাল বুঝান যায় না—শ্রবণেই ইহার স্বাদ গ্রহণ । অতএব আমার অনুরোধ এই একবার বোম্বাই আসিয়া এখানকার গীতবাদ্য শ্রবণ কর—দুর্গোৎসবের অবকাশ ইহার প্রশস্ত সময় ।

‘বাইনাচ’ বলিলেই নৃত্যের প্রণালী কি বুঝিতে পারিবে । নাচের মধ্যে অবশ্য গান অন্তর্ভূত এমন কি প্রধান অঙ্গ বলিলেও হয় । এদেশে গানের ভাল ওস্তাদ সচরাচর দেখা যায় না—নর্তকীর মুখেই যা কিছু ভাল গান শুনা যায় । আমার মনে আছে একবার কারওয়াবে একজন কর্ণাটী নর্তকীর মুখে জয়দেবের কবিতা গান শুনিয়াছিলাম, গান অতি চমৎকার আর তেমন শুদ্ধ

সংস্কৃত উচ্চারণ বঙ্গদেশের বড় বড় পণ্ডিতের মুখেও শুনা যায় না । সংস্কৃত নাটকে স্ত্রীলোকের মুখে প্রাকৃত দিবার রীতি আছে কিন্তু সংস্কৃতও তাহাদের মুখে কত ভাল শুনায় তাহা বেশ বুঝিতে পারিলাম । এদেশে কেরল * নামে একপ্রকার নৃত্য আছে, তাহাতে নটী পুরুষের বেশ ধারণ করিয়া স্ত্রীতাকাটা ঘুড়ি উড়ন সাঁপুড়ের ভেঁপু বাজান ইত্যাদি নানা বিষয়ের তালে তালে নকল করিয়া দেখায় । ইহাতে গতির কবিত্ব না থাকে—ইহা কোঁতুকজনক নৃত্য বটে । কর্ণাটক দেশ নানাবিধ কলা-কৌশলের জন্য বিখ্যাত ।—ওদেশে নর্তকীদলেরও বিশেষ প্রাদুর্ভাব । ইউরোপে সামান্যতঃ নরনারী একত্রে মিলিয়া নাচিবার রীতি আছে তাহা যদিও এদেশে দুর্লভদর্শন কিন্তু কোন কোন স্থলে একদল নর্তকী মিলিয়া নৃত্য করিতে দেখা যায় । কানেড়ায় দেখিতাম একদল নর্তকী প্রতিজনে এক এক যষ্টিখণ্ড হস্তে করিয়া ঘুরিয়া ঘুরিয়া নৃত্য করিত—তালে তালে যষ্টির পরস্পর সঙ্ঘর্ষ—সে এক সুন্দর দৃশ্য—তাহাতে একটু চলাফেরার সৌন্দর্য্য দেখা যায় ।

একবার একস্থানে ‘পাল্কী’ নাচ দেখিয়াছিলাম সে অতি চমৎকার । মনে কর একটা বালিকা পাল্কীর ভিতরে শয়ান ।—আর পাল্কীটি তালে তালে নৃত্য করিতে করিতে আসিয়া উপস্থিত । স্ত্রীলোকটির যে আসল পা তাহা নিচে পাল্কীর কাপড়ে

* দাক্ষিণাত্য মালাবার বাসীগণ সংস্কৃত গ্রন্থে কেরল বলিয়া অভিহিত ।

অদৃশ্য হইয়া রহিয়াছে। আর যে পা দেখা যায় তাহা নকল পা—ঠিক্ বোধ হয় একটী বালিকা পাল্কীর মধ্যে ঠাসান দিয়া বসিয়া আছে আর তার বাহন কি-এক মন্ত্রবলে নাচিয়া বেড়াইতেছে।

কালের বিচিত্র গতি। রুচির পরিবর্তন হইতেছে। পুরাতনের রাজ্য গিয়া নূতনের অধিকার প্রসূত হইতেছে। এক্ষণে বাইনাচ, যাত্রা, কথা কাহারও ভাল লাগে না এখন নাটকের পালা পড়িয়াছে। যেখানে যাও পারসী নাটক হিন্দু নাটকের ডঙ্কাধ্বনি শ্রুতিগোচর হইবে। সে দিন এক পারসী নাটকের দলপতি আসিয়া আমাকে মুরবির ধরিয়াছিল—আমি অগত্যা তাহার প্রস্তাবে সম্মত হইলাম। অনেকগুলি নাটকের ছাপা কাগজ আমার নিকট পাঠান হইল তাহার মধ্য হইতে আমার যাহা ইচ্ছা বাছিয়া লইলে সেই নাটক অভিনীত হইবে। দুর্ভাগ্যক্রমে শকুন্তলা আমার মনোনীত হইল—তাহার অভিনয় দেখিয়া আমার আপাদমস্তক সর্ব্বাঙ্গ জ্বলিয়া গেল। শকুন্তলা একালের পারসী মেয়ের বেশে আসিয়া রঙ্গভূমিতে অবতীর্ণ হইল—দুয়ন্ত উনবিংশ শতাব্দীর নবেল-বর্ণিত প্রণয়ী। নাট্যোল্লিখিত ব্যক্তিগণ হিন্দুস্থানী ভাষাতে গান করিতে লাগিল। দুয়ন্তের পুত্র সেও একেলে ধরণের বালক; পিতাকে দেখিয়া তাহার উপরে একটা বই ছুঁড়িয়া মারিল। আর সে যে আশ্রম, যে ঋষিবালক, যে কণ্ঠমুনি—কালিদাস স্বকৃত নাটকের এইরূপ অপব্যবহার দেখিলে কি মনে করিতেন বলিতে পারি না।

মহারাত্রীদের মধ্যেও নাটকের কতকগুলি বিখ্যাত দল আছে তাহারা শকুন্তলা, মৃচ্ছকটিক, নারায়ণরাও পেশওয়ার বধ নাটক উৎকৃষ্ট অভিনয় করিয়া থাকে। এই সকল নাটকে গণেশ সরস্বতী প্রভৃতি দেবদেবীর নৃত্য গীত হইয়া রীতিমত কৰ্ম্মারম্ভ হয়। গুজরাতে ভাবইয়া নামে এক ভাঁড়ের দল আছে অনেক বৎসর হইল অহমদাবাদে একবার তাহার যাত্রা শুনিয়াছিলাম। যাত্রা কথাটি ঠিক হইল না। তাহাদের অভিনয়ে যাত্রার মত গানের প্রাচুর্য্য নাই—সংএর ভাগটাই অধিক। ভাবইয়ারা নকল করিতে বিলক্ষণ মজবুত। আমি যে সময়কার কথা বলিতেছি তখন বোম্বায়ে “সেয়র-মেনিয়া” রোগের বিশেষ প্রাদুর্ভাব। আবালবৃদ্ধবনিতা সকলেই “সেয়র” কিনিবার জন্য পাগল। যে দরিদ্র সে এক রাত্রের মধ্যে ধনী হইবে—যার সচ্ছল অবস্থা সে লক্ষপতি—যে লক্ষপতি সে ক্রোরপতি হইবে—সকলেই সহজ উপায়ে টাকা করিবার জন্য ক্ষেপিয়া উঠিয়াছে। ইংরাজ গুজরাটী মহারাত্রী সকলেই সেয়র কিনিবার জন্য লালায়িত। যাহার সঙ্গতি আছে সে আপনার যথাসৰ্ব্বস্ব দিয়া ব্যাক্বের এক সেয়র লাভ করিতে পারিলে আপনাকে কৃতার্থ মনে করে। সেই ঝোঁকে ইংরাজী দেশীয়ের মধ্যে অনেক মেলামেশা হইত—নেটিব তখন নীচ বলিয়া ঘৃণিত হইত না। লক্ষ্মীর অনুগ্রহে ইংরাজ নেটিব দিনকতক সমকক্ষ হইয়া চলিয়াছিল—তাহাদের তখন গলাগলি ভাব দেখে কে! “সেয়র” বাজারের রাজা প্রেমচাঁদ রায়চাঁদ—তিনি তখন ক্রোরপতি—তাহার অঙ্গু-

লীর এক ইঙ্গিতে সেয়রের বাজার নিয়মিত হইত । ইংরাজেরা তখন তাঁহার দরবারে গিয়া খোষামোদ করিতে আপনাদিগকে অপমানিত বোধ করিতেন না । মেমসাহেব পর্য্যন্ত কখন কখন সেয়র ভিক্ষা করিতে তাঁহার দ্বারে উপস্থিত হইতেন । এই বিষয়টি সেই গুজরাতি ভাঁড়েরা সুন্দর নকল করিয়াছিল । সাহেব তাঁহার মেমকে সঙ্গে লইয়া সেয়র আবদারের জন্য বাহির হইয়াছেন—এদিকে দর্শকমণ্ডলীর মধ্যে হাস্যের ফোয়ারা উঠিল । ইহার মধ্যে ওদিকে ও কি গোলযোগ উপস্থিত ! চটাপট চপেটাঘাতের শব্দ উঠিল । একজন ইংরাজ তাঁহার জাতির ওরূপ উপহাসজনক নকল সহিতে না পারিয়া বেচারী ভাঁড়দের উপর উত্তমমধ্যম প্রহার আরম্ভ করিলেন—সেই গোল-মালে মজলিস ভাঙ্গিয়া গেল । ভাঁড়ের খেল বিয়োগান্ত নাটকে পরিণত হইল—আমরা হাসি কি কাঁদি কিছু ঠিক করিতে পারিলাম না ।

প্রবাস-পত্র ।

সমাজসংস্কার ।

সমাজ } এবারকার পত্রে এদেশীয় হিন্দুসমাজ সংস্কার বিষয়ে
সংস্কার } দুই এক কথা বলিবার ইচ্ছা করি । পৌত্তলিকতা ও
জাতিভেদ বর্তমান হিন্দুসমাজ ও ধর্মের সারভূত দুই প্রধান অঙ্গ ।

হিন্দু সমাজশৃঙ্খলার মূলে জাতিভেদ ও হিন্দুধর্মের শিরে শিরে পৌত্তলিকতা । সংস্কারকর্তাগণ কাল বিশেষে ও অবস্থা বিশেষে কেহ জাতিভেদ প্রথা কেহ বা পৌত্তলিকতা এই দুই ভিত্তির উপর সাধ্যানুসারে অত্যাঘাত করিয়া আসিতেছেন । সমাজ-সংস্কারের প্রতি যাঁহাদের একান্ত লক্ষ্য তাঁহারা জাতিভেদ উন্মূলন করিতে ব্যগ্র—ধর্মসংস্কার যাঁহাদের একমাত্র উদ্দেশ্য তাঁহারা পৌত্তলিকতার উচ্ছেদ সাধনে যত্নবান । পৌত্তলিকতার উচ্ছেদ সাধন মানসে মহাত্মা রাজা রামমোহন রায় বঙ্গদেশে সনাতন বেদবেদান্তপ্রতিপন্ন একমেবাদ্বিতীয়ং ব্রহ্মের উপাসনা প্রচারে কৃতসংকল্প হন তাহাই এইক্ষেণে ব্রাহ্মধর্মে পরিণত হইয়াছে । এ প্রদেশে ব্রাহ্মধর্মের বীজ নিষ্কিপ্ত হইয়াছে বটে কিন্তু তাহা হইতে আশানুরূপ ফলোৎপত্তি দৃষ্ট হয় না । ব্রাহ্মধর্মের প্রভাব সাধারণ হিন্দুসমাজে অদ্যাপি প্রবেশ লাভ করে নাই । এদেশে হিন্দুধর্মের দুর্গ আটে ঘাটে এমনি দৃঢ় বদ্ধ যে তাহা ভেদ করা কঠিন ব্যাপার । জাতিভেদের শৃঙ্খলও তেমনি কঠোর । সময়ে সময়ে ধর্ম ও সমাজ সংস্কারের যে সকল চেষ্টা হইতেছে তাহাতে বিশেষ ফলোদয় উপলব্ধিত হয় না । রক্ষণশীল হিন্দু সমাজের বাধা দিবার ক্ষমতা প্রচুর, উন্নতির পথে পদক্ষেপ করিবার শক্তি নাই । এই সমাজে যাহা কিছু পরিবর্তন—যাহা কিছু উন্নতি প্রত্যক্ষ হইতেছে তাহা বাহিরের সংশ্রবে, সমাজের নৈসর্গিক নিজ বলে তাহা সাধিত হইতেছে না । ইংরাজি শিক্ষার ফলে—পাশ্চাত্য

সভ্যতার সংশ্রবে এখন আমাদের নবজীবনের সূত্রপাত। বোম্বায়ে ইংরাজি উচ্চ শিক্ষা পতন হইবার অনতিকাল পরে একদল শিক্ষিত যুবক সমাজ সংস্কারে কটিবদ্ধ হইলেন, কিন্তু সেই বামন বলপ্রয়োগে রাক্ষস সমাজের কি হইবে? সমাজের এক অঙ্গুলীর তাড়নে উদ্ধত যুবকদল রণে ভঙ্গ দিয়া কে কোথায় ছুটিয়া পালাইলেন তাহার ঠিকানা নাই। শিক্ষিত মণ্ডলী হিন্দুসমাজের বর্তমান অবস্থায় অসন্তুষ্ট; সমাজ সংস্কারের আবশ্যিকতা তাঁহাদের অনেকেরই মনে জাজ্বল্যমান কিন্তু কি উপায়ে তাহা সাধিত হইবে সে বিষয়েই বিষম মতভেদ। কাহারো মত এই যে জোর জবরদস্তী করিয়া জাতিবন্ধন ভাঙ্গিয়া ফেল— সামাজিক কুরীতি কুসংস্কার উৎপাটন কর। তদপেক্ষা শান্ত ও দূরদর্শী লোকেরা বলেন, জ্ঞান ও ধর্ম্মের উন্নতি সাধন করিয়া আস্তে আস্তে সংস্কারের সোপান প্রস্তুত কর—মূলে কুঠারাঘাত কর রক্ষ আপনা হইতেই ভূমিসাৎ হইবে। এই প্রয়াণশীল ও রক্ষণশীল দুই দলের মধ্যে প্রথম হইতেই দলাদলি বিবাদ বিচ্ছেদ।

বাল গঙ্গাধর } প্রায় ৫০ বৎসর পূর্বের বাল গঙ্গাধর শাস্ত্রী *
 শাস্ত্রী } নামে এক উন্নতচেতা মহাপুরুষ বোম্বায়ে
 প্রাদুর্ভূত হন। ইনি যেমন প্রথরবুদ্ধিসম্পন্ন তেমনি ধর্ম্মনিষ্ঠ

* ইন্দুপ্রকাশ সাপ্তাহিক সংবাদ পত্রে ২ মার্চ ১৮৮৫ হইতে কতিপয় সংখ্যায় Political Rishi স্বাক্ষরিত কয়েকটি সারগর্ভ প্রবন্ধ প্রকাশিত হয় তাহা হইতে বালগঙ্গাধর শাস্ত্রীর জীবনী ও পরমহংস সভার বিবরণ সঙ্কলিত হইল।

সচ্চরিত্র সাধু পুরুষ ও আপামর সাধারণের ভক্তিভাজন ছিলেন। এদিকে শিক্ষা বিভাগে তিনি উচ্চ পদারূঢ় কর্মচারী—ইউরোপীয় পণ্ডিতদিগের মধ্যেও তাঁহার বিদ্যা বুদ্ধির সম্মান, অথচ তাঁহার শরীরে অহঙ্কারের লেশমাত্র ছিল না। তাঁহার নম্রস্বভাব ও বিনয়গুণে তিনি সকলেরি চিত্ত আকর্ষণ করিতেন। তাঁহার চেহারা বেশভূষাতে কে তাঁহার অগাধ পাণ্ডিত্য—তাঁহার আন্তরিক মাহাত্ম্য অনুভব করিতে পারে? এ বিষয়ের একটা কোতূহলজনক উদাহরণ দেওয়া যাইতে পারে। এক ব্যক্তি তাঁহার গুণ কীর্তনে মোহিত হইয়া পরিচয় লাভের উদ্দেশে বাটীতে তাঁহার সহিত সাক্ষাৎ করিতে যান। শাস্ত্রী মহাশয় তাঁহার ডেস্কে ভর দিয়া কি এক ছুরুহ প্রবন্ধ লিখিতেছেন এমন সময় সেই ব্যক্তি গিয়া উপস্থিত। লেখকটাই যে বালশাস্ত্রী তাঁহার ভাবসাবে তাহা বুঝিতে না পারিয়া আগন্তুক জিজ্ঞাসা করিলেন শাস্ত্রী মহাশয়ের সহিত কখন সাক্ষাৎ হইবে। তিনি তখন কাজে ভয়ানক ব্যস্ত, সময় নষ্টের ভয়ে উত্তর করিলেন আর কতকঘণ্টা বিলম্বে আসিলে অমুক সময়ে সাক্ষাৎ হইতে পারে। আগন্তকের প্রস্থান ও যথা নির্দিষ্ট সময়ে পুনঃ প্রবেশ। বালশাস্ত্রী সেই স্থানেই বসিয়া—কেবল সামনে গ্রন্থ কাগজ কলম নাই। আগন্তুক ব্যক্তি যখন জানিতে পারিলেন যে এই সামান্য বেষধারী খর্ব্বকায় ব্যক্তিই সেই বালশাস্ত্রী তখন কিঞ্চিৎ অপ্রস্তুত হইলেন। বালশাস্ত্রীর যত্নে বোম্বায়ে একটা নশ্বাল স্কুল স্থাপিত হয়। মফস্বলের নানা স্থান হইতে বিদ্যার্থী আহরণ

করা—নিজ গৃহের নিকট তাহাদের বাসস্থান ভাড়া করিয়া দেওয়া—তাহাদের যথাযোগ্য শিক্ষাদান ও সর্বতোভাবে তত্ত্বাবধান করা এই সকল বিষয়ে তাঁহার যত্ন ও পরিশ্রমের ক্রটি ছিল না । এই সকল বিদ্যার্থীদিগকে শিক্ষা দিয়া জ্ঞান, ধর্ম, শিক্ষা প্রচারে ত্রুতী করা তাঁহার উদ্দেশ্য । তিনি সমাজসংস্কর্তা বলিয়া আপনার পরিচয় দিতেন না ও সমাজবিপ্লবকারী সেকালের শিক্ষিত যুবকদের সঙ্গেও যোগ দিতেন না । বিশুদ্ধ ধর্ম প্রচার করিয়া অল্পে অল্পে সমাজসংস্কার করা তাঁহার মনোগত অভিপ্রায় । তিনি বলিতেন ধর্মভিত্তির উপর সমাজসংস্কার স্থাপন কর নতুবা স্থায়ী ফলের প্রত্যাশা নাই । এই বিষয়ে রাজা রামমোহন রায়ের সহিত তাঁহার মতের ঐক্য । তিনি এত সাবধানে কার্য্য করিয়াও গোঁড়া হিন্দুদের কটাক্ষ এড়াইতে পারেন নাই । জাতিতে পহ্লাড় ব্রাহ্মণ কিন্তু ব্রাহ্মণেরা তাঁহাকে ব্রাহ্মণ-বিদ্বেষী বলিয়া ঘৃণা করিত । তাহার কারণ এই, জাতির অনুরোধে কর্তব্য পালনে তিনি পরাঙ্মুখ ছিলেন না । তাহার দৃষ্টান্ত, রেবরেণ্ড নারায়ণ শেষাদ্রির ভ্রাতা শ্রীপাদ শেষাদ্রি অকারণে জাতিভ্রষ্ট হন । জাতে উঠিবার আবেদন করিলে একদল গোঁড়া হিন্দু তাঁহার বিপক্ষে দণ্ডায়মান হইলেন, এই লইয়া হিন্দুসমাজে মহা ছলুস্থূল বাধিয়া গেল । শাস্ত্রী মহাশয় প্রাণপণে পতিতোক্কারের সাহায্যে তৎপর হইলেন ও নিজে অশেষ অন্ডায় উৎপীড়ন সহ্য করিয়াও শ্রীপাদের বহিষ্কার কলঙ্ক মোচনে কৃতকার্য্য হইলেন, এদেশে কুসংস্কার ও ধর্মাস্কতার উপর

জয়লাভের এই প্রথম দৃষ্টান্ত । দুর্ভাগ্য বশতঃ বালশাস্ত্রী অকালে কালগ্রাসে পতিত হয়েন—তিনি ১৭ই মে ১৮০০ অব্দে ৩৫ বৎসর বয়ঃক্রমে মানবলীলা সম্বরণ করেন । তাঁহার ধর্মসংস্কারের যে ইচ্ছা—সে মনের ইচ্ছা মনেই রহিয়া গেল । আমাদের সন্ধ্যা গায়ত্রীর মধ্যে যে গূঢ়ার্থ যে উচ্চ উপদেশ প্রচ্ছন্ন আছে তাহা বিবৃত করিয়া প্রকাশ করিবার সঙ্কল্প করিয়াছিলেন তাহাও সিদ্ধ হইল না । তাঁহার অকাল মৃত্যুতে সমাজ-সংস্কারের বিস্তর হানি জন্মে—সে ক্ষতি পূরণ করে আজ পর্য্যন্ত এমন লোক উদয় হইল না । তাঁহার মৃত্যুর পর শিক্ষিত মণ্ডলীর মধ্যে আর এক নূতন ভাব প্রবেশ করিল—তাহার কার্য্য-প্রণালী স্বতন্ত্র, ও ফলে কি দাঁড়াইল তাহার বিবরণ বলি শুন ।

কলিকাতায় ডিরোজিও ও ডাক্তার ডফের আমলে নব্য বঙ্গের মধ্যে যে অশান্ততা, যে প্রচণ্ড রুদ্রভাবের আবির্ভাব হয় তাহা শুনিয়া থাকিবে । কতিপয় শিক্ষিত বাঙ্গালী-যুবক জাতি-চ্ছেদ ব্রতে ব্রতী হইয়া হিন্দু সমাজের সহিত যে ঘোরতর সংগ্রামে প্রবৃত্ত হন বোম্বায়ের ইতিহাস পৃষ্ঠায়ও তাহার অবিকল প্রতিক্রিয়া মুদ্রিত দেখা যায় ।

কৃষ্ণবন্দ্য } মৃত কৃষ্ণমোহন বন্দ্য সেকালের ইঙ্গবঙ্গদের নেতা—তাঁহারা যে সকল কাণ্ড করিয়া গিয়াছেন তাহা বঙ্গদেশে প্রসিদ্ধই আছে । ডিরোজিওর টেবিলে প্রকাশে খানা খাওয়া তাঁহাদের এককাজ—তাহাতেও সন্তুষ্ট না হইয়া একদিন কতকগুলি যুবক তাঁহাদের দলপতির ভবনে সম্মিলিত হন । তথায়

যথেষ্ট পানাহার করিয়া তাঁহারা গোমাংসহস্তে উন্মত্তের ন্যায় রাস্তায় বাহির হইয়া জনৈক ভক্ত বৈষ্ণবের প্রাক্গণে মাংসখণ্ড নিক্ষেপ করিয়া আসেন । কিন্তু এ উদ্যম অধিক কাল টিকিতে পারে নাই । হিন্দু সমাজের শাসনে শীঘ্রই তাঁহাদের চৈতন্যোদয় হয় ও এই দুঃসাহস ব্রতে জলাঞ্জলি দিয়া নিস্তার পান ।

ইহার ১৫ বৎসর পরে বোম্বায়ে সমাজসংস্কারের সূত্রপাত হয় ও উভয়ের শেষ দশা একই প্রকার । এই উভয় বীরদলের কার্য্য-প্রণালী যে একই প্রকার তাহা নহে । মহারাষ্ট্রীরা বাঙ্গালীদের অপেক্ষা practical কাজের লোক—তাঁহারা দিগ্বিদিক্ জ্ঞান শূন্য হইয়া উন্মাদের ন্যায় বাহির না হইয়া অতি সন্তর্পণে গুপ্তভাবে কার্য্যারম্ভ করেন । বাঙ্গলায় যেমন কৃষ্ণ দাদোবা } বন্দ্য, বোম্বায়ে তেমনি দাদোবা পাণ্ডুরঙ্গ প্রসিদ্ধ
পাণ্ডুরঙ্গ } ডাক্তার আত্মারাম পাণ্ডুরঙ্গের ভ্রাতা, এই দলের দলপতি । এই দুই ব্যক্তি একই ধরনের লোক । উভয়েই সংস্কৃত শাস্ত্রে ব্যুৎপন্ন—উভয়েই খৃষ্টধর্ম্ম তত্ত্ব বিশারদ । উভয়েই ধর্ম্মের ভাব প্রবল—প্রভেদ এই, কৃষ্ণ বন্দ্য খৃষ্ট ধর্ম্মে দীক্ষিত হইয়া হিন্দু সমাজের সহিত সমুদয় বন্ধন ছেদন করিলেন । দাদোবার ঝোক ঐ দিকে কিন্তু খৃষ্ট ধর্ম্ম গ্রহণ করিতে তাঁহার প্রবৃত্তি হয় নাই । ধর্ম্ম বিষয়ে তিনি অব্যবস্থিতচিত্ত ছিলেন—কোন্ ধর্ম্ম সত্য কোথায় গিয়া দাঁড়াইবেন তাহা ঠিক করিতে পারেন নাই । সে যাহা হউক দাদোবার উৎসাহ—তাঁহার বশীকরণ শক্তি—সামাজিক অনীতি অত্যাচারের উপর

জ্বলন্ত বিদ্বেষ এই সকল বিষয়ে তিনি কৃষ্ণবন্দ্যের সমতুল্য ছিলেন ও ইনি যেমন কলিকাতায় উনি তেমনি বোম্বায়ে কতিপয় শিক্ষিত যুবকের নেতা হইয়া দাঁড়াইলেন ।

বাল শাস্ত্রীর মৃত্যুর পর দাদোবা পাণ্ডুরঙ্গ বোম্বাই নর্ম্মাল স্কুলের অধ্যক্ষপদে নিযুক্ত হন । এই তাঁহার অবসর—সেই স্কুলের ১২ জন ব্রাহ্মণ ছাত্রকে তাঁহার কাজের উপযোগী হাতিয়ার পাইলেন ও নিজ মস্ত্রে দীক্ষিত করিয়া শীঘ্রই তাহা-দিগকে শিষ্য করিয়া লইলেন । তাঁহার দৃষ্টান্ত অপরাপর বিদ্যালয়েও অনুপ্রবিষ্ট হইল । জাতিভেদ প্রথা ও তৎ সম্বন্ধীয় অন্যান্য কুরীতি নিবারণ উদ্দেশে এক সভার স্থষ্টি হইল, তাহার সভ্যগণ ফ্রীমেসনদের ন্যায় গোপনে কার্য্য সাধনে প্রতিজ্ঞারূঢ়

পরমহংস সভা } হইলেন । এই সভার নাম পরমহংস সভা ।
 } হংস যেমন জলীয় ভাগ ফেলিয়া দিয়া ছুন্ধ বাছিয়া
 লয় সেইরূপ সকল বস্তুর মন্দ পরিত্যাগ করিয়া সদগুণ গ্রহণ
 করা এই সভার উদ্দেশ্য । জন্মিয়াই হিন্দু সমাজের প্রতি
 বাণ বর্ষণ ইহার প্রথম উদ্যম । বাহিরের লোকের দৃষ্টি-বহি-
 ষ্টৃত বিজন স্থানে অকুতোভয়ে সম্মিলিত হইয়া কাজ করিতে
 পারেন তাহার উপযোগী স্থান চাই—অনেক খুঁজিয়া সভ্যেরা
 একটা বাড়ী সংগ্রহ করিলেন । বাড়ীর কর্তা তাঁহাদের দিতে
 প্রস্তুত কিন্তু একটা ভাড়াটে ব্রাহ্মণ তাহাতে বাস করিতেন
 তিনি আততায়ীদিগের ছুরভিসন্ধি সন্দেহ করিয়া ছাড়িয়া যাইতে
 কোন মতে সন্মত হইলেন না । অনেক বাদানুবাদের পর

বাসেন্দা এক ফন্দী করিলেন। তিনি তালাচাবি দিয়া ঘর বন্ধ করিয়া সরিয়া পড়িলেন—ভাবিলেন তাঁহার দেব দেবীর বিগ্রহ সকল ঘরের মধ্যে সুরক্ষিত। পরমহংসগণ তাহাতে নিবারণিত হওয়া দূরে থাকুক তাঁহাদের বল ও সাহসের পরিচয় দিবার অবসর পাইলেন। সেই লোকটির অবর্তমানে তালা চাবি ভাঙ্গিয়া প্রতিমা সকল এককোণে সরাইয়া স্বচ্ছন্দে ঘর দখল করিয়া লইলেন। এখানে কিন্তু তাঁহারা অধিক দিন রাজত্ব করেন নাই—গিরগামের এক অপেক্ষাকৃত উৎকৃষ্ট গৃহে শীঘ্র উঠিয়া যান। প্রতি সপ্তাহে এক দিন সভার অধিবেশন হইত। ঈশ্বর প্রার্থনার পর কর্ম্মারম্ভ এই যা ধর্ম্মের সঙ্গে তাঁহাদের সম্পর্ক। আর সকল বিষয়ে সভার উদ্দেশ্য সামাজিক। কোন ব্যক্তি সভ্যপদে দীক্ষিত হইবার পূর্ব্বে তাঁহার প্রতিজ্ঞা করিতে হইত যে তিনি জাতিভেদ স্বীকার করেন না, পরে পাঁওরুটির টুকরা মুখে করিয়া আপনার অকৃত্রিম বিশ্বাসের পরিচয় দিতে হইত, তদনন্তর সভার রেজিষ্টারে নাম স্বাক্ষর করিয়া সভ্যশ্রেণীর মধ্যে গণ্য হইতেন। প্রথম কয়েক বৎসর মুসলমানের হস্ত হইতে জলগ্রহণ করিবারও বিধান ছিল।

দাদোবা পাণ্ডুরঙ্গ, রাম বালকৃষ্ণ এইরূপ কতকগুলি লোকের যত্ন ও উৎসাহে ক্রমে সভ্যদল বৃদ্ধি হইতে লাগিল। পুণা, অহমদ নগর, খানায়শ, বেলগাম প্রভৃতি মফস্বলের ভিন্ন ভিন্ন স্থানে পরম হংস সভার শাখা প্রশাখা বিস্তৃত হইল। সভ্য

সংখ্যা কত ঠিক নির্ণয় করা অসাধ্য তথাপি সভার ত্রীমুদিকালে অন্যান্য ৫০০শ আন্দাজ করা যায় ।

এই সভা প্রায় বিশ বৎসর কাল জীবিত ছিল । যদিও ইহার সাপ্তাহিক অধিবেশনে গোপনে কার্য্য নির্বাহ হইত তথাপি সময়ে সময়ে সভ্যদের উৎসাহ উথলিয়া উঠিয়া নির্দিষ্ট সীমা উল্লঙ্ঘন করিতে দেখা গিয়াছে । একবার তাঁহাদের মধ্যে কতকগুলি যুবক কেল্লার এক রুটিওয়ালার দোকানে পাঁওরুটি কিনিয়া সেই রুটি হস্তে প্রকাশ্য রাজপথ দিয়া তাঁহাদের গৃহ-দ্বারে উপনীত হন । তাঁহাদের সাপ্তাহিক অধিবেশনে দীক্ষা ও তর্ক বিতর্ক ভিন্ন আর বিশেষ কোন অনুষ্ঠান হইত না । কিন্তু বার্ষিক প্রীতিভোজ এই সভার এক প্রধান অনুষ্ঠান ছিল । সেই সময়ে মফস্বলের ভিন্ন ভিন্ন স্থান হইতে পরম হংস দল সমবেত হইয়া জাতি নির্বিশেষে একত্রে পান-ভোজন করিতেন ।

কিন্তু এইরূপে অধিক দিন যায় নাই—পরমহংস মণ্ডলীর শীঘ্রই স্বথ-স্বপ্ন ভঙ্গ হইল । তাঁহারা বুঝিতে পারিলেন যে হিন্দু ধর্ম্ম ও জাতিভেদের উচ্ছেদ সাধন সহজ নহে । এক সামান্য ঘটনা হইতে এই বালীর বাঁধ ভাঙ্গিয়া গেল । কোন এক ব্যক্তি (কে তাহা প্রকাশ হয় নাই কিন্তু সভ্যদের মধ্যে নিঃসন্দেহ এক জন) সভার খাতাপত্র হরণ করিয়া লইয়া যায় । তাহাতে সভার যত গুহ্য কথা—সভ্যদিগের নাম, তাহাদের জাতিচ্ছেদের প্রতিজ্ঞা যাহা কিছু নিহিত ছিল সকলি বাহির হইয়া পড়িল । হিন্দুসমাজে মহা গণ্ডগোল বাধিয়া গেল । যতদিন পর্য্যন্ত

সভার গুহ্য প্রকাশ হয় নাই ততদিন হিন্দু সমাজ সন্দেহ করিয়াও তাহাদের কার্যে হস্তক্ষেপ করিতে সমর্থ হয় নাই, গুপ্ত কথা সকল ফাঁস হইয়া গিয়া সকলের চিত্তে ভয়ের সঞ্চার করিয়া দিল । হিন্দু সমাজের কাছে তাঁহারা বমালস্বন্ধ ধরা পড়িলেন । তাঁহারা ভয়ে একে একে সরিয়া পড়িলেন—পলাতকদের দৃষ্টান্তে যথার্থ বীরের হৃদয়ও দমিয়া গেল । সভা ভগ্ন চূর্ণ হইয়া ধরণীতলে লুণ্ঠিত হইল । ভিত্তি এমন দুর্বল যে অল্প একটুকু আঘাত পাইয়া সমূলে নির্মূল ও অদৃশ্য হইয়া গেল । জনসমাজে গভীর-নিখাত কোন কুপ্রথার উচ্ছেদ সাধন করিতে হইলে প্রথমে লোকের মন নবমার্গে চলিবার জন্য প্রস্তুত করা আবশ্যিক । জাতিভেদ প্রথা হিন্দুসমাজে এরূপ বন্ধমূল যে উহার সহিত সম্মুখ যুদ্ধে জয়লাভের আশা ছুরাশা মাত্র । আক্রমণের অন্যতম কৌশল অবলম্বন করা কর্তব্য । ধর্মোৎকর্ষ সাধন—বিদ্যালোক প্রকাশ—স্ত্রীশিক্ষা দান, গার্হস্থ্যপ্রণালী সংশোধন ইত্যাদি উপায়ে সামাজিক উন্নতি সাধন কর, জন সমাজে সভ্যতা বিস্তার কর, জাতিভেদ বন্ধন আপনাপনি শিথিল হইয়া আসিবে । এখনি দেখ ঐ সকল কারণে হিন্দুসমাজে কত পরিবর্তন ঘটিয়াছে । সেকাল ও একালে একবার তুলনা করিয়া দেখ । তখনকার কালে জাতিভেদের কি কঠোর নিয়ম ছিল, ‘রাজ-নীতিজ্ঞ ঋষি’ তাহার এক দৃষ্টান্ত উদ্ধৃত করিয়া দিয়াছেন । কতকগুলি ইংরাজ বোটে করিয়া গঙ্গা ভ্রমণকালে দেখিলেন গঙ্গার উপর এক মনুষ্য দেহ ভাসিয়া যাইতেছে, তাহাতে জীবন

এখনো নিঃশেষিত হয় নাই। এক জনের কাছে ল্যাবেণ্ডরের আরক ছিল, দেহ উপরে তুলিয়া তাহার এক শিশি আরক মুমূর্ষু ব্যক্তির মুখে ঢালিয়া দিলেন সে তৎক্ষণাৎ বাঁচিয়া উঠিল। ইংরাজগণ সে ব্যক্তিকে সঙ্গে লইয়া গৃহে পৌঁছিয়া দিলেন কিন্তু সে নিজ গৃহে স্থান পায় না। তাহার আত্মীয় স্বজন তাহাকে জীবিত পাইয়া কোথায় সাদরে ডাকিয়া লইবে, না তাহার প্রবেশদ্বার বন্ধ করিয়া দিল। সে বেচারী গৃহ হইতে বহিষ্কৃত হইয়া কোথায় যায়—কি করিয়া উদর পোষণ করে—মহা বিপদ! অবশেষে যিনি দয়া করিয়া তাহার প্রাণ রক্ষা করিয়াছিলেন তাঁহারই দয়ার উপর তাহার গ্রাসাচ্ছাদনের ভার পড়িল। বাঁচিয়া উঠিয়া লোকটার কি আপশোষ! সে তাহার জীবনদাতার প্রতি কৃতজ্ঞ হইবে কি—এমন দিন যায় নাই যে তাহার এই দুঃসহ দুঃখ ও কষ্টের কারণ বলিয়া সেই ইংরাজকে সে শত শত তিরস্কার না করিয়াছে। তিন বৎসর এইরূপে যায় পড়ে আবার সে ব্যাধিগ্রস্ত হয়। এবার তাহার মরিবার অগাধ সাধ মিটিয়া গেল, আর ক্রেহ তাহাতে বাধা দিল না। অর্দ্ধশতাব্দী পূর্বে এই ঘটনা বঙ্গ-দেশে ঘটিয়াছিল—আর এক্ষণ-কার কি বিপরীত চিত্র! ল্যাবেণ্ডার—লোহিত ল্যাবেণ্ডরের উপরেও এখনকার লোকের ওরূপ বিষদৃষ্টি নাই। ভিন্নজাতির লোকদের সহিত একাসনে বসিয়া পানাহার এখন ধর্ভব্যের মধ্যে গণ্য হয় না। কোন হিন্দু হোটেলে গিয়া প্রকাশ্যে সাহেবীয়ানা খানা খাইলেও জাতির লোকেরা তাহা দেখিয়াও

দেখেন না। বোম্বায়ে জাতিবন্ধন অপেক্ষাকৃত কঠিন তথাপি পূর্বকালের তুলনায় কত শিথিল হইয়া আসিতেছে। জাতির শৃঙ্খল অপেক্ষা ঘটনাত্মক বলবত্তর। পূর্বের নীচ জাতির স্পর্শে ব্রাহ্মণ আপনারে অপবিত্র জ্ঞান করিতেন, এইক্ষণে রেলওয়ে গাড়ীতে উচ্চনীচ জাতি একসঙ্গে বসিয়া ভ্রমণ করেন। প্রথমে যখন বোম্বাই হইতে একজন গুজরাটী ব্রাহ্মণ ‘কালাপানী’ পার হইয়া ইংলণ্ড যাত্রা করেন তাঁহার প্রত্যাগমন কালে হিন্দু-সমাজে যে বিষম আন্দোলন উপস্থিত হয় পূর্বেরই তাহার উল্লেখ করিয়াছি। এই কয়েক বৎসরের মধ্যেই এ বিষয়ে বিলক্ষণ পরিবর্তন দর্শন করা যায়। এইক্ষণে সমুদ্রপার-যাত্রী হিন্দুসন্তান ফিরিয়া আসিয়া পিতৃগৃহ হইতে বহিষ্কৃত হন না ও নাম মাত্র প্রায়শ্চিত্ত গ্রহণ করিয়া তিনি জাতির সমক্ষে সংশোধিত হন। এই পার্লামেন্টে প্রতিনিধি নির্বাচন উপলক্ষে বোম্বাই প্রেরিত হিন্দু প্রতিনিধি ইংলণ্ড হইতে গৃহে প্রত্যাগত হইবার পর জাতির খাতিরে তাঁহার সাদর সৎকারের কোন ক্রটিই হয় নাই। দেখ সেকাল ও একালে এ বিষয়ে কত প্রভেদ।

প্রার্থনা } পরমহংস মণ্ডলীর ধ্বংস হইবার পর তাহার ভগ্নাব-
সমাজ } শেষ হইতে বোম্বায়ে প্রার্থনা সমাজ উদ্ভূত হই-
য়াছে। ডাক্তার আত্মারাম পাণ্ডুরঙ্গ এই সমাজের প্রধান নেতা। তাঁহার ও তৎসদৃশ আর কতকগুলি সজ্জনের যত্ন ও উৎসাহে ১৮৬৭ খৃষ্টাব্দে এই সমাজ স্থাপিত হয়। জাতিভেদ-

বাল্য বিবাহ চির বৈধব্য প্রভৃতি সামাজিক কুরীতি উন্মূলনে কৃতসঙ্কল্প হইয়া সমাজ কার্য্যারম্ভ করেন—পরে সভ্যেরা বিবেচনা করিলেন সামাজিক নিয়মে সাক্ষাৎ হস্তক্ষেপ করাতে কোন ফল নাই—ধর্ম্মোন্নতি সাধন প্রথম কর্তব্য । ধর্ম্মসংস্কারের সোপান হইতে সমাজসংস্কার সহজসাধ্য, এই বিবেচনায় পৌত্তলিকতা পরিহার পূর্ব্বক একেশ্বরের উপাসনা প্রচার সমাজের মুখ্য উদ্দেশ্য বলিয়া স্থিরীকৃত হইল । ইতিপূর্বে কেশবচন্দ্র সেন দুই একবার বোম্বাই আগমন করিয়া বক্তৃতা দ্বারা লোকের মন বিচলিত করিয়া গিয়াছিলেন—ক্ষেত্র প্রস্তুত, উপযুক্ত সময়েই বীজ নিক্ষিপ্ত হইল । ১৮৬৭ অব্দে এই সমাজের প্রথম অধিবেশন ও তদুপলক্ষে আনন্দাশ্রম স্বামী নামক জনৈক বাঙ্গালী ব্রহ্মচারী হিন্দীভাষায় উপাসনাদি কার্য্য সূচাক্রমে সম্পন্ন করেন । ১৮৭২ এ সমাজের স্বতন্ত্র মন্দিরের প্রথম ভিত্তিপ্রস্তর নিহিত হয় ও শ্রীযুক্ত প্রতাপচন্দ্র মজুমদার এই কার্য্যে সহায়তা করেন ।

সমাজের) একমাত্র অনন্তস্বরূপ সর্ব্বজ্ঞ সর্ব্বশক্তিমান পবিত্র-
মূলতত্ত্ব) স্বরূপ পরমেশ্বরই জগতের সৃষ্টিকর্ত্তা ।

২ । তাঁহার উপাসনাতেই ঐহিক পারত্রিক মঙ্গল ।

৩ । তাঁহাকে প্রীতি ও তাঁহার প্রিয়কার্য্য সাধন তাঁহার উপাসনা ।

৪ । প্রতিমা পূজা ও অবতার পূজা তাঁহার প্রকৃত উপাসনা নহে ।

৫। ঈশ্বর প্রণীত বিশেষ কোন ধর্ম গ্রন্থ নাই।

৬। ঈশ্বরকে পিতা ও সকল মনুষ্যকে পরস্পর ভ্রাতৃস্বরূপ জ্ঞান করা কর্তব্য।

সমাজের এই কয়েকটি মূলতত্ত্ব।

ইহা হইতে প্রতীতি হইবে যে প্রার্থনা সমাজ যদিও ব্রাহ্ম-
নাম গ্রহণে সঙ্কুচিত তথাপি ইহার মত ও বিশ্বাস অনেকাংশে
ব্রাহ্মধর্মের অনুযায়ী। আমার বোধ হয় আদি ব্রাহ্মসমাজের
সহিত এই সমাজের বিশেষ সহানুভূতি। অতীতের প্রতি
উভয়েরই অটল শ্রদ্ধা—সামাজিক বিষয়ে উভয়েই রক্ষণশীল।
প্রার্থনা সমাজের সাপ্তাহিক অধিবেশনে আদি ব্রাহ্মসমাজের
ধরণে ব্রহ্মোপাসনা সঙ্গীতাদি হইয়া থাকে। সঙ্গীত আধুনিক ও
তুকারামের অভঙ্গ প্রভৃতি প্রাচীন এই উভয় মিশ্রিত ও এমন
সহজ ভাষায় গীত হয় যে তাহাতে উপস্থিত সকলে যোগ
দিয়া থাকেন। সমাজের কোন দীক্ষিত উপাচার্য্য নাই—সভ্য-
দের মধ্যে যাঁহারা স্ববক্তা ও ধর্মোপদেশে সক্ষম তাঁহারা
অবসর ক্রমে আচার্য্য পদ গ্রহণ করিয়া সমাজের সাপ্তাহিক কার্য্য
নির্ব্বাহ করেন।

যাঁহারা প্রতিজ্ঞাপূর্ব্বক সভ্যশ্রেণীভুক্ত হইয়াছেন তাঁহাদের
সংখ্যা অন্যান্য ১০০, তাহার দশমাংশ পৌত্তলিকতা কার্য্যতঃ পরি-
ত্যাগ করিয়া স্বীয় প্রতিজ্ঞা পালনে সমর্থ হইয়াছেন। অনুষ্ঠান
বিষয়ে ইহাদের বড় অগ্রসর দেখা যায় না। নূতন আইন অনু-
সারে রেজিষ্ট্রি করিয়া ব্রাহ্মবিবাহ আজ পর্য্যন্ত দুইটি মাত্র সমা-

হিত হইয়াছে । এই আইন এখানকার হিন্দুদের হৃদয়গ্রাহী নহে । তাহার প্রধান কারণ এই যে এই আইন অবলম্বন করিবার পূর্ব্বে হিন্দুধর্ম্মভ্রষ্ট বলিয়া আপনার পরিচয় দিতে হয় ।

শ্রমজীবী } প্রার্থনাসমাজ যে সকল সংকার্য্য অনুষ্ঠানে
বিদ্যালয় } যোগ দিয়াছেন শ্রমজীবীদের জন্য বিদ্যালয়-
স্থাপন তাহার মধ্যে প্রধান । সভ্যদের যত্নে এইরূপ চারিটি
বিদ্যালয় বোম্বায়ে স্থাপিত হইয়া তথায় প্রায় ৩০০ ছাত্র মহা-
রাষ্ট্র ও ইংরাজী অধ্যয়ন করিতেছে ।

প্রার্থনা সমাজ যে শাস্ত্র নিরীহ ভাবে কার্য্য করিতেছে তাহার অস্তিত্ব পর্য্যন্ত হিন্দু সমাজের স্বপ্নগোচর হইয়াছে কি না সন্দেহ । তাহার সাপ্তাহিক ভজন পূজনে হিন্দু সমাজের বিশেষ ক্ষতিবৃদ্ধি নাই । হিন্দু সমাজ তাহার ৩৩ কোটি দেবদেবী ও অগণ্য ব্রাহ্মণ পুরোহিত লইয়া সমান ভাবে রাজত্ব করিতেছে । পৌত্তলিকতা যেরূপ পরাক্রমশালী তাহা ভাস্কিবার বল সে পরিমাণে সমাজে আছে কিনা সন্দেহ । রাবণ বধের জন্য রামের মত বীর চাই—তাহা কোথায় ? যে পর্য্যন্ত না তেজীয়ান্ একনিষ্ঠ ধর্ম্মোপদেষ্টা বোম্বাই সমাজে আবির্ভূত হইবে সে পর্য্যন্ত প্রার্থনা সমাজের ধর্ম্মবল হিন্দুসমাজে প্রবিষ্ট হইবার সম্ভাবনা অতি অল্প ।

আর্য্য } পৌত্তলিকতার দ্বিতীয় শত্রু আর্য্য সমাজ । এই
সমাজ } সমাজের অস্ত্র বেদ । মহাত্মা দয়ানন্দ সরস্বতী
ইহার জন্মদাতা । ইনি একজন গুজরাতি ব্রাহ্মণ—কাঠেওয়াড়

ইহার জন্মভূমি । দয়ানন্দের পিতা একজন গোঁড়া শৈব ছিলেন, আপন পুত্রকেও শৈব-ধর্মে দীক্ষিত করেন কিন্তু এই স্থল অম্লে পুত্রের আধ্যাত্মিক ক্ষুধার নিরুত্তি হইল না । তাঁহার ধর্মজিজ্ঞাসা প্রবল ছিল পৌত্তলিকতার অসারতা শীঘ্রই তাঁহার হৃদয়ঙ্গম হইল, তিনি মনোনিবেশ পূর্বক বেদাধ্যয়নে প্রবৃত্ত হইলেন । তাঁহার এক ভগিনীর সহসা অকাল মৃত্যুতে তাঁহার মনে বৈরাগ্য উদয় হইল । পিতার ইচ্ছা তাঁহার বিবাহ দিয়া তাঁহাকে গার্হস্থ্য শৃঙ্খলে বদ্ধ করেন—তিনি সেই বন্ধনভয়ে গৃহত্যাগী হইয়া পলায়ন করিলেন । ইহার কিছু কাল পরে সন্ন্যাস ধর্ম গ্রহণ ও দয়ানন্দ সরস্বতী নাম ধারণ করিলেন । অশেষ শাস্ত্র-সিদ্ধি মন্বনের পর তাঁহার সিদ্ধান্ত এই দাঁড়াইল যে ব্রাহ্মণ উপ-নিষদ স্মৃতি পুরাণ তন্ত্র এ সমস্ত শাস্ত্র ভ্রান্তিমিশ্রিত—কেবল খাঁটি সত্য বেদ—বেদ ভিত্তির উপরেই হিন্দুধর্মের পত্তন করা বিধেয় । বেদে মূর্তি পূজা নাই—একেশ্বরবাদই বেদমন্ত্র সক-লের প্রকৃত মর্ম—অগ্নি ইন্দ্র বরুণ প্রভৃতি সেই একং ব্রহ্মের নাম ভেদ মাত্র । তিনি নানা যুক্তি প্রদর্শন পূর্বক স্বমত স্থাপন ও বিরুদ্ধ মত খণ্ডন করিয়া বেড়াইতেন—যেখানে যাইতেন পৌত্তলিকতার প্রতিবাদ ও বেদ মাহাত্ম্য প্রতিপাদন করিতেন—তাঁহার বুদ্ধি বাজিতা পাণ্ডিত্যে লোকের চিত্ত আকৃষ্ট হইত । তাঁহারি যত্নে ভারতবর্ষের স্থানে স্থানে বেদসত্যসমর্থনকারী আর্ধ্যসমাজ স্থাপিত হইয়াছে । বোম্বায়েও এই সমাজের এক শাখা আছে । বেদবাক্য সত্য বলিয়া সভ্যদের বিশ্বাস । কিন্তু

তঁাহারা বলেন ভাষ্যকারেরা যেরূপ বেদার্থ প্রকাশ করিয়াছেন তাহা আমরা সৰ্ব্বাংশে সত্য বলিয়া স্বীকার করি না । তঁাহাদের মতে পৌত্তলিকতা বেদবিরুদ্ধ আধুনিক ধর্ম, স্তূতরাং তাহা পরিহার্য্য । কিন্তু তঁাহাদের মধ্যে কয় জন স্বীয় বিশ্বাস অনুষ্ঠানে পরিণত করিয়াছেন ? এই আৰ্য্য সমাজ এক স্বতন্ত্রঃসম্প্রদায় রূপে পরিগণিত হইতে পারে না । ইহাঁদের মতামত এখনো বায়ুমণ্ডলে বাষ্পাকারে অবস্থিত—জমাট বাঁধিয়া ভূতলে অবতীর্ণ বলিয়া বোধ হয় না ।

প্রবাস পত্র ।

কড়ুয়া কণবী ।

গুজরাটে কৃষিদলের সাধারণ নাম কণবী । কণবীগণ প্রধানতঃ দুই শ্রেণীতে বিভক্ত—লেওয়া কণবী ও কড়ুয়া কণবী । কড়ুয়া ও লেওয়া কণবী একত্রে পান ভোজন করিতে পারে, কিন্তু উহাদের মধ্যে পরস্পর আদান প্রদান নাই ।

কড়ুয়া কণবীদের মধ্যে দ্বাদশ বৎসর অন্তর বিবাহের লগ্ন উপস্থিত হয় । এই দ্বাদশ বৎসরের নিয়ম-সম্বন্ধে এইরূপ প্রবাদ আছে যে, এক দিন হরপার্ব্বতী বনের মধ্যে বিচরণ করিতে করিতে এক স্থানে আসিয়া বিশ্রাম করিলেন । মহাদেব উমাকে কহিলেন, প্রিয়ে, তুমি এই স্থানে কিছুকাল অবস্থিতি কর, আমি

বিরলে তপস্যা করিতে চলিলাম, দ্বাদশ বৎসর পরে আসিব । এই বলিয়া মহাদেব প্রস্থান করিলেন । বিরহ-বিধুরা উমা কথঞ্চিৎ কাল হরণ করিবার জন্য যুক্তিকার পুত্তলী গড়াইয়া জ্বীড়া করিতেন । বার বৎসর পরে মহাদেব আসিয়া উপস্থিত হইলেন ও উমার অনুরোধে সেই সকল পুত্তলীকে জীবন দান করত সচেতন করিলেন । তাহা হইতেই কণবী জাতির উৎপত্তি হইল । এই হেতু কণবীজাতি উমার বিশেষ ভক্ত ।—যে স্থানে মহাদেব বার বৎসর তপস্যা করিয়াছিলেন, তাহা গাইকবাড় পরগণার উমা নামক গ্রাম বলিয়া নির্দিষ্ট হয় । সেখানে একটি দুর্গা-মন্দির প্রতিষ্ঠিত । এই দেবীর আদেশ ক্রমে কড়ুয়া কণবীর মধ্যে বিবাহ লগ্ন স্থিরীকৃত হয় । প্রতি দশ কিস্বা বার বৎসর অন্তর সিংহরাশির সহিত বৃহস্পতির সমাগম হইলে তাহাদের বিবাহের সময় উপস্থিত হয় । উমা সন্মতি দান করিলে পূজারীগণ বিবাহের লগ্ন প্রকাশ করে ও তাহা গ্রামে গ্রামে সমস্ত কণবী জাতির মধ্যে দূত কর্তৃক ঘোষিত হইয়া থাকে ।

এই বিবাহের দিবস উপস্থিত হইলে কণবী জাতির মধ্যে যত অবিবাহিতা কন্যা থাকে তাহাদের উদ্ধাহ-ক্রিয়া সেই এক দিবসেই সম্পন্ন হয় । মাসেকের দুঃখপোষ্য হইতে যোগ্য-বয়স্কা কন্যা পর্য্যন্ত সকলেই এক একটি বরের সহিত পরিণয়-সূত্রে বদ্ধ হয় । এই অবসর চলিয়া গেলে আবার বার বৎসর কাল অপেক্ষা করিতে হয় ; হুতরাং পারত-পক্ষে এ সময় কেহ অব-হেলা করে না । যদি কারণ বশত কোন কন্যার উপযুক্ত বর

না পাওয়া যায় তো পুষ্পরাশির সঙ্গে তাহার নাম-মাত্র বিবাহ-ক্রিয়া সম্পন্ন হইয়া থাকে । পর দিবস সেই সকল ফুল কুপে নিষ্কিপ্ত হয় । এইরূপ ক্রিয়া বরের মৃত্যু-সমান পরিগণিত হয়, ও তৎপরে সেই কন্যার ‘নাত্রা’ অর্থাৎ পুনর্বিবাহ হইবার কোন বাধা থাকে না । ঈদৃশ আর একটি প্রথার নাম ‘বাহুবর’ বিবাহ । অর্থাৎ স্বজাতীয় কোন পুরুষ যদি পূর্ব হইতে এই রূপ অঙ্গীকার করে যে, আমি এত টাকা পাইলে আমার বিবাহে কোন দাবী থাকিবে না এবং এই বলিয়া যদি অর্থ গ্রহণ করে তাহা হইলে সে কন্যার উপর তাহার কোন অধিকার থাকে না । কন্যা-দানের অব্যবহিত পরেই সেই বিবাহ-বন্ধন হইতে বর ও কন্যা উভয়েই নিষ্কৃতি পায় । যে স্ত্রী এই-রূপে অব্যাহতি পায় তাহার ‘নাত্রা’ অর্থাৎ পুনর্বিবাহ করিবার বাধা নাই । অবিবাহিতা স্ত্রীর নাত্রা হইবার বিধি নাই, সুতরাং বিবাহের নির্দিষ্ট কাল ভিন্ন তাহার বিবাহ হইতে পারে না । কিন্তু একবার নাম-মাত্র বিবাহ দিতে পারিলে পুনর্বিবাহ সম্ভবে ও এইরূপ বিবাহের কোন নিরূপিত সময় নাই, যখন ইচ্ছা দেওয়া যাইতে পারে । বাহু-বর বিবাহ-ক্রিয়া সম্পন্ন হইয়া পরক্ষণেই বর স্বকীয় আলয়ে গমন করে । কন্যা পিতৃগৃহে আসিয়া হস্তের চুড়ি ফেলিয়া জ্ঞান করে, যেন তাহার স্বামীর মৃত্যু হইয়াছে । পরে সুবিধা হইলে পিতামাতা তাহার নাত্রা দেয় ।

মুসলমানদের যেমন নিকা, নীচবর্ণ হিন্দুগণের সেই রূপ

‘নাত্রা’ । নাত্রাতে বিবাহের অন্ত্যেষ্টিক্রিয়-পদ্ধতি কিছুই আবশ্যক হয় না, বিবাহের স্থায় তাহাতে ব্যয়-বাহুল্যও নাই । বয়স্ক বিধবার ত কথাই নাই—অল্প বয়সে পতিগৃহে গমন করিবার পূর্বে যে স্ত্রীর বৈধব্য-দশা উপস্থিত হয়, অথবা পূর্বোল্লিখিত প্রকারে নামমাত্র বিবাহ হইবার পর যে স্ত্রীর পুনর্বিবাহ হয়, তাহার নাত্রা অপেক্ষাকৃত আড়ম্বরের সহিত সম্পন্ন হইয়া থাকে । বরের ধূতির অঞ্চল ও কন্যার শাড়ীর অঞ্চলে গাঁঠ দেওয়া হয়, ও এইরূপ গ্রন্থিবদ্ধ দম্পতী অশ্বারূঢ় হইয়া জনতার মধ্য-দিয়া গীতবাদ্যের সঙ্গে সঙ্গে গৃহে প্রবেশ করে । তথায় পুরোহিত তাহাদিগকে গগনপতির পূজা করাইয়া বিবাহের কার্য সম্পন্ন করেন । ইহার নাম নাত্রা ।

এইরূপ শুনা যায় যে, কণবী জাতির মধ্যে অজাতসন্তান-দিগেরও বিবাহের সম্বন্ধ কখন কখন স্থির হইয়া থাকে । ছুই প্রতিবাসীর নিজ নিজ স্ত্রী গর্ভবতী হইলে তাহারা এইরূপ চুক্তি করে যে তোমার পুত্র আমার কন্যা, কিম্বা আমার পুত্র তোমার কন্যা হইলে তাহাদের পরস্পর বিবাহ হইবে । এইরূপ ধার্য্য হইলে সত্য সত্যই যদি এক স্ত্রীর কন্যা ও অপরের পুত্র প্রসূত হয় ত অঙ্গীকার মত তাহাদের বিবাহ দেওয়া হয় ।

সকলের কুল সমান নহে । কোন কুল উচ্চ, কোন কুল নীচ রূপে পরিগণিত । পূর্ব পুরুষের কৃতি ও স্মৃতি বশত কোন কোন বংশ বিশেষ গৌরবের পাত্র হইয়াছে । এক্ষণে অনেকটা জন্ম-ভূমির উপর বংশ-মর্যাদা প্রতিষ্ঠিত দেখা যায় ।

অহমদাবাদের আদিম-বাসী কণবীগণ কুলশীলে শ্রেষ্ঠরূপে প্রখ্যাত । কুলীনের সঙ্গে কিসে কন্যার বিবাহ হয় ইহারই উপর পিতা মাতার বিশেষ লক্ষ্য । নীচ কুলের বরের সঙ্গে কন্যার বিবাহ হওয়া মহা অপমানের বিষয়, কুলীন যদি হতশ্রী বা বিগত-যৌবন হয় তথাপি সে প্রার্থনীয় । ৫০ বৎসর বয়স্ক কুলীনের সঙ্গে মাতা তাঁহার দশমবর্ষীয়া বালিকার বিবাহ দিতে কুণ্ঠিত হন না । উচ্চ কুলের বর পাইতে হইলে অনেক অর্থের প্রয়োজন ও বিবাহের অনুষ্ঠানেও বিস্তর ব্যয় । এই হেতু কুলাভিমानी নির্ধন কণবী এবং রাজপুত্রদের মধ্যে কন্যা-হত্যা এত প্রচলিত ছিল । কন্যা-সন্তানের প্রতি বিরাগের আর এক কারণ এই যে, পিতা মনে করেন কন্যার বিবাহ হইলেই অপর ব্যক্তি আমাকে শালা স্বশুর বলিয়া সম্বোধন করিবে, এ অপমান কিরূপে সহ্য হয় ? কন্যা ভূমিষ্ঠ হইবামাত্র তাহাকে এক দুগ্ধ-পূর্ণ পাত্রে ফেলিয়া দিয়া পিতা মাতা কন্যাদায় হইতে নিষ্কৃতি পাইতেন ; এই প্রথার নাম ‘দুগ্ধ পীতী’ । ইহা বলা বাহুল্য যে ইংরাজ-রাজ্যে এ নিয়ম এক্ষণে সতীদাহ ও অন্যান্য নিষ্ঠুর প্রথার ন্যায় রাজ-শাসনে বিলুপ্ত হইয়াছে ।

বর নীচ-বংশজ হইলে তাহাকে টাকা দিয়া কন্যা ক্রয় করিতে হয় । অর্থের অভাবে আপন পরিবারস্থ কোন কন্যার বিনিময়েও কন্যা পাওয়া যায় । মনে কর, রণছোড়ের এক ভগিনী ও দাজীর একটা কন্যা আছে । রণছোড় দাজীর ভ্রাতার সঙ্গে আপনার ভগিনীর বিবাহ দিয়া দাজীর কন্যাকে বিনিময়ে

পাইতে পারেন। এইরূপ তিন ভ্রাতার তিন ভগিনী থাকিলে তাহারা প্রত্যেকে আপন আপন ভগিনীর বিনিময়ে এক এক স্ত্রী পরিগ্রহে সমর্থ হয়। এইরূপ বিবাহকে ‘স্ট্রা’ বিবাহ বলে।

কণবীদের মধ্যে স্ত্রী পুরুষ উভয়েই পরস্পরের সম্মতিক্রমে বিবাহ-বন্ধন হইতে বিমুক্ত হইতে পারে। স্বামীকে অর্থ-লালসার বশ করিতে পারিলে স্ত্রী আপনার অভিলষিত নায়কের নিকট গমন করিতে সমর্থ হয়। স্বামীর অভিমতি ভিন্ন পর-পুরুষের সহিত সহবাস করিলে অনেক সময় স্বামী ক্রুদ্ধ হইয়া মাজিষ্ট্রেটের নিকট অভিযোগ উপস্থিত করে; কিন্তু আইন-অনুসারে স্ত্রী দণ্ডনীয় নহে, তাহার নায়ককেই দণ্ড ভোগ করিতে হয়। কিন্তু এই সকল মকদ্দমা উপস্থিত হইবার পূর্বেই প্রায় পঞ্চায়ত-কর্তৃক নিষ্পত্তি হইয়া থাকে। এই সকল বিবাহ-সম্বন্ধীয় বিবাদে জাতীয় শাসন বিশেষ রূপে লক্ষিত হয়। জাতির পাঁচ জন মিলিয়া যে বিধান করেন তাহা উভয় পক্ষের শিরোধার্য। স্ত্রী স্বামীকে পরিত্যাগ করিয়া যদি আর এক জনের সংসর্গে বাস করে—স্বামী স্বজাতীয় লোকদিগকে একত্র করিয়া তাহাদের নিকট আপন কাহিনী ব্যক্ত করেন। জাতির মত হইলে স্ত্রীকে স্বামীর নিকট প্রত্যর্পণ করিতে হইবে। এই আদেশ লঙ্ঘন করিলে তৎক্ষণাৎ সেই অপরাধী পুরুষকে জাতি হইতে বহিষ্কৃত করা হয়, ইহা হইতে গুরুতর দণ্ড আছে কি না সন্দেহ। জাতির অভিপ্রায়ে যদি স্থির হইল যে, পরস্ত্রী-গ্রহণের দণ্ড-স্বরূপ ৫০০ টাকা দিয়া স্বামীর সম্মতি ক্রয় করিতে

হইবে তো অগত্যা তাহাতেই তাঁহাকে সম্বন্ধ করিতে হয় ।
জাতির বিচারে নিতান্ত অসম্বন্ধ হইলে উপায়াভাবে আদা-
লতের শরণাপন্ন হইতে হয় ।

যে সকল কণবীর মধ্যে স্ত্রীজাতির সংখ্যা পুরুষ অপেক্ষা
অল্প, তাহাদের পুরুষদের বিবাহ লইয়া মহা গোলযোগ উপ-
স্থিত হয় । এক একটি কন্যার জন্য পাইবার জন্য তাহাদের প্রভূত
অর্থ ব্যয় করিতে হয়, ও অনেক বৎসর পর্যন্ত কাজে কাজেই
অবিবাহিত থাকিতে হয় । এই সকল লোককে মিথ্যা প্রলো-
ভন দেখাইয়া ফাঁদে ফেলিয়া তাহাদের যথাসর্বস্ব অপহরণ
করিবার আশয়ে কোন কোন প্রবঞ্চক এক এক কন্যা লইয়া
তাহাদের নিকট উপস্থিত হয় । কন্যা হয়ত অন্য জাতীয়া—
অথবা বিবাহিতা ও তাহার স্বামী জীবিত । বর ত কন্যার জন্য
বুভুক্ষিত মৎস্যের ন্যায় তাকাইয়া আছেন—টোপ্ টপ্ করিয়া
পড়িল কি অমনি তাহা কণ্ঠস্থ করিয়া আটকাইয়া পড়িলেন ।
ভবিষ্যতে কোন গোলযোগ না হয় তজ্জন্য গ্রামের দুই এক
জন ভদ্র লোক হয় ত জামীন হইল—তাহাদের চক্ষে ধূলি
দিয়া ছল-বল-কৌশলে তাহাদিগকেও বশ করিতে হয় । বর
কন্যাকর্তার হাতে টাকা গণিয়া দিয়া মহা উল্লাসে বিবাহ করি-
লেন, পর দিন প্রাতে উঠিয়া দেখেন সে কন্যা নাই—কন্যা-
কর্তাও অন্তর্হিত হইয়াছে । খোঁজ্ খোঁজ্ খোঁজ্—পরে সম্মান
পাইলে হয় ত আদালতে এক মহা-মকদ্দমা আসিয়া উপস্থিত
হয় । ইনি ত চক্ষু মুদ্রিত করিয়া পরস্ত্রীর পাণিগ্রহণ করি-

লেন—এদিকে সে স্ত্রীর যে যথার্থ স্বামী তাহার বাটীতে হুলস্থূল পড়িয়া গেল । তাহার স্ত্রী কোথায় পলায়ন করিল, এক গ্রাম হইতে গ্রামান্তর অন্বেষণ করিয়া প্রকৃত ব্যাপার অবগত হইলে তিনিও বিচারালয়ে উপস্থিত হইয়া কন্যাকর্তার নামে অভিযোগ উপস্থিত করেন । সত্য নিরূপণ করিতে বিচার-পতির মাথা ঘুরিয়া যায় । স্বামী চান তাঁহার স্ত্রী, উপস্বামী, প্রতারক দল, সকলেরই সমুচিত শাস্তি হয় । স্ত্রী বলিতেছেন—আমার স্বামী আগাকে মা বোন্ বলিয়া সম্বোধন করত গৃহ হইতে বহিষ্কৃত করিয়া দিয়াছেন—আমার দোষ কি ? উপস্বামী বলিতেছেন—এই স্ত্রীর স্বামী বর্তমান ইহা আমার স্বপ্নেরও অগোচর, জানিতে পারিলে কি এত টাকা দিয়া কন্যা ক্রয় করিতাম । প্রতারক-দল বলিতেছে, আমরা ইহার কিছুই জানি না, আমাদের সঙ্গে শত্রুতা করিয়া আমাদের বিরুদ্ধে মিথ্যা অভিযোগ করিয়াছে—বর কন্যা আমরা কাহাকেও জানি না—আমরা আমাদের গ্রামে বাস করিতেছিলাম, তথা হইতে পুলিশের লোকে আমাদের সঙ্গে ধরিয়া আনিয়াছে । প্রত্যেক পক্ষ আপন আপন সাক্ষীর সহিত দণ্ডায়মান । পাঠকগণ বিবেচনা করিয়া দেখুন, এই মিথ্যা জালের মধ্য হইতে সত্য নির্ণয় করা কি সহজ ব্যাপার ?

এই প্রসঙ্গে আমার এক বালিকা-হরণ মকদ্দমার কথা মনে পড়িল—তাহার আসামী ফরিয়াদী নাসিক জিলা নিবাসী মহা-রাষ্ট্রীয় কুণবী । বালিকার বয়স ১২ বৎসর ও তাহার মাসীর নামে নালিশ । বালিকার পিতা বলিতেছেন—আমি আমার

কন্যার বিবাহ সম্বন্ধ স্থির করিয়া বিবাহ সামগ্রী ক্রয় করিতে রেবলার বাজারে যাই। কন্যা আমার সঙ্গে ছিল, তাহাকে একটা দোকানে বসাইয়া জিনিস পত্র কিনিতে লাগিলাম। কার্য শেষ হইলে ফিরিয়া আসিয়া দেখি বালিকা সেখানে নাই—শুনিলাম তাহার মাসী তাহারে লইয়া গিয়াছে। ইহাতে কোন মন্দ অভিসন্ধি সন্দেহ না করিয়া আমি বাড়ী ফিরিয়া যাই, গিয়া দেখি কন্যা এখনো ফেরে নাই। পরে অন্য গ্রামে তাহার মাসীর বাড়ী গিয়া শুনিতে পাই যে সেখানে সকালে আসিয়া আবার তাহারা চলিয়া গিয়াছে। আরো এদিক ওদিক অন্বেষণ করিয়া কন্যার কোন খোঁজ খবর পাই না অবশেষে জানিতে পারিলাম যে তাহার মাসীর সঙ্গে বোম্বাই প্রস্থান করিয়াছে। আমিও দুই একজন লোক লইয়া বোম্বাই চলিলাম। সেখানে সন্ধান পাই গিরগামে একজন পারসীর বাঙ্গালায় আমার মেয়ের বিবাহের উদ্যোগ চলিতেছে—গিয়া দেখি কন্যার গায়ে হলুদ কুঙ্কুম নূতন চেলী নূতন সাড়ী বিবাহের সমস্ত আয়োজন। কি করি পুলিশে খবর দিলাম। পুলিশ সাহেবের সাহায্যে শেষে আমার কন্যা ফিরিয়া পাই ও তাহাকে লইয়া বাড়ী ফিরিয়া আসি।

বালিকা নিজে সাক্ষ্য দিতেছে—আমি রেবলার দোকানে বসিয়া আছি এমন সময় আমার মাসী আসিয়া বলিলেন, তোমার দিদিমার ভারি ব্যামো চল দেখিতে যাই। আমি জিজ্ঞাসা করিলাম পিতার কি অনুমতি লওয়া হইয়াছে—তিনি

বলিলেন হাঁ। হইয়াছে তাই আমি যাইতে সম্মত হইলাম। মাসীর বাড়ী গিয়া দেখি দিদিমা যেমন তেমনি আছেন ব্যামোর কথা সকলি মিথ্যা। তার পর আমাকে একটা বিয়ে দেখাইবার ছলে অপর গ্রামে লইয়া যান পরে যে কোথায় গেলাম কি হইল বলিতে পারি না—আমি অজ্ঞান হইয়া পড়িলাম। যখন চৈতন্য হইল তখন দেখি আমি বোম্বায়ে আমার গায়ে হলুদ—বিয়ের ধূম। কতক ক্ষণ পরে আমার পিতা লোকজন সঙ্গে আসিয়া আমাকে উদ্ধার করিলেন।

আসামীর বক্তব্য এই বোম্বাইবাসী সখারামের ভাই পরশ-রামের সঙ্গে কন্যার বিবাহ সম্বন্ধ স্থির হয়। স্থির হইবার পর তার পিতা তাহাকে আমার সঙ্গে বোম্বাই পাঠান। আমি তাঁহার অনুমতি ক্রমেই রাধীকে বোম্বাই লইয়া যাই। কথা ছিল তিনি নিজে ছুই একদিনের মধ্যে বোম্বাই গিয়া আমাদের সঙ্গে মিলিবেন। কথা মত তিনিও উপস্থিত হইলেন শেষে যে কি গোল উঠিল তাহাতে বিবাহের সমস্ত উৎসব ভাঙ্গিয়া গেল।

আসামীর তরফ অনেকগুলি সাক্ষী ছিল তন্মধ্যে সখারামই প্রধান। তাঁহার সাক্ষ্যে বিপরীত পক্ষের সমুদায় গাঁথুনি চুরমার হইয়া গেল। সখারাম বলিলেন—আমি বোম্বায়ে বাস করি—ডাক্তারি আমার উপজীবিকা। আমার ভ্রাতার বিবাহোদ্দেশে আমি এই অঞ্চলে আসিয়া ফরিয়াদী কাশীবাবর সঙ্গে এই সম্বন্ধ স্থির করিয়া যাই। অনেক বাদানুবাদের পর মেয়ের মূল্য ৫০ টাকা ধার্য্য হয় আমি তাহার অর্দ্ধেক কাশীবাবর হস্তে দিই—

অপর্যর্ক পরে দিবার কথা । তিনি বলিলেন আমার এখনি তোমার সঙ্গে যাইবার সুবিধা হইতেছে না—কাজকর্ম গোছাইয়া দুই এক দিন পরে যাইব । আমার কন্যার মাসী ছোট বেলা থেকে তাকে মানুষ করেছে তার সঙ্গে মেয়ে পাঠাইলেই হইবে । সে আগে তোমার সঙ্গে মেয়ে নিয়ে যাক আমি দু দিন পরে গিয়া উপস্থিত হইব । তাঁর অনুমতি ক্রমে রাধী তার মাসীর সঙ্গে চলিল আমিও অন্যান্য নিমন্ত্রণ কার্য শেষ করিয়া তাহাদের সহিত পথে মিলিয়া নাসিক ষ্টেশনে রেলগাড়ীতে উঠিয়া বোম্বাই যাত্রা করি । সেখানে ১০০ টাকায় একটা বাড়ী ভাড়া করিয়া বিবাহের সমস্ত আয়োজন করিয়া রাখি । বিবাহের ঠিক পূর্ব দিনে কাশীবা দুই চার জন বন্ধুর সহিত আসিয়া পড়িলেন—আমি ষ্টেশনে গিয়া বিবাহের বাটীতে তাহাদের লইয়া আসি । সে দিন গেল—পর দিন গায়ে হলুদ হইয়া গেল—ভোজন শেষ হইল তখনো কোন কথা নাই তার পর থেকে কাশীবা নিজ মূর্তি ধারণ করিলেন । যে টাকা পূর্বের ঠিক হইয়াছে তাহাতে তিনি সন্তুষ্ট নন—তিনি আরো অধিক হাঁকিয়া বসিলেন—আমি তাহাতে সন্মত হইলাম না । মহা গোল ; শেষে আমি তাহাকে বিবাহ সভা হইতে বহিস্কৃত করিয়া দিতে বাধ্য হইলাম । খানিক পরে তিনি পুলিশের দল বল লইয়া উপস্থিত—তখন বর কন্যার শুভদৃষ্টি হইয়া গিয়াছে—চাউল বৃষ্টি চলিতেছে এমন সময় পুলিশের হাঙ্গামা । পুলিশের সাহেব আগাদের ডাকিয়া পাঠান—সেখানে লোকের

মহা ভীড়—এই গোলমালে কাশীবা তাহার কন্যা লইয়া যে কোথায় পালাইলেন তাহা ঠিক পাইলাম না। দু দিন খুঁজিলাম কিন্তু কোন সন্ধান নাই—পরে আর একজন পাত্রী দেখিয়া আমার ভায়ের বিবাহ দিই।

এ দিকে কাশীবাও গৃহে প্রত্যাগমন করিয়া আর একজন বর ঠিক করিয়া তাহার সহিত কন্যার বিবাহ দেন। দু পক্ষেরই গোল মিটিয়া গেল—মধ্যে থেকে বেচারী মাসীর এই যন্ত্রণা-ভোগ।

বোম্বাই রায়ত।

বঙ্গদেশে ভূমিসম্পর্কীয় চিরস্থায়ী বন্দবস্ত বঙ্গসমাজের ইচ্ছাজনক কি অনিচ্ছাজনক এই বিষয় লইয়া সর্বদাই বাদানুবাদ শ্রবণ করা যায়। অধিকাংশ আঙ্গো-ইণ্ডিয়ানের মত এই যে এ বন্দবস্ত ভাল হয় নাই। ইহাতে জমিদারদিগের ধনাগমের সুবিধা হইয়াছে বটে কিন্তু প্রজাদিগের অকল্যাণ। ইহা যে কেবল বঙ্গদেশের প্রজাগণের দুঃখবস্তার মূল কারণ তাহা নহে কিন্তু ইহাতে সমুদয় ভারতবর্ষের ক্ষতি। ইহাতে গবর্ণমেণ্টের স্পৃহনীয় রাজস্ব জমিদারের ঘরে যাইতেছে এবং সে ক্ষতিপূরণ করিবার জন্য ভারতবর্ষের অন্যান্য দেশের উপর অযথোচিত করভার ন্যস্ত হইতেছে। তাহার দৃষ্টান্তে তাঁহারা বলেন যে

দেখ বঙ্গদেশের আয়তন ও বসতি অনুসারে তাহা হইতে যে নির্দ্ধারিত রাজস্ব আদায় করা হয়, বোম্বাইয়ের আয়তন ও বসতির তুলনায় তাহা হইতে তদপেক্ষা অধিক টাকা নিষ্পীড়িত হইতেছে ও যত দিন এ বন্দবস্ত বিদ্যমান থাকিবে ততদিন এই রূপ চলিবে। এই সকল লোকের বাক্য কতদূর যুক্তিসিদ্ধ তাহা নির্ণয় করা এ প্রস্তাবের উদ্দেশ্য নহে। ইহা নিশ্চয় যে ভারতীয় গবর্ণমেন্ট বঙ্গ দেশে নিজ ভূস্বত্ব কতকটা শিথিল করিয়া এইক্ষণে অনুতাপ করিতেছেন। অন্যান্য অনেক কৃতবিদ্য লোকের মত এই যে বঙ্গদেশের যাহা কিছু উন্নতি ও শ্রীবৃদ্ধি দেখা যায় সে কেবল এই চিরস্থায়ী বন্দবস্তের প্রসাদে। বঙ্গদেশে জমিদার ও প্রজামধ্যে যে ঘনিষ্ঠ সম্বন্ধ, অন্যান্য স্থলে গবর্ণমেন্ট ও প্রজার মধ্যে সে সম্বন্ধ দৃষ্ট হয় না। ধনী জমিদার রাজ্যের স্তম্ভ স্বরূপ। অন্ন-চিন্তা হইতে মুক্ত হইয়া দেশের উন্নতি সাধনে তিনি সময় পান ও তাহার যোগ্য উপায় অবলম্বন করিতে পারেন। সে যাহা হউক এইক্ষণে জিজ্ঞাস্য এই যে এই বন্দবস্তে যেমন জমিদারের লাভ সেই অনুসারে প্রজার কল্যাণ কি না? এই প্রশ্নের উত্তর দিতে আমি প্রস্তুত নহি, কেন না বঙ্গদেশের প্রজাদের অবস্থা কিরূপ সে বিষয়ে আমি সম্পূর্ণ অনভিজ্ঞ। তবে এই মাত্র বলিতে পারি যে বোম্বাই প্রদেশে ভূমি সম্বন্ধে যে নিয়ম তাহাতে প্রজারা যে স্থখে আছে তাহা বোধ হয় না। এখানকার অস্থায়ী বন্দবস্ত বশতঃ ও অন্যান্য কারণে প্রজাদের উপর লক্ষ্মী অপ্রসন্না সন্দেহ নাই ও অনেকের

বিশ্বাস এই যে চিরস্থায়ী বন্দবস্ত তাহাদের দারিদ্র্য মোচনের এক প্রধান উপায় ।

এ প্রদেশে প্রজাদের যে দুঃবস্থা তাহা কাহারো অবিদিত নাই । তাহাদের অধিকাংশই আপাদমস্তক ঋণগ্রস্ত—ও কোন বৎসর অতিরুষ্টি অনারুষ্টি কি অন্য কোন উৎপাত উপস্থিত হইলে তাহাদের দুর্দশার আর পরিসীমা থাকে না । এক বৎসর শস্তোৎপত্তির ব্যাঘাত জন্মিলে তাহাদের মধ্যে হাহাকার পড়িয়া যায়, এতটুকু সঙ্গতি নাই যে তাহার বলে তাহারা দৈবের ঋণস্থায়ী বিঘ্ন সকল অতিক্রম করিয়া উঠিতে পারে । এই দুর্ভিক্ষে তাহার পরিচয় বিলক্ষণ পাওয়া গিয়াছে । মহারাষ্ট্র-দেশে মহাজনদের বিরুদ্ধে যে রায়তদের বিদ্রোহ সংঘটিত হয় তাহা বোধ করি পাঠকগণ শুনিয়া থাকিবেন । ১৮৭৫ খৃষ্টাব্দের মে মাসে এই বিপ্লব উপস্থিত হয় । ঐ বৎসরে মে মাসের দ্বাদশ দিবসে পুণা জিলায় স্থপা নামক গ্রামে ইহার প্রথম সূত্র-পাত । সে দিন হাটের দিন, পার্শ্ববর্তী পরী হইতে অনেক লোকজনের সমাগম হইয়াছে, এমন সময় সহসা বণিক ও মাড়-ওয়ারীর দোকানে লুটপাট আরম্ভ হইল । রায়তেরা ঐ সকল দোকানদারদের খাতাপত্র, কাপড় ও অন্যান্য সামগ্রী একত্রিত করিয়া জ্বালাইয়া দেয় । এই বিদ্রোহের সংবাদ শ্রবণ করিবা-মাত্র জিলার মাজিস্ট্রেট পদাতিক ও অশ্বারোহী পুলিশ সিপাহি ও এক দল সৈন্য সমভিব্যাহারে স্থপায় গিয়া উপস্থিত হন—এদিকে পুলিশের অধ্যক্ষ তাঁহার দলবল লইয়া উপস্থিত ।

ভাঁহাদের যত্নে গ্রামের ইতস্ততঃ বিক্ষিপ্ত প্রায় ৬৭০০০ টাকার সামগ্রী উদ্ধার করা যায়—শতাধিক রায়ত গ্রেফতার হয় ও তাহাদের মধ্যে সাব্যস্ত অপরাধীগণ মাজিষ্ট্রেট কর্তৃক দণ্ডিত হয় । এই বিপ্লব সংবাদ চতুর্দিকে রাষ্ট্রে হইয়া অন্যান্য গ্রামেও এই অগ্নি প্রজ্বলিত হয় । এ সকলেরই লক্ষণ একই প্রকার, রায়তেরা মহাজনদের নিকট হইতে তাহাদের খৎ-পত্র কাড়িয়া লইয়া ভস্মসাৎ করে ও মহাজনেরা কাগজ পত্র বাহির করিতে বিলম্ব করিলে তাহাদের উপর নানাবিধ অত্যাচার করে । কাগজ-পত্রই মহাজনদের প্রথর অস্ত্র, ইহার জ্বালায় অস্থির হইয়া প্রজারা ভাবিল—এই কাগজগুল জ্বালাইয়া দিতে পারিলেই আমরা পরিত্রাণ পাই । এইরূপে শত শত দলিল দস্তাবেজের ধ্বংশ—ও অনেকানেক মহাজনের নাক কান কর্তন, দ্রব্যাদি লুণ্ঠন আরম্ভ হইল । পুণা হইতে অহমদনগরের স্থানে স্থানে এই উৎপাত প্রবেশ করে । পরিশেষে কর্তৃপুরুষ ও পুলিশের যত্নে বিদ্রোহানল প্রশমিত হয় । ইহাতে মহারাষ্ট্রীয় মহাজন-দের বিস্তর ক্ষতি হইয়াছিল কিন্তু এক উপকার এই হয় যে তথাকার রায়তদের অবস্থার প্রতি গবর্ণমেন্টের বিশেষ মনোযোগ আকৃষ্ট হয় । এই বিদ্রোহের কারণ অনুসন্ধান করিবার জন্য কয়েক জন প্রবীণ ও বিচক্ষণ জুডিসিয়াল ও রেবেনিউ কর্মচারীর এক কমিসন নিযুক্ত হয় ও কমিসনরগণ বিস্তর অনুসন্ধানের পর অনেক প্রমাণ সংগ্রহ করিয়া গবর্ণমেন্টে রিপোর্ট প্রেরণ করেন । তাহার স্থূল মর্ম্ম এই যে, রায়তদের দারিদ্র্য নিবন্ধন কষ্ট ও দুর্দ্দ-

শার সীমা নাই। জুডিসিয়ল মেম্বরেরা বলেন—রায়তেরা গবর্ণমেন্টের রাজস্ব ভারে প্রপীড়িত, তাহার লাঘব করা কর্তব্য—রেবেনিউ মেম্বরেরদের মতে আদালত ও মকদ্দমার হান্সামেই রায়তের সর্বনাশ—তৎসংক্রান্ত নিয়ম সংশোধন করা কর্তব্য। এই সকল রিপোর্টের কি হইল এখন আর তাহার বিশেষ কিছু শুনা যায় না। রিপোর্টাবলীর চিরনিদ্রার স্থান—অকেজো কাগজের ঝুড়িতে তাহার গতি না হইলে রক্ষা। আশা হয় না, কমিসনরগণ রায়তের দুর্গতি নিবারণের যে সকল উপায় নিরূপণ করিয়াছেন তাহা অচিরাৎ অবলম্বিত হইয়া তাহাদের যত্ন ও পরিশ্রম সার্থক হইবে। তালুকদার, জাইগীরদার প্রভৃতি বড় বড় জমিদারদের ঋণ মুক্তি লাভ উদ্দেশে ভুরি ভুরি আইন বর্ষিত হইতেছে কিন্তু গরীব রায়তের পক্ষে হইয়া কেহ কোন কথা কহিলে তাহাতে সহজে কর্ণপাত প্রত্যাশা করা যায় না।

বোম্বাই অঞ্চলে অধিকাংশ ভূমি সম্বন্ধে রায়তওয়ারী বন্দবস্ত দৃষ্ট হয়। এই বন্দবস্তের দোষ গুণ বিচারে প্রবৃত্ত হইবার পূর্বে বোম্বাই প্রদেশের রেবেনিউ কার্য্য-প্রণালী কিরূপ তাহা সংক্ষেপে প্রদর্শিত করা সম্ভব বোধ হইতেছে।

নিম্নলিখিত কর্মচারীদিগের হস্তে রেবেনিউ কার্য্য পরিচালনের ভার সমর্পিত। *

কর্মচারী	মোট মাসিক বেতন সংখ্যা
৩ জন রেবিনিউ কমিসনর	১০০০০
১২ জন বরিষ্ঠ (সিনিয়র) কলেक्टर	২৭৯০০
৬ জন কনিষ্ঠ (জুনিয়র) কলেक्टर	১০৮০০
১৫ জন প্রথম সহকারী কলেक्टर	১৩৫০০
১৫ জন দ্বিতীয় সহকারী কলেक्टर	১০৫০০
৩৫ জন ডিপুটি কলেक्टर	১৪০০০

ইহাঁরাই স্থায়ী কর্মকর্তা—এতদ্ব্যতীত কতক গুলি অতিরিক্ত সহকারী কলেक्टर আবশ্যকমতে স্থানে স্থানে নিযুক্ত হয় । ইহাঁদের সর্বশুদ্ধ মাসিক বেতন সংখ্যা ১ জানুয়ারি ১৮৭৭ পর্যন্ত—২৩,৪১৪ টাকা ।

সিন্ধুদেশ ও নিজ বোম্বাই সহরের স্বতন্ত্র বন্দবস্ত । তাহা ছাড়িয়া দিলে এই প্রেসিডেন্সির অন্তর্গত ব্রিটিস রাজ্য অষ্টাদশ কলেক্টরেটে বিভক্ত ও তাহা উল্লিখিত কর্মচারীগণ কর্তৃক প্রশাসিত । ইহাঁদের মোট বেতন সংখ্যা মাসিক এক কোটিরও অধিক টাকা ।

প্রতি কলেক্টরেট কতকগুলি তালুকে বিভক্ত ও প্রত্যেক তালুকের প্রধান রেবিনিউ কর্তৃপুরুষ এক এক জন মামলৎদার, গ্রামস্থ অপরাপর রেবিনিউ কর্মচারীগণ তাঁহার অধীন ।

এত দিন পর্যন্ত উত্তর ও দক্ষিণ ভাগে দুই জন রেবিনিউ কমিসনর নিযুক্ত ছিলেন ।—সম্প্রতি মধ্য ভাগের জন্য এক জন

তৃতীয় রেবেনিউ কমিসনর নিযুক্ত হইয়াছেন। রেবেনিউ কমিসনরগণ পুলিশেরও প্রধান অধ্যক্ষ। পূর্বে তাঁহাদের নাম ‘রেবেনিউ ও পুলিশ কমিসনর’ ছিল। সম্প্রতি তাঁহাদের হস্তে কতকগুলি ক্ষুদ্র ক্ষুদ্র দেশীয় সংস্থানের রাজকার্য্য তত্ত্বাবধানের ভার ন্যস্ত হইয়া তাঁহাদের উপাধি ‘কমিসনরে’ পরিবর্তিত হইয়াছে। কতকগুলি ‘পোলিটিকল এজেন্ট’ যাঁহাদিগের সহিত পূর্বে গবর্ণমেন্টের সাক্ষাৎ সম্বন্ধে পত্র লেখালেখি চলিত তাঁহাদিগকে এক হিসাবে কমিসনরদের অধীনতা স্বীকার করিতে হইবে এই নিয়ম এক বৎসরের জন্য ধার্য্য হইয়াছে— এক বৎসর কাল-কিরূপ চলে তাহা দেখিয়া পরে তাহার স্থায়িত্ব নির্ণীত হইবে। কমিসনরদের হস্তে মাজিস্ট্রেটের কোন অধিকার নাই।—রেবেনিউ সংক্রান্ত তত্ত্বাবধান তাঁহাদের প্রধান কার্য্য। শীত কালে তাঁহারা নিজ নিজ বিভাগ পরিদর্শনার্থে বাহির হইয়া কলেक्टरদের কাজকর্ম্ম হিসাবপত্র পর্য্যবেক্ষণ করেন। প্রত্যেক কমিসনরের অধীনস্থ কনিষ্ঠ কর্ম্মচারীদিগের উপর এক জন সহকারী কমিসনর প্রতিষ্ঠিত—তাঁহার পদটী ডেপুটী কলেक्टरের সঙ্গে সমান।

প্রত্যেক কলেক্টরেটে এক এক জন কলেক্টর বিরাজিত— তিনিই আবার জিলার মাজিস্ট্রেট। জিলার মধ্যে তিনিই সর্বো-সর্ব্বা হর্ত্তাকর্ত্তা বিধাতা। কলেক্টর নাম তাঁহার কার্য্যের ঠিক উপযোগী নয়। এই নামে লোকে মনে করিতে পারে যে

গবর্ণমেন্টের কর আদায়ের জন্যই তিনি নিযুক্ত । কিন্তু বাস্তবিক তাহা নহে । তাঁহার কর্মক্ষেত্র বিস্তীর্ণ—জিলার মধ্যে এমন কোন কার্য্য নাই যাহা তাঁহার দৃষ্টিবহির্ভূত । বাণিজ্য ব্যবসার উন্নতি অবনতি—অর্থের হ্রাস বৃদ্ধি—ন্যায় ও শিক্ষা-কার্য্যের শৃঙ্খলা—পথ ঘাট বাপী সেতু কোথায় কি আবশ্যক—নগরের শোভা সৌন্দর্য্যবর্দ্ধন—যে কোন কার্য্য তাঁহার অধীনস্থ প্রজাপুঞ্জের সুখসমৃদ্ধি সাধনের উপযোগী তাহার সহিত তাঁহার কোন না কোন রূপ সংশ্রব দেখা যায় । তাঁহার পক্ষে পরাধিকার চর্চ্চা বর্জনীয় সত্য বটে কিন্তু তাঁহার নিজাধিকার-বহির্ভূত কোন বিষয়ে বিশৃঙ্খলা দেখিলে বিবেচনা পূর্ব্বক হস্তক্ষেপ করা তাঁহার কর্তব্যের মধ্যে গণ্য হইতে পারে ।

কলেक्टर এবং সহকারী কলেক্তরের পদে সিবিলিয়ন ভিন্ন কেহ আরুঢ় হইতে পারে না । সহকারী কলেক্তরের সংখ্যা অল্প কমাইয়া তাহাদের বেতন বৃদ্ধির সম্প্রতি এক প্রস্তাব হইয়াছে । কোন এক জন সিবিলিয়ন প্রথমে এদেশে পদার্পণ করিলে তিনি অতিরিক্ত সহকারীরূপে এক জন কলেক্তরের অধীনে নিযুক্ত হন । পরে প্রথম ডিপার্টমেন্টাল পরীক্ষা উত্তীর্ণ হইলে তিনি দুই এক তালুকের স্বতন্ত্র অধিকার প্রাপ্ত হয়েন ও ক্রমে কার্য্যগতিকে তাঁহার পদের উন্নতি ও তাহার সঙ্গে সঙ্গে বেতন বৃদ্ধি হয় । গ্রামস্থ ও তালুকের কর্মচারীদিগের তত্ত্বাবধান সহকারী কলেক্তরের প্রধান-কার্য্য । তিনি কোন গ্রামে গিয়া তাম্বু করিলে প্রথমে পাটেল, কুলকর্ণী অথবা তলাটীদিগকে

ডাকাইয়া তাহাদের সহিত কৃষিকার্য্য রাস্তা বিদ্যালয় ও অন্যান্য বিষয়ে কথোপকথন করিয়া গ্রামের কার্য্য বিবরণ অবগত হইবেন। পরে কোন এক দিবস স্থির করিয়া রায়তদের দাখিলা প্রভৃতি হিসাবপত্র অবলোকন করিবেন—তাহারা যে খাজানা দিয়াছে তাহা তাহাদের রসিদ পুস্তকে বরাবর জমা হইয়াছে কি না ও তাহাদের কাহার কি আবেদন কি অভাব এই সকল বিষয় অনুসন্ধান করিবেন। গ্রামের পরিষ্কার পরিচ্ছন্নতার প্রতি দৃষ্টি করিবেন—বিদ্যালয় পরিদর্শন করিবেন, ক্ষেত্রের সীমাচিহ্ন সকল ঠিক আছে কি না বিশেষ করিয়া দেখিবেন। পথ ঘাট বাঁধ পুষ্করিণী ছায়াতরু সকলের অবস্থা পর্য্যবেক্ষণ করিবেন। গ্রাম পরিদর্শন কার্য্য সমাপ্ত হইলে তালুকের কাচারী, ত্রিজুরী—মামলতদারদিগের হিসাবপত্র পরীক্ষা করা ইত্যাদি অনেক কাজ সহকারী কলেক্টরের হস্তে। তাঁহার কার্য্যদক্ষতা ও বিচক্ষণতার উপর তালুকের মঙ্গল অনেকটা নির্ভর করে।

ডেপুটী কলেক্টরগণ পাঁচ শ্রেণীতে বিভক্ত—সর্বোচ্চ শ্রেণীর ডেপুটীর বেতন মাসিক ৭০০ টাকা। তাহাদের কর্ম্ম বিভাগ অনুসারে—হজুর ডেপুটী ও জিলার ডেপুটী এই দুই নাম। ডিষ্ট্রিক্ট ডেপুটী ও সহকারী কলেক্টরের কার্য্য ও অধিকার প্রায় সমান। হজুর ডেপুটী জিলার প্রধান নগরীতে ত্রিজুরী সম্বন্ধীয় ও অপর কার্য্যে নিযুক্ত—তন্নিম্ন আর আর রেবেনিউ কর্ম্মচারীগণ বর্ষার চতুর্মাস ভিন্ন নিজ নিজ বিভাগ পরিদর্শনের জন্য তাম্বু করিয়া ভ্রমণে বাহির হয়েন।

তালুকের প্রধান রেবেনিউ কর্ম্মাধ্যক্ষের নাম মামলৎদার । তাঁহার অধীনস্থ গ্রাম সমূহের কর্ম্মচারী মুখী পাটেল কুলকর্ণী তলাটি প্রভৃতি তাঁহার আঙ্গাবহ । তালুকের ত্রিজুরী, যাহাতে গ্রাম-সংগৃহীত গবর্ণমেন্টের সমুদয় খাজানা জমা হয় ও যাহা হইতে তালুকের নির্দিষ্ট সমস্ত ব্যয় নির্বাহিত হয়—তাহার তিনিই পরিরক্ষক । কলেঙ্কর যাহাকে যে কোন অনুজ্ঞা প্রেরণ করেন তাহা মামলৎদারের হস্ত হইতেই প্রেরিত হয় । মামলৎদারদের কার্য্যকুশলতা অনুসারে তাহাদের প্রথম, দ্বিতীয় কিন্ধা তৃতীয় শ্রেণীর মাজিষ্ট্রেটের অধিকার । তদ্ব্যতীত পোলিষাধ্যক্ষ, এঞ্জিনিয়র, ইন্সপেক্টিং পোর্টমাস্টার, রেজিষ্ট্রার প্রভৃতি সকলেরই মামলৎদারের সহিত সাক্ষাৎসম্বন্ধে পত্র-ব্যবহার চলে । কোন ভ্রমণকারী যে কোন কারণেই হউক তাঁহার সীমার মধ্যে আগমন করিলে তাঁহার যখন যাহা আবশ্যক হয় তাহার জন্য মামলৎদারের নিকটেই আবেদন করেন । ইহা হইতে মামলৎদারের উপরে যে অগাধ কার্য্য-ভার নিপতিত তাহা সহজে বোধগম্য হইতে পারে । রেবেনিউ ও অপরাপর বিষয়ে মামলৎদার যে কোন আদেশ প্রদান করেন তালুকের সহকারী কলেঙ্করের নিকট সামান্যতঃ তাহার আপীল হইয়া থাকে । কেবল এক বিষয়ে কোন আপীল নাই । কোন ব্যক্তি কোন ভূমি, বাটী, বৃক্ষ, ফসল, জলকর অথবা তাহার উপস্থিত হইতে অন্যায় পূর্ব্বক বেদখল হইলে অথবা ইজারার মেয়াদ অতীত হওয়াতে কি অন্য কোন কারণে

ঐ সকল বস্তুর ন্যায্য অধিকার লাভে স্বত্ত্ববান্ হইয়া তাহা হইতে বঞ্চিত হইলে সে প্রতিকার উদ্দেশে ছয় মাসের মধ্যে মামলৎদারের নিকটে আবেদন করিতে পারে ও তাহা হইলে মামলৎদার তাহাকে তাহার অপহৃত বিষয় প্রত্যর্পণ অথবা তাহার প্রাপ্য অধিকার প্রদান করিতে পারেন । অথবা এই সকল বিষয়ের অধিকার হইতে কেহ কাহাকেও বঞ্চিত করিবার চেষ্টা করিলে মামলৎদার সেই আশঙ্কিত অত্যাচার নিবারণের জন্য আজ্ঞা প্রচার করিতে পারেন । বোম্বাই আইন অনুসারে এই সকল মকদ্দমার উপর আপীল নাই । মামলৎদার ত্রাঙ্কণের গরুটির মত মহোপকারী ভৃত্য অথচ অল্লাহারে সম্মত । তাঁহার তিন শ্রেণীতে বিভক্ত—প্রধান শ্রেণীস্থ মামলৎদারের মাসিক ২৫০ টাকা বেতন মাত্র ।

যে সকল কর্মচারী গবর্ণমেন্ট ও রায়তের মধ্যবর্তী তাঁহাদের শৃঙ্খল সম্পূর্ণ বাঁধিতে গেলে গ্রামস্থ কর্মচারীগণের উল্লেখ করিতে হয় । এই সকল কর্মচারীর মধ্যে পটেল ও কুলকর্ণী প্রধান । গুজরাটে পটেলের নাম মুখী ও কুলকর্ণীর নাম তলাটি । আক্ষেপের বিষয় এই যে পল্লীগ্রামে পূর্বের কাজ-কর্মের যে সুন্দর ব্যবস্থা বিদ্যমান ছিল ইংরাজদের আমলে তাহা ভগ্নদশা প্রাপ্ত হইতেছে । মুখী অথবা পটেল গ্রামের মণ্ডল—রায়ত ও গবর্ণমেন্টের মধ্যে সকল কার্যস্থলে পটেল রায়তের মুখপাত স্বরূপ । পটেলের কার্য অনুসারে সে—হয় রেবেনিউ কিম্বা পুলিশ পটেল—এই দুই নাম ধারণ করে ।

রেবেনিউ পটেলের হস্তে গ্রামের রেবেনিউ সংক্রান্ত সমুদয় কার্য ; পুলিশ পটেলের হস্তে পুলিশ সংক্রান্ত সমুদয় কার্য । কোন কোন স্থলে রেবেনিউ ও পুলিশ পটেলের কার্য একই জনের হস্তে সম্মিস্ত দেখা যায় । রায়তের নিকট হইতে সরকারী খাজানা আদায় করা ও সর্বতোভাবে গ্রামের কৃষি ও আর আর বিষয়ের উন্নতি ও শ্রীবৃদ্ধির প্রতি দৃষ্টি রাখা পটেলের কার্য । অনেক স্থলে পটেলের কার্য বংশানুক্রমে পিতা হইতে পুত্রে অবতীর্ণ হয় ও কার্যকর্তা চাকরা জমী বেতনের বিনিময়ে উপভোগ করে ।

গ্রামের হিসাবপত্র রাখা কুলকর্ণীর কার্য । ইহার পদও অনেক স্থলে বংশপরম্পরাগত ও ভূমির উপস্থিত হইতে সে তাহার বেতন লাভ করে । পটেলের ন্যায় তাহার হস্তেও সরকারী খাজানা আদায়ের ভার । খাজানা আদায় হইলে তাহা সরকারী দফতরে প্রবিষ্ট করা ও রায়তকে তাহার দাখিলা লিখিয়া দেওয়া এই সকল লেখাপড়ার কৰ্ম্ম কুলকর্ণীর । সে সচরাচর ব্রাহ্মণজাতীয়—গ্রামের সরকারী খাজাঞ্জি । গ্রামে যে খাজানা জমা হয় তাহা মামলদারের তহবিলে ও তথা হইতে হজুর ত্রিজুরীতে প্রেরিত হয় ।

এতদ্ভিন্ন আরো কতকগুলি কৰ্ম্মচারী আছে যাহাদের কতক গবর্ণমেণ্টের কাজে—কতক গ্রামবাসীদের কাজে নিযুক্ত যথা,—

মাহার, গ্রাম পরিরক্ষক—ফসল ও সীমাচিহ্ন রক্ষণাবেক্ষণ করা, সরকারী খাজানা তালুকের তহবিলে পৌঁছান—চিটিপত্র

লইয়া যাওয়া—পথিকদিগের পথ প্রদর্শন করা ইত্যাদি তাহার কার্য্য । ছুতার, লৌহকার, স্বর্ণকার, কুম্ভকার, পোদার, ধোবা, নাপিত, দৈবজ্ঞ, গুরু ইত্যাদি লোকেরা প্রচলিত প্রথা অনুসারে গ্রামবাসীদের কার্য্য করে । তাহাদের মধ্যে কেহ কেহ চাকরা জমী উপভোগ করে, কেহ বা অন্য প্রকারে রায়তদের নিকট হইতে কিছু কিছু করিয়া পায় ।

এইত রেবেনিউ কার্য্যপ্রণালী ও কৰ্ম্মচারীদিগের বিষয় বলা হইল—এইক্ষণে রায়তওয়ারী বন্দবস্ত বিবৃত করিতে প্রবৃত্ত হওয়া যাইতেছে । এই বন্দবস্তের মূলসূত্র এই যে রাজার প্রজার সাক্ষাৎ সম্বন্ধ—তাহাদের মধ্যবর্তী কোন ভূস্বামী নাই । গবর্ণমেন্টই জমীদার ও গবর্ণমেন্টের কৰ্ম্মচারীদিগের প্রতি খাজানা আদায়ের ভার অর্পিত । পূৰ্বে দেশীয় রাজার রাজত্ব কালে সামান্যতঃ এইরূপ বন্দবস্ত ছিল যে, জমিতে যে শস্য জন্মিত রাজা তাহার অমুক অংশ গ্রহণ করিতেন, এক্ষণে আর শস্যের ভাগ গৃহীত হয় না । তাহার পরিবর্তে নির্দ্ধারিত খাজানা মুদ্রাকারে গ্রহণ করা হয় । এইরূপে সমুদয় রায়তওয়ারী ভূমির জরীপ হইয়া তাহার জমাবন্দি নিরূপিত হইয়াছে । ১৮৩৬—৩৭ সালে এই অঞ্চলে জরীপ কার্য্য আরম্ভ হয় ও তৎসংক্রান্ত নিয়মাবলি ১৮৬৫ সালের বোম্বায়ের ১ আইনে বিধিবদ্ধ হয় ।

জরীপ বিভাগের কার্য্য ছুই জন কমিসনর, কতকগুলি স্পর্টিংমেণ্ট ও তাহার অনেকানেক সহকারী ও কণিষ্ঠ কৰ্ম্মচারীগণ কর্তৃক নির্বাহিত হয় । জরিপ ও জমাবন্দি করিবার নিয়ম এই—

১ ভূপৃষ্ঠ পরিমাপ ।

২ জমীর গুণাগুণ নির্ণয় করিয়া তাহা শ্রেণীবদ্ধ করা ।

৩ জল বায়ু বাজার কৃষির অবস্থা অনুসারে এক এক তালুক কতকগুলি পল্লী শ্রেণীতে বিভাগ করা ।

৪ প্রতি পল্লী শ্রেণীর জন্য এই রূপ নিয়মে কর নির্ধারণ করা যে তাহা রায়তেরা সহজে দিতে পারিবে—অর্থাৎ যাহা দিয়া উদ্ধৃত মুনফায় তাহার কৃষিকার্যের খরচ ও উন্নতি সাধনে সমর্থ হইতে পারে ।

৫ প্রতি ক্ষেত্রের জমা নিরূপণ করা ।

১ ভূমি পরিমাপ, এই কার্যের জন্য এক দল আমীন তালুকে প্রেরিত হয়—তাহারা এক এক গ্রামের আবাদযোগ্য ও পতিত ভূমি কতকগুলি ক্ষেত্রে বিভক্ত করিয়া প্রত্যেক ক্ষেত্রের এক এক ‘জরীপ নম্বর’ স্থির করে । এক জোড়া বল-দের সাহায্যে যত বিঘা জমী সহজে আবাদ করা যায় তাহা দেখিয়া ক্ষেত্রের আয়তন স্থির হয় । তত বিঘা হইতে তাহার দ্বিগুণ বিঘা পর্য্যন্ত এক এক ক্ষেত্রের আয়তন, তাহা অপেক্ষা নিতান্ত বড়ও নয় ছোটও নয় । আয়তন স্থির হইলে ক্ষেত্রের সীমা নিরূপিত ও সীমাচিহ্ন স্থাপন ও রক্ষণের বিহিত উপায় অবলম্বিত হয় ।

২ ক্ষেত্রের গুণাগুণ নির্ণয় ।

ইহার জন্য পরে আর এক দল আমীন আসিয়া উপস্থিত হয় । যে সকল কারণে জমী মূল্যবান্ হয়—যেমন তাহার ফল-

বত্তা—জলসেকের স্রবিধা, বাজারের সন্নিধি ইত্যাদির প্রতি লক্ষ্য করিয়া কোন্ ক্ষেত্র কোন্ শ্রেণীতে গণ্য তাহারা তাহা নির্ণয় করে। ইহার অনেক নিয়ম আছে, প্রস্তাব বাহুল্য-ভয়ে তৎপ্রদর্শনে ক্ষান্ত হইলাম।

৩—৪ পল্লী শ্রেণীতে তালুকের বিভাগ—ও প্রত্যেক শ্রেণীর দর নিরূপণ।

ইহা খাজানার হারের সমীকরণের জন্ম। ক্ষেত্রের জরীপ নকসা ও শ্রেণী বিভাগ হইয়া গেলে গ্রাম-শ্রেণীতে তালুকের বিভাগ করা হয় ও প্রত্যেক শ্রেণীর জন্ম তাহার উর্দ্ধসংখ্যক হার নিরূপিত হয়। এই হার জরীপ স্পারিটেণ্টেণ্ট কমিসনরের মত লইয়া বন্ধন করেন ও গবর্ণমেন্টের সম্মতি হইলে তাহা ধার্য্য হয়।

৫ প্রতি ক্ষেত্রের জমা নিরূপণ—

তৎপরে প্রত্যেক ক্ষেত্রের শ্রেণী অনুসারে তাহার জমাবন্দির হার নির্দ্ধারিত হয়। উত্তর পশ্চিম ও অন্যান্য প্রদেশে গ্রামের জন্ম সদর খাজানা ধার্য্য হয় ও প্রত্যেকের জমির জন্য কত করিয়া খাজানা দিতে হইবে তাহা গ্রামবাসীগণ আপনাদের মধ্যে স্থির করে কিন্তু বোম্বায়ে সেরূপ নয়।—এখানে আমীনেরা প্রত্যেক ক্ষেত্রের জন্য খাজানার দেয় অংশ স্থির করিয়া দেন। ক্ষেত্রের জমাবন্দি স্থির হইলে গ্রামস্থ রায়তদিগকে আহ্বান করিয়া প্রতি জনের জমির জন্য যাহা দেয় তাহা তাহাকে বুঝাইয়া দেওয়া—তাহাদের কাহারো কোন আপত্তি

থাকিলে তাহার নিষ্পত্তি করা—অনধিকৃত জমীর উপর প্রজা-
পত্তন—রেবেনিউ আমীনদিগের এই শেষ কার্য্য। এই সকল
শেষ হইলে কাগজপত্র কলেঙ্কের নিকট প্রেরিত হয় ও আমীন-
গণ দলবল লইয়া অন্যত্র প্রস্থান করেন। এই যে জমাবন্দী
সম্বন্ধীয় বন্দবস্ত ইহাকেই রায়তওয়ারী বন্দবস্ত কহে—সামান্যতঃ
ইহা ত্রিংশৎ বৎসর ব্যাপী।

এই রূপে যে খাজানা নির্দিষ্ট হয় রায়ত তাহা যত দিন
দিতে পারিবে ততদিন জমির উপর তাহার সম্পূর্ণ স্বত্ব—সে স্বত্ব
হইতে কেহুই তাহাকে বঞ্চিত করিতে পারিবে না। তাহার
সে স্বত্ব বিক্রী কিম্বা বন্ধক দ্বারা হস্তান্তর করা তাহার সম্যক্
ইচ্ছাধীন—যে তাহা গ্রহণ করিবে সেই গবর্ণমেণ্টের নিয়মিত
খাজানার জন্য দায়ী। জমাবন্দী সম্বন্ধীয় বন্দবস্ত সাধারণতঃ
ত্রিংশৎ বৎসর ব্যাপী, তাহার মধ্যে জমার হ্রাস বৃদ্ধি হইবার
নহে। সেই কাল অতীত হইলে রায়তের অযত্নসম্মত কারণে
জমি ও ফসলের মূল্য বৃদ্ধির সঙ্গে সঙ্গে নূতন বন্দবস্তে গবর্ণ-
মেণ্টের খাজানা বৃদ্ধি করা যাইতে পারে। সেই খাজানা দিতে
পারিলে রায়তের স্বত্ব বংশপরম্পরা চালিত হইবার কোন বাধা
নাই।

রায়ওয়ারী বন্দবস্তের বিশেষ গুণ এই যে ইহা ত্রিশ বৎসর
কাল গবর্ণমেণ্টের উপর বন্ধনকারী—সেই কালের মধ্যে গবর্ণ-
মেণ্ট খাজানা বৃদ্ধি করিতেও পারেন না ও খাজানা দিতে ক্রটি
না করিলে রায়তকে স্থানান্তরিত করিতেও পারেন না অথচ

তাহা রায়তের উপর বন্ধনকারী নহে। রায়ৎ ইচ্ছা করিলে ফসলী সালের প্রারম্ভে তাহার উপভোগ্য জমির সম্পূর্ণ অথবা এক ক্ষেত্রের অন্যান্য কয়দাগ পরিত্যাগ করিতে পারে এবং অন্যান্য অনধিকৃত ক্ষেত্র আবাদের জন্য গ্রহণ করিতে পারে। এ নিয়ম রায়তের পক্ষে সামান্য হিতকরী নহে। এই বন্দবস্তে ত্রিশ বৎসর ইজারার যে লাভ তাহা সম্পূর্ণ রায়তের অথচ তন্নি-
 বন্ধন দায়িত্ব হইতে সে মুক্ত। তাহাতে তাহার কোন ক্ষতির আশঙ্কা নাই, কেননা ক্ষতির সম্ভাবনা দেখিলে নিজ স্বত্ব ছাড়িয়া দিবার তাহার কোন বাধা নাই। ছাড়িতে হইলে তাহার হস্ত-
 স্থিত সমস্ত ভূমি ছাড়িয়া দিতে হইবে তাহাও নহে—সে আপন ইচ্ছামত আপনার শক্তি-অনুসারে অল্প কিম্বা অধিক ভূমিখণ্ড রাখিয়া অবশিষ্ট ভাগে ইস্তফা দিয়া তাহার খাজানার দায় হইতে মুক্ত হইতে পারে। মনে কর, এক জন রায়তের দশটি ক্ষেত্র আছে, তাহার সমুদায়ে ১৫০ টাকা ও প্রত্যেকের জন্য ১৫ টাকা করিয়া খাজানা দিতে হয়। মনে কর, তাহার অবস্থা সচ্ছল—
 হাতে কিছু টাকা আসিয়াছে ও সেই টাকা দিয়া তাহার জমির স্থায়ী উন্নতি সাধনে সে কৃতসঙ্কল্প হইয়াছে—যথা, তাহার ভূমির এক ভাগে জলসেকের জন্য কুয়া খনন করা। এক্ষণে বিবেচনা কর, যদি তাহার সমগ্র ভূমির জন্য বৎসর বৎসর তাহাকে ১৫০ টাকা করিয়া খাজানা দিতে হয় তাহাতে তাহার সুবিধা অথবা যদি তাহার প্রত্যেক ক্ষেত্রের জন্য পৃথক্ খাজানা ১৫ টাকা নিরূপিত হয় ও সে তাহার যত গুলি ইচ্ছা রাখিতে ও ছাড়িয়া

দিতে পারে তাহা হইলে তাহার সুবিধা হয় ? পূর্বোক্ত প্রকার ' নিয়ম হইলে হয়ত কোন আপদ বিপদে সে অত টাকা দিয়া উঠিতে অক্ষম হইতে পারে ও যে টাকা সে ভূমির উৎকর্ষ সাধনে ব্যয় করিয়াছে, ভূমির সঙ্গে সঙ্গে সে টাকাও তাহার নষ্ট হইবার সম্ভাবনা । শেযোক্ত প্রকার নিয়মে তাহার অবস্থা বুঝিয়া কতকগুলি ক্ষেত্র সে ইচ্ছামত ছাড়িয়া দিতে ও তন্নিবন্ধন খাজানার দায় হইতে অনায়াসে নিষ্কৃতি লাভে সমর্থ হয় । আর যে সকল ক্ষেত্র অধিক মূল্যবান্ ও যাহার উৎকর্ষ সাধনে তাহার অর্থব্যয় হইয়াছে তাহা রক্ষা করিতেও কৃতকার্য হইতে পারে । উল্লিখিত প্রকার দুই নিয়মের মধ্যে যে নিয়ম রায়তের পক্ষে অধিক সুবিধাজনক, যাহাতে জমির উন্নতি সাধনের জন্য অর্থ-ব্যয়ে তাহার অধিক প্ররুতি জন্মে—অধিক সাহসের সঞ্চার হয়, সেই নিয়মটিই এই রায়ৎওয়ারী বন্দবস্তের অন্তর্গত । এদিকে ত্রিশ বৎসর অন্তর বন্দবস্ত পরিবর্ত করিবার নিয়ম থাকাতে সরকারী খাজানার কোন ক্ষতি হইবার সম্ভাবনা নাই । খাজানা দিয়া যাহা অবশিষ্ট থাকে তৎসমুদায়ই রায়তের ভোগ্য—জমির উপস্বত্বভাগী জমিদার কি পত্তনীদার আসিয়া তাহার যথাসর্বস্ব হরণ করিতে পারে না । রায়ৎ তাহার নিজ স্বত্বের উপর সম্পূর্ণ অধিকারী—গবর্ণমেন্টের খাজানা দিবার ব্যতিক্রম না ঘটিলে কেহই তাহাকে সে স্বত্ব হইতে বঞ্চিত করিতে পারে না । গবর্ণমেন্টের কর্মচারিগণ তাহার স্বত্বে হস্তক্ষেপ করিতে অসমর্থ । রায়তের দেয় খাজানা নিয়মিত সময়ে গ্রহণ করা ভিন্ন

তাহারা আর কিছুই করিতে পারে না । এই সময়ে খাজানার টাকা লইয়া প্রস্তুত থাকিলে রায়ৎ নিজের জমি আবাদ করিয়াছে কি না—ফসল ভাল কি মন্দ হইয়াছে—এসকল বিষয়ের তদারক করিবার কোন আবশ্যক নাই । নূতন বন্দবস্ত করিবার নিয়ম এই যে, রায়ৎ নিজ যত্ন ও পরিশ্রমে যাহা কিছু উন্নতি সাধন করিয়াছে তাহা বিচারস্থলে আনীত না হইয়া অন্যান্য কারণে জমি ও ফসলের মূল্য বৃদ্ধি দেখিয়া খাজানার হার নিরূপিত হইবে । রায়তের লাভের প্রতি নিরপেক্ষ হইয়া খাজানা বৃদ্ধি করিলে সে ভূমি কর্ষণ হইতে বিরত হইবে সুতরাং তাহাতে গবর্ণমেন্টকেই ক্ষতিগ্রস্ত হইতে হইবে । রায়ৎ অযথাবিধ খাজানা বৃদ্ধির আশঙ্কা না রাখিয়া ইচ্ছামত ভূমির উৎকর্ষ সাধনে তৎপর থাকিতে পারে । অতএব কে না স্বীকার করিবে যে রায়তওয়ারী বন্দবস্তে সরকারী খাজানা আদায়ের যেমন সুবিধা, তেমনি তাহা আবাদ কার্যের উন্নতি ও কৃষকের শ্রীবৃদ্ধি সাধনের নিদানভূত ।

রায়ৎওয়ারী বন্দবস্তে নিম্নলিখিত চারিটি প্রধান নিয়ম দৃষ্ট হইবে ।

(১) প্রত্যেক রায়তের সহিত গবর্ণমেন্টের পৃথক্ বন্দবস্ত ।

(২) ত্রিশ বৎসর, কি অন্য কোন নিয়মিত কালের জন্য ইজারা দান—সেই ইজারার অন্তর্গত সমুদয় অথবা কিয়দংশ ভূমি রায়ৎ ইচ্ছামত বৎসরের শেষে ছাড়িয়া দিতে পারে কিন্তু খাজানা দিবার ক্রটি না হইলে গবর্ণমেন্টের তাহাতে হস্তক্ষেপ করিবার অধিকার নাই ।

(৩) রায়ৎ নিজস্ব ইজারা বিক্রয় কিম্বা বন্ধক দ্বারা হস্তান্তরিত করিবার সম্পূর্ণ অধিকারী ।

(৪) নিয়মিত কাল অতীত হইলে রায়তের স্বকৃত উন্নতি সাধনের উপর লক্ষ্য করিয়া খাজানার হার বৃদ্ধি হইবার নহে ।

যে সকল রায়তের নিকট হইতে নিয়মিত সরকারী খাজানা গৃহীত হয় তাহারা দুই ভাগে বিভক্ত হইতে পারে—গতকুলী অথবা উপরী ও মিরাসদার । উপরী রায়তেরা রায়ৎওয়ারী বন্দবস্ত হইতে যাহা কিছু স্বত্ত্ব প্রাপ্ত হইয়াছে তদ্বিন্ন ভূমির উপর তাহাদের কোন স্থায়ী স্বত্ত্ব নাই । কিন্তু মিরাসদার পূর্ব হইতেই জমীর প্রকৃত মালিক রূপে পরিগণিত । তাহাদের স্বত্ত্ব বংশপরম্পরাগত ও বিক্রয়ের পাত্র ও নিয়মিত খাজানা দিতে পারিলে তাহারা তাহাদের ভূমি হইতে পরিচ্যুত হইতে পারে না । মিরাস-স্বত্ত্ব এরূপ প্রবল যে মিরাসদার যদি তাহার ভূমি ছাড়িয়া অন্যত্র চলিয়া যায় ত তখনি ফিরিয়া আসিয়া নিজ ভূমি প্রতিগ্রহণ করিতে ইচ্ছা করিবে তখনি তাহা গ্রহণ করিতে পারিবে । এক্ষণে কেবল তামাদি বিষয়ক আইন প্রচলিত হইয়া তাহার সেই অধিকারের কিঞ্চিৎ খর্ব্বতা ঘটিয়াছে । কিন্তু ইহা দৃষ্ট হইবে যে জরীপি বন্দবস্তে উপরী রায়তদের প্রতি যে সকল অধিকার প্রদত্ত হইয়াছে তাহাতে ফলে তাহাদের ও মিরাসদারদের মধ্যে বিশেষ কোন প্রভেদ নাই—এই মাত্র প্রভেদ যে উপরী রায়ৎ একবার তাহাদের জমি ছাড়িয়া

দিলে তাহা প্রতিগ্রহণের দাওয়া করিতে পারে না । মহারাষ্ট্র দেশে মিরাস ভূমি বহুল পরিমাণে দৃষ্ট হয় ।

রায়ওয়্যারী জমির উপর যে নির্দ্ধারিত জমা তাহার প্রত্যেক টাকায় এক আনার হিসাবে এক অতিরিক্ত কর রায়তের নিকট হইতে গৃহীত হয় । তাহার নাম ‘লোকল ফণ্ড সেস’ । তাহা লোকল ফণ্ডে জমা হয় ও পল্লীসমূহে বিদ্যাপ্রচার ও পথ নিৰ্ম্মাণ ও সংস্করণ প্রভৃতি স্থানিক কার্য্যে ব্যবহৃত হইয়া থাকে । নিয়ম এই যে, এই টাকার দুই তৃতীয়াংশ শিক্ষা ফণ্ডে ও এক তৃতীয়াংশ রথ্যাফণ্ডে প্রযুক্ত হইবে । স্থানিক ফণ্ড নিম্নলিখিত ফণ্ডের সমষ্টি ।—

রথ্যাফণ্ড ।

শিক্ষাফণ্ড ।

গোষ্ঠগৃহ ফণ্ড ।

(এই গৃহে অনিষ্টকারী গোমেষাদি ধৃত হইয়া রক্ষিত হয় ও তাহাদের ছাড়াইবার জন্য যে দণ্ড দিতে হয় তাহা হইতে এই ফণ্ড সংগৃহীত)

তরণ নৌকাফণ্ড ।

টোল ফণ্ড ।

পান্থশালা ফণ্ড ।

এই সকলের উৎপন্ন টাকা হইতে নিজ নিজ ব্যয় নির্ব্বাহিত হইয়া যাহা অবশিষ্ট থাকে তাহা সাধারণ লোকলফণ্ডে জমা হয় ।

এই সম্বন্ধে মুসলমান রাজাদের যে রীতি ছিল তদ্বিষয়ে

Sir Henry Lawrence বলেনঃ—

“মুসলমান রাজাদের সমুদয় কার্যের প্রবর্তন কেবলি স্বার্থ-পরতা । রাস্তা, সরাই, আবাদ—এ সকল কি প্রজাদের জন্য ? না, তাহা নহে, সকলি রাজার চলাচলের সুবিধার জন্য । একটা বাদসাহি সরাই নির্মাণে যে ব্যয় তাহাতে প্রজাদের জন্য দশটা সরাই নির্মিত হইতে পারিত । এদেশের সকল স্থানেই এই নিয়ম । যে স্থান দিয়া রাজার পরিভ্রমণ করিবার সম্ভাবনা সেখানে সুবিস্তীর্ণ পথ ও অন্যান্য অশেষবিধ সুবিধা । অন্যত্র পথ, পানীয়, আশ্রমের জন্য প্রজাদের বুখা ক্রন্দন । অযোধ্যার নবাব—জোয়ানপুর ও মহারাষ্ট্রের মুসলমান রাজাদেরও ঐরূপ পদ্ধতি । তাহাদের প্রিয় বাসগৃহের সন্নিহিত স্থান সকলকে সজ্জিত ও শোভিত করা—তাহাদের ক্রীড়াকাননে যাইবার জন্য পথ মুক্ত করা—তাহাদের পথের বিঘ্নকারী নদীর উপর সেতু বন্ধন করা—সুন্দর কূপ খনন ও ছায়াবিশিষ্ট বৃক্ষাদি রোপণ, এ সকল কার্যে তাঁহারা তৎপর ছিলেন কিন্তু সকলই স্বার্থসাধন উদ্দেশে, কিন্তু হিন্দুরাজারা যে প্রজাদের কল্যাণ উদ্দেশে পথ ঘাট নির্মাণ—পান্থশালা স্থাপন—বাপী পুষ্করিণী খনন—ছায়া-বৃক্ষ-রোপণ প্রভৃতি কার্যে উৎসাহী ছিলেন তাহার অনেক প্রমাণ প্রাপ্ত হওয়া যায় ।”

পূর্বের রায়ওয়াদারী বন্দবস্তের বিষয় যাহা কিছু বলা গিয়াছে তাহাতে তাহার ভাল দিকটাই দেখান হইয়াছে কিন্তু তাহা শুনিতে যেমন শ্রুতিমধুর, কার্যে তেমন ফলোপধায়ী হইয়াছে কি না সন্দেহ ।

রায়ৎওয়ারী বন্দবস্তের দোষগুণ নিরূপণ করিবার পূর্বে বিবেচনা করা উচিত যে গবর্ণমেন্টের খাজানার প্রকৃত লক্ষণ কি ? কি হিসাবে তাহা নির্দ্ধারিত হইলে রায়তের সুখ সমৃদ্ধি সাধিত হইতে পারে । আমাদের বিবেচনায়—চাস ও আবাদের খরচ বাদ দিয়া যে মুনফা অবশিষ্ট থাকে গবর্ণমেন্টের খাজানা তাহার অর্দ্ধাংশ কি আরো কিঞ্চিৎ অধিক হইলে ক্ষতি নাই । কৃষকের পরিশ্রমের বেতন ও হল বলদ প্রভৃতি কৃষিসাধন জিনিসের মূল্য অবশ্য আবাদের খরচের মধ্যে ধরিতে হইবে । তাহা বাদ দিয়া অবশিষ্ট মুনফার অংশ সরকারী খাজানাতে নির্দ্ধারিত হওয়া উচিত—এ কথা রায়ৎওয়ারী বন্দবস্তের প্রধান প্রতিপোষকগণও স্বীকার করিয়া থাকেন । এইক্ষণে প্রশ্ন এই যে, ফলে সরকারী খাজানা এই রূপ দাঁড়াইয়াছে কি না ? তাহার উত্তর ‘না’ বলিতে হইবে । ইহা নিশ্চয় যে কৃষিকার্যের খরচ ও সরকারী দেনা বাদ দিয়া রায়তের অবশিষ্ট মুনফা কিছুই থাকে না । অনেক স্থলে সরকারী খাজানা দিবার জন্যও রায়ৎকে মহাজনের শরণাপন্ন হইতে হয় । সে তাহার নিজের ও পরিবারের সম্বৎসরের মত গ্রাসাচ্ছাদন যোগাইবার জন্য যাহা কিছু কষ্টস্বৰ্ঘে উপার্জন করে তাহা ‘মুনফা’ বলা যাইতে পারে না—তাহা তাহার পরিশ্রমের বেতন । কোন এক শুভবর্ষে যদি তাহার অল্প মুনফা উদ্ধৃত হয় ত তাহা অন্য এক অনাবৃষ্টি-জনিত অশুভ বৎসরে সকলি ব্যয় হইয়া যায় । কৃষক বৎসর বৎসর কায়ক্লেশে ভূমি কর্ষণ করিয়া প্রতি বৎসর আশা করিয়া

থাকে—কবে সূদিন হইবে—মহাজনের দেনা পরিশোধ করিতে পারিবে—সে সূদিন আর দেখা দেয় না। স্বেপার্জিত অর্থ সে যৎকিঞ্চিৎ সংগ্রহ করিয়া উঠে তাহা অনেক সময় তাহার সম্বৎসর উপজীবিকা চলিবার জন্য যথেষ্ট হয় না—অন্য স্থান হইতে ধার কর্ত্ত করিয়া তাহার সংসার খরচ নির্বাহ করিতে হয়। রায়ৎওয়ারী বন্দবস্তের পরিণাম যদি এই হইল ত কোন্ মুখে তাহার প্রশংসা করা যায়। জরীপ-কর্ত্তারা মুখে যাহা বলুন, কার্য্যে তাহা প্রকাশ পায় না। প্রকৃত প্রস্তাবে এই দেখা যাইতেছে যে গবর্ণমেণ্টের খাজানা রায়তের মুনফার অংশ নহে—বেচারী রায়ৎ তাহার নিজ বেতন হইতে এবং কখন কখন মহাজনের নিকট হইতে ধার করিয়া তাহা যোগাইতে বাধ্য হয়।

পূর্ব্বকালে এ প্রদেশে নিয়ম এই ছিল যে, যে পরিমাণে ফসল উৎপন্ন হইবে রাজা তাহার ভাগগ্রাহী। রাজার ষষ্ঠাংশ রুভি ইহা আমাদের শাস্ত্রসম্মত বাক্য। ভাল বৎসরে প্রজার মঙ্গল অবস্থা হইলে রাজভাগার পূর্ণ হইত—মন্দ বৎসরে শস্যোৎপত্তির ব্যাঘাত জন্মিলে খাজানাও সেই পরিমাণে অল্প আদায় হইত। কোন বৎসর রায়ৎ তাহার জমি কারণ বশত আবাদ করিতে না পারিলে তাহার জন্য খাজানা দিতে হইত না। কিন্তু এক্ষণে আর সে কাল নাই। ভাল বৎসরই হউক, মন্দ বৎসরই হউক—স্বরুষ্টিই হউক অনারুষ্টিই হউক,—ফসল হউক আর নাই হউক—জমি আবাদ হউক, কি পতিত থাকুক—

নিয়মিত খাজানাটি রাজভাণ্ডারে আনিয়া দিতেই হইবে। নতুবা জমি নিলামে বিক্রয় হইয়া যায়। আগে কখন কখন কার্য্য-বিশেষের জন্য রায়ৎকে ধার দিবার প্রথা ছিল—কোন কারণে তাহাকে খাজানা হইতে নিষ্কৃতি দেওয়া যাইত, কিন্তু এক্ষণে সে নিয়ম বন্ধ হইয়াছে।

খাজানা আদায়-নিয়মের কঠোরতা, এই দুর্ভিক্ষের বৎসরে বিলক্ষণ প্রকাশ পাইতেছে। ভারতীয় গবর্ণমেন্ট উল্লাসিত হইয়াছেন, সেক্রেটারি অফ্‌ ফেট্‌ মহা সন্তোষ প্রকাশ করিতে-ছেন যে, দুর্ভিক্ষপ্রপীড়িত রায়তের নিকট হইতে এবার প্রায় তাহার দেয় সমুদয় খাজানা আদায় করা যাইবে। করগ্রাহীর পক্ষে ইহা অতিশয় সন্তোষজনক সন্দেহ নাই কিন্তু করদাতার পক্ষে কতদূর তাহা সন্দেহ। সচরাচর সরকারী খাজানা দিতে যাহাদের গলদ্বর্ষ্য হয়, দুর্ভিক্ষের বৎসর অস্থিচর্য্যসার, সেই সকল রায়তের নিকট হইতে দুই বৎসরের খাজানা এক কালে আদায় করা সামান্য নিষ্ঠুরতার কার্য্য নহে। এই দ্বিগুণ কর দিবার সামর্থ্য-সাধনোপযোগী এ বৎসর যে দ্বিগুণ ফসল হইয়াছে, কৈ তাহা ত শুনা যায় না। এই ঐন্দ্রজালিক ব্যাপার কিরূপে সংসাধিত হইল বলা যায় না। এই প্রেসিডেন্সিতে সমুদয় সরকারী খাজানার সমষ্টি ২৥০ কোটি টাকারও অধিক— তাহার মধ্যে ২ কোটি ৩৩ হাজারেরও অধিক আগষ্ট মাসের শেষে আদায় করা হইয়াছে। যে ক-হাজার টাকা ছুট দেওয়া গিয়াছে, তাহাও সম্পূর্ণ আদায় হইবার প্রত্যাশা। ১৮৭৭—৭৮

সালেরও সমুদয় খাজানা সমাহত হইবে এই রূপ শুনা যাই-
তেছে ।

পুণা সার্বজনিক সভা রায়ৎদের অবস্থা বিষয়ে বিস্তর অনু-
সন্ধানের পর এইরূপ সিদ্ধান্ত করিয়াছেন যে, রায়ৎওয়ারী
বন্দবস্তের প্রথম সূত্রপাত হইবার সময় জমীর উপর যে গবর্ণ-
মেন্টের খাজানা নিরূপিত হয় তাহা অপেক্ষাকৃত লঘু, জমি ও
কৃষি-কার্যের অবস্থার প্রতি দৃষ্টি রাখিয়া উদার ও পরিমিত-
ভাবে তাহার দর নির্ণীত হইয়াছিল । কিন্তু প্রথম ত্রিশ বৎসর
অতীত হইলে নূতন বন্দবস্ত জারী করিবার সময় এত অধিক
পরিমাণে খাজানা বৃদ্ধি করা হইয়াছে যে তাহাতে মহারাষ্ট্র-
দেশের অধিকাংশ রায়তের ওষ্ঠাগত প্রাণ । পূর্বে বলা হই-
য়াছে যে, নূতন বন্দবস্তের নিয়ম এই যে, রায়তের বিনা যত্ন ও
পরিশ্রমে জমী ও ফসলের মূল্য বৃদ্ধির সঙ্গে সঙ্গে খাজানা বৃদ্ধি
করা বিধেয় । কিন্তু সুবিবেচনা ও দূরদর্শিতার সহিত সে নিয়ম
রক্ষা না করিলে অনেক অনিষ্টের সম্ভাবনা । মনে কর ইংরাজি
১৮৩৫ শালের প্রারম্ভে প্রথম বন্দবস্তের সূত্রপাত হইল । ৩০ বৎ-
সর অতীত হইলে ১৮৬৫ শালে দেখা গেল যে, সকল জিনিস
আক্রা—জমির মূল্য চতুগুণ বৃদ্ধি পাইয়াছে—রায়তের অবস্থা
সচ্ছল হইয়াছে—তাহা দেখিয়া ঐ ত্রিশ বৎসরের শেষে পাঁচ
বৎসরকার জিনিসের দরের সরাসরিতে যদি সরকারী খাজানা
বর্দ্ধিত হয় তবে রায়ৎদের কি দুর্দশা । ঐ বর্দ্ধিত মূল্য আগামী
ত্রিশ বৎসর পর্য্যন্ত অটল থাকিবে তাহার স্থিরতা কি ?

১৮৬৪—৬৫ শালে রায়তের শ্রীবুদ্ধি হইবার কারণ কি ? না, আমেরিকার যুদ্ধ-জনিত এদেশে তুলার ব্যবসায়ের উত্তেজনা। ইহা বিবেচনা করা উচিত যে এ উত্তেজন ক্ষণস্থায়ী—যুদ্ধসমাপ্তির সঙ্গে সঙ্গেই ইহা তিরোহিত হইবে। অতএব এই সম্ভবতঃ ক্ষণস্থায়ী মূল্য বৃদ্ধি অনুসারে আগামী ত্রিংশৎ বৎসরব্যাপী খাজানার দর নির্ধারণ করা অন্যায়। এই রূপে অতীত ত্রিশ বৎসরের কোন এক ভাগের উপর লক্ষ্য করিয়া খাজানার দর বন্ধন করিলে তাহাতে যে ভ্রমোৎপত্তির সম্ভাবনা তাহা সহজে অনুধাবন করা যাইতে পারে। সেই কালের মধ্যে ৫ বিঘার ১০ বৎসরের সরাসরি দর যে আগামী ত্রিশ বৎসর কাল স্থায়ী থাকিবে তাহার কোন স্থিরতা নাই। বাস্তবিক পরীক্ষাতেও এই দেখা যাইতেছে যে, জিনিসের দরের কোন স্থিরতা নাই—নানা কারণে মধ্যে মধ্যে তাহার হ্রাসবৃদ্ধি হয়। যদি অতীত ত্রিশ বৎসরের সমুদায় কালের জিনিসের দরের সরাসরি লইয়া তাহার পূর্ববর্তী ত্রিশ বৎসরের সরাসরি জিনিসের মূল্যের সহিত তুলনা করিয়া দেখা যায় ও সেই অনুসারে খাজানার দর নিরূপিত হয় তাহা হইলেও কতকটা স্থির সিদ্ধান্তে উপনীত হওয়া যাইতে পারে। কিন্তু যে মহাত্মাদের হস্তে এই বন্দবস্তের ভার সমর্পিত তাঁহারা তত সূক্ষ্মানুসূক্ষ্ম অনুসন্ধান করিতে তৎপর নহেন। সুতরাং নূতন বন্দবস্তে মনঃকল্লিত নিয়ম অনুসারে খাজানা বৃদ্ধি করিয়া তাঁহারা যে প্রজাপীড়ন দোষে দোষী হইয়াছেন ইহা সহজে বিশ্বাস করা যায়। আর এক

কথা এই যে, জিনিসের দর বৃদ্ধির সঙ্গে সঙ্গে শ্রমের মূল্যও অধিক হয়, সুতরাং কৃষিকার্য্য চালাইবার খরচ বৃদ্ধি হইবার সম্ভাবনা এটিও মনে রাখা কর্তব্য। নূতন বন্দবস্তের সময় জরীপঅধিকারীদিগের এই দুই বিষয়ে মনোযোগ দেওয়া কর্তব্য। প্রথম—জমি ও ফসলের মূল্য বৃদ্ধি যাহা দৃষ্টি হইতেছে তাহা ভবিষ্যৎ ত্রিশ বৎসর কাল স্থায়ী হইবার সম্ভাবনা কি না ? দ্বিতীয়তঃ মূল্যবৃদ্ধির সমতুল্য খাজনার দরবৃদ্ধি বিধেয় নহে, কেননা জিনিসের মূল্যবৃদ্ধি হইলে শ্রমের বেতন বৃদ্ধি, সুতরাং কৃষি কার্য্যের ব্যয় অধিক হইবে। এই সম্বন্ধে আর একটা বিষয় বক্তব্য এই যে, যে সকল তালুকে বর্দ্ধিত জমা স্থাপিত হইয়াছে তাহাতে জমীর জরীপ প্রভৃতি সমুদয় কার্য্য পুনর্ব্বার নবানুষ্ঠিত হইয়া সেই দর ধার্য্য হয়। এইরূপ করাতে জমীর মূল্যের বিস্তর তারতম্য ঘটিয়া অনেক ভূস্বামী ক্ষতিগ্রস্থ হইয়াছে। ৩০ বৎসর বন্দবস্তের বচন পাইয়া রায়ৎ মনে করিতে পারে—আমি এই জমীর মালিক—নিয়মিত খাজনা দিতে পারিলে আর আমার কোন ভাবনা নাই। ত্রিশ বৎসর কাল নিজ সম্পত্তি ভোগ করিয়া পরে যখন সে দেখে আমার ২০ বিঘা ভূমি এক্ষণে ২৫ বিঘা হইয়া দাঁড়াইয়াছে ও পূর্ব্বাপর প্রচলিত খাজনা ত্রিগুণ কি চতুগুণ ধার্য্য হইয়াছে, তাহা না দিতে পারিলে আমার সমুদয় ভূমিসম্পত্তি ছাড়িয়া দিতে হইবে তখন তাহার কি যন্ত্রণা ! রায়তের সর্ব্বনাশ ও গবর্ণমেণ্টের বচনের প্রতি তাহার হত-শ্রদ্ধা—ইহা রাজা প্রজার উভয়েরই অনিষ্টকর সন্দেহ নাই।

যাহা বলা হইল তাহাতে পাঠকগণ রায়ওয়্যারী বন্দবস্তের দোষগুণ কতকটা বুঝিয়া লইতে পারিবেন। এইক্ষণে এই বন্দবস্তের অধীনস্থ রায়তের অবস্থা যৎকিঞ্চিৎ বর্ণন করিবার ইচ্ছা রহিল।

দ্বিতীয় ভাগ ।

রায়তওয়্যারী বন্দবস্ত ও তাহার দোষগুণ সংক্ষেপে এক প্রকার প্রদর্শিত হইয়াছে, এইক্ষণে এই বন্দবস্তের অধীনস্থ প্রজাদিগের অবস্থা আলোচনা করা যাউক। ইহা কাহারো অবিদিত নাই যে বোম্বাই রায়তের অবস্থা নিতান্ত শোচনীয়। ফসলের মূল্যবৃদ্ধি—বিশেষতঃ তুলার ব্যবসার উন্নতি বশত ১৮৬০ শাল হইতে ১৮৭০ পর্যন্ত রায়তের যে শ্রীবৃদ্ধির চিহ্ন দেখা যাইতেছিল তাহা জিনিসের দরের পুনঃপতন ও স্থানে স্থানে খাজনাবৃদ্ধি প্রভৃতি কারণে লুপ্তপ্রায় হইয়া গিয়াছে। মহারাষ্ট্রেই বল, গুজরাটেই বল, এদেশের কৃষিদল ঋণপাশে এরূপ জড়িত যে তাহা হইতে তাহাদের নিষ্কৃতি লাভের উপায় নির্দ্ধারণ করা সহজ নহে। মহারাষ্ট্রের মহাজনেরা অধিকাংশ মারওয়াড়ী, গুজরাটে অধিকাংশ বণিক-জাতীয় লোক উত্তমর্ণ ব্যবসায়ী, কোন রায়তের হয়ত বলদ কিনিবার জন্য টাকা ধার দিতে প্রস্তুত, অথবা কোন কুণবীর

পুত্রের বিবাহ কিম্বা পিতার অন্ত্যেষ্টিক্রিয়ার জন্য টাকার প্রয়োজন এই সকল উপলক্ষে মহাজনের আশ্রয় ভিন্ন তাহার গত্যন্তর নাই। অনেক সময় রায়তের গবর্ণমেন্টের খাজনা দিবার সঙ্গতি হয় না—তাহা না দিলেও তাহার স্বত্ব নিলামে বিক্রয় হইয়া যায়—অগত্যা তাহাকে বণিকের আশ্রয় গ্রহণ করিতে হয়। এইরূপ যে কোন কারণেই হউক, একবার সাহকারের * ঋণজালে আবদ্ধ হইলে আর তাহার নিস্তার নাই। মহাজনের নিকট ধার করিতে হইলে মাসে শতকরা দুই টাকা সুদের—নিদান পক্ষে এক টাকার—হিসাবে ধার করিতে হয়। ধার করিতে হইলে রায়ৎ খত লিখিয়া দিতে বাধ্য হয়। সে নিজে ত লেখাপড়ার ধার ধারে না—হিসাব করিয়া ঋণের টাকা নির্ণয় করা—সে সকলি মহাজন ও তাহার আশ্রিত জনের কথার উপর নির্ভর। কখন কখন যে সুদ ভবিষ্যতে উৎপন্ন হইবে তাহা আগে হইতেই আসল টাকার সঙ্গে মিলিত করিয়া ঋণের সংখ্যা নিরূপিত হয়, অর্থাৎ রায়ত হয়ত ৮০ টাকা ধার করিতেছে কিন্তু তাহার ভাবি সুদ কসিয়া হয়ত তাহাকে একশত টাকার খত লিখিয়া দিতে হয়—তাহার উপর নিয়মিত কাল অতীত হইলে নিয়মিত দরের সুদ সঞ্চিত হইতে থাকে। খত প্রস্তুত হইলে রায়ত হয়ত তাহার নীচে হলাকুতি চিহ্নে নিজের নাম স্বাক্ষর করে। সেই সময়ে মহাজনের দোকানে যদি কেহ উপস্থিত থাকে কিম্বা রাস্তা হইতে লোক ডাকিয়া তাহাদের

* মহাজনকে এদেশে সাহকার বলে।

নাম খতের উপর সাক্ষীরূপ স্বাক্ষরিত হয়। অনেকস্থলে লেখক ও স্বাক্ষীর ব্যবসাই খত লেখা, সাক্ষর করা ও কোর্টে উপস্থিত হইয়া সাক্ষ্য প্রদান করা—ইহাদের সাক্ষ্যের কত মূল্য তাহা অনায়াসেই অনুধাবন করা যাইতে পারে। খত লিখিবার সময় রায়তের সঙ্গে সঙ্গে তাহার একজন জামীন উপস্থিত থাকে, ও কখনো বা তাহার বৃদ্ধ মাতা কিম্বা স্ত্রীকে সাহকার তাহার ঋণপাশে বদ্ধ না করিয়া ক্ষান্ত থাকে না। তাহার কারণ এই, টাকা আদায়ের সুবিধা। বৃদ্ধ মাতার কি গৃহিণীর কারাবাস-ভয়ে রায়ত যেমন করিয়াই হউক ঋণ শোধ করিতে তৎপর হয়। যখন আগামী বৎসরের ফসল প্রস্তুত হয়, আর গবর্ণমেন্টের টাকা মুখী কিম্বা তলাটীর হস্তে গচ্ছিত হয়, তখন সাহকার রায়তের দ্বারে আসিয়া দণ্ডায়মান হয়। অনেক কাকুতি মিনতির পর রায়ত আপনার সংসার খরচের জন্য যৎ-কিঞ্চিৎ হাতে রাখিয়া অবশিষ্ট স্বদের টাকা বলিয়া হয়ত মহাজনের হস্তে অর্পণ করে। দেনা বৃদ্ধি হইলে মহাজন হয়ত সমস্ত ফসলই গৃহে লইয়া যায়, ও রায়ত যখন আপনার পরিবার পোষণের জন্য অল্প কিছু প্রার্থনা করে তখন সাহকার তাহাকে বুঝাইয়া দেয়—তোমার ভাবনা কি? তোমার যখন যাহা প্রয়োজন হইবে আমার দোকান হইতে সকলি পাইবি। পর বৎসর শস্য বপন করিবার বীজ চাই, রায়ত অমনি মহাজনের দ্বারে গিয়া উপস্থিত। মহাজন তাহাকে বীজ ধার দেয়; ধারের নিয়ম এই যে, শস্য পরিপক্ব হইলে ঋণের দ্বিগুণ ত্রিগুণ শস্য স্বদ

সম্মত প্রত্যর্পণ করিতে হইবে। এইরূপে বীজ বপনের জন্য—
 জীবিকা নির্বাহের জন্য প্রতিবৎসর তাহাদের বণিকের দোকানে
 ধার করিতে হয়। পর বৎসর ফসল কাটিবার সময় উপস্থিত
 কিন্তু এইরূপে গবর্ণমেন্টের খাজনা দিয়া যাহা কিছু উদ্ধৃত হয়
 তাহা গত বৎসরের দেনার স্ৰুদ পরিশোধ করিতে গিয়া সকলি
 নিঃশেষিত হইয়া যায়। এই স্ৰুদ ক্রমে মূলধনের উপর সঞ্চিত
 হইয়া কর্জ ক্রমিক বাড়িয়া যায়, ও যখন খত তামাদি হইবার
 উপক্রম হয় তখন মহাজন অবসর বুঝিয়া স্ৰুদের হিসাব করিয়া
 বদ্ধিত আকারে এক নূতন তমস্ক প্রস্তুত করিয়া লয়। এবার
 কিন্তু সহজ তমস্কে সাহকার সম্ভব নয়, তাহার সঙ্গে বন্ধক
 চাই—রায়তের ক্ষেত্র ও বসত বাটী বন্ধক লিখিয়া এক নূতন
 তমস্ক লিখিত ও স্বাক্ষরিত হয়। এই প্রকারে গরীব বেচারী
 আটে ঘাটে এরূপ বদ্ধ হইয়া পড়ে যে তাহার পলাইবার পথ
 থাকে না। অবশেষে যখন দেনা পরিশোধ করিবার আর তাহার
 কিছুমাত্র সঙ্গতি থাকে না, তখন মহাজন তাহার তমস্ক লইয়া
 রায়তের বিরুদ্ধে আদালতে মকদমা উপস্থিত করে। এই সকল
 মকদ্দমার অধিকাংশ রায়তের অবর্তমানেই নিষ্পত্তি হয়। খতের
 লেখক ও এক স্বাক্ষরকারীর সাক্ষ্য লইয়া জজ স্বকীয় কোর্ট
 হইতে ডিক্রী বাহির করেন। সেই ডিক্রী জারী হইয়া রায়তের
 ঘর জমি সকলি অল্প মূল্যে নিলামে বিক্রয় হইয়া যায়। অনেক
 সময় মহাজন নিজেই হয়ত তাহার সমুদয় সম্পত্তি ক্রয় করিয়া
 লন। মহাজন রায়তের জমী লইয়া কি করিবেন, তিনি কিছু

নিজ হাতে চাস করিতে পারেন না, স্ততরাং রায়তকেই হয়ত তাহা ইজারা দিয়া পাট্টা লিখিয়া লন। যে রায়ত এক কালে ভূস্বামী ছিল সে হয়ত মহাজনের করদ প্রজা হইয়া সেই জমি উপভোগ করে, ও কখনো বা তাহার দাসত্ব করিয়া যথাকথ-
 ক্ষিৎরূপে দিনপাত করিতে বাধ্য হয়।

রায়ত-মক্ষিকার উপর মহাজন মাকড়সার জাল অল্পে অল্পে
 ক্রীড়ায় বিস্তৃত হয় তাহা বলা হইল। কিন্তু এই ত গেল
 সাধারণ নিয়ম। এতৎ ব্যতীত কত সময় কত জাল তমস্কক—
 হিসাবে কত প্রতারণা—মিথ্যা মকদ্দমা প্রভৃতি সকল অস্ত্র
 প্রয়োগ করিয়া মহাজন রায়তের সর্বনাশ করিতে উদ্যত হয় ;
 তাহার ভুরি ভুরি দৃষ্টান্ত আদালতের দফতরে দেখিতে পাওয়া
 যায়।

রায়তেরা যে বিষম ঋণভার-প্রপীড়িত তাহার উদাহরণ দক্ষিণ
 রায়তদের উপর যে কমিসন বসিবার কথা পূর্বের উল্লিখিত
 হইয়াছে তাহার রিপোর্টে অনেক সংগৃহীত দেখা যাইবে।

মহাজনদের খাতা হইতে কতকগুলি কৃষকের কর্জের হিসাব
 পর্য্যবেক্ষণে প্রকাশ পাইতেছে যে যে টাকা ধার দেওয়া গিয়াছে
 তাহার সমষ্টি ৪৯১৭ টাকা—যত টাকা শোধ হইয়াছে তাহার
 সমষ্টি ৫৯১৮ আর তাহা দিয়া এখনো ৫৯০৬ টাকা বাকি দেনা
 করিয়াছে। এতদ্ব্যতিরিক্ত মনে রাখিতে হইবে যে প্রজারা
 এই বলিয়া অনেক সময় হাহাকার করে যে খতপত্রে যত টাকা
 দেনা বলিয়া লিখিত আছে তাহার সম্পূর্ণ তাহারা পায় নাই,

কিন্মা ধার শুধিতে তাহারা যত টাকা মহাজনকে গণিয়া দিয়াছে তাহা তাহাদের হিসাবে জমা হয় নাই ।

ঐ রিপোর্ট হইতে আরো কতকগুলি দৃষ্টান্ত দেখাইলে রায়তদের দৈন্যাবস্থা পাঠকদিগের বিশেষরূপে হৃদয়ঙ্গম হইবে ।

কভিরে পরিবার, যাহারা পার্ণেজ গ্রামের পাটেলকী কৰ্ম্ম বংশপরম্পরা ভোগ করিয়া আসিতেছে, তাহারা দক্ষিণ দেশের নামাঙ্কিত পরিবার মধ্যে গণ্য ছিল । বার বৎসর হইল তাহাদের গৃহস্থামী ২০০ টাকা ধার করেন । তিনি ৩৩৫ টাকা প্রত্যর্পণ করেন, বাকি ৩৮৫ টাকার জন্য তাহার উপর মকদমা আনা হয়, তাহাতে ভূমি সম্পত্তি—প্রায়, ৪০ বিঘা জমি নিলামে বিক্রয় হইয়া যায়, ও এক্ষণে তিনি দাসত্ব করিয়া জীবন-বাত্রা নির্ব্বাহ করিতেছেন । বালাজী আট টাকা ধার করিয়া ১৫টাকা দেনা পরিশোধ করেন । মহাজন তাঁহার উপর ৩০ টাকা ডিক্রী পাইয়া সেই ডিক্রীজারী করিয়া তাহার ৪০ বিঘা জমি ও ১২টা বলদ বিক্রী করাইয়া স্বয়ং তাহা কিনিয়া লন । শ্রীপতি এক মণ দানা (দাম তার বড় জোর ৪টাকা) ধার করিয়া প্রত্যর্পণ করেন । স্ত্রদের জন্য তাঁহাকে ১৫ টাকার খত স্ত্রদ শুদ্ধ লিখিয়া দিতে হয় । আবার দেনা শুধিবার জন্য উত্থিত হইলে সে দশ টাকা নগদ দিয়া ২৫ টাকার এক নূতন খত লিখিয়া দিতে বাধ্য হয় । ২৫ টাকা শুধিবার জন্য মহাজনের চাকরীতে নিযুক্ত হয়, ও অবশেষে মকদমার হাজামে পড়িয়া তাহার বসতবাটী ও জমি ৬ টাকায় বিক্রয় হইয়া যায় । রাওজী ১৫ বৎসর পূর্বে ৬০ টাকা

ধার করে । ভিন্ন ভিন্ন সময়ে সে মহাজনকে ১০০টাকা নগদ, ২২৫ টাকার শস্য, ৪টা বলদ, ১টা ঘোড়া ও তিনটা ক্ষেত্র বন্ধক দিয়াও এখনো সে দেনা হইতে নিষ্কৃতি লাভে সমর্থ হয় নাই । ১১ বৎসর পূর্বের আনন্দজী দোকানের দেনার জন্য ২৫টাকার এক খত লিখিয়া দেয়, আর এক্ষণে তাহার আবশ্যিক কতকগুলি জিনিস পত্র আছে কিন্তু হাতে নগদ টাকা নাই । সে তাহার মহাজনকে একটা ক্ষেত্র ৮ বলদ ও ৪ গো দান করিয়াছে । একে একে ৫০।১০০।২০০।৩০০।৩৫০ টাকার খত লিখিয়া দিয়াছে ও এক্ষণে তাহার দেনা ৫০০ টাকায় বর্দ্ধিত হইয়াছে । লক্ষ্মণ ৮ টাকার কাপড় কিনিয়া ঋণগ্রস্ত হয়—রামজী তাহার জামীন হয় । লক্ষ্মণ তিন টাকা শোধ দিয়া গ্রাম ছাড়িয়া চলিয়া যায় । সাহু-কার রামজীকে পেড়াপীড়ি করাতে সে তিন বৎসর হইল ২২ টাকার এক খত লিখিয়া দিতে বাধ্য হয় । গত বৎসরে সেই খতের সর্ত্তে তাহার উপর মকদমা আনিয়া মহাজন খরচা সমেত এক ৫৬ টাকার ডিক্রী করিলেন । ডিক্রীজারী হইবার পরে সে ২২ টাকা নগদ দিয়া ৪৫ টাকার এক নূতন খত লিখিয়া দেয় । বিবি জান নামক একজন বৃদ্ধা বিধবা স্ত্রী তার পুত্রের বিবাহের জন্য অনেক বৎসর হইল ১৫০ টাকা কর্জ করে । ১৩ বৎসর পূর্বের এই দেনার জন্য সে ৩০০ টাকার এক বন্ধকখত লিখিয়া পাতকুয়া শুদ্ধ ২০ বিঘা জমি তাহার হস্তে বন্ধক রাখে । সেই অবধি মহাজন তার সমুদায় উপস্বত্ব ভোগ করিতেছে, সে হিসাবও দিবে না, জমি ফেরত দিতেও চায় না । বিশ বৎসর

হইল আজু নামক এক ব্যক্তি ১৭ টাকা নগদ ও এক মন দানা ধার করিয়াছিল। সেই দেনা শোধ করিতে সে ভিন্ন ভিন্ন সময়ে ৫৬৭ টাকা দিয়াছে, অনেকগুলি খত লিখিয়া গিয়াছে তাহার দুইটির দরুণ ৮৭৫ টাকা এখনো পর্য্যন্ত অদেয় রহিয়াছে।

বোম্বাই রায়তের অবস্থা কতদূর শোচনীয় তাহা উল্লিখিত দৃষ্টান্তগুলি হইতে সহজে প্রতীয়মান হইবে। এইরূপ ধার্য্য হইয়াছে * যে, কোন এক প্রদেশে ৬০০ জন রায়তের অবস্থা দেখিতে গেলে তাহাদের ঋণের পরিমাণ ৩ কোটি টাকারও অধিক দৃষ্ট হয়। অর্থাৎ তাহাদের দেনা গবর্ণমেন্টের সদর খাজনার ১৬ গুণ ও মোট বার্ষিক উপস্বত্বের প্রায় ১১০ গুণ হইবে। ইহাও দৃষ্ট হইয়াছে যে বিগত ১৫ বৎসরের মধ্যে যে কালের প্রারম্ভে মহারাণী স্বয়ং রাজ্য-ভার গ্রহণ করাতে সকলেই রায়তের ভাবী মঙ্গলের প্রত্যাশা করিতেছেন, যে কালের অভ্যন্তরে বিশুদ্ধ আইন ও আদালত সকল প্রতিষ্ঠিত হইল কোথায় তাহাতে রায়তদের শ্রীবৃদ্ধি হইবে—না তাহাদের ঋণভার শতগুণ বৃদ্ধি পাইয়াছে। পূর্বেই বলা হইয়াছে যে অনেক সময় মহাজনে ডিক্রীজারী করিয়া তাহার ঋণের ভূমিসম্পত্তি নিলামে বিক্রী করিয়া অল্প মূল্যে স্বয়ং কিনিয়া লয় তাহাতেও ডিক্রীর সমুদয় টাকা পরিশোধ হয় না। হতভাগ্য রায়তকে তাহার নিজের জমি অনেক খাজানা দিয়া মহাজনের নিকট হইতে পাট্টা

* Famine and debt in India Nineteenth Century. September 1887.

লইয়া ভোগ করিতে হয় । না হয়ত জন্মভূমি ছাড়িয়া বিদেশে গিয়া তাহাকে নবজীবন আরম্ভ করিতে হয় । কখন কখন সে কতক বৎসরের জন্য হয়ত মহাজনের দাসত্ব স্বীকার করিয়া জীবিকা নির্বাহ করিতে বাধ্য হয় । কমিসনরগণ একজন রায়-তের কথা উল্লেখ করিয়া বলিয়াছেন যে একজন রায়তের সমুদয় সম্পত্তি বিক্রয় হইয়া গেলে সে নিজে ও তাহার স্ত্রী বার্ষিক খাওয়া, তামাক ও একখানা করিয়া কম্বলের বিনিময়ে ১৩ বৎসর পর্যন্ত তাহার দেশ বিদেশ দাসত্ব স্বীকার করিয়া খত লিখিয়া দেয় ।

কমিসনরগণ রায়তদের এইরূপ দুর্দশার অনেক গুলি কারণ নির্দেশ করিয়াছেন । গৃহকার্য ও উৎসব ক্রিয়ার জন্য দিখিদিব্ জ্ঞানশূন্য হইয়া ধার কর্ত্ত করা—গবর্ণমেন্টের খাজানা আদায়ের কড়া কড় নিয়ম—শস্য বিক্রয়ের উপযুক্ত বাজারের অভাব, এই সকল তাহার মধ্যে অবশ্য ধর্তব্য ।

রায়তদের দুর্বস্থার প্রধান কারণ রায়তের অজ্ঞান ও ভীৰুতা আর মহাজনের অত্যাচার । আদালত সকল এই অত্যাচারের এক অব্যর্থ হাতিয়ার । দুঃখের বিষয় এই যে আদালতে ন্যায় বিতরণ করিয়া কোথায় এই অত্যাচার নিবারণ করিবে, না তাহা হইতেই অন্যায় অত্যাচার আরো প্রশ্রয় পায় । আদালতের যে আইন ও কার্যবিধি তাহাতে গরীবের উপর ধনীর জয়—নিরীহ অজ্ঞানের উপর স্বার্থপর প্রথর-বুদ্ধির জয় এ ত ধরা কথা । ন্যায়ান্যায়-বিচারহীন বাদী যখন এক জন অজ্ঞান দীন হীন রায়-

তের বিরুদ্ধে মকদমা উপস্থিত করে তখন সেই রায়তের পরাজয়ই অবশ্যম্ভাবী বলা যাইতে পারে । আইন আবার রায়তের উপর এমন খড়্গহস্ত যে মহাজনে একবার তাহার বিরুদ্ধে ডিক্রী বাহির করিতে পারিলেই তাহার যথাসর্বস্ব লুণ্ঠিয়া লইতে পারে—তাহার ঘর দ্বার ভূমি সম্পত্তি সমুদয়ই বিক্রীত হইয়া যায় ও অবশেষে হয়ত দেনার জন্য তাহাদের কারাদণ্ড ভোগ করিতে হয় । এদিকে আবার বিচারপতির হাতে যে অগাধ কৰ্মভার, আদালতের যেরূপ কার্যপ্রণালী তাহাতে প্রত্যেক মকদমার তন্ন তন্ন বিচার হইয়া উঠা এক প্রকার অসম্ভব—তাঁহারা ন্যায় অন্যায় না দেখিয়া আইনের প্রতিই দৃষ্টি করেন—তাঁহারা আইন মতে কার্য করিতে পারিলেই সন্তুষ্ট, সত্য-নির্ণয়ের জন্য সময় ব্যয় সময়ের অপব্যয়ই বিবেচনা করেন ।

আদালতে যে অর্থী প্রত্যর্থী উপস্থিত হয়েন তাঁহারা আইনের চক্ষে উভয়েই সমান । কিন্তু প্রকৃত প্রস্তাবে রায়ত ও মহাজনের মধ্যে যে বিবাদ তাহা দুষ্কপোষ্য শিশু ও বলিষ্ঠ পাহালওয়ানের মল্ল যুদ্ধের ন্যায় । মকদমার কার্য-প্রণালী যতই সহজ হউক না কেন, সামান্য রায়তের পক্ষে তাহাই নিতান্ত দুর্লভ, তাহাতেই সে খতমত খাইয়া যায় । যদি কোন রায়ত মহাজনের বিরুদ্ধে দ্বন্দ্ব-যুদ্ধে কৃতনিশ্চয় হয়—প্রথমতঃ তাহাকে গ্রাম ছাড়িয়া, কাজ কৰ্ম পরিত্যাগ করিয়া কত দূরে আসিয়া সংগ্রাম করিতে হইবে—তার পর ফ্যাম্পের ব্যয় ও উকীল খরচা, কত কারণে মকদমা স্থগিত হইতেছে ও তাহার পুনঃপুনঃ আদা-

লতে আসিয়া কষ্ট ভোগ—তার পর নিজ পক্ষ সমর্থনের জন্য প্রমাণ সংগ্রহ করা সেও তাহার পক্ষে সহজ নহে । এই সকল কারণে বুঝিতে পারা যায় মকদ্দমার সময় কেন প্রতিবাদিগণ প্রায়ই অনুপস্থিত থাকে । নথি অনুসন্ধান করিলে দেখা যাইবে যে শতকরা ৯০ মকদ্দমা রায়তের অবর্তমানেই নিষ্পত্তি হইয়া থাকে । আর এই সকল ধার কর্ত্তের মামলায় শতের একটাতে যদি রায়তে জয়লাভ করিতে পারে তাহাই ঢের অর্থাৎ এক-শতের মধ্যে এক জন রায়ত যদি মহাজনের ষড়চক্রের বিরুদ্ধে জয়লাভে সমর্থ হয় তবে তার ভাগ্য বলিতে হইবে । এ অতি ভয়ানক কথা । ফৌজদারী মকদ্দমায় এ অপেক্ষা সুবিচারের সম্ভাবনা । যদি চুরির অভিযোগ আনিয়া কাহারো বিরুদ্ধে নালিশ করা যায় সে হয়ত দুই এক মাস কারাদণ্ডে দণ্ডিত হইতে পারে, কিন্তু সে বিচারের সময় স্বয়ং উপস্থিত থাকিয়া সাক্ষীদের জেরা করিতে পারে, শত্রুর অভিযোগ খণ্ডন করিতে পারে—আপনার নির্দোষিতা সপ্রমাণ করিতে সমর্থ হয় ।

মকদ্দমার ব্যয়বাহুল্য হেতু যে রায়তেরা অনেক সময় মকদ্দমা চালাইতে অক্ষম হইয়া মিথ্যাবাদী বাদীর নিকটেও পরাভূত হয় তাহা রায়ত কমিসনরগণ স্বীকার করিয়াছেন । তাহার বলেন যে মকদ্দমার ব্যয়াধিক্য গরীব রায়তদের পক্ষে গুরু-ভার-জনক । এই ব্যয় যদি মকদ্দমার ন্যায্য খরচার অধিক না হইত তবে কিছু বলিবার থাকিত না । কিন্তু দেখিতে গেলে স্টাম্প ও কোর্ট ফী হইতে যে রাজস্ব উৎপন্ন হয় তাহা হইতে

মূল ও আপীল কোর্টের সমুদয় খরচা বাদেও এই বোম্বাই প্রেসিডেন্সির জন্যই প্রায় ৬ লক্ষ টাকা উদ্ধৃত হয় ।

মকদ্দমার ব্যয়বাহুল্য প্রতিপাদন করিবার জন্য এক্ষণকার আইন অনুসারে প্রতিবাদীর উপর কি কি খরচা পড়ে তাহা দেখাইলেই যথেষ্ট হইবে । মনে কর এক খতের টাকা আদায়ের দাওয়া । প্রতিবাদীর বক্তব্য এই যে খতের টাকা সে পায় নাই । এই কথা সমর্থন করিবার জন্য তার চারি সাক্ষীর প্রয়োজন । সমন জারী হইয়াও তাহাদের মধ্যে এক জন সাক্ষী উপস্থিত হয় নাই । ইহাও অনুমান করা যাউক যে সেই মকদ্দমায় প্রতিবাদীর পক্ষ সমর্থন করিবার জন্য এক জন উকীল নিযুক্ত হইয়াছে । এইরূপ হইলে প্রতিবাদীর যে খরচ পড়িবে তাহা নিম্নে প্রদর্শিত হইতেছে ।—

	২৫ টাকার	৫০ টাকার
	মকদ্দমায়	মকদ্দমায়
আরজীর উত্তর	” ১	” ৮
উকীল পত্রের উপর কোর্ট ফী	” ৮	” ৮
২ আনার হিসাবে ৪ সাক্ষীর সমন খরচ	” ৮	” ১
৩ আনার হিসাবে সাক্ষীর ভাতা খরচ	” ১২	” ১২

একজন সাক্ষীর	}	” ৪	” ৮
ওয়ারেন্ট খরচ			
নকলের জন্য কোর্ট	}	” ১২	” ১২
ফী ইত্যাদি			
উকীল ফী		১ ” ৪	২
		—————	—————
সমষ্টি		৪ ” ১	৬

উল্লিখিত তালিকা দৃষ্টে প্রমাণ হইবে যে ২৫ টাকার মকদমায় প্রায় দাওয়ার ষষ্ঠাংশ খরচ—৫০ টাকার মকদমায় প্রায় অষ্টমাংশ। এক্ষণে যে ফাঁস্প সংক্রান্ত আইন প্রবর্তিত হইবার কথা হইতেছে তাহার বিধানানুসারে মকদমার খরচ আরো বর্দ্ধিত হইবে। এই ব্যয়ভার লইয়া গরীব রায়তেরা চলংশক্তি হীন। বাহাতে তাহারা আত্মপক্ষ সমর্থনের জন্য বিচারালয়ে সহজে উপস্থিত হইতে পারে তাহার জন্য মকদমা সংক্রান্ত ব্যয়ের হ্রাস করা নিতান্ত আবশ্যিক। নতুবা তাহাদের নিকট হইতে শ্রায়ের দ্বার এক প্রকার রুদ্ধ করা যায়। এইক্ষণকার আইন অনুসারে যে সকল খরচা বাদী, প্রতিবাদী উভয়কেই বহন করিতে হয় তাহা এইঃ—

১। কোর্ট ফী আইন অনুসারে আরজী দরখাস্ত-নকল প্রভৃতির উপর কোর্টফী।

২। শমন প্রভৃতির জন্য নির্দ্ধারিত কোর্ট ফী।

৩। সাক্ষীর ভাতা খরচ।

৪ । ডাকের খরচ ।

৫ । উকীলের ফী ।

৬ । নকল লইবার খরচ ।

ইহার প্রত্যেক বিষয়ে খরচ কমাইবার দিকে আইনকর্তাদি-
গের লক্ষ্য থাকা উচিত । বিশেষতঃ অল্প টাকার মকদ্দমা সংক্রান্ত
ফীর স্বল্পীকরণ অবশ্য কর্তব্য । দুই জন ধনীর মধ্যে মকদ্দমা
উপস্থিত হইলে উকীল মোক্তার আটগাঁগণ ভুরি ভোজন করিয়া
লন তাহাতে তত ক্ষতি নাই কিন্তু ন্যায়প্রার্থী গরীবের পথের
কণ্টক তুলিয়া না দিলে তাহার আর কোন রূপে নিস্তার নাই ।
বরং গবর্ণমেন্টের উচিত যে এই সকল লোকদের বিনা বেতনে
উকীল পাইবার সুবিধা করিয়া দেন—তাহা হইলে বাস্তবিকই
তঁাহাদের রাজোচিত কার্য্য হয় ও তঁাহারা সহস্র সহস্র প্রজার
আশীর্ব্বাদের পাত্র হয়েন । বিচারালয়ের ব্যয় নির্ব্বাহই ফাঁদী
ও কোর্টফী গ্রহণের উদ্দেশ্য হওয়া উচিত । অর্থী প্রত্যর্থীর
নিকট হইতে টাকা লইয়া সাধারণ রাজস্ব বর্দ্ধিত করা কখন
ন্যায়-পরায়ণ সুসভ্য গবর্ণমেন্টের কর্তব্য নহে ।

আদালতে মকদ্দমা আনিবার দরুণ যে অর্থনাশ ও মনস্তাপ
তাহা হইতে মুক্ত করিবার এক সহজ উপায়, সালিসী বিচারের
উদ্ভেজনা । গ্রামের পাঁচজনে মিলিয়া বিবাদ-ভঙ্গন-প্রথা এ
দেশের চিরন্তন প্রথা । জাতি-সংক্রান্ত ও অন্যান্য বিবাদে
এখনো পর্য্যন্ত ইহা প্রচলিত দেখা যায় । মহারাষ্ট্রীয় রাজত্ব
কালে পঞ্চায়তের বিচারের উপর লোকেরদের বিশেষ আস্থা

ছিল। এদেশে কথায় বলে “পঞ্চ পরমেশ্বর” অর্থাৎ পঞ্চের বিচার ঈশ্বরের বিচার সমান। *Vox populi vox dei*. মহারাষ্ট্রীয়দের আমলে সামান্যতঃ গ্রামের পঞ্চায়ত কর্তৃক সকল দেওয়ানী মকদ্দমার নিষ্পত্তি হইত—হয় বাদী প্রতিবাদী নয় স্বয়ং গবর্ণ-মেন্টের কর্তৃপক্ষগণ সেই সকলের মীমাংসা পঞ্চায়তের হস্তেই সমর্পণ করিতেন। বেতনভুক্ত কর্মচারিগণ প্রায়ই সে সকল কাজে হস্তক্ষেপ করিতেন না। এপ্রদেশে ইংরাজ রাজ্যের প্রারম্ভে কর্তৃপক্ষগণ এই রীতি অনুসরণ করিয়া চলিতেন। খৃষ্টাব্দ ১৮২৭ পর্যন্ত গবর্ণমেন্টের কর্মচারিগণ পঞ্চায়তের উপরেই দেওয়ানী মকদ্দমার ভার নিক্ষেপ করিতেন, পঞ্চায়তের হুকুম অনুমোদন ও জারী করাই তাহাদের কার্য ছিল। ১৮২৭-এর দেওয়ানী আইন বোম্বাই প্রেসিডেন্সীতে প্রচলিত হইলে পঞ্চায়ত সংক্রান্ত নিয়মাবলী বিধিবদ্ধ হইয়া এক স্বতন্ত্র আইন (১৮২৭ এর ৭) সংস্থাপিত হয়। লোকের মধ্যে পরস্পর বিবাদ বিসম্বাদ যাহাতে আপসে মিটিয়া যায় তাহার উত্তেজনা দেওয়াই ঐ আইনের প্রধান উদ্দেশ্য। গবর্ণমেন্টের কর্মচারিগণ পঞ্চায়তের কার্যভার গ্রহণে আদিষ্ট। সত্য নিরূপণের জন্য যেরূপ প্রমাণ ও বিচারের আবশ্যক সেই সকল প্রমাণ সংগ্রহ করা ও সেইরূপ বিচার অবলম্বন করা পঞ্চায়তের ক্ষমতাধীন ছিল ও তাহাদের নিকট সাক্ষী হাজির করিবার ভার আদালতের উপর। তাহাদের ব্যবস্থার উপর ফাঁস্প ছিল না ও তাহা আদালতে দাখিল হইলে ডিক্রীর সমান ফলোপধায়ী। তাহার উপর

আপীল ছিল না । ১৮৫৯ এর ৮ আইন প্রচলিত হওয়া পর্যন্ত ঐ আইন জারী ছিল, ক্রমে তাহার নিয়ম সকল শিথিল হইয়া এই পঞ্চায়ত প্রথা বিলুপ্তপ্রায় হইয়া আসিয়াছে ।

সৌভাগ্য ক্রমে মহারাষ্ট্রীয় কতকগুলি দেশানুরাগী ব্যক্তি এই পুরাতন প্রথা পুনরুদ্দীপ্ত করিতে তৎপর হইয়াছেন ও তাঁহাদের যত্নে মহারাষ্ট্র ও গুজরাটের স্থানে স্থানে মালিসী কোর্ট সকল প্রতিষ্ঠিত হইয়াছে । এই সকল কোর্ট স্থাপন করিবার প্রযত্ন কয়েক বৎসর হইল পুণা জিলায় ইন্দাপুর নগরে প্রথম আরম্ভ হয় । এই সকল কোর্ট জনসাধারণের এত প্রার্থনীয় ও তখনকার আইন তৎস্থাপন পক্ষে এরূপ অনুকূল ছিল যে দুই বৎসরের মধ্যে পুণা, সাতারা, মোলাপুর, অহমদনগর, থানা, রত্নাগিরী নাসিক, আহমদাবাদ প্রভৃতি প্রধান প্রধান নগরে মালিসী কোর্ট সকল স্থাপিত হয় ও তাহাদের শাখা আট্টো অন্যান্য স্থানে বিস্তারিত হয় । জানুয়ারি ১৮৭৬ শালে পুণার ‘লওয়াদ’ কোর্টের কার্য্যারম্ভ হয় । পুণানগরবাসীদের এক সাধারণ সভাতে বিদেশী জন নানা শ্রেণীস্থ ভদ্রলোক কোর্টের বিচারপতি নিযুক্ত হইলেন । ইহাদের মধ্যে এক কিস্বা একাধিক জনকে বাদী প্রতিবাদিগণ ইচ্ছামত বাছিয়া লইয়া আপনার বিবাদ নিষ্পত্তির ভার অর্পণ করিতে পারেন । বিচারকগণের পালায় পালায় অধিবেশন হয় ও তাঁহারা বিনা অর্থে কার্য্য করেন । এই পুণা কোর্টে দুই বৎসর মধ্যে প্রায় ৩ সহস্র মকদ্দমার নিষ্পত্তি হইয়াছে । এই ৩০০০ মকদ্দমা স্বল্প ব্যয়ে

আপসে মিটিয়া গেল, আদালতে যাইতে হইলে কত অর্থ ও সময় ব্যয়—কত মিথ্যাসাক্ষী, কিরূপ মনঃপীড়া, এই সকল নিবারিত হইল—একি সামান্য লাভ !—এবিষয়ে পুণানিবাসী গণেশ বাহুদেব জোশী একজন প্রধান উদ্যোগী । এই দেশ-হিতৈষী ব্যক্তি ভারতবর্ষের নানা স্থানে ভ্রমণ করিয়া এই শুভ কার্যে দেশীয়দের উৎসাহ বর্দ্ধন করিবার জন্য যত্ন ও পরিশ্রম করিতে ক্রটি করেন নাই ।

তৃতীয় ভাগ ।

এক দিকে এই সকল মালিসী কোর্ট আর এক দিকে কঠোর আইনবদ্ধ আদালত । বিনা ব্যয়ে আপসে বিবাদ ভঞ্জন একের কার্য—অপরের কার্য বিবাদানল প্রজ্বলিত করিয়া অর্থী প্রত্যর্থী উভয়েরই অর্থনাশ করা । একবার আদালতে মকদ্দমা উপস্থিত হইলে আর শান্তি নাই—বিরাম নাই । ইহার চূড়ান্ত হইতে যে কালবিলম্ব হয় তাহাতে কত ধূর্ততা প্রবঞ্চনা মিথ্যা মাজাইবার সময় পাওয়া যায় । প্রথম কোর্টে মকদ্দমার নিষ্পত্তি হইলে জিলা জজের নিকট আপীল—তার পর বোম্বাই হাইকোর্টে—কখনো বা বিলাতে রাণীর বিচারালয় পর্য্যন্ত না গিয়া পরাজিত পক্ষ ক্ষান্ত হয় না । ইহাতে কত বিলম্ব ও অর্থব্যয়, বাদী প্রতিবাদীর মধ্যে কি ভয়ানক বিবাদ বিদ্বেষ প্রদীপ্ত হয় ।

ইহা অপেক্ষা মালিসী কোর্টের সহজ ও শান্তিময় প্রণালী কত প্রার্থনীয় । বোম্বাই অঞ্চলের একজন জিলা জজ মালিসী কোর্ট ও আদালতের কার্যপ্রণালীর সম্মিলন প্রস্তাব করিয়া East Indian Association সভায় এক প্রবন্ধ * পাঠ করেন । তাঁহার মতে এই উভয় কোর্ট একত্রে মিলিয়া কার্য করিলে তাহা হইতে অনেক শুভফল প্রসূত হইতে পারে । তিনি বলেন ইহার প্রত্যেক কোর্টেরই দোষ গুণ লক্ষিত হয় । এই উভয় কোর্টের বিচারক বিদ্যা বুদ্ধিতে সমান নহে । পঞ্চায়তের একজন মেম্বর সুশিক্ষিত মুন্সেফের তুল্য বিচক্ষণ বুদ্ধিমান কার্যদক্ষ আইনজ্ঞ হইবে এরূপ প্রত্যাশা করা যায় না । কিন্তু তেমনি আবার আর কতকগুলি বিষয়ে পঞ্চায়ত কোর্টের প্রাধান্য স্বীকার করিতে হইবে । পঞ্চায়তের লোকেরা গ্রামের মধ্যে থাকিয়া আপনার গ্রামের স্বভাস্ত সকল জানিতেছে শুনিতেছে—গ্রামবাসীদিগের চরিত্র রীতি নীতি তাহারা বিশেষ রূপে অবগত । হয়ত সাক্ষীদের হাব ভাব দেখিয়া তাহারা সাক্ষ্য ভাল করিয়া ওজন করিতে পারিবে, সাক্ষ্যের সত্যাসত্য সহজে নির্ণয় করিতে সমর্থ হইবে । তাহারা মোটামুটি বিচার করিয়া যেভাবে অভ্রান্ত সিদ্ধান্তে উপনীত হইতে পারিবে মুন্সেফ হয়ত সহস্র আইন খাটাইয়া তাহাতে কৃতকার্য হইবেন না । আর এক দিক্ দেখিতে গেলে মুন্সেফ হয়ত তাহাদের অপেক্ষা বিচারক্ষম

* "The Panchayat ; a remedy for Agrarian disorders in India." read before The East India Association by Mr. William Wedderburn (Bombay Civil Service)

বহুদর্শী, মুন্সেফ হয়ত অপক্ষপাতে বিচার করিয়া দিবেন—
 পক্ষায়তের পক্ষপাত-দোষ ঘটিবার সম্ভাবনা। এই ক্ষণে এই
 দুই কোর্ট পৃথক্ পৃথক্ কার্য্য করিতেছে বলিয়া তাহারা তাদৃশ
 ফলোপধায়ী হয় না, কিন্তু তাহারা সম্মিলিত হইলে তাহাদের
 পরস্পরের দোষ খণ্ডন ও উপকারিতা বর্দ্ধন প্রত্যাশা করা
 যাইতে পারে। এই রূপে উভয় কোর্টে মিলিয়া কার্য্য করা
 আমাদের প্রাচীন প্রথার অনুযায়ী, পূর্ব্বে মহারাষ্ট্র দেশে বাদী
 প্রতিবাদী প্রথমে পক্ষায়তের নিকটে বাইয়া আপনাদের বিবাদ
 ভঞ্জনর জন্য আবেদন করিত—সে বিচার মনের মত না হইলে
 অসন্তুষ্ট পক্ষ রাজকর্ম্মচারী ন্যায়াধীশের শরণাপন্ন হইত। এখনো
 কতকটা এই নিয়ম প্রবর্তিত হইতে পারে। প্রত্যেক বড় বড়
 গ্রামে ও ক্ষুদ্র ক্ষুদ্র পল্লী সমূহে এক একটা পক্ষায়ত কোর্ট
 স্থাপিত হউক। তাহাদের নিকট প্রথমতঃ সামান্য ঋণ-সম্বন্ধীয়
 মকদ্দমার বিচার হইবে। তাহারা যতগুলি মকদ্দমা আপসে
 মিট মাট করিয়া দিতে পারেন তাহা সাধ্যমত করিয়া দিবেন—
 অবশিষ্ট গুলি যাহা সহজে নিষ্পত্তি হওয়া দুষ্কর তাহা মুন্সেফের
 বিচারালয়ে আনীত হইবে। মুন্সেফ কোর্ট এক স্থানে আবদ্ধ
 থাকিবে না—মুন্সেফ গ্রামে গ্রামে সরকিট ভ্রমণ করিয়া বিচার-
 কার্য্য নির্বাহ করিবেন। যে গ্রামে পক্ষায়ত কোর্ট প্রতিষ্ঠিত,
 তথায় উপস্থিত হইলে তিনি পক্ষায়তের মতে তাহার সভাপতি
 হইয়া বিচারাসনে বসিবেন ও তাহাদের সাহায্যে গুরুতর মক-
 দ্দমা সকলের নিষ্পত্তি করিবেন। যাহাতে অর্থী প্রত্যর্থী পক্ষ-

যত্নের ব্যবস্থা অমান্য করিয়া অকারণে আদালতে মকদ্দমা আনিতে না পারে তাহার জন্য ঐ সকল মকদ্দমার উপর ফাঁস্প কর নির্দ্ধারিত করা আবশ্যক। আর মুন্সফ কোর্টের কার্য-প্রণালী স্বচ্ছল রূপে চলিতেছে কি না ও তাহার বিচার-কার্য ভাল মন্দ কিরূপ হইতেছে তাহার তত্ত্বাবধানের ভার জিলা জজের উপর থাকিবে। জিলা জজ ও তাঁহার সহকারিগণ মধ্যে মধ্যে সরকিট গমন করিয়া তাহার তত্ত্বাবধান করিবেন।

এই পঞ্চায়ত-প্রথা প্রবর্তিত হইলে দেশের অশেষ হিত সাধিত হয়, বোধবিশিষ্ট ব্যক্তি মাত্রেই তাহা স্বীকার করিবেন। কিন্তু এ বিষয়ে গবর্ণমেন্ট মনোযোগী না হইলে কিছুই হইবে না। গবর্ণমেন্টের সাহায্য ব্যতীত এই মৃতপ্রায় তরু পুনরুজ্জীবিত হওয়া সম্ভব নহে। পঞ্চায়ত সভার সভাসদদিগকে কোন সম্মানসূচক পদবী প্রদান করা মন্দ নয়। তাহা হইলে জমীদার, উচ্চশ্রেণীর বণিক, পেনসনভুক লোক যাঁহাদের হাতে অগাধ সময় পড়িয়া আছে তাহা কিরূপে কাটাইবেন ভাবিয়া পান না, তাঁহারা স্থানীয় সভার সভাসদ হইবার প্রার্থী হইতে পারেন। এইরূপ সভা লোকের মধ্যে বিবাদ ভঞ্জন করিয়া জনসমাজে শান্তিরক্ষণে বিশেষ সহায়তা করিতে পারে তাহার আর সন্দেহ নাই।

দক্ষিণ রাইয়ত কমিসনরগণ প্রস্তাব করিয়াছেন যে ছোট ছোট ঋণ সম্বন্ধীয় মকদ্দমার বিচার জন্য কতকগুলি বিশেষ কোর্ট স্থাপিত হওয়া উচিত। সরকিট কোর্টের ন্যায় স্থানে

স্থানে তাহাদের অধিবেশন হইবে ও এই সকল কোর্টের তত্ত্বাবধানে প্রচলিত আদালতের মুসফ প্রভৃতি বিচারকগণ নিযুক্ত থাকিবে । রাইয়তদিগকে আপনাদের ঘরবাড়ী কৃষিকার্য্য ছাড়িয়া দূরস্থিত আদালতে যাইতে বাধ্য করা তাহাদের উপর সামান্য অত্যাচার নয় । সরকিট কোর্টে ইহার অনেকটা উপশম হইতে পারে । তদ্বিন্ন তাহাতে কিয়ৎপরিমাণে বিচারের সৌকর্য্য ও বিলম্ব হ্রাসের সম্ভাবনা । অবিচারের নীচেই বিচারে কালবিলম্ব দুষণীয় । এইক্ষণকার বিচার-প্রণালীতে বিলম্ব ও দীর্ঘসূত্রতা বিশেষ প্রত্নয় পায় বলিয়া বাদী প্রতিবাদী অনেক সময় স্বেচচারের ফল হইতে বঞ্চিত হয় । এই সকল অমঙ্গল নিবারণ উদ্দেশে কমিসনরগণ বলেন যে বিচারকেরা ভ্রমণে বাহির হইয়া প্রধান প্রধান গ্রামে গিয়া আদালত খুলিবেন ও সেই সময়ে গ্রামের অধীনস্থ পল্লী-সমূহের সমুদায় মকদ্দমা তাহাদের কোর্টে উপস্থিত করিতে হইবে । গ্রামের মণ্ডলেরা প্রতিবাদীদিগকে আনিয়া হাজির করিতে আদিষ্ট হইবে—কার্য্য-প্রণালী যতদূর সহজ হইবার তাহা হইবে এবং প্রতিবাদীর যদি আপনার পক্ষে কিছু বলিবার থাকে সে তাহা ব্যক্ত করিবে, এইরূপ হইলে অনেক জাল প্রতারণা মিথ্যাসাক্ষ্য উঠিয়া যাইবে, প্রতিবাদিগণ মন খুলিয়া আত্মপক্ষ সমর্থনে সক্ষম হইবে, সাক্ষীরাও অকুতোভয়ে অন্যের পক্ষ হইয়া সাক্ষ্যদান করিতে পারিবে । প্রতিবাদিগণের প্রবাস যাপনের কষ্ট দূর হইবে । এইক্ষণে যে সকল মকদ্দমার বহুকষ্টে দীর্ঘকালে মীমাংসা হয় তাহা অনতিপরি-

শ্রমে অল্প সময়ের মধ্যে নিষ্পত্তি হইবে—বিচারে ন্যায় ও স্বরা উভয়ই রক্ষা পাইয়া অর্থী প্রত্যর্থীর সন্তোষ সাধন করিবে ।

অধুনাতন আদালতে কার্য্য-প্রণালী রাইয়তের পক্ষে বিষম সঙ্কটাবহ তাহার আর সন্দেহ নাই । দাবীদার আসিয়া তাহার দাওয়ার আরজী দাখিল করিলে পর প্রতিবাদীর প্রতি কোর্টে হাজির হইবার সমনজারী হয়, কিন্তু অনেক সময় এই সমন যথাস্থানে পৌঁছে কিনা সন্দেহ । এমন হইতে পারে যে বেলিফ বাদীর টাকায় ক্রীত, সে সমন জারী না করিয়াও কোর্টে মিথ্যা রিপোর্ট প্রেরণ করিল । ডিক্রীজারীর সময় রাইয়ত হয়ত প্রথম জানিতে পারিল যে তাহার সর্ব্বনাশ উপস্থিত—সে অমনি দৌড়িয়া কোর্টে গিয়া নিবেদন করিল “দোহাই ধর্ম্মাবতার, আমি এ মকদ্দমার কিছুই জানি না ।” সে আপনার কথা সমর্থন করিতে পারে না পারে তাহা দৈবের উপর নির্ভর । রাইয়ত যদি বা সমন পাইল, তাহাকে কোর্টে আসিয়া দাওয়ার উত্তর দিতে হইবে—উকীল নিযুক্ত করিতে হইবে—শাক্ষীর ডাকিবার খরচা দিতে হইবে, এই সকল বিভীষিকা দেখিয়া সে আদালতে ঘেসিতেই সঙ্কুচিত হয় । অতএব অধিকাংশ মকদ্দমা যে প্রতিবাদীর অবর্ত্তমানে নিষ্পত্তি হইবে তাহাতে বিচিত্র কি ? তদনন্তর রাইয়তের উপর একবার ডিক্রী করিয়া লইতে পারিলেই মহাজনের কার্য্যসিদ্ধ হইল । সে যে সদ্য সদ্য ডিক্রীজারী করিতে প্রবৃত্ত হয় তাহা নহে কিন্তু সে সেই ডিক্রী রাইয়তের চক্ষের সম্মুখে ধরিয়া সময়ে সময়ে তাহার নিকট হইতে টাকা শস্য

গ্রহণ করে, অথবা তাহাকে আপনার দাসত্বে নিযুক্ত করে । তৎপরে ইচ্ছা হইলে আবার সম্পূর্ণ ডিক্রীজারী করিয়া লয় । এইরূপ প্রবঞ্চনায় আইন তাহার সহায়, কেন না আইনানুসারে ডিক্রীর টাকা কোর্টে আনিয়া অথবা কোর্টকে জানাইয়া ডিক্রীদারকে দিতে হইবে । কিন্তু রাইয়ত ত এ নিয়মের কিছুই জানে না । সে একবার আপনার যথাসর্বস্ব বেচিয়া কিনিয়া ডিক্রীর টাকা শুধিয়াছে—তাহার উপর আবার ডিক্রীজারীর সংবাদ পাইয়া কোর্টে গিয়া কাদিয়া পড়ে “দোহাই ধর্ম্মাবতার, আমি ডিক্রীর সব টাকা শুধিয়াছি—বাদীর আর এক পয়সাও পাওনা নাই ।” বিচারক কি করিবেন—তাহার হাত পা বন্ধ—হয়ত বলিতে বাধ্য হন “তুই আপসে বাদীকে টাকা দিয়াছিস্—কোর্টে হাজির করা হয় নাই—এখন আর আমি এ বিষয়ে হস্তক্ষেপ করিতে পারি না”—এই বলিয়া তাহাকে দূর করিয়া দেন । দৈবাৎ কখন এই অত্যাচার মাজিস্ট্রেটের কর্ণগোচর হইলে ফৌজদারীতে ইহার বিচার হইতে দেখা যায় ও তখন মহাজন তাহার দুষ্কৃতির উপযুক্ত দণ্ড প্রাপ্ত হয় ।

উল্লিখিত বিবরণ পাঠে সহজে প্রতীতি হইবে, দরিদ্র প্রতিবাদীর শ্রায়-লাভ কিরূপ দুর্ঘট । প্রথম হইতে শেষ পর্য্যন্ত তাহার যন্ত্রণাভোগ । প্রথমতঃ মকদ্দমার ব্যয়-বাহুল্য হেতু তাহার পক্ষে আদালতের দ্বার ত একপ্রকার রুদ্ধ বলিলে হয় । যদি কখন প্রবেশ করিতে পায় ত আত্মপক্ষ সমর্থন করিয়া জয়লাভ করাও তাহার পক্ষে সহজ নহে । আর তাহার বিরুদ্ধে একবার

যদি ডিক্রী বাহির হইল তাহা হইলে আর তাহার নিস্তার নাই । তখন হইতে তাহার মন্দভাগ্য উদয়—তাহার সুখশান্তি সকলি অন্তর্মিত হইল—সেই অবধি সে হয়ত মহাজনের দাসত্বে তাহার সমুদায় জীবন অতিবাহিত করিতে বাধ্য হয় ।

রাইয়তেরা প্রায়ই অজ্ঞান—লেখাপড়া কিছুই জানে না—আপনাদের হিতাহিত কিছুই বুঝে না । সামান্য হিসাব-জ্ঞান না থাকায় অনেক সময় তাহারা প্রতারিত হয় । তাহারা বুঝে এক, লেখায় দাঁড়ায় আর একপ্রকার । রাইয়ত যে টাকা কর্জ করিতে চায় ও যাহার জন্ম সে খত লিখিয়া দেয় অনেক সময় তাহা পূরাপূরি প্রাপ্ত হয় না—কখনো বা একেবারে কিছুই পায় না । অনেক সময় মহাজন দেনার টাকা অথবা শস্ত্র পাইয়াও তাহা রাইয়তের হিসাবে জমা করিয়া লন না । দেনার টাকা পাইলে তাহার রসিদ দিবার ত নিয়ম নাই, স্তত্রাং দেনা শুধিয়াও তাহা আদালতে সপ্রমাণ করা রাইয়তের পক্ষে সামান্য কঠিন ব্যাপার নহে ও কাজেই দেনা বারবার পরিশোধ করিয়াও অনেক সময় তাহার নিস্তার নাই ।

রাইয়তের উপর মহাজনের যে অত্যাচার—আদালতে যে সকল ঋণ সম্বন্ধীয় মকদ্দমা উপস্থিত হয় তাহা হইতে তাহার রাশি রাশি প্রমাণ সংগৃহীত হইতে পারে । বোম্বাই হাইকোর্ট রিপোর্ট পাঠ করিলে পাঠকেরা তাহার কতক আভাস প্রাপ্ত হইতে পারেন । এবিষয়ে তাঁহাদের কৌতূহল চরিতার্থ করিবার জন্য নিম্নলিখিত মকদ্দমাটি উদ্ধৃত করিয়া দিতেছি,

ইহা হইতে রাইয়তের ব্যবহার-জ্ঞান সুস্পষ্ট উপলব্ধি হইবে । *

এই মকদ্দমার পত্তন একটা বন্ধক খতের উপর । দুইজন রাইয়ত মহাজনের নিকট হইতে ৩০০ টাকা কর্জ করিয়া প্রায় বিশ বিঘা জমি বন্ধক দিয়া ১৮৬২ সালে এক খত লিখিয়া দেয় । খতের করার এই যে সূদের পরিবর্তে রাইয়তেরা উৎপন্ন শস্যের অর্দ্ধভাগ মহাজনের বাঁটাতে প্রতিবর্ষে আনিয়া উপস্থিত করিবে । প্রতিবর্ষে ২০ টাকা করিয়া ৩০০ টাকা পরিশোধ করিতে হইবে । ১৫ বৎসরের পূর্বে সে ঋণ পরিশোধ হইয়া গেলেও মহাজনকে ১৫ বৎসর পর্যন্ত শস্যের অর্দ্ধভাগ বর্ষে বর্ষে আনিয়া দিতে হইবে আর খতের তারিখ হইতে চারি মাসের মধ্যে যদি সরকারী দফতরে মহাজনের নামে জমি দাখিল করা না হয় তাহা হইলে সেই জমি মহাজনের নিকট ১০০ টাকায় বিক্রীত হইবে । অবশিষ্ট ২০০ টাকা একবৎসর পরে চাহিবা মাত্র সূদ শুদ্ধ আনিয়া দিতে হইবে । রাইয়ত যদি বার্ষিক শস্যার্দ্ধভাগ দিতে অক্ষম হয় অথবা জমি মহাজনের নামে করারমত দাখিল করা না হয় কিন্মা প্রতিবর্ষে ২০ টাকা দিবার ব্যতিক্রম ঘটে, কি জমি পতিত রাখা হয় তাহা হইলে একশত টাকার মূল্যে সেই জমির উপর মহাজনের সম্পূর্ণ অধিকার হইল । শস্যার্দ্ধভাগের মূল্য যতই হউক না কেন—আসল টাকার দ্বিগুণ অপেক্ষা অধিক হইলেও তাহা কখনই অদেয় থাকিবে না ।

এই খতের চারিজন জামীন । তাহারাও দেনা পরিশোধের জন্য সম্পূর্ণ দায়ী । তাহাদের দুইজনে আপনাদেরও জমি বন্ধক দিয়া এই অঙ্গীকার করে যে মূল ঋণী দেনা পরিশোধে অক্ষম হইলে জামীনদারদের সেই জমি শুদ্ধ একশত টাকার মধ্যে বিক্রীত গণ্য করা যাইবে । অপর দুই ব্যক্তি এই করার করে যে উক্ত বন্ধক জমি হইতে ঋণ আদায় না হইলে আমরা যেমন করিয়া হউক আমাদের ঘর বলদ কৃষিয়ন্ত্র গৃহসামগ্রী সমস্ত বেচিয়াও তোমার টাকা পরিশোধ করিব ।

মহাজনেরা ১৮৬৪ সালে ৫০০ টাকা মায় খরচা আদায় করিবার জন্য নালিশ করে ও তাহাদের আবেদন এই যে আসল ঋণী ও জামিনদের জমীর স্বত্বের উপর তাহাদের ক্রয়-ধিকার আদালত হইতে নিরূপিত হয় ও সেই সকল জমি ও ফসলে তাহাদের দখল দেওয়া হয় । আর বন্ধকীকৃত ঘর বলদ কৃষিয়ন্ত্র গৃহসামগ্রী বেচিয়া তাহার ৫০০ টাকা আদায় করা হয় ।

প্রতিবাদিগণ উত্তর দেয় আমরা এ খত লিখিয়া দিই নাই, আর একটা খত লিখিয়া দিয়াছি—যাহার করার অপেক্ষাকৃত সহজ । তাহাতে আমরা শস্যের কতক ভাগ দিতে স্বীকৃত হইয়াছি বটে কিন্তু আমাদের দোষ নাই—আমরা সেই ভাগ বাদীদের দিতে প্রস্তুত হইলেও তাহারা তাহা গ্রহণ করিতে সম্মত হয় নাই ।

মুন্সেফের বিচারে বন্ধক খত সাব্যস্ত হইল ও তিনি নির্ণয় করিলেন যে মূল ঋণিগণ তাহাদের করার মত কার্য্য করিতে

সমর্থ হয় নাই সুতরাং তাহাদের জমীর উপর বাদীদের সম্পূর্ণ স্বত্ত্ব জন্মিয়াছে, ও তাহারা খরিদদার রূপে জমি দখলের অধিকারী । আদালতের ডিক্রী হইল যে ১০০ টাকা মূল্যে বাদীদিগকে সেই জমি দখল দিতে হইবে । আরো হুকুম হইল যে ঋণী ও তাহার অভাবে জামীনদের মহাজনদিগকে মূল ঋণের অবশিষ্ট ২০০ টাকা ও সুদের হিসাবে ৩০০ টাকার শস্য দেওয়া বিধেয় ।

জিলা জজের নিকট আপীলে সেই হুকুমনামা বাহাল রহিল ।

পরে প্রতিবাদীরা এই ডিক্রীর বিরুদ্ধে হাইকোর্টে আপীল করিল ।

চীফ জাস্টিস সাহেব বলিলেন ;—

আমরা এই Equity কোর্টের বিচারাসনে বসিয়া বলিতে বাধ্য হইতেছি যে এই কোর্ট হইতে এই বন্ধক খত সদৃশ অন্যায ও কঠোর করার পূর্ণ খত অনুমোদিত ও কার্য্যে পরিণত হওয়া কখনই উচিত নহে । ইহা সত্য যে যে স্থলে প্রতারণা নাই সে স্থলে উপযুক্ত মূল্যের অসম্ভাবে কোন চুক্তি রহিত করা অথবা তাহা কার্য্যে পরিণত হইতে না দেওয়া যুক্তিসঙ্গত নহে । কিন্তু মূল্যের স্বল্পতার সঙ্গে বখন প্রবঞ্চনা—প্রতারণা—যথার্থ মূল্য গোপন, বিষয়ের অবস্থা বর্ণন, অর্থের নিতান্ত প্রয়োজন—জড়বুদ্ধি কিম্বা অজ্ঞান ইহার কিছু না কিছু সম্মিলিত দেখা যায় তখন Equity কোর্টের বিবেচনা-যোগ্য যে একরূপ করার গ্রাহ্য হইবে কি না—তাহা কার্য্যে পরিণত করা উচিত কি না ? এই

সকল কারণে অনেক সময় অল্প মূল্যের বিক্রী রহিত করা আবশ্যক হইয়া পড়ে ।

আমরা এরূপ কোন সাধারণ নিয়ম বাঁধিয়া দিতে চাহি না যে জানিয়া শুনিয়া কোন ব্যক্তি কোন করারে প্রবিষ্ট হইলে তাহার কঠোরতা নিবন্ধন সে তাহা হইতে মুক্তিলাভের অধিকারী হইবে । কিন্তু এই মকদ্দমায় যখন দেখা যাইতেছে যে অজ্ঞান রাইয়ত যাহারা লেখাপড়া কিছুই জানে না—আপনাদের নাম স্বাক্ষর করিতেও যাহারা অক্ষম, তাহারা যে সময়ে আপনাদের কৃষিকার্য্য নির্বাহের জন্য কর্জ করিতে উদ্যত, তাহাদের তখনকার টাকার নিতান্ত প্রয়োজন দেখিয়া মহাজনেরা এমন কঠোর করার তাহাদের স্কন্ধে নিক্ষেপ করিয়াছে—যখন দেখিতে পাই রাইয়তেরা লিখিয়া দিয়াছে যে তাহারা শস্যের নিয়মিত অর্দ্ধাংশ যোগাইতে অক্ষম হইলে এবং অন্যান্য কারণ উপস্থিত হইলে তাহারা আপনাদের জমি অল্প মূল্যে বিক্রয় করিতে প্রস্তুত—এত অল্প মূল্যে যে তাহা ঋণের তৃতীয়াংশ মাত্র—যে ঋণের টাকা জমির বার্ষিক উপস্বত্বের অর্দ্ধাংশেরও অধিক নহে—আর এরূপ করিয়াও তাহারা ঋণের অবশিষ্ট দুই তৃতীয়াংশের জন্য সুদ শুদ্ধ দায়ী—যখন দৃষ্ট হইতেছে যে বার্ষিক উৎপন্ন শস্য দিবার কোন ক্রটি না হইলেও, করার মত অপরাপর কার্য্য করিতে সক্ষম হইলেও, মূল টাকা পরিশোধ করিতে পারিলেও ১৫ বৎসর পর্য্যন্ত তাহারা শস্যাদ্ধভাগ দানে বাধ্য, তখন এই অন্যায় পীড়নকারী কঠোর-করার-পূর্ণ খত রহিত করা নিতান্ত

আবশ্যক বিবেচনা করিতেছি, কেন না ইহাতে ঋণিগণ এক-প্রকার প্রতারিত হইয়াছে অনুমান না করিয়া ক্লান্ত থাকা যায় না । আমরা কোন মতে বুঝিতে পারি না কেমন করিয়া কোন মনুষ্য সহজ বুদ্ধিতে এইরূপ লিখিয়া দিতে সম্মত হইবে যদি তাহারা কি লিখিয়া দিতেছে তাহা ভাল করিয়া স্পষ্ট জানিতে পারে ও তাহার ফলাফল বিবেচনা করিতে সমর্থ হয় । যদিও জিলাজজের মতে আমরা মত দিতে বাধ্য হইতেছি যে এই খত রাইয়তেরা লিখিয়া দিয়াছে—এই খত তাহারা লিখিয়া দিয়াছে ইহা যদিও সত্য হয় তথাপি লিখন পঠনে অসমর্থ অবোধ লোকের নিকট একবার এইরূপ লেখা পাঠ করিলেই যে তাহা তাহাদের বোধগম্য হইবে তাহা প্রত্যাশা করা যায় না—এই সকল অসাধারণ ছুরুহ করার তাহাদিগকে ভাল করিয়া বুঝাইয়া দেওয়া উচিত ।

এই বলিয়া এই ঘোর অন্যায় কঠোর বন্ধক খত হাইকোর্টে হইতে অগ্রাহ্য হয় ও রাইয়তেরা তাহাদের যথার্থ দেনার টাকা দিয়া নিষ্কৃতি লাভ করে । যদি হাইকোর্টে এই মকদ্দমার আপীল না হইত তবে গরীব বেচারী রাইয়তদিগকে কি অত্যাচারই ভোগ করিতে হইত ।

ছুফ্তবুদ্ধি মহাজনেরা গরীব রাইয়তের উপর শাঠ্য-জাল বিস্তার করিতে না পারে এই জন্য কমিসনরগণ এইরূপ অভি-প্রায় প্রকাশ করিয়াছেন যে প্রত্যেক তমসুক হয় কোন রেজি-ষ্ট্রার কি কোন গবর্ণমেন্টের উচ্চ কর্মচারীর সমক্ষে লিখিত

পাঠিত ও স্বাক্ষরিত হয় । এইরূপ কোন নিয়ম প্রচলিত হইলে কেবল যে রাইয়তের লাভ তাহা নহে । কিন্তু অনেক সময় সদাশয় মহাজনেরও তাহা কার্য্যকর হইতে পারে । অনেক মকদ্দমায় এইরূপ দেখা যায় যে, যে সকল খত সত্য সত্যই লিখিয়া দেওয়া হইয়াছে ঋণী তাহা অস্বীকার করে ও গ্রামস্থ লোকদিগকে আপনার পক্ষে ডাকিয়া তাহা লিখিত ও স্বাক্ষরিত হয় নাই ইহা আদালতে প্রমাণ করিবার চেষ্টা পায় । উল্লিখিত প্রণালী অবলম্বিত হইলে এইরূপ মিথ্যা শপথের পথ অবরুদ্ধ হয় । কোন্ পক্ষ সত্য তাহা আপীলে নির্ণয় করা অত্যন্ত কঠিন—কারণ প্রথম কোর্টের জজ সাক্ষীদের ভাব ভক্তি দেখিয়া তাহাদের সাক্ষ্যের সত্যাসত্য কতকটা নিরূপণ করিতে সক্ষম হইবেন—আপীল কোর্টে স্ক্রকৌশল-গ্রন্থিত শিক্ষিত সাক্ষীদের অসত্যজাল আবিষ্কৃত হওয়া সহজ নহে । অনেক সময় এইরূপ ঘটে যে ঋণী খত লিখিয়া দিবার সময় নাবালক ও আপনার হিতাহিত বোধে অসমর্থ, খতের মর্শ্ব সে কিছুই বুঝে না, তথাপি ছলবল কৌশলে তদুপরি তাহার নাম স্বাক্ষরিত হয় । যখন সেই খতের দাবীতে মকদ্দমা উপস্থিত হয় তখন ঋণী অজ্ঞান আলস্য ভয় নিরাশা বশতঃ বিচারালয় হইতে দূর থাকে, সুতরাং অবর্ত্তমানে তাহার বিরুদ্ধে ডিক্রী হইয়া যায়, করারের প্রকৃত স্বরূপ প্রচ্ছন্ন থাকে । যদি কোন নিযুক্ত কর্মচারীর সমক্ষে তমস্ক লিখিয়া দিবার নিয়ম প্রবর্ত্তিত হয় তাহা হইলে নাবালকের উপর এরূপ অত্যাচার স্থান পায়

না । এক দিকে অবোধ রাইয়ত ধূর্ত মহাজনের প্রবঞ্চনা হইতে নিষ্কৃতি পায়, অন্য দিকে মহাজনের ন্যায্য টাকা মিথ্যা সাক্ষ্যে ডুবিয়া যাইবার আশঙ্কা দূর হইয়া স্বদের দর কমিয়া যায়, তাহাতে রাইয়তের মঙ্গলেরই সম্ভাবনা । যদি মহাজনের ন্যায্য পাওনা ডুবিয়া যাইবার ভয় দূর হয়—যদি ঋণের পরিমাণ সহজে সপ্রমাণ হইবার উত্তরূপ কোন উপায় নির্দ্ধারিত হয়—তবে যে সকল স্বল্প সম্পত্তি সম্পন্ন মহাজন এক্ষণে ভয়ে অগ্রসর হইতে চায় না তাহার। বড় বড় মহাজনের প্রতিস্পর্দ্ধী হইতে সাহসী হইবে ও এই স্পর্দ্ধিতায় স্বদের দর আপনা হইতে কমিয়া গিয়া পরিণামে রাইয়তের কল্যাণ সাধিত হইবে ।

কেহ কেহ পরামর্শ দেন যে এই ক্ষণে মহাজনের। ঋণীর নিকট হইতে অপরিমিত স্বদ গ্রহণ করেন তাহার প্রতিবিধান করা আবশ্যিক । তাঁহাদের মতে স্বদের এক নিয়মিত দর বন্ধন করা উচিত, তাহা অপেক্ষা অধিক দরের স্বদ ধার্য্য হইলে আদালতে তাহা অগ্রাহ্য হইবে । এইরূপ স্বদের সীমা বন্ধনকারী কোন আইন করা তাঁহাদের অভিপ্রেত । হিন্দু শাস্ত্রে অপরিমিত স্বদ গ্রহণ করা নিষেধ । মনু লিখিয়াছেন ব্রাহ্মণ ক্ষত্রিয় জাতি স্বদ দিয়া টাকা ধার করিতে পারেন কিন্তু স্বদ নিয়া টাকা ধার দিতে পারিবেন না । যথা—

ব্রাহ্মণঃ ক্ষত্রিয়োবাপি বুদ্ধিং নৈব প্রযোজয়েৎ

কামং তু খলু ধর্ম্মার্থং দদ্যাৎ পাপীয়সেহল্লিকা ।

ব্রাহ্মণ কিন্মা ক্ষত্রিয় বুদ্ধি যোজনা করিবেন না কিন্তু যে পাপবুদ্ধি চাহিবে তাহাকে ধর্মার্থে অল্প স্তদ ইচ্ছামত দিতে পারিবেন—

স্বদের প্রতিরোধক আরো কতকগুলি নিয়ম আছে, যথা—

বশিষ্ঠবিহিতাং বুদ্ধিং সৃজেৎ বিভববিবর্দ্ধিনীং

অশীতিভাগং গৃহীয়ান্মাসাব্দীকৃত্বিকং শতে ॥ ১৪০

দ্বিকং শতং বা গৃহীয়াৎ সতাং ধর্মমনুস্মরণ্ ।

দ্বিকং শতং হি গৃহীণো ন ভবত্যর্থকিলিষী ॥ ১৪১

দ্বিকং ত্রিকং চতুষ্কং চ পঞ্চকং চ শতং সমং ।

মাসস্য বুদ্ধিং গৃহীয়াৎ বর্ণানামনুপূর্ব্বশঃ ॥ ১৪২

অষ্টম অধ্যায় ।

বুদ্ধি ব্যবসায়ী ব্যক্তি বিভববর্দ্ধনকারী বশিষ্ঠ-বিহিত স্তদ গ্রহণ করিতে পারিবেন অর্থাৎ মাসে শতের অশীতি ভাগ গ্রহণ করিবেন ।

সতের ধর্ম স্মরণ করিয়া শতকরা দুয়ের হিসাবে গ্রহণ করিবেক,—যে ব্যক্তি শতকরা দ্বিক গ্রহণ করেন, তিনি অর্থ দোষে দোষী হয়েন না ।

বর্ণানুক্রমে শতকরা দ্বিক ত্রিক চতুষ্ক অথবা পঞ্চক মাসিক বুদ্ধি গ্রহণ করিবেক অর্থাৎ ব্রাহ্মণের নিকট হইতে দ্বিক, ক্ষত্রিয়ের নিকট হইতে ত্রিক, বৈশ্যের নিকট হইতে চতুষ্ক এবং শূদ্রের নিকট হইতে পঞ্চক ।

স্তদ গ্রহণ সম্বন্ধে হিন্দু-শাস্ত্রের এক বিশেষ নিয়ম এই যে,

এককালে হুদ শুদ্ধ দেনা গ্রহণ করিলে মূলধন অপেক্ষা অধিক হুদ গ্রহীত হইবে না । যথা —

কুসীদবুদ্ধিরৈ'গুণ্যং নাভ্যেতি সৰুদাহত ।

ধাত্তে সদে লবে বাহে নাতিক্রমতি পঞ্চতাং ॥ ১৫১

কৃতানুসারাদধিকা ব্যতিরিক্তা ন সিধ্যতি ।

কুসীদপথমাহন্তং পঞ্চকং শতমহতি ॥ ১৫২

অষ্টম অধ্যায় ।

ঋণের টাকা এককালে আহত হইলে তাহার দ্বিগুণ অপেক্ষা অধিক হুদ গ্রহীত হইবে না—ধান্য, ফল, লোম অথবা বাহক জন্তু সম্বন্ধে ঋণের পঞ্চগুণ অতিক্রম করিবেক না ।

নির্দিষ্ট নিয়মের অতিরিক্ত হুদ গ্রহণ করিলে তাহা অসিদ্ধ— তাহাকে কুসীদপথ কহে । উর্দ্ধ সংখ্যা শতকরা পঞ্চক মাত্র ঋণীর নিকট হইতে প্রাপ্য ।

উক্ত নিয়মকে “দাম ছুপট” কহে ও এপ্রদেশের আদালত সকলে ঐ নিয়ম প্রচলিত । ঋণ আদায় করিবার সময় মহাজন কখন আসল অপেক্ষা হুদের টাকা অধিক লইতে পারে না— আসলের দ্বিগুণ পর্য্যন্ত ‘সরুদাহত’ হুদের সীমা । হিন্দুশাস্ত্রের এই নিয়ম ছাড়িয়া দিলে একগণকার আইন অনুসারে হুদের দর অন্যান্য বিষয়ের ন্যায় চুক্তি অনুসারে নিরূপিত হইয়া থাকে । এ বিষয়ে আইনকর্তাদের হস্তক্ষেপ করা উচিত কি না এই লইয়া অনেক সময় অনেক তর্ক বিতর্ক শুনা যায় । কমিসনরদিগের মত এই যে আইন দ্বারা হুদের দর নির্দ্ধারিত হওয়া যুক্তিসিদ্ধ

নহে ।—আইন দ্বারা স্বেদের দর বাঁধিয়া দিলে তাহাতে যে ঋণী-
দিগের লাভের সম্ভাবনা নাই, তাহা পরীক্ষায় প্রমাণীকৃত
হইয়াছে । বার্তাশাস্ত্রেরও সিদ্ধান্ত এই যে, এবিষয়ে আইন
বাঁধিতে গেলে ফলোপধায়ী হইবে না । ঋণীর টাকার প্রয়োজন
ও তাহাকে ধার দিবার মত মহাজনের অর্থের প্রাচুর্য্য—এই
দুয়ের উপর স্বেদের দর নির্ভর করে । যদি আইনের দ্বারা স্বেদের
দর বাজার-দর অপেক্ষা অধিক স্থিরীকৃত হয়, তাহা স্বেতরাং কোন
কার্যেরই হইবে না । যদি বাজার দর অপেক্ষা স্বেদের দর অল্প
নির্দ্ধারিত হয় আর এইরূপ নিয়ম করা যায় যে, ঐ নির্দ্ধারিত
দরের উর্দ্ধে স্বেদ গৃহীত হইবে না, তাহা হইলে হয়ত ধার কর্ত্ত
একেবারেই বন্ধ হইয়া যায় । অথবা কাহারো টাকা কর্ত্ত করি-
বার যদি নিতান্তই আবশ্যক হয়, তবে সে নিয়মিত দরের
অপেক্ষা এত অধিক স্বেদ দিতে বাধ্য হয়, যাহাতে আইন ভঙ্গের
আশঙ্কা না রাখিয়াও মহাজনে তাহাকে ধার দিতে প্রবৃত্ত হইতে
পারে । স্বেদের দর বৃদ্ধির জন্য যে মহাজনেরই দোষ এরূপ
মনে করা অন্যায় । যদি মহাজনেরা মিলিয়া এইরূপ চক্রান্ত
করে যে, চলিত দর অপেক্ষা অধিক দরে স্বেদ না পাইলে টাকা
ধার দিব না, তাহা হইলে উত্তমর্গের ব্যবসায়ে এত অধিক লাভ
দেখিয়া অন্যান্য প্রতিদ্বন্দ্বী আসিয়া সে চক্রান্ত ভাঙ্গিয়া দিবে
সন্দেহ নাই । সামান্যতঃ বিবেচনা করিতে গেলে ঋণ-প্রার্থীকে
নিজ স্বার্থ বুঝিয়া দর করিতে দিলেই ভাল হয়—মহাজনের মধ্যে
যে প্রতিদ্বন্দ্বিতা আছে, তাহাতে দরের সাম্যভাব আপনাপনিই

দাঁড়াইবে । কিন্তু একটা কথা এই যে, যে স্থলে চুক্তি-শাস্ত্রের নিয়ম খাটাইলে অন্যায় করা হয়, সে স্থলে কি কর্তব্য । একজন রাইয়ৎ যদি নিতান্ত গরজে পড়িয়া কৰ্জ করিতে আসে, আর মহাজন তাহার গরজ বুঝিয়া তাহার নিকট হইতে কোন অন্তায় কঠোর সৰ্ত্ত লিখাইয়া লন, তবে সে সৰ্ত্ত হয়ত আদালতে অগ্রাহ্য হইবে । এই প্রকার অল্প টাকার ধারকৰ্জকারী রাইয়তের মহাজনের সহিত এরূপ অধীনতা সম্বন্ধ—একের উপর অন্যের অন্তায় ব্যবহার এরূপ সহজ-সাধ্য যে, এই সকল রাইয়তের রক্ষার জন্য কোন বিশেষ আইন করিলে অযুক্তি-যুক্ত হয় না । ৫০০ টাকার অনধিক দেনার মকদমায় শতকরা ৯ টাকার হিসাবে কিম্বা অন্য কোন নিয়মিত দরে হুদ ধরিয়া দেওয়া ও তদতিরিক্ত টাকা অগ্রাহ্য করা—কোর্টের এইরূপ সম্পূর্ণ অধিকার থাকা উচিত । এইরূপ হইলে মহাজনের অত্যাচার হইতে রায়তেরা অনেকটা নির্বৃত্তি লাভ করে । যে সকল লোকেরা ৫০০ টাকার অধিক টাকা ধার কর্জ করে, তাহারা প্রায়ই আপনার হিতাহিত বুঝিতে সক্ষম আর যে সকল মহাজনের অধিক টাকার কারবার তাহাদের ভদ্রতা সততার উপরও বিশ্বাস করা যাইতে পারে, সুতরাং এই সকল লোকের জন্য কোন বিশেষ আইন আবশ্যক করে না—তাহাদের পরস্পর চুক্তিই তাহাদের উপর বন্ধনকারী ।

বোম্বাই প্রদেশে রায়তওয়ারী বন্দবস্ত প্রচলিত বলিয়া হুদের কতকটা বর্দ্ধিতাকার দৃষ্ট হয় । এই বন্দবস্তে সদর খাজনা

সময়ে সময়ে বৃদ্ধি হইবার সম্ভাবনা থাকাতে রাইয়তের ভূস্বত্বের অনিশ্চিত মূল্য—টাকা ধার দিবার সময় মহাজন তাহার উপর দৃষ্টি রাখিয়া অপেক্ষাকৃত অধিক দরে হুদ লইতে বাধ্য হয়।

১৮৫৯ খ্রীষ্টাব্দের পূর্বের দেনার টাকা আদায় করিবার ১২ বৎসর পর্য্যন্ত মেয়াদ ছিল, ঐ মেয়াদ অতীত না হইলে ঋণীর নিকট হইতে নূতন খত করিয়া লইবার রীতি ছিল না। তখনকার আইন অনুসারে শতকরা ১২ টাকার অধিক হুদ আদালতে অগ্রাহ হইত ও আসলের অধিক হুদ এককালীন পাইবার নিয়ম ছিল না, সুতরাং কোন মহাজন ১০০ টাকা কর্জ দিয়া এককালে তাহা আদায় করিতে গেলে বার বৎসর অন্তে তিনি উর্দ্ধ ২০০ টাকার ডিক্রী পাইতে পারিতেন। এক্ষণে ঐ বিষয়ে তামাদির নিয়ম ৩ বৎসর, কাজেই রাইয়তেরা প্রায় দুই বৎসর অন্তর হুদ সমেত নূতন খত লিখিয়া দিতে বাধ্য হয়। অতএব ১০০ টাকার খত, শতকরা ২৫ টাকা মায় হুদ তাহা উল্লিখিত প্রকারে পুনঃ পুনঃ নবীকৃত হইয়া ১২ বৎসরের শেষে ঋণীর স্বন্ধে ১১৩৯ টাকার বোঝা নিক্ষেপ করিবে। রাইয়ত কমিসনর মধ্যে শম্ভুপ্রসাদ নামক একজন দেশীয় কমিসনর তামাদি সংক্রান্ত ৩ বৎসরের নিয়ম রাইয়তের ঋণভারগ্রস্ত হইবার এক প্রধান কারণ বলিয়া নির্দেশ করিয়াছেন এবং তিনি রাইয়ত ও মহাজনের অনেকানেক পরীক্ষিত হিসাব হইতে স্বমত সমর্থন করিয়াছেন। এই সকল হিসাব হইতে জানা যায় যে ১৮৫৯এর পর থেকে প্রজাদিগের ঋণভার ক্রমিকই বৃদ্ধি পাইতেছে। যথা—

১৮৫৯ এর পূর্বে কর্জের টাকার সমষ্টি	}	২৬০০
অদ		১৪৬০
				<hr/>
				৪০৬০
দেনা শোধ		৩৪৭০
				<hr/>
বাকী		৬০০
<hr/>				
১৮৫৯ এর পরে কর্জের টাকার সমষ্টি	}	২৯৩০
অদ		৪৪২০
				<hr/>
				৭৩৫০
দেনা শোধ		২৭৪০
				<hr/>
বাকী		৪৬১০

শম্ভুপ্রসাদের মতে তামাদির পূর্বকার মত দীর্ঘ মেয়াদ হইলে রাইয়তের বিস্তর উপকারের সম্ভাবনা । অন্যান্য কমিস-নরেরা কিন্তু এই কথা বলেন যে, যদিও তামাদির নিয়ম পরি-বর্তনে রাইয়তের কতকটা অসুবিধা হইয়াছে, তথাপি তাহাদের হিসাব ১২ বৎসর ফেলিয়া রাখা অপেক্ষা ৩ বৎসর অন্তর দেনার নূতন বন্দবস্ত করাই শ্রেয়স্কর ও তাঁহারা এই অভিপ্রায় ব্যক্ত করেন যে অন্যান্য বিহিত উপায় অবলম্বিত হইলে আগেকার ১২ বৎসর মেয়াদ প্রত্যাবর্তন অনাবশ্যক হইবে । .

প্রচলিত নিয়মানুসারে মারওয়াড়ীর অনুগ্রহের উপর রাই-
য়তের সকল নির্ভর । মারওয়াড়ীর হস্তেই খত রক্ষিত হয়,
রাইয়ত তাহা পরীক্ষা করিয়া দেখিবার অবসর পায় না ।
মারওয়াড়ী আপন ইচ্ছামত হিসাব প্রস্তুত করে, রাইয়ত তাহা
গৃহে লইয়া গিয়া সময়মত পর্য্যবেক্ষণ করিতে পারে না । অনেক
সময় এমন দেখা গিয়াছে যে, রাইয়ত ঘোরতর কষ্টে পড়িয়া
তাহার ভূমি সম্পত্তি মহাজনেব নিকট বন্দক রাখিয়াছে—অনেক
বৎসর পরে তাহার অবস্থা একটু ভাল হইলে সে অথবা তাহার
সন্তান সন্ততিগণ আপনাদের বন্ধক বিষয় ছাড়াইয়া লইবার জন্য
যত্নশীল হয়, কিন্তু তখন মহাজন অথবা তাহার বংশজ লোকেরা
বহুল কাল ভুক্ত বিষয় ছাড়িয়া দিতে সম্মত নহে । রাইয়ত
আদালতে যাইতে বাধ্য হয় । মহাজন উত্তর দেয়—“এ সম্পত্তি
বাদীর নহে—ইহা ত আমাদেরই হস্তে বংশ পরম্পরা চলিয়া
আসিতেছে—আমরা বন্ধকের কিছুই জানি না ।” খত মহা-
জনেরই হস্তে রক্ষিত—বাদী সে বন্ধক কি রূপে সপ্রমাণ করিবে?
এই সকলের প্রতিবিধান করা নিতান্ত আবশ্যিক । এই প্রকার
অন্যায় আচরণের একটী সহজ উপায় আমাদের মনে হইতেছে ।
যে সকল স্ক্যাম্প কাগজের উপর খত লিখিত হয়, তাহার যদি
ছুই ভাগ পরম্পর সংযুক্ত থাকে—মধ্যে ছিদ্রময় রেখা (যেমন
চেক বহিতে সচরাচর দৃষ্ট হয়)—আর যখন তাহার এক ভাগে
খত লিখিত হয় তখন যদি তাহার সারাংশ অপর ভাগে লিখিবার
নিয়ম থাকে, তাহা হইলে সেই শেষোক্ত ভাগটী খত হইতে

ছিড়িয়া লইয়া রাইয়তকে দেওয়া যাইতে পারে। এইরূপ হইলে মূল খতের এক প্রস্ত রাইয়তের হস্তে রক্ষিত হয়। এই দুই ভাগ সহজে মিলাইয়া দেখিবার জন্য দুয়ের উপরই সমান নম্বর থাকা আবশ্যক ও এইরূপ নিয়ম করা উচিত যে এক প্রস্তের উপর ঋণীর নাম স্বাক্ষরিত হইবে। যদি রাইয়তের হস্তস্থিত কাগজে কোন ভুল কি মিথ্যা বিষয় সন্নিবেশিত হয়, তাহা সহজে ধরা পড়িবে ও ঋণী তাহা মহাজনের নিকট হইতে তখনি শোধন করিয়া লইতে পারিবে। মহাজন রাইয়তকে মিথ্যা লিখিয়া দিতে সাহসী হইবে না, কেন না যদি সে তাহার খতের দাবীতে প্রকৃত ঋণের অধিক টাকার জন্য নালিস করিতে যায়, তাহা হইলে তাহার নিজ নাম স্বাক্ষরিত অপর প্রস্ত আদালতে উপস্থিত হইলেই তাহার প্রতারণা আবিষ্কৃত হইবে। এখনকার নিয়ম অনুসারে দেনার টাকার কতক ভাগ পরিশোধ করিলে তাহা কখন কখন মূল খতের পৃষ্ঠে লিখিয়া দেওয়া হয়। কিন্তু সে খত মহাজনের নিকটেই থাকে—ঋণী কখন তাহা দেখিতে পায় না ও কর্জের টাকা লইয়া “এখন খত কাছে নাই পরে লিখিয়া দিব” এই বলিয়া মহাজন অনেক সময় ওজর করিয়া কাটায়। কিন্তু খতের অপর প্রস্ত ঋণীর হাতে থাকিলে আর এরূপ হইতে পারে না—টাকা দিবার সময় সে তাহার সংখ্যা সেই কাগজের উপর লিখিয়া দিতে মহাজনকে সহজেই বাধ্য করিতে পারে। এইরূপ হইলে রাইয়ত তাহার নিজের হিসাব সহজেই বুঝিতে পারে ও মহাজন কর্তৃক তাহার প্রতারণিত

হইবার তাদৃশ সম্ভাবনা থাকে না । ইহাতে আর এক প্রকার প্রবঞ্চনার দ্বার রুদ্ধ হয় । কখন কখন এরূপ ঘটে যে, খতের মেয়াদ অতীত হইলে পরেও রাইয়তের ধার শুধিবার সম্ভাবনা নাই, মহাজনেও তাহারে বিরক্ত করিতেছে ও আদালতে যাইবার জন্য ব্যস্ত, তখন রাইয়ত অনেক বলিয়া কহিয়া পুরাতন খতের পরিবর্তে তাহাকে এক নূতন খত লিখিয়া দেয় । এই সকল স্থলে নূতন খত লিখিয়া লইয়াও প্রলুব্ধ মহাজন তাহাতে পুরাতন দেনার পরিশোধ স্বীকার করেন না । পুরাতন খতের পরিবর্তে নূতন খত লিখিত হইয়াছে রাইয়তের তাহা সপ্রমাণ করিবার কোন উপায় নাই । যদি নূতন খতে পুরাণ ঋণের কোন উল্লেখ না থাকে তাহা হইলে মহাজন এই দুই খতের পৃথক টাকা আদায় করিয়া লইতে সক্ষম হয়—তাহার বিরুদ্ধে ঋণীর কোন কথা কহিবার উপায় থাকে না । আবার ইহার বিপরীতে কখন কখন দেখা যায় যে ঋণী তাহার ঋণভার হইতে মুক্ত হইবার জন্য মিথ্যা করিয়া বলে যে পুরাতন দেনার পরিবর্তে সে নূতন খত লিখিয়া দিয়াছে । উল্লিখিত প্রণালী অবলম্বিত হইলে, রাইয়ত ও মহাজন উভয়েরই এই প্রকার অসত্য ব্যবহারের দ্বার রুদ্ধ হইবে, সুতরাং মিথ্যা মকদ্দমা উঠিয়া ন্যায়ের আদালতকে কলঙ্কিত করিতে পারিবে না ।

এক্ষণকার আইনের বলে মহাজনের কর্জ আদায় করিবার যেরূপ সুবিধা, রাইয়ত তাহার পাকচক্র হইতে সে পরিমাণে সুরক্ষিত নহে, এই বিষয় লইয়া কমিসনরগণ অনেক কথা কহি-

য়াছেন। তাঁহাদের মতে প্রচলিত আইন মহাজনের অত্যাচারের বিশেষ পোষকতা করে। পূর্বকার দেশীয় প্রথানুসারে মহাজন রাজার নিকট হইতে ঋণ আদায় করিবার বিশেষ কোন সাহায্য পাইত না। তখনকার ঋণ আদায়ের প্রথা স্বতন্ত্র ছিল। মহাজন ইচ্ছামত ঋণীকে কারারুদ্ধ করিয়াও খাটাইয়া লইতে পারিতেন। ঋণ আদায়ের জন্য যে সকল উপায় অবলম্বিত হইত তাহা এই :—

“তাগাদা” অর্থাৎ ঋণীকে টাকার জন্য বার বার তাগাদা করিয়া উদ্ভ্যস্ত করা—

“মোহস্মলী” অর্থাৎ তাগাদা করিবার জন্য ঋণীর নিকট দূত পাঠান ও ঋণীকে তাহার খোরাক যোগাইতে বাধ্য করা—

“ধন্না” ঋণীর দ্বারে ধন্না দিয়া বসিয়া থাকা—

“ত্রাগা” অর্থাৎ টাকা না পাইলে ঋণীকে আত্মহত্যা করিবার ভয় দেখান—

ইত্যাদি অনেক প্রকার নিয়ম ছিল ; ইহাতে যেমন ঋণীর উপর পীড়ন তেমনি মহাজনেরও সামান্য কষ্টভোগ নহে। মহাজনের টাকার জন্য রাইয়তের বলদ কৃষিয়ন্ত্র প্রভৃতি ত্রোক করিয়া তাহাকে নিঃসম্বল করিবার নিয়ম দেশীয় রাজত্ব কালে প্রচলিত ছিল না। ঋণের জন্য বংশ পরম্পরা ভোগ্য ভূমি সম্পত্তি বিক্রীত হইত না। মহারাষ্ট্র দেশে কখনই এরূপ ঘটনার সম্ভাবনা ছিল না। সেখানকার রাইয়তেরা অধিকাংশই

মিরাসদার বলিয়া গণ্য ছিল ও মিরাসী স্বত্বের নিয়মই এই যে রাইয়ত সে স্বত্ব হইতে কখনই বঞ্চিত হইবার নয়—ছাড়িয়া দিলে যখনি ইচ্ছা তাহা পুনঃ প্রাপ্ত হইতে পারিত । ১৮২৭ সালের আইনে মহাজনের ঋণ আদায় সম্বন্ধে নিজস্ব ক্ষমতা প্রত্যাহৃত হইয়া তৎপরিবর্তে আদালত সকল স্থাপিত হয় । তথাপি তখনকার আইন ঋণীর পক্ষে অনেক অবিধাজনক ছিল—স্বদের দরের সীমা নিরূপিত ছিল, মহাজনেরা তদতিরিক্ত সুদ গ্রহণ করিতে পারিত না ; অপিচ কৃষকের স্বীয় জীবিকা ও কৃষিকার্য্য নির্বাহের জন্য যে সকল বস্তুর প্রয়োজন, তাহার ক্রোক ও বিক্রয় নিষিদ্ধ ছিল । কাল সহকারে এই সকল নিয়ম পরিবর্ত হইল । বর্তমান আইন সম্বন্ধে কমিসনরগণ নিম্নলিখিত অভিপ্রায় প্রকাশ করিয়াছেন ;—

ঋণ আদায় করিতে হইলে হয় ঋণীর উপার্জিত ও অর্জনীয় বিষয় বিক্রয়, নয় তাহার ও তাহার পরিবারের কায়িক পরিশ্রম গ্রহণ করা—এই দুই উপায় অবলম্বিত হইতে পারে । যে আইনে অবাধে এই সকল উপায় নিয়োজিত হয়, তাহা পারত পক্ষে মহাজনেরই বিশেষ অনুকূল । এদেশের আইন এবিষয়ে মহাজনের যেমন পক্ষপাতী আর কোন আধুনিক আইন তেমন আছে কি না সন্দেহ । এই আইন মতে ঋণী সপরিবারে মহাজনের নিকট ধন প্রাণে যেরূপ আবদ্ধ, তাহার ইয়ত্তা করা যায় না । যদিও আইনে দাসত্বের কোন স্পষ্ট উল্লেখ নাই, তথাপি যখন অশক্ত ঋণীকে বন্দীখানায় প্রেরণ করা মহাজনের ইচ্ছা—

ধীন, তখন পক্ষান্তরে দাসত্বই প্রশ্রয় পাইতেছে বলিতে হইবে । কেন না অনেক দেনাদার কারাবাস অপেক্ষা মহাজনের দাসত্ব অল্প যন্ত্রণাদায়ক জ্ঞান করিয়া তাহাতেই ত্রুতী হইবে সন্দেহ নাই । কারাবাস ভয়ে যে অনেক সময় রাইয়তকে মহাজনের দাসত্ব স্বীকার করিতে হইয়াছে, তাহার প্রচুর প্রমাণ প্রাপ্ত হওয়া গিয়াছে । এইত ঋণের জন্য ঋণীর কায়িক দায়িত্বের কথা বলা হইল । তাহার বৈষয়িক দায়িত্ব সম্বন্ধে দৃষ্ট হইবে যে, আইনে মহাজনের হস্তে ঋণীর বিষয় সম্পত্তি বিক্রয় করিয়া লইবার অগাধ ক্ষমতা অর্পিত হইয়াছে । ঋণীর নিজের কিম্বা তাহার স্ত্রীপুত্র পরিবারের একান্ত প্রয়োজনীয় বস্তুও সে ক্ষমতার বহির্ভূত নয় । ঋণীর পরিধেয় বস্ত্র পর্য্যন্ত বিক্রয় করিবার কোন বাধা নাই, একবার মাত্র তাহাকে হত-সর্বস্ব ও নিঃসম্বল করিয়া ছাড়িয়া দিলেই যে, সে নিস্তার পাইল তাহা নহে, কিন্তু যখনি আবার সে যৎকিঞ্চিৎ উপার্জন করিতে আরম্ভ করে, অমনি মহাজন আসিয়া তাহা নিঃশেষ করিয়া লইতে পারে । এইরূপে তাহাকে পুনঃ পুনঃ পীড়ন করিবার ক্ষমতা আইন কর্তৃক মহাজনের হস্তে অর্পিত । সভ্য জাতির আইনে মহাজনকে যতদূর আশ্রয় দেওয়া কর্তব্য, তাহার অধিক প্রদত্ত হইয়াছে । যে সাধারণ সর্ববাদীসম্মত আইন অনুসারে দেউলিয়া হইয়া ঋণের দায় হইতে নিষ্কৃতি লাভের নিয়ম আছে, এদেশের রাইয়তের ভাগ্যে সে লাভ টুকুও নাই । এবিষয়ে আর কোন দেশে ভারতবর্ষের আইনের ন্যায় কঠোর আইন

আছে কি না সন্দেহ। মুসার বিধানেও “ঋণী সাত বৎসর চাকরী করিয়া মুক্তিলাভে সমর্থ হইত।”

কমিসনরগণ যখন এদেশীয় আইনের উপর উক্তরূপ দোষারোপ করিয়াছিলেন, তখন নূতন দেওয়ানী কার্য্য বিধি আইন (Civil Procedure Code) প্রচলিত হয় নাই, আইন-প্রস্তুত-কারী-জঁাতায় পেশিত হইতেছিল মাত্র। এই আইনের গুণে পূর্ব-কার ঋণ সম্বন্ধীয় কঠোর নিয়ম সকল অনেকাংশে সংশোধিত হইয়াছে। ঋণী মহাজনের নানাবিধ অত্যাচার হইতে অব্যাহতি পাইয়াছে। এক্ষণে আর তাহার হলবলদ প্রভৃতি আবশ্যক সামগ্রী সকল ডিক্রীজারী দ্বারা ক্রোক ও বিক্রয় করিবার নিয়ম নাই।—দেনার দরুন কারাবাসের মেয়াদ স্বল্পীকৃত হইয়াছে—যাহাতে রায়তের ভূসম্পত্তি প্রকৃত মূল্য অপেক্ষা অনেক অল্প দরে বিক্রীত হইতে না পারে তাহার বিহিত উপায় সকল প্রবর্তিত হইয়াছে ও সে যাহাতে অপেক্ষাকৃত সহজ উপায়ে ঋণবন্ধন হইতে মুক্ত হইতে পারে তাহার উপযোগী (Insolvency) নিয়ম সকল রচিত হইয়াছে।

এই সম্বন্ধে আর একটি প্রশ্ন উত্থাপিত হইতে পারে। দেনার জন্য রাইয়তের জমী হস্তান্তর হইতে দেওয়া উচিত কি না, এবিষয়ে বিস্তর মতভেদ দৃষ্ট হয়। অনেকানেক বিদ্বানের মত এই যে, স্থাবর সম্পত্তি একশ্রেণীর লোকের মধ্যে বাঁধিয়া রাখিবার নিয়ম কখন হিতাবহ হইতে পারে না। অন্যান্য বিষয়ের ন্যায় ভূমির ব্যবস্থাও প্রতিজনের স্বৈচ্ছাধীন রাখা

কর্তব্য । প্রকৃতির নিয়মই এই যে বলীর হস্তে দুর্বলের পরাজয়—ধনীর নিকট দরিদ্রের পরাজয় । ধনবান্ জমীদার নির্ধন রাইয়তের স্থান অধিকার করিলে মঙ্গল ব্যতীত অমঙ্গল নাই । যে সকল লোক আপনাদের বিষয় আপনারা রক্ষা করিতে অক্ষম—বিষয়ের উন্নতি সাধনে অসমর্থ তাহাদের ঠেকা দিয়া রাখিবার প্রয়োজন কি? তাহাতে কি দেশের শ্রীবৃদ্ধি হইবে? গবর্ণমেন্টের রাজস্ব বৃদ্ধি হইবে? আধুনিক ব্রিটিশ রাজ্যের নিয়মই এই যে যাহারা ইহার নবোদ্ভূত ঘটনাস্রোতের সহিত সম্মুখীন করিয়া কার্য্য করিবে, তাহাদেরই জয় । লক্ষ্মী তাহাদের প্রতিই প্রসন্ন । ধন সঞ্চয় করিলেই ভূমি সম্পত্তি করিবার স্বাভাবিক স্পৃহা উদ্দীপ্ত হয়, তাহা কি কতকগুলি কৃত্রিম নিয়ম দ্বারা নির্বাপিত করা উচিত? রাইয়ত আবহমান কাল হইতে একখণ্ড ভূমি কর্ষণ করিয়া আসিতেছে বলিয়াই কি তাহার সম্বন্ধ চিরস্থায়ী রাখিতে হইবে? সে যদি ঋণভারে এরূপ আক্রান্ত হইয়া পড়ে যে গবর্ণমেন্টের খাজনার জন্য ও তাহাকে মহাজনের শরণাপন্ন হইতে হয় তাহা হইলে তাহার দ্বারা কি কৃষিকার্য্য সুন্দর রূপে নির্বাহ হইতে পারে—সে জমী তাহার হস্ত হইতে মহাজনকে দিলে কি ভাল হয় না?

ইহার বিপক্ষ দলের লোকেরা বলেন, এরূপ যুক্তি যেমন ঐতিমধুর, কার্য্যে তেমন ফলোপধায়ী দেখা যায় না । বার্তা-শাস্ত্রের সমুদয় নিয়ম এদেশে খাটে না । দেখিতে হইবে যে প্রস্তাবিত নিয়ম এদেশের সামাজিক অবস্থার উপযোগী কি না ।

জাতিভেদ প্রথা—চিরন্তন দেশাচার—কুলাচার সকল দিক্ ভাবিয়া তাহার ফলাফল নিরূপণ করিতে হইবে। অহিংসেন সেবন অনিষ্টকারী সত্য, কিন্তু তাহা একেবারে ছাড়িয়া দিতে হইলে মৃত্যুমুখে পতিত হইতে হয়। ভূমির উপর দেশীয়দের মমতা এরূপ প্রগাঢ়—সামাজিক নিয়ম ও কুলাচারের সঙ্গে তাহা এরূপ অনুসৃত, যে তাহা ভগ্ন করিয়া সেই ভূমি পরহস্তগামী করা সামান্য কঠোর কার্য্য নহে। এতৎ সম্বন্ধে হিন্দু সমাজের একান্ন-বর্ত্তী পরিবারের নিয়ম বিবেচনা-যোগ্য। এক পরিবারের মধ্যে প্রতিজনে স্ব স্ব অংশ হস্তান্তর করিবার অধিকারী অথবা এই-রূপ স্থলে পরিবারস্থ সমস্ত লোকের সাধারণ সম্মতি আবশ্যক কি না—এবিষয়ে হিন্দু আইন শাস্ত্রের ভিন্ন ভিন্ন শাখায় মত-ভেদ দৃষ্ট হইবে। বোম্বাই অঞ্চলে বৈধ বিক্রয়ের জন্য সর্ব-সম্মতি আবশ্যক, এই নিয়ম হিন্দু শাস্ত্র সম্মত বলিয়া নির্দ্ধারিত হইয়াছে। একত্রিত পরিবারের অবিভক্ত স্থাবর সম্পত্তির মধ্যে অপর কোন ব্যক্তি প্রবিষ্ট হইলে সমূহ অনিষ্টের সম্ভাবনা। এক পরিবারের বসতিবাটীর একভাগ ক্রয় করিয়া তাহাতে যদি একজন ভিন্ন জাতীয় আগন্তুক আসিয়া বাস করে, তাহা হইলে হয়ত সমুদায় পরিবারকে গৃহত্যাগ করিয়া যাইতে বাধ্য করিতে পারে।

ভূমি বলিতেছ ধন হইলেই ভূমি সম্পত্তি করিবার ইচ্ছা জন্মে, কিন্তু তাহা না করিলেই বা ক্ষতি কি? সেই ধন বাণিজ্য ব্যবসায়ে পরিচালিত হইলে কি দেশের শ্রীবৃদ্ধি হয় না?

আরো জিজ্ঞাস্য এই, যখন মহাজন রাইয়তের যথা-সর্বস্ব বিক্রয় করাইয়া তাহার ভূমি দশমাংশ মূল্যে কিনিয়া অধিকার করে, তখন তাহারা কি সেই ভূমির উন্নতি সাধনে প্রবৃত্ত হয়? কৃষি কার্যের উন্নতি সাধন, বাপী পুষ্করিণী খনন—ভূমির সারবত্তা বর্দ্ধন—মহাজন জমীদার কি এই সকল কার্যে মনোযোগী হন? তাঁহাদের যত্নে কি ভূমির মূল্য বৃদ্ধি—কৃষির উন্নতি—কৃষকের শ্রীবৃদ্ধি সাধিত হইতে দেখা যায়? অনেক সময় ইহার সম্পূর্ণ বিপরীত ঘটে। মহাজন সেই পুরাতন রাইয়তকেই নিযুক্ত করেন—ভূমি ও ফসলের অবস্থা সমানই থাকে—কৃষি কার্যের উন্নতি নাই, কেবল কৃষকের অবস্থান্তর উপলক্ষিত হয়—পূর্বে যে ব্যক্তি স্বয়ং ভূস্বামী ছিল, সে এক্ষণে মহাজনের খেড়ুত হইয়া সেই ভূমি কর্ষণ করে ও আপনার শ্রমজাত সমস্ত দ্রব্য প্রভুর চরণে ঢালিয়া দেয়। এই সকল মহাজনের অর্থোপার্জন-শক্তি ভিন্ন এমন আর কি শক্তি—কি ঔদার্য্য—পৌরজনোচিত এমন কি গুণ আছে, যে তাহা দেখিয়া রাজা রাইয়তের সর্বনাশ করিয়া তাহাদিগকে প্রশ্রয় দিতে প্রবৃত্ত হইবেন?

যে সকল প্রদেশে রাইয়তওয়ারী বন্দবস্ত প্রচলিত, রাজাই সেখানকার ভূস্বামী—রাজাই জমিদার। তিনি যাহাকে ইচ্ছা ভূমিদান করিতে পারেন। তিনি যদি এরূপ নিয়ম করেন যে কোন মহাজন রাইয়তকে তাহার স্বত্ব হইতে বঞ্চিত করিতে পারিবে না, তাহাতে কাহারো কোন কথা কহিবার অধিকার নাই। রাজা বলিতে পারেন, “আমি কোন মধ্যবর্তী ভূস্বামী

চাহি না । তুমি হয় নিজে ভূমি কর্ষণ কর কিম্বা অন্য কোন কৃষককে তোমার স্থান অধিকার করিতে দেও । যদি তোমার স্বত্ব বিক্রয় করিতে ইচ্ছা কর, তবে তাহা মহাজনের নিকট করিও না । যে ব্যক্তি স্বয়ং কৃষিকার্য্য চালাইতে অক্ষম, সে যেন ভূম্যধিকারী না হয় ।” রাজা এইরূপ নিয়ম করিতে পারেন যে তাঁহার সম্মতি ব্যতীত কোন রাইয়ত তাঁহার অধিকৃত ভূমি হস্তান্তর করিতে পারিবে না । তিনি এইরূপ নিয়ম প্রচার করিতে পারেন যে, যতটুকু ভূমির উপস্বত্ব হইতে একটি পরিবারের স্বচ্ছন্দে জীবিকা নির্বাহ হইতে পারে, তাহাতে কোন মহাজনের হস্তক্ষেপ করিবার অধিকার থাকিবে না । সেই নির্দিষ্ট পরিমাণ জমীর ফসল ও তাহা চাস করিবার উপযোগী হল বলদ প্রভৃতি এবং রাইয়তের বসতিবাটীর উপর ডিক্রীজারী করিয়া তাহা কেহ নিলামে বিক্রী করাইবার অনুমতি পাইবে না । তাহার অতিরিক্ত ভূমি এবং কেবল ততটুকু মাত্র কোর্টের আদেশক্রমে নিলামের পাত্র হইতে পারে ।*

রাইয়তকে ঋণভার হইতে মুক্ত করিবার জন্য যে সকল উপায় প্রদর্শিত হইয়াছে তাহাও তদ্বিন্ন অন্যান্য উপায় বিবেচনা পূর্বক অচিরাৎ অবলম্বন করা গবর্ণমেণ্টের কর্তব্য । ভারত-বর্ষীয় গবর্ণমেণ্টের আইনসভা হইতে প্রজাদিগের মতামতের অপেক্ষা না রাখিয়া তাহাদের জন্য বর্ষে বর্ষে ভূরি ভূরি আইন বর্ষণ হইতেছে । ইহা হইতে দেশীয় সংবাদপত্রের মুখবন্ধ

* The land and the law in India By Raymond West.

করিয়া এক ভয়ঙ্কর আইনের সৃষ্টি হইয়াছে । মধ্যে মধ্যে রাজস্ব-বর্দ্ধনকারী ভীষণ-দর্শন আইন-রাক্ষস সকল প্রসূত হইতেছে । কিন্তু ১৮৭৫ সালে যে কমিশন বসে, তাহার দ্বারা বোম্বাই রাইয়তের শ্রীরুদ্ধি সাধনোপযোগী যে সকল উপায় সূচিত হয়, তাহা বিধিবদ্ধ করিয়া আইন প্রস্তুত করিতে এত বিলম্ব হইবার কারণ কি ? রাজাই যখন জমীদার—জমীদারের অধিকারের সঙ্গে জমীদারের কর্তব্য ভার তাঁহাকে বহন করিতে হইবে । শুদ্ধ নিয়মিত খাজানা আদায় করিয়া রাজভাণ্ডার স্ফীত করিতে পারিলেই যে তিনি সে ভার হইতে মুক্ত হইলেন তাহা নহে—রাইয়তের সুখ দুঃখের প্রতি তাঁহার বিশেষরূপ দৃষ্টি করা আবশ্যিক । তিনি যদি মহাজনের অত্যাচার হইতে রাইয়তকে উদ্ধার করিতে চাহেন, তবে তিনি নিজেই মহাজনের স্থান গ্রহণ করুন । গবর্ণমেন্ট হইতে যদি রাইয়তদিগকে প্রয়োজন মত অল্প সুদে টাকা ধার দিবার নিয়ম জারী হয়, তাহা হইলে বিস্তর শুভফল প্রত্যাশা করা যাইতে পারে । এইরূপ নিয়ম জারি করিবার বিশেষ কোন প্রতিবন্ধক নাই । যেখানে মহাজন বৎসরে শতকরা ৩৬ টাকার হিসাবে সুদ না লইয়া ক্ষান্ত হয় না, সেখানে গবর্ণমেন্ট তাহার ষষ্ঠাংশ সুদ গ্রহণ করিলেও ক্ষতিগ্রস্ত হইবেন না । মহাজনের টাকা আদায় করিবার যে বিঘ্ন বিপত্তি, গবর্ণমেন্টের তাহার শতাংশের একাংশও নহে । গবর্ণমেন্ট মহাজনের স্থান অধিকার করিলে রাইয়ত প্রবঞ্চনার ভয় হইতে মুক্ত হয় । জাল খত, হিসাবে গোলা, সকলি ঘুচিয়া

যায় । গবর্ণমেন্ট রাইয়তের মহাজন হউন, গবর্ণমেন্ট আবার তাহাদের কোষাধ্যক্ষ হউন । রাইয়ত অনেক পরিশ্রমে অল্প স্বল্প যাহা কিছু জমাইতে পারিবে, তাহা সে গবর্ণমেন্টের হস্তে গচ্ছিত রাখিয়া নিঃশঙ্ক হউক । এক্ষণে যেমন Saving's Bank স্থানে স্থানে স্থাপিত হইয়াছে, তাহা সর্বত্র বিস্তারিত হউক, যাহাতে ক্ষুদ্র পল্লীর রাইয়ত পর্য্যন্ত তাহার ফলভাগী হইতে পারে ।

ব্রিটিশ শাসন যদি অসংখ্য অসংখ্য রাইয়তের কল্যাণকর না হইল, তবে আর কি হইল । পরিশ্রমী মিতাচারী বিনীত রাইয়ত, মোগল, মহারাষ্ট্রী, পিণ্ডারীদিগের লুটপাট দৌরাভ্যেয় মধ্যে যদি উন্নতশির থাকিয়া আত্মরক্ষণে সমর্থ হইত, তাহা হইলে ব্রিটিশ রাজ্যের আশ্রয়ে তাহাদের কত কল্যাণের সম্ভাবনা । কত বৎসর যুদ্ধ বিপ্লবের নামগন্ধ পর্য্যন্ত বিলুপ্ত হইয়াছে—অন্যায় অত্যাচারের স্থানে বিশুদ্ধ ন্যায়ের আদালত সকল স্থাপিত হইয়াছে—বাণিজ্য ব্যবসা প্রমুক্ত হইয়াছে—অনিয়মিত করের পরিবর্তে ভূমির পরিমিত খাজানা নির্দ্ধারিত হইয়াছে । ইহা সত্ত্বেও রাইয়তের এরূপ দুর্দশা কেন ? চতুর্দিক্ হইতেই তাহার আর্ভনাদ শ্রবণ করা যায় । সে দুর্দহ ঋণভারে আক্রান্ত । মহাজনের দৌরাভ্যে তাহারা ধন প্রাণে মারা যাইতেছে । মহাজন আদালতের সাহায্য লইয়া তাহার যথাসর্ব্বস্ব হরণ করিতেছে—তাহার বসতিবাটী—ধন ধান্য—পশু—পরিবার বস্ত্র পর্য্যন্ত ডিক্রীজারী করিয়া লুটিয়া লইতেছে । তাহার পিত্রা-

জিজ্ঞাসিত ভূমি সম্পত্তি নিলামে বিক্রয় করিয়া তাহা হইতে তাহাকে বঞ্চিত করিতেছে—তাহাকে চিরদাসত্বে নিযুক্ত অথবা কারাবদ্ধ করিয়া পীড়ন করিতেছে। ইহার কারণ কি? ইহার ঔষধ কি? এই সকল অত্যাচার নিবারণের উপায় কেন অচিরাৎ অবলম্বিত হয় না?

আমাদের বিবেচনায় সকল অপেক্ষা রাইয়তের কল্যাণ সাধনের উৎকৃষ্ট উপায় তাহাকে শিক্ষাদান। শিক্ষাদান ব্যতীত আর আর সমস্ত উপায় ব্যর্থ হইবে। যতদিন রাইয়তেরা অজ্ঞান-জালে আবৃত থাকিবে, যতদিন না তাহারা আপনার হিতাহিত বুঝিয়া কার্য্য করিতে পারিবে, ততদিন তাহাদের নিস্তার নাই। তাহার মঙ্গল উদ্দেশে যতই কর না কেন, শিক্ষার অভাবে সে তাহার সম্যক্ লাভ গ্রহণ করিতে অসমর্থ হইবে। কাল যদি গবর্ণমেন্ট আইনের বলে তাহার সমুদায় দেনা পরিশোধ করিয়া দেন, রাইয়ত সেই অজ্ঞানান্ধ থাকিলে পরশ্ন আবার হয়ত ঋণ-পাশে বদ্ধ হইয়া পূর্বদশা প্রাপ্ত হইবে। শিক্ষাদানই এই সকল দুর্গতি নিবারণের একমাত্র ঔষধ। যেমন উচ্চশ্রেণীর লোকদের হিতকারী উচ্চ শিক্ষা দানে গবর্ণমেন্ট ব্রতী হইয়াছেন, সেইরূপ নিম্নশ্রেণীস্থিত সাধারণ জনগণের উপযোগী সহজ লিখন পঠন শিক্ষা প্রচারেও তাহাদের মনোযোগী হওয়া কর্তব্য। এই উদ্দেশ্য সিদ্ধির নিমিত্তে গ্রামে গ্রামে ও ক্ষুদ্র পল্লীসমূহেও বিদ্যালয় পাঠশালা সকল স্থাপিত হউক। শুদ্ধ লেখাপড়া শিক্ষা নয়, অন্যান্য বিদ্যার ন্যায় কৃষিবিদ্যা শিক্ষাও নিতান্ত প্রয়োজনীয়।

স্থানে স্থানে কৃষিবিদ্যালয়—স্থানে স্থানে উন্নত কৃষিকার্যের উৎসাহ-বর্দ্ধনকারী আদর্শক্ষেত্র সকল (Model farms) প্রতিষ্ঠিত হউক—অসংখ্য অসংখ্য প্রজাপুঞ্জের জ্ঞান-চক্ষু প্রস্ফুটিত হউক—তাহাদের বুদ্ধিবৃত্তি সকল মার্জিত হউক—তাহাদের অবস্থার উপযোগী শিক্ষালাভের উপায় সকল কল্পিত হউক । তাহা হইলে রাজা প্রজা উভয়েরই কল্যাণ—তাহা হইলেই ব্রিটিশ রাজ্যের কীর্তিস্তম্ভ ভারতবর্ষে এরূপ বদ্ধমূল হইবে যে তাহা কোনকালেই বিলুপ্ত হইবে না ।

লিখিতে লিখিতে “দাক্ষিণাত্য কৃষি-কন্টিনিবারণী বিল” আমাদের হস্তগত হইল । এই বিল্ সম্প্রতি কক্রেল্ সাহেব ভারতবর্ষীয় আইন সভায় উপস্থিত করিয়াছেন । ইহাতে বোধ হইতেছে যে, রাইয়ত কমিসনের পরিশ্রম ব্যর্থবায় নাই, তাঁহারা রাইয়তদিগের ঋণ মোচনের যে সকল উপায় উদ্ভাবিত করিয়াছেন, তাহা লইয়া কর্তৃপক্ষদের মধ্যে আন্দোলন চলিতেছে ইহা এক শুভ চিহ্ন । প্রস্তাবিত আইন সেই আন্দোলনের ফল স্বরূপ পরিগণিত হইতে পারে ।

কক্রেল সাহেবের বক্তৃতা হইতে জানা যাইতেছে যে গত বর্ষে বোম্বাই গবর্ণমেন্ট, ভূতপূর্ব গবর্ণর সাহেব কৰ্ম্মত্যাগ করিবার কিছু পূর্বে, কমিসনের সমুদায় রিপোর্টখানি সমালোচন করিয়া ইণ্ডিয়া গবর্ণমেন্টে এক পত্র লেখেন । মহারাষ্ট্রীয় রাইয়তদের ঘোরতর ঋণভার ও তৎকারণ বিষয়ে কমিসনরগণ যে সিদ্ধান্ত করিয়াছেন, বোম্বাই গবর্ণমেন্ট তাহার সহিত একমত হইয়াছেন,

কিন্তু প্রচলিত খাজানার আকার অথবা সেই খাজানা আদায়ের কঠোর নিয়মাবলী যে রাইয়তদের বর্তমান দুর্দশার কারণ তাহা তাঁহারা স্বীকার করেন নাই ।

ভূমি সম্পর্কীয় খাজানার আকার ও রাজস্ব আদায় বিষয়ে কমিসনরগণ যে সকল অস্ফুট মত ব্যক্ত করিয়াছেন তাহা বোম্বাই গবর্ণমেন্টের বিবেচনায় কার্য্যে পরিণত করা কঠিন । তাহা করিতে হইলে ফসলে খাজানা গ্রহণ করিবার প্রাচীন প্রথা অবলম্বন করিতে হয় । এই অবনতিকারক প্রথার পুনঃ প্রবর্তনে গবর্ণমেন্ট কখনই সম্মতি দিতে পারেন না । আর যদি খাজানার কোন নিয়মিত দর বাঁধিয়া না দেওয়া যায়, তাহা হইলে রাইয়তের কি দেয়, তাহা লইয়া গোল উঠিবার সম্ভাবনা । গবর্ণমেন্ট ও রাইয়তের এই অনিশ্চিত সম্বন্ধ থাকিলে তাহা হইতে যে অমঙ্গল নিরাকৃত হইবার কথা হইতেছে, তদপেক্ষাও অধিক অমঙ্গল প্রসূত হইবে ।

এক্ষণকার আইন ও আদালতের হাঙ্গামে রাইয়তের যে অবস্থান্তর লক্ষিত হইতেছে, তৎসম্বন্ধে গবর্ণমেন্ট এই অভিপ্রায় প্রকাশ করেন যে, রাইয়তের বর্তমান দুর্দশার দুই প্রধান কারণ,—এক দেনা আদায় সম্বন্ধীয় মকদ্দমায় তামাদি মেয়াদের স্থল্লীকরণ ও রাইয়তের বিরুদ্ধে মকদ্দমার একতরফা নিষ্পত্তির স্থলভতা । অতএব তাঁহারা কমিসন রিপোর্ট প্রস্তাবিত বিষয়ের মধ্যে এই কয়েকটি বিষয় অনুমোদন করিয়াছেন ।

১। রাইয়তেরা মহাজনদিগকে যে সকল কর্জ্জখত লিখিয়া

দেয়, তাহা একজন গবর্ণমেন্ট কৰ্মচারীর সমক্ষে লিখিত ও রেজিষ্টরি করা হয় ।

২। দেনার টাকা পাইলে রাইয়তকে অবশ্য তাহার রসিদ দিতে হইবে । রাইয়তের ইচ্ছামত তাহাকে মধ্যে মধ্যে হিসাব দেখাইতে ও লিখিয়া দিতে হইবে ।

৩। দেনার মকদ্দমা উপস্থিত হইলে আদালতে যাহাতে তাহার সুবিচার হয় তাহার উপায় বিধান করা ।

৪। ১৮৫৯ সালের পূর্বে দেনার জন্য যে তামাদি আইন প্রচলিত ছিল, বোম্বাই গবর্ণমেন্ট তাহা পুনঃ স্থাপন করিবার পরামর্শ দেন ।

দেনার জন্য গ্রেপ্তার ও কারাবাস উঠাইয়া দেওয়া ও স্থাবর সম্পত্তির উপর ডিক্রীজারী করিয়া তাহা নিলাম হইতে মুক্ত রাখা—এই দুই প্রস্তাব তাঁহাদের মনঃপূত হয় নাই ।

ইহার পর আবার এই বর্ষে বোম্বাই গবর্ণমেন্ট নিম্নলিখিত বিষয় সকল আইনে বিধিবদ্ধ করিবার প্রস্তাব করেন ।

প্রথমত (ক) যে কোন মকদ্দমা উপস্থিত হউক না কেন, প্রতিবাদী উপস্থিত থাকুক বা না থাকুক, কোর্ট তাহার সম্পূর্ণ বিচার করিতে বাধিত হইবে ।

(খ) যদি কোন ব্যক্তি কোর্টে আসিয়া পৈতৃক ঋণ শুধিবার ইচ্ছা প্রকাশ করে সে অন্য কথা, কিন্তু তাহা না হইলে কেহ পৈতৃক ঋণ পরিশোধ করিতে বাধ্য নয় ।

(গ) চক্রবৃদ্ধি স্বদ (Compound Interest) অগ্রাহ্য; আসল টাকার অধিক স্বদ কেহ এককালীন দিতে বাধ্য হইবে না ।

দ্বিতীয়ত (ক) কোন ঋণী উপস্থিত হইয়া ঋণ পরিশোধে অসামর্থ্য জানাইলেই সে তাহা হইতে মুক্তি লাভে সমর্থ হইবে, তাহাকে কোর্টে গ্রেপ্তার করিয়া আনিবার আবশ্যিক নাই ।

(খ) যে জমী দেনার জন্য বন্ধক রাখা না হয়, আর সেই বন্ধক খত আইন মত রেজিস্ট্রি করা না হয়, কোর্টের হুকুমে সে জমীর নিলাম হইবে না ।

প্রস্তাবিত আইনে যে সকল নিয়ম বিধিবদ্ধ হইবার কথা হইতেছে তাহা এই ;—

১। প্রতিবাদী গ্রেপ্তার না হইয়াও যদি কোর্টে আসিয়া ঋণ মুক্তির জন্য আবেদন করে, তবে তাহার অবস্থানুসারে তাহাকে দেউলিয়া স্থির করা কোর্টের ক্ষমতা থাকিবে ।

২। যে জমী দেনার জন্য বন্ধক রাখা হইয়াছে তাহা ব্যতীত অপর কোন জমী দেনার ডিক্রীতে নিলামের পাত্র নহে ।

৩। স্থাবর সম্পত্তির বন্ধক সম্বন্ধীয় চুক্তি লিপিবদ্ধ ও রেজিস্ট্রি করিতে হইবে ।

উপরি উক্ত আইন এইরূপে কেবল মহারাষ্ট্রের অন্তর্গত কয়েকটি তালুকে আবদ্ধ—ইহার ফলাফল দেখিয়া ভবিষ্যতে ইহা অন্যান্য স্থানে বিস্তারিত হইবে এইরূপ আশা করা যাইতে পারে ।

বোম্বাই রাইয়ত ।

পরিশিষ্ট ।

১২৮৫ সালের কয়েক সংখ্যক ভারতীতে প্রকাশিত ‘বোম্বাই রায়ত’ শিরক প্রবন্ধ পাঠকদের স্মরণ থাকিতে পারে,—তাহা প্রকাশিত হইবার অনতিকাল পরে কৃষিকষ্টনিবারণী নূতন বিধি* বোম্বাই প্রেসিডেন্সির দক্ষিণ বিভাগে পুণা, সাতারা, সোলাপুর প্রভৃতি স্থানে প্রবর্তিত হয় । ১৮৭৯ সালে এই আইন জারী হইয়া ১৮৮২ সালে ইহার তৃতীয় সংস্করণ হয় । কৃষিদের ঋণ মোচন—বিবিধ উপায়ে তাহাদের সংরক্ষণ ও শ্রীবৃদ্ধি সাধন এই আইনের উদ্দেশ্য । উল্লিখিত প্রবন্ধে রায়ত ও মহাজনের পরস্পর ব্যবহার সম্বন্ধে যে সকল নিয়ম পরিবর্তন অত্যাবশ্যক বলিয়া সূচিত হয় বিচার্য্য আইনে তাহার কতকগুলি নিয়ম সন্নিবেশিত দৃষ্ট হইবে । এই আইন সম্মত প্রধান প্রধান নিয়ম গুলি সংক্ষেপে নিম্নে প্রদর্শিত হইতেছে—

ঋণ সম্বন্ধীয় ছোট ছোট মকদমা নিষ্পত্তির জন্য গ্রামের পটেল কিম্বা অন্য যোগ্য ব্যক্তি গ্রাম্য মুন্সিফ রূপে নিযুক্ত হইতে পারে ।

গ্রাম্য রেজিষ্ট্রারের নিকট কৃষিদের দলিল দস্তাবেজ রেজিষ্ট্রি করা বিধেয় নতুবা তাহা আদালতে গ্রাহ্য হইবে না ।

* The Dekhan Agriculturist's Relief Act 1879.

Amended by Acts 23 of 1881 and 22 of 1882.

আমরা পঞ্চায়ত সূত্রে মকদ্দমা নিষ্পত্তির সূচনা করিয়াছি—
স্থল বিশেষে এই রূপ পঞ্চায়তে মকদ্দমা বিচারের ভার সমর্পণ
করিবার সম্পূর্ণ ক্ষমতা বিচারকের হস্তে অর্পিত এবং বাদী প্রতি-
বাদী ইচ্ছা করিলে তাহারা আপন আপন মধ্যস্থ নিয়োগে সক্ষম।

কিন্তু এই আইনের বিশেষ বিধান এই যে গবর্ণমেন্টকে
রায়ত মহাজনের মধ্যে কতকগুলি সন্ধিকর্তা (Conciliators) নিযুক্ত
করিতে হইবে। আদালতে মকদ্দমা উপস্থিত করিবার পূর্বে
অর্থীকে সন্ধিকর্তার নিকট যাইতে হইবে। তিনি রায়ত মহা-
জনের বিবাদ আপসে মিটাইয়া দিবার সাধ্যমত চেষ্টা করিবেন
ও তাহাতে কৃতকার্য না হইলে অর্থীকে আদালতে যাইবার
অনুমতি দিবেন, তাহার সার্টিফিকেট ভিন্ন কোন দাওয়া আজী
গ্রাহ্য হইবে না। এই পাঁচ বৎসরে যত দূর জানা গিয়াছে
তাহাতে এই সন্ধি-নিয়ম হিতাবহ বলিয়া অনুভূত হয়। অনেক
স্থলে সন্ধিকর্তার সুপরামর্শে অর্থী প্রত্যর্থী আপসে বিবাদ মিট
মাট করিয়া মকদ্দমার অর্থ নাশ মনস্তাপ হইতে নিষ্কৃতি লাভ
করে। ইহাতে আমাদের প্রাচীন পঞ্চায়ৎ প্রথার গুণস্পর্শ
কিয়দংশে উপলব্ধিত হয়।

রায়ত ঋণ শোধের টাকা মহাজনের কাছে আনিয়া দিলে
মহাজন তাহাকে স্বতন্ত্র রসিদ অথবা পাসবহি মধ্যে রসিদ
লিখিয়া দিতে ও প্রতিবর্ষে রায়তের হাতে তাহার দেনা পাও-
নার হিসাব দিতে বাধ্য।

আদালতে মকদ্দমা উপস্থিত হইলে বিচারকের কর্তব্য

প্রতিবাদীকে ডাকাইয়া আনিয়া তাহার জবানবন্দী লওয়া । দেনা পাওনার হিসাব সমস্ত আদ্যোপান্ত পরীক্ষা করিয়া ঋণের আসল টাকা নিরূপণ করা ও জজের বিচারে যাহা ন্যায্য সূদ তাহাই ধরিয়া হিসাব ঠিক করিয়া দেনা নির্ণয় করা কর্তব্য । সূদের উপর সূদ কিম্বা অতিরিক্ত অন্যায় সূদ চুক্তি সন্মত হইলেও ধরা হইবে না ।

ডিক্রী দিবার অথবা জারী করিবার সময় দেয় টাকা উচিত মত কিস্তীবন্দী করিয়া দেওয়া সকল সময়েই কোর্টের সাধ্যা-য়ত্ত ।

রায়তের ভূমি সম্পত্তি বন্ধক না থাকিলে দেনার জন্য তাহা বিক্রী হইবার নহে ।

দেনার ডিক্রীজারী জনিত কারাবাসের আদেশ নিষিদ্ধ । ডিক্রীজারীর দরুণ রায়ত গ্রেপ্তার না হইলেও, তাহার মাল-ক্রোকের হুকুম বাহির না হইলেও ৫০ টাকা ও ততোধিক ঋণে যে রায়ত ঋণগ্রস্ত সে ইচ্ছানুসারে ইন্সল্‌বেন্সির জন্য দরখাস্ত করিতে পারিবে ।

করার নির্দিষ্ট মেয়াদ ফুরাইবার পূর্বেও কোন বন্ধকদাতা কৃষক বন্ধক ছাড়াইবার মকদ্দমা আনিতে সক্ষম । বন্ধক-করার লিপিবদ্ধ হওয়া আবশ্যিক ।

ঋণাদায় সম্বন্ধীয় তামাদির মেয়াদ ৩ বৎসরের পরিবর্তে ৬ বৎসর কাল বিস্তৃত ।

এই আইনের গুণাগুণ বিষয়ে বিলক্ষণ মতভেদ দৃষ্ট হয় ।

এ আইন প্রবর্তিত হইয়া অবধি এ অঞ্চলের প্রজারা দুর্ভিক্ষ দুষ্কালের করাল গ্রাসে আজ পর্য্যন্ত পতিত হয় নাই, স্ততরাং ইহা পরীক্ষার কণ্ঠিপাথরে এখনো উত্তীর্ণ হইয়াছে বলা যায় না। এই বিধির চিরন্তন জনরুটি বিরুদ্ধ বিধান-সমূহ জন সাধারণের বাস্তবিক ইচ্ছা কি অনিচ্ছ জনক—ভবিষ্যতেই তাহা সম্যক্ অনুভূত হইবে। আপাতত দেখা যাইতেছে এই আইন মহাজনের পক্ষে যেমন কঠোর, রায়তের তেমনি লাভ জনক। ইহার প্রভাবে অনেকানেক ঘোর দুর্দশাপন্ন রায়ত ঋণমুক্ত ও নিজ নিজ পৈতৃক ভূমি সম্পত্তি মহাজনের গ্রাস হইতে পুনরুদ্ধারে সমর্থ হইয়াছে। অন্য দিকে মহাজনের পক্ষ দেখ। মহাজন রায়তের উপর ডিক্রী পাইলেও তাহার তাহাতে বিশেষ লাভ নাই কেন না সে ডিক্রীজারী করা সামান্য কষ্ট সাধ্য নহে। এক্ষণে জিজ্ঞাস্য এই, মহাজন সম্বন্ধে রায়তের কল্যাণ সাধনে যেমন গবর্ণমেন্ট তৎপর, তাঁহাদের নিজের বেলায়—নিজের স্বার্থের সঙ্গে যেখানে বিরোধ সেখানে কি তদ্রূপ মনোযোগী? গবর্ণমেন্টই এ প্রদেশের জমীদার।—রায়ত সরকারকেই মা বাপ বলিয়া জানে, সরকারের কৃপাদৃষ্টি ভিন্ন রায়তের দুর্দশা সম্পূর্ণ ঘুচিবার নহে। রায়তেরা কত দূর করভারে প্রপীড়িত, তাহাদের ধার কর্জের স্বেবিধার জন্য ব্যাঙ্ক খুলিবার প্রস্তাব কার্য্যে পরিণত করা কত দূর যুক্তিযুক্ত, রাজস্ব আদায়ের কঠোর নিয়ম সকল শিথিল করা কতদূর প্রার্থনীয়, ৩০ বৎসর অন্তর যে রাজস্ব পরিবর্তনের নিয়ম আছে তাহার পরিবর্তে অপেক্ষাকৃত স্থায়ী বন্দোবস্ত প্রবর্তিত

করা সুসঙ্গত কি না, * এই সকল বিষয় বিবেচনা পূর্বক গবর্ণমেন্ট যথাকর্তব্য বিধান করুন পরিশেষে এই আমাদের প্রার্থনা।

সিন্ধু কাহিনী।

প্রথম ভাগ।

সিন্ধুদেশের কি দুর্ভাগ্য! ভারতবর্ষের মোহাড়ায় তার অধিষ্ঠান সূতরাং আততায়ীদের প্রথম পাদক্ষেপ তাহার উপরে গিয়াই পড়ে। প্রাচীন কাল হইতে পূর্বাপর তাহার উপর দিয়া কত উৎপাত কত ধাক্কাই গিয়াছে। প্রথমে সেকন্দর সেকন্দর বাদসা } বাদসাহের সিন্ধু আক্রমণ দেখ। পারস্যাদি-
পতি দরায়ুসকে ধন প্রাণে বিনাশ করিয়া সেক-
ন্দর সা সৈন্য সামন্ত সমভিব্যাহারে আফগানিস্থানের মধ্য দিয়া
হিন্দুকুশ পর্বত উল্লঙ্ঘন ও খাইবরের দুর্গম পথ অতিক্রম পূর্বক
ভারতভিমুখে যাত্রা করিলেন, অবশেষে তাঁহার রণমত্ত সৈন্যগণ
সিন্ধুতীরস্থিত আটকে আসিয়া উত্তীর্ণ হইল। আটকের বাধা
না মানিয়া মাসিডন-বীর সিন্ধুপার হইয়া পঞ্জাবে প্রবেশ করি-

* নূতন জমাবন্দী বান্ধিবার সময় রায়তের স্বয়ত্ত্বসম্বৃত উন্নতির প্রতি লক্ষ্য করিয়া করবৃদ্ধি করা বিধেয় নহে এই সাধারণ নিয়ম কিন্তু কার্যতঃ অনেক সময় ইহার ব্যতিক্রম ঘটে, এই নিয়ম সংশোধিত হইয়া বোম্বায়ে এক নূতন আইন প্রবর্তিত হইয়াছে দেখিয়া আমরা সন্তুষ্ট হইলাম।

লেন । পঞ্জাবে তক্ষশীলের প্ররোচনায় বীরশ্রেষ্ঠ পুরুরাজের সহিত তাঁহার যে যুদ্ধ হয় তাহা প্রসিদ্ধই আছে, এস্থলে বর্ণন করিবার আবশ্যক নাই । আশ্চর্য্য এই যে, যে রণক্ষেত্রে গ্রীক ও হিন্দু এই দুই প্রতিদ্বন্দ্বী বীরদলের সম্মিলন হইয়াছিল সেই স্থলেই দুই সহস্রাধিক বৎসরান্তে ইংরাজ ও শিখদের মধ্যে ঘোরতর যুদ্ধ সংঘটন হয় । দুবারই পঞ্জাবীদের পরাজয় কিন্তু সে পরাজয়ে শত্রুরাও তাহাদের বীরত্বের প্রশংসা না করিয়া ক্ষান্ত থাকিতে পারে নাই । বন্দীকৃত পুরুরাজের সঙ্গে রাজার মত ব্যবহার করিয়া সেকন্দর তাঁহার সিংহাসন প্রত্যর্পণ করেন । বিজয়ী গ্রীকরাজ জয়স্থলে নগর দ্বয় পতন করিয়া চেনাব ও রাবী নদী পার হইলেন । এই সময়ে মগধ রাজের বিপুল কীৰ্ত্তি তাঁহার কর্ণগোচর হইল । ৬ লক্ষ পদাতিক ও সহস্র সহস্র অশ্ব গজারোহী সেনা যে রাজার সৈন্যবল তাঁহার রাজধানী পাটলীপুত্রে জয়স্তুম্ভ নিখাত করেন এই তাঁহার ইচ্ছা । তাঁহার লোভের অন্ত নাই, কিন্তু বিধাতা তাঁহার প্রতিকূল হইয়া দাঁড়াইলেন । প্রাংশুলভ্য ফলে উদ্বাহ বামনের আয় তাঁর দশা হইল । বেয়াস (বিপাশা) নদী পর্য্যন্ত পৌঁছিয়া তাঁহার শ্রান্ত ক্লান্ত সৈন্য দল কিছুতেই আর অগ্রসর হইতে চায় না । সম্রাট তাহাদের বশ করিতে কত চেষ্টা করিলেন, তাঁহার সকল সাধ্য সাধনা নিষ্ফল,—ভৎসনা গঞ্জনা কাকুতি মিনতি কিছুতেই কিছু হইল না, স্ততরাং ঐখানে রণে ভঙ্গ দিয়া তাঁহাকে অগত্যা ফিরিতে হইল ।

পুরুরাজের হস্তে সপ্তরাজ্য সমর্পণ করিয়া সেকন্দর তাঁর সৈন্য সামন্ত লইয়া স্বীলমে ফিরিয়া আসিলেন । তথায় রণতরী সজ্জিত হইল । অনন্তর তিনি সৈন্যদের দুই দলে বিভক্ত করিলেন । সেনাপতির অধীনে একদল পৃথক্ পাঠাইলেন আর আপনি একদল সৈন্য লইয়া পঞ্চাবের নদী বাহিয়া সিন্ধু নদী দিয়া সমুদ্রাভিমুখে চলিলেন । এই যাত্রার কতিপয় মাস সিন্ধুদেশে সেকন্দরের বীরদর্পে কম্পিত ও রাজ্যে বিপুল বিপ্লব সমুৎপন্ন হয় । সিন্ধু প্রবেশ পূর্ব্বে মালীদের যুদ্ধে হারাইয়া মুলতান অধিকার করেন এবং আরো দক্ষিণে পঞ্চ নদীর সঙ্গমে এক নগর পত্তন করিয়া যান ।

সেকন্দর বাদসার সিন্ধু আক্রমণের হিন্দু লেখ্য কিছুই নাই—যাহা কিছু পাওয়া যায় তাহা গ্রীক্ ভাষায় লিখিত । এই হেতু নাম লইয়া বড় গোল । গ্রীক্ ও চীন লেখকেরা এদেশের নামাবলির যেরূপ শ্রদ্ধা করিয়াছেন তাহা হইতে দেশের প্রকৃত নাম সকল উদ্ধার করা সহজ নহে । গ্রীক্ রাজ যেখানে যুদ্ধে জয়লাভ করেন সেখানে নগর দুর্গ প্রভৃতি কীর্ত্তি স্তম্ভ সকল স্থাপন করিয়া যান—গ্রীক্ ইতিহাসের এইরূপ বর্ণনা, কিন্তু এক্ষণে এদেশে সেই সকল কীর্ত্তিকলাপের কোন নাম গন্ধ নাই—কোথাও যদি তাহার চিহ্ন থাকে তাহা কেবলি অনুমান ও কল্পনা ।

পুরাকালে আলোর সিন্ধুদেশের রাজধানী ছিল কিন্তু গ্রীক্ গ্রন্থে এরূপ কোন নাম পাওয়া যায় না । “মৃষিকানুস্” নামক এক রাজার সমৃদ্ধিশালী রাজ্যের বর্ণনা আছে সম্ভবতঃ আলোর

তাঁহার রাজধানী । আর একটি প্রাচীন সহরের নাম ব্রাহ্মণাবাদ ।
 ব্রাহ্মণাবাদ } কনিংহাম সাহেব ইহা “মুঘিক” রাজ্যের অন্তর্গত
 বলিয়া অনুমান করেন । এককালে ইহা সধন সজন হিন্দু
 নগর বলিয়া প্রখ্যাত ছিল ।—ইহার অভ্যন্তরে বিরাজিত
 ১৪০০ বুরুজের এক প্রকাণ্ড দুর্গের চিহ্ন-সকল অদ্যাপি বিদ্য-
 মান । এই স্থান গ্রীক ইতিহাসে হর্শ্মতেলিয়া (ব্রাহ্মণ-স্থল)
 বলিয়া অভিহিত ও কথিত আছে । এখানে সেকন্দরের একজন
 সৈনিক বিষাক্ত তরবারাঘাতে আহত হন । আরব ইতিহাসেও
 ব্রাহ্মণাবাদের অনেক কথার উল্লেখ পাওয়া যায় ।

প্রোথিত নগর } সিন্ধু-হাইদ্রাবাদের কিয়ৎ ক্রোশ উত্তর পূর্বে
 } একটি প্রোথিত নগরের ভগ্ন স্তূপ আবিষ্কৃত
 হইয়াছে । আবিষ্কর্তা বেলানীস সাহেব স্থির করেন তাহাই
 পুরাতত্ত্বের চিরপরিচিত ব্রাহ্মণাবাদের ভগ্নাবশেষ, প্রবাদ এই যে
 এই নগর দুই রাজা দলুরায়ের পাপাচারে ভূমিকম্পে বিধ্বংস
 হয় । সিন্ধী ইতিহাসে তার বিবরণ এই :—

আলোর রাজধানী বিলুপ্ত হইলে পর দলুরায় ব্রাহ্মণাবাদে
 আসিয়া বাস করেন । ছোট্ট আমরাণী নামক তাঁহার এক
 ভ্রাতা মুসলমান ধর্মে দীক্ষিত হইয়া তাঁহার বিরাগভাজন হইয়া
 পড়েন । এই ছোট্ট সাহেব তীর্থ যাত্রায় বাহির হইয়া মক্কা
 হইতে একজন মুসলমানী বিবাহ করিয়া আনেন । ফাতিমা
 সিন্দুদেশে পদার্পণ করিয়া অবধি দলুরায়ের হস্তে অশেষ অপ-
 মান যন্ত্রণা ভোগ করিতে লাগিলেন । ছোট্ট এই সকল অত্যা-

চার সহ করিতে না পারিয়া স্ত্রীকে লইয়া দেশ ছাড়িয়া পলাইলেন । এমন সময় দৈববাণী উঠিল “ব্রাহ্মণপুরী যায় যায়—সাবধান !” তাহা শুনিয়া কেহ কেহ সতর্ক হইল । প্রথম রাত্রে একজন বুড়ী চরখা কাটিতে কাটিতে জাগিয়া চৌকী দিতে লাগিল তাহাতেই নগর রক্ষা পাইল । দ্বিতীয় রাত্রে একজন কলুর সতর্কতায় নগর রক্ষিত হইল । তৃতীয় দিন সন্ধ্যোগ পাইয়া পুরী একেবারে পাতালে প্রবেশ করিলেন—তাহার একটা মাত্র দুর্গ-স্তম্ভ দৃষ্টান্ত স্বরূপ অবশিষ্ট রহিল ।

বেলাসিস্ সাহেব এই ভগ্ন স্তূপ খনন ও বিস্তর অনুসন্ধানের পর স্থির করিয়াছেন যে নগরী ভূকম্পন প্রভৃতি প্রকৃতির কোন প্রবল উৎপাতে সহসা এইরূপ প্রলয় দশা প্রাপ্ত হইয়াছে । বেলাসিস্ সাহেবের খননে ভূমিকম্পই ব্রাহ্মণের প্রলয়ের কারণ বলিয়া সপ্রমাণ হয় । তিনি যে সকল নরকঙ্কাল দেখিতে পান তাহা প্রধানতঃ দ্বারমুখে—কতকগুলি ঘরের কোণে ;—যেন লোকেরা কেহ প্রাণ ভয়ে পলায়নোদ্যত—কেহ বা ভয়ে জড় সড় হইয়া এক কোণে বসিয়া মরণ প্রতীক্ষা করিতেছে । কথিত আছে এই ভগ্ন স্তূপে চরখায় উপবিষ্টা একটা স্ত্রীলোকের কঙ্কাল পাওয়া গিয়াছে যেন স্ত্রীলোকটা চরখা কাটিতে কাটিতে হঠাৎ চাপা পড়িয়া মৃত্যু মুখে পতিত । অগ্ন্যুৎপাতে এরূপ হয় নাই, কেন না কয়লা, দন্ধকার্ঠ প্রভৃতি এমন কোন পদার্থ পাওয়া যায় নাই যাহাতে আগ্নেয় উপদ্রব সূচিত হয় । প্রাচীরে দহনের কোন চিহ্ন নাই ।

এই সকল ভগ্নরাশির মধ্যে কত ভাল ভাল খোদিত প্রস্তর, মাটির ও কাচের বাসন, গজদন্ত, পিতল ও কাচের আভরণ, রৌপ্য ও তাম্রমুদ্রা—ধান্যের জালা—সতরঞ্চি ও পাশা খেলার সামগ্রী—অশ্ব গো উষ্ট্র কুকুর কুকুট মানব অস্থি সকল আবিষ্কৃত হইয়াছে। অস্থি সকল জীর্ণ দশা প্রাপ্ত, অতি প্রাচীন বলিয়া প্রতীয়মান হয়।

এই সমস্ত দৃষ্টে ব্রাহ্মণাবাদ এককালে ধনধান্যপূর্ণ জনাকীর্ণ বিস্তীর্ণ নগর ছিল তাহা নিঃসন্দেহ প্রমাণ হয়। বেলাসিস্ সাহেব এই স্থানের এইরূপ বর্ণনা করিয়াছেন “এই সমস্ত ভগ্ন রাশির মধ্যে অনেকগুলি খোলা জায়গা বা চৌক দৃষ্ট হইল—সে সকল হয়ত পুরাণ নগরের হাট বাজার, ক্রয় বিক্রয়ের স্থান। ইহাদের কোন কোনটা দীর্ঘায়তন—কেল্লার ভিতর দিয়া গিয়াছে। কল্লনা একটুকু ছাড়িয়া দেও, দেখিতে পাইবে এইখানে সৈন্যদের বারাক, এই খোলা ময়দানে তাহাদের প্যারেড হইত। এই পোদ্দারের টাকা কড়ি বিনিময়ের দোকান। এই নগরের প্রবেশ দ্বার, যেখানে মালের উপর কর আদায় হইত। আবার সহজে মনে করিতে পারা যায় এই প্রাচীরের পার্শ্ব দিয়া পুণ্যবতী সিন্দুনদী মহাত্মাতে কল কল রবে বহিয়া যাইতেছে—নানাজাতীয় তরণী তাহার বক্ষের উপর এখনকার মত শোভা পাইতেছে—ধীবরেরা পল্লামৎস্য ধরিতে কলসীর উপর ভর দিয়া ভাসিয়া চলিয়াছে। এখন মনে কর এই নদী তীরে, এই প্রাচীরতলে বাণিজ্য ব্যবসার প্রকাণ্ড

কারখানা—এইখানে কত মাল বোঝাই-নৌকা নোঙড় করিয়া আছে—এই স্থলে নানান বাণিজ্য সামগ্রী বস্তায় বস্তায় বিক্রয়ার্থ রাশীকৃত ও যেমন এখন দেখা যায়—শ্রীমন্ত হিন্দু সওদাগর-গণ ক্রয় বিক্রয়ের হট্টগোলে ব্যাপ্ত ।”

হায়, এই শ্রীমন্ত্ৰি সম্পন্ন জীবন্ত নগর এক্ষণে মৃত্যুপাশে চির নিদ্রিত । ইহার প্রবল কেব্লা দুর্গ ভূমিসাৎ হইয়াছে । সবে একটি মাত্র বুরুজ স্মরণ চিহ্ন স্বরূপ অবশিষ্ট । ইহার প্রাসাদ অট্টালিকা গৃহাবলী ইষ্টক ধূলি ও বালুরাশিতে পরিণত, “পেচক ও বাছড়, শৃগাল ও শাদ্দুলের আবাস স্থান ।” নদী তীরে এককালে যে সকল সুরম্য সুন্দর উদ্যান কানন নগরের শোভা সম্পাদন করিত তাহা কণ্টকাকৃত বন জঙ্গলে অদৃশ্য হইয়া গিয়াছে । সে স্রোতস্বতী আর নাই তাহার প্রবাহ অন্যত্রে বিবর্ত হইয়া গিয়াছে, চতুর্দিক শুষ্ক নীরস মরুভূমি । *

দ্বিতীয় ভাগ ।

এবার মুসলমানদের সিন্ধু-আক্রমণ পালা । সেকন্দর বাদসা চলিয়া যাইবার পর সিন্ধুদেশ অনেক কাল পর্য্যন্ত হিন্দুরাজাদের অধীন ছিল, মুসলমান ইতিহাস লেখকেরা বলেন রাজপুত বংশীয় পঞ্চরাহী সিন্ধুদেশে ১৪০ বৎসর রাজত্ব করেন । আলোর

* Cunningham's ancient Geography of india (westetn India.
The Buried city of Brahmanabad By H. M. Birdwood (Bombay C. S.)

তাঁহাদের রাজধানী ও তাঁহাদের রাজত্ব কালে প্রজা সকল সুখ স্বচ্ছন্দে দিনপাত করিত । খৃষ্টাব্দের সপ্তম শতাব্দীতে রাহী সাহসীর মৃত্যু হয় । তাঁহার কোন পুত্র সন্ততি ছিল না । রাজ্যের এক ব্রাহ্মণ উপপতি ছিল তাহার নাম কচ্ছ* । কথিত আছে যে ন্যায়্য উত্তরাধিকারীগণকে সবংশে ধ্বংস করিয়া রাণী স্বীয় প্রণয়ী কচ্ছের হস্তে রাজ্যভার সমর্পণ করেন । অবশিষ্ট রাজপুত বলীদিগকে ছলে বলে কৌশলে পরাজয় করিয়া কচ্ছ রাজা রাজা ডাহীর } অন্তায়লক সিংহাসনে স্থস্থির হইয়া বসিলেন । এই কচ্ছ রাজা ৪০ বৎসর রাজত্ব করেন । তাঁহার মৃত্যুর পর তাঁহার পুত্র ডাহীর সিংহাসনে অধিরূঢ় হইলেন । †

ডাহীরের রাজত্বকালে সিন্দুদেশ ধর্ম্মান্ন যবনদল কর্তৃক আশ্রিত হয় । আরবেরা প্রাচীন কাল হইতে ভারতবর্ষে বাণিজ্য করিতে আসিত । তাহাদের একটি জাহাজ দেওয়াল ‡ বন্দরে ধৃত হওয়াতে রাজা ডাহীরের নিকট তাহা প্রত্যর্পণের জন্য আবেদন করা হয় । রাজা সে আবেদন অগ্রাহ করেন—এই সামান্য কারণে যুদ্ধের সূত্রপাত ।

মহম্মদ কাশিম } ৭১১ খৃষ্টাব্দে কালিফ ওয়ালিদের রাজত্ব কালে
মহম্মদ কাশিম (২০ বৎসরের বালক বৈ নয়) এক
দল সৈন্য লইয়া দেওয়াল বন্দরে উপনীত হন । প্রথমে একটি

* অথবা চ্ছ;—নাম ঠিক করা সহজ না—ইংরাজীতে Chah—

† Burton's Sindh.

‡ Elphinstone বলেন দেওয়াল করাছীর নিকটবর্তী কোন বন্দর ছিল ।

মন্দিরের উপর তাঁর যত আক্রোশ । ইহা বন্দরের প্রান্তবর্তী প্রস্তর প্রাচীর বেষ্টিত একটি বিখ্যাত হিন্দু দেবালয়—অন্তরে ব্রাহ্মণ বসতি ও রাজপুত সৈন্য কর্তৃক সুরক্ষিত । মন্দিরের একটি স্তম্ভের উপর এক নিশান উড়িতেছিল । কাশিম তাহার প্রতি বাণপ্রয়োগ করিয়া ধরাশায়ী করিলেন । পতাকা পতনের সঙ্গে সঙ্গে সৈনিকদিগের এমনি ভয়ের সঞ্চার হইল যে তাঁহাদেরও যবন হস্তে পতনের আর বিলম্ব রহিল না । মন্দির অধিকার করিয়া ব্রাহ্মণদের বলপূর্ব্বক মুসলমান করা এই কাশিমের প্রথম কাজ । তাহাদের অসম্মতি দেখিয়া কাশিম এমনি ক্রুদ্ধ হইলেন যে বয়স্ক পুরুষদের সমূলে নিপাত, বালক ও স্ত্রীলোকদের দাসত্ব শৃঙ্খলে বন্ধনের আদেশ জারী হইল ।

মন্দির পতনের পর বন্দর শীঘ্রই যবনদের হস্তগত হইল ও তদনন্তর কাশিম নিরংকোট (এক্ষণকার হাইদ্রাবাদ) দেওয়াল প্রভৃতি প্রধান প্রধান স্থান অধিকার করিয়া লইলেন ।

এপর্যন্ত কাশিমের ভাগ্য সুপ্রসন্ন—অনন্তর ডাহিরের রাজধানী আলোরের নিকট এক মহা যুদ্ধ হয় । রাজা স্বয়ং ৫০ সহস্র সৈন্য সমভিব্যাহারে তাঁহার রাজধানী সংরক্ষণার্থে অগ্রসর হইলেন । কাশিম পারস্য হইতে নবাগত ২০০০ অশ্বরোহী ও পূর্ব্বকার অবশিষ্ট বল লইয়া হিন্দু সেনার আক্রমণ প্রতীক্ষা করিয়া রহিলেন । রাজা যে গজপৃষ্ঠে আরুঢ় ছিলেন দৈবঘটনায় এক অগ্নিগোলা তাহার উপর পড়িয়া ছলছুল বাধাইয়া দিল, অবাধ্য হস্তী রণভূমি হইতে রাজাকে লইয়া পলায়ন করিল ।

এই ঘটনায় যুদ্ধের পরিণাম সূচিত হইল । রাজা অশ্বারূঢ় হইয়া বাণ জর্জরিত দেহে বীরের ন্যায় যুদ্ধ করিতে লাগিলেন কিন্তু তাহার কোন ফল হইল না, রণোন্মত্ত আরব সৈন্য-মাঝে ক্ষত বিক্ষত হইয়া কাল কবলে পতিত হইলেন ।

বীরঙ্গনা } এই শঙ্কটের সময় রাজ্যীর অসাধারণ সাহস ও
রাজমহিষী } বীরত্বের পরিচয় পাওয়া যায় । বিক্ষিপ্ত সেনা-
দল একত্রিত করিয়া সেই বীরঙ্গনা ব্রাহ্মণবাদ রক্ষার একবার শেষ চেষ্টা দেখেন, যতক্ষণ পারিলেন শত্রু আক্রমণ প্রতিরোধ করিলেন, পরিশেষে অস্বাভাবে সৈন্যদের মধ্যে হাহাকার পড়িয়া গেল । আর তাহারা তিষ্ঠিতে পারে না । পরে তাহারা রাজপুত বীরোচিত ‘জোহর’ ব্রতে ব্রতী হইয়া স্ত্রী পুত্রদিগকে জ্বলন্ত চিতানলে আহুতি প্রদান করিল—পুরুষেরা নগর দ্বার খুলিয়া তরবার হস্তে অরিদলে প্রবিষ্ট হইয়া প্রাণত্যাগ করিল । ইহার পর ডাহীরের রাজ্য মুসলমানদের চরণতলে ন্যস্ত হইল । মূল-
তানে যবন জয়পতাকা উড্ডীন হইল ।

ক্রমে হিন্দু ও আরবদের মধ্যে একটা বোঝা পড়ার সূত্র-
পাত হইল । হিন্দু শ্রেষ্ঠীরা যবনকে কর দিতে স্বীকৃত হইলেন কিন্তু এই সম্বন্ধে এক প্রশ্ন উত্থাপিত হইল । হিন্দু দেবালয় উচ্ছন্ন—পূজার্চনা বন্ধ হইয়া পৌত্তলিকতার উচ্ছেদ সাধন হই-
য়াছে—ব্রাহ্মণদের দেবত্র ব্রহ্মত্র ভূমি সম্পত্তি কাড়িয়া লওয়া হইয়াছে—করদ রাজ্যে কি এই সকল নষ্টাধিকার প্রত্যর্পণ করা যাইতে পারে ? তাহা হইলে কি পৌত্তলিকতার প্রশ্রয় দেওয়া

হয় না ? কাশিমের মনে এবিষয়ে সন্দেহ উপস্থিত হওয়াতে তিনি তাঁহার প্রভুর সম্মিথানে জিজ্ঞাসা করিয়া পাঠান । সেখান হইতে হিন্দুদের প্রীতিজনক উত্তর পাওয়া গেল । তাহা এই যে, যে সকল হিন্দু করদানে প্রতিশ্রুত তাহারা করদ রাজ্যের প্রজার ন্যায় সমস্ত অধিকার পাইবার যোগ্য । তাহারা দেবা-
লয় পুনঃ স্থাপন করিয়া পূজার্চনা করুক তাহাতে কোন আপত্তি নাই, অপহৃত ভূমি সম্পত্তি ব্রাহ্মণদিগকে প্রত্যর্পণ করা হউক—
হিন্দু রাজার আগলে তাহাদের বাহা ন্যায্য পাওনা তাহা হইতে তাহারদিগকে বঞ্চিত করা বিধেয় নহে ।

কাশিম জয়লাভে স্ফীত হইয়া হিন্দুস্থান আক্রমণের উদ্যোগ করিতেছেন এমন সময় হঠাৎ তাঁহার ভাগ্য ফিরিল । ডাহি-
রের পরাজয় ও পতনের পর তাঁহার পরমাত্মন্দরী কন্যাদ্বয় যবন-
দের হস্তে পতিত হয় । কাশিম রাজকুমারীদিগকে দমাস্কসের
রাজকুমারী } কালিফের নিকট উপহার স্বরূপ প্রেরণ করিলেন ।
} কালিফের সম্মুখে আনীত হইলে জ্যেষ্ঠা যিনি
তিনি অশ্রুপূর্ণ নয়নে নিবেদন করিলেন “আমি মহারাজের
যোগ্য নই—কাশিম আমাকে বিদায় করিবার পূর্বে আমার
প্রতি ব্যভিচার করিয়াছে ।” কালিফ রাজকুমারীর রূপলাবণ্যে
মুগ্ধ হইয়া ভৃত্যের প্রতি রোমানলে প্রজ্জ্বলিত হইলেন । রাগের
মাথায় আদেশ দিয়া পাঠাইলেন “কাশিমকে কাঁচা-চন্দ্র-খলিতে
পুরিয়া মুখ সেলাই করিয়া এখনি আমার সম্মুখে হাজির কর ।”
কালিফের আদেশ সম্পন্ন হইলে পর রাজকুমারীকে ডাকিয়া

আনিয়া কাশিমের মৃত দেহ দেখাইলেন। রাজকুমারী আহ্লাদে উৎফুল্ল হইয়া বলিয়া উঠিলেন “মহারাজ! কাশিম বাস্তবিক নিরপরাধী—আমার পিতার মৃত্যু ও কুল কলঙ্কের এই প্রতি-
শোধ!” *

তৃতীয় ভাগ।

কাশিমের সিন্ধু আক্রমণ হইতে ইংরাজ রাজ্য সংস্থাপন পর্য্যন্ত সিন্ধু দেশে অনেক রাষ্ট্র বিপ্লব অনেকানেক রাজ বংশের উত্থান পতন সংসাধিত হইয়াছে। অষ্টম শতাব্দী হইতে এ ইতিহাস } পর্য্যন্ত যত শতাব্দী গত হইয়াছে প্রায় ততগুলি রাজ বংশ সিন্ধু রাজ্যে অবতীর্ণ। ৮৭১ খৃষ্টাব্দের পর ঐ দেশ মূলতান ও মনসুরা এই দুই মুসলমান রাজ্যে বিভক্ত হয়। মূলতান উত্তর হইতে আলোর পর্য্যন্ত বিস্তৃত। মনসুরা সিন্ধু বিজয়ের অনতিকাল পরে ব্রাহ্মণ্যবাদের নাম ধাম অধিকার করিয়া সমুখিত হয়, আলোর হইতে দক্ষিণ সাগর পর্য্যন্ত তাহার সীমা। কালিফ-প্রতিনিধিগণ প্রায় ৩০০ বৎসর সিন্ধুদেশ শাসন করেন তদনন্তর যবনাধিপত্য ক্ষণকালের জন্য অন্তমিত হইয়া যায়। তৎপরিবর্তে স্তমরা ও সন্ম্বা রাজপুতগণ কয়েক শত বৎসর উত্তরোত্তর রাজ্য করেন তন্মধ্যে সন্ম্বা বংশীয় রাজগণ অনেকে মুসলমান ধর্ম্মাক্রান্ত। সত্ৰাট আকবরের সময় সিন্ধু-

দেশ মোগল রাজ্যভুক্ত হয় । ১৭৪০ অব্দে পারস্যরাজ নাদর সা হিন্দুস্থান আক্রমণান্তর সিন্ধু নদীর পশ্চিমের কতক প্রদেশ দিল্লী সম্রাটের প্রসাদে আত্মসাৎ করেন । ইহার কতিপয় বৎসর পরে মহারাষ্ট্র বিজেতা আহমদ খাঁ দুরাণী সিন্ধুদেশে স্থায়ী আধিপত্য স্থাপন করেন । তাঁহার সময় হইতে কতক কাল আফগান আমীরদের নাম সিন্ধু ইতিহাসে মিশ্রিত দেখা যায় । কিন্তু তাঁহাদের অধিকার নাম মাত্র । যিনি যখন পারিতেন কর আদায় করিয়াই সন্তুষ্ট থাকিতেন । সেও অধিক কালের জন্য নয়—ব্রিটিস ধুমকেতু অকস্মাৎ উদয় হইয়া সকলি উলট পালট করিয়া দিল ।

কাল্‌হোরা } ইংরাজ শাসন আরম্ভ হইবার পূর্বে যে দুই রাজবংশ সিংহাসন অধিকার করেন তাহা কাল্‌হোরা ও তালপুর । অষ্টাদশ শতাব্দীর প্রারম্ভে কাল্‌হোরা রাজবংশের পতন ও প্রায় অশীতি বৎসর ঐ বংশের রাজত্ব কাল । ঐ বংশীয় রাজা গোলাম সা রাজ্যের ত্রীবৃদ্ধি সাধন ও স্বশাসনে খ্যাতিলাভ করিয়াছিলেন । তাঁহার আমলে (১৭৬৫) হাইদ্রাবাদ দুর্গ প্রতিষ্ঠা হয় । তার ছয় বৎসর পরেই তাঁহার মৃত্যু । লোকের বিশ্বাস এই যে গোলাম সা তাঁহার প্রাসাদ নির্মাণ কালে এক ফকীরের কুটীর ভূমিসাৎ করিতে আদেশ করেন সেই ফকীরের অভিশাপে তাঁহার অকাল মৃত্যু হয় । আবদুল নবী কাল্‌হোরা বংশের শেষ রাজা—বলোচ বিদ্রোহে তাঁহার রাজ্য বিনষ্ট হয় ।

তালপুর } ১৭৮০ কিম্বা তার দুই তিন বৎসর পরে তালপুর

বংশীয় বলোচ আমীরগণ কাল্‌হোরাদিগকে রাজ্যভ্রষ্ট করিয়া সিংহাসনে আরুঢ় হন । ইংরাজদের দেশাধিকার কালে এই আমীরদের আধিপত্য ছিল । তালপুর বংশের মূলপুরুষ ফতে-আলি খাঁ, তিনি বংশের গৌরব বর্দ্ধন ও কলহ বিদ্রোহ নিবারণ-মানসে স্বীয় ভ্রাতৃগণ সাথে একত্রে রাজ্য শাসনের সূত্রপাত করেন । তাঁহারা চার ভাইয়ে মিলিয়া একমতে একচিহ্নে এমনি স্মৃতিচিহ্ন পূর্বক কার্য্য করিতেন যে ‘চার ইয়ার’ বলিয়া তাঁহাদের নাম রাষ্ট্র । ক্রমে তালপুর বংশের স্বতন্ত্র তিন শাখার সৃষ্টি হইল—হাইদ্রাবাদ, মীরপুর, খয়েরপুর তিন আমীরের তিন রাজ্য বিভাগ । নিয়ম এই যে আমীরেরা মিলিয়া জুলিয়া রাজকার্য্য করিবেন কিন্তু তাঁহাদের মধ্যে যিনি বড়, তিনি কর্তা—তাঁহার পদবী ‘রাইস্’—রাইসের মান মর্যাদাও বিশিষ্ট রূপ ।

আসিয়ার শান্তি } আফগান যুদ্ধাবসানের পর লর্ড এলেনবরো (Lord Ellenborough) সিংলা হইতে আজ্ঞাপত্র প্রচার করিলেন যে ভারতীয় গবর্ণমেন্ট প্রকৃতি-নির্দিষ্ট রাজ্য সীমায় সন্তুষ্ট থাকিয়া এইক্ষণ অবধি শান্তি স্থাপন ও রাজ্যরক্ষণে একান্ত যত্নবান্ হইবেন । এই অভিপ্রায়ে “আসিয়ার শান্তি” চিহ্নিত এক মেডাল বাহির হইল । কিন্তু ফলে ইহার বিপরীত ঘটনা ঘটিল । ইহার ছয় মাসের মধ্যেই সিন্ধুদেশ ব্রিটিশ রাজ্য ভুক্ত বলিয়া দ্বিতীয় ঘোষণাপত্র জারী হইল । পূর্বোন্নিখিত প্রকারে সিন্ধুদেশ তখন তিন রাজ্যে বিভক্ত—উত্তর, দক্ষিণ ও মধ্য সিন্ধু—

প্রত্যেক রাজ্যের এক এক জন আমীর অধিস্বামী । ১৮৩৯
 অর্ধে ব্রিটিশ গবর্ণমেন্ট ও আমীরদের মধ্যে এক সন্ধি বন্ধন হয়
 ১৮৩৯ অব্দের } তাহা হইতেই দেশের ভাবি দুর্গতির সূত্রপাত ।
 সন্ধি
 এই সন্ধি সূত্রে ইংরাজেরা সিন্ধুদেশে প্রবেশ লাভ করেন । এই
 সন্ধি যদিও আমীরদের মনঃপূত হয় নাই কিন্তু কি করেন দায়ে
 পড়িয়া ব্রিটিশ যুগে গ্রীবা অবনত করিতে হইল । আফগান
 যুদ্ধের তিন বৎসর আমীরদের আচরণে দোষ ধরিবার কিছুই
 ছিল না । দেশের মধ্য হইতে ব্রিটিশ সৈন্য চলাচলের পথ
 উন্মুক্ত রাখা—জাহাজে খোরাক যোগান' কিছুতেই তাঁহাদের
 কোন ক্রটি হয় নাই । কাবুল সৈন্য ছারখার হইবার পরেও
 তাঁহারা বাহন খোরাক প্রভৃতি যোগাইতে সাধ্যমত ক্রটি করেন
 নাই । General Nott — জেনেরেল নট কাবুল প্রয়াণ কালে
 সিন্ধু হইতে তিন সহস্র উটের সাহায্য লাভ করেন । ইহা
 সত্ত্বেও কোন কোন আমীর ইংরাজদের পরাজয় দেখিয়া
 দাঁত দেখাইতে সাহস করিয়াছিলেন এই এক ছুতা ধরিয়া তখন-
 কার এজেন্ট Major Outram আমীরদের বিরুদ্ধে অভিযোগ উপ-
 স্থিত করিয়া সন্ধিপত্রের পরিবর্তন প্রার্থনা করেন । লর্ড এলেন-
 বরো আদেশ করিলেন ব্রিটিশরাজের বিপত্তির চিহ্ন দৃষ্টে যদি
 কোন আমীর তাহার বিরুদ্ধে ষড়যন্ত্র করিয়া থাকে তাহার
 যথোচিত শাস্তি দেওয়া হয় ।

Sir Charles
 Napier

} ৯ই সেপ্টেম্বর ১৮৪২ এ সর্ চার্লস্ নেপিয়র
 } সর্বেসর্ব্বা হর্ত্তাকর্ত্তা বিধাতা হইয়া সিন্ধুদেশে

প্রেরিত হন। রাজদ্রোহ অভিযোগ বিচারের ভার তাঁহার হস্তে ও তাঁহার প্রতি আদেশ এই যে দোষের স্পষ্ট প্রমাণ ব্যতীত আমীরদের অধিকারে হস্তক্ষেপ না করা হয়। সে যাহা হউক তিনি বিচারে তাহারদিগকে দোষী সাব্যস্ত করিলেন ও বলিলেন ১৮৩৯ এর সন্ধি অনুসারে কার্য্য করা হয় নাই। আমীরগণ সন্ধিভঙ্গ অপরাধে অপরাধী।

Major } পূর্ব্বকার সন্ধিপত্রের পরিবর্তে এক নূতন সন্ধি-
Outram } লেখ্য প্রস্তুত হইবার কথা। মেজর আউট্রাম

তাহার এক নমুনা তৈয়ার করিয়া লর্ড এলেনবরোর কাছে পাঠান। তাহা গবর্ণর জেনেরেলের নিকট হইতে ১২ই নবেম্বরে নেপিয়রের হস্তে আসে। তখন আউট্রাম দেখিতে পাইলেন তাহা ঠিক হয় নাই—তাহার কতকগুলি কঠোর অনুশাসন সংশোধন করা আবশ্যিক নতুবা বেচারী আমীরদের প্রতি ভয়ানক অত্যাচার করা হয়। তিনি এই বিষয়ে নেপিয়র সাহেবের নিকট স্থায়ী অভিপ্রায় ব্যক্ত করিয়া গবর্ণর জেনেরেলের অনুমতি প্রার্থনার জন্য অনুরোধ করিলেন। সেনাপতি এই নমুনা পত্র প্রায় দেড়মাস কাল আপনার কাছে রাখিয়া দেন ও পরিশেষে যখন ভ্রম সংশোধনের অনুজ্ঞা আইসে তখন যতদূর অনিষ্ট হইবার হইয়া গিয়াছে, তাহার আর কোন ফল হইল না। সন্ধিপত্রে আমীরদের নিকট হইতে যে সকল ভূমি সম্পত্তি কাড়িয়া লইবার কথা ছিল, সন্ধি সাক্ষরিত হইবার পূর্ব্বে সে সকল কবলীকৃত হইল—আর বিলম্ব সহিল না। ওদিকে যে

বলোচ সরদারগণ ঐ ভূমি সম্পত্তির অধিকারী তাহাদের মধ্যে
অন্যভাবে হাহাকার পড়িয়া গেল।

গৃহ-বিচ্ছেদ। } এই সকল দুর্ঘটনার মূল আর্মীরদের গৃহ-
বিচ্ছেদ। আর্মীরদের রাইস তখন ৮৫ বৎ-

সরের বৃদ্ধ মীর রোস্তম। রাজা প্রজা সকলেই তাঁহাকে ভক্তি
করিত। তাঁহার কনিষ্ঠ আলি-মোরাদ ইংরাজদের আগমনে নিজ
কাজ গোছাইবার অবসর পাইলেন ও স্বার্থ সাধন মানসে ব্রিটিশ
সেনাপতির তোষামোদ আরম্ভ করিলেন। সেনাপতিকে মীর
রোস্তমের বিরুদ্ধে চটাইবার মতলব, আর চেষ্টা এই যে
রোস্তম কোন বিদ্রোহের কাজে ধরা পড়েন। আলি-মোরাদের
প্ররোচনায় সেনাপতি মীর রোস্তমকে কটুকাটব্য পূর্ণ পত্র প্রেরণ
করেন ও যখন মীর নেপিয়রের সহিত সাক্ষাৎ করিবার ইচ্ছা
প্রকাশ করিলেন তখন তাহা অগ্রাহ্য হইল। ইত্যবসরে আলি-
মোরাদ তাঁহার ভ্রাতার স্বাক্ষরিত এক পত্র সেনাপতির নিকট
প্রেরণ করেন, তাহাতে জানান হয় যেন রোস্তম ইচ্ছা পূর্বক
তাঁহার পাগ্‌ড়ী পরিত্যাগ করিয়া তাঁহার সৈন্যসামন্ত দেশ
ভূর্গ সকলি সেনাপতির হস্তে সমর্পণ করিতে উদ্যত। নেপি-
য়র বলিয়া পাঠাইলেন মীর রোস্তমের সহিত সাক্ষাৎ করিয়া
অবশেষে যথা কর্তব্য বিধান করিবেন। এরূপ হইলে আলি-
মোরাদের সব জুয়াচ্চুরি ধরা পড়ে,—এই সাক্ষাৎকার নিবারণ
অভিপ্রায়ে তিনি মধ্যরাত্রে তাঁহার ভ্রাতাকে উঠাইয়া বলিলেন
“এই বেলা পালাও নহিলে জেনেরেল সাহেব সকালে গ্রেফতার

করিতে আসিবেন ।” বুদ্ধ মীর শশব্যস্ত হইয়া অরণ্যে পলায়ন
 মীর রোস্তমের } করেন । অমনি নেপিয়র ঘোষণা করিয়া দিলেন
 পলায়ন । } যে মীর রোস্তম ব্রিটিসরাজের অপমান করিয়া-

ছেন । আলি-মোরাদকে তাঁহার পদে প্রতিষ্ঠিত করা হইল ।
 মীর রোস্তমের ঘোর বিপদ উপস্থিত । তিনি নেপিয়রের নিকট
 তাড়াতাড়ি আপন মন্ত্রীকে এই বলিয়া পাঠান যে আলি-মোরাদ
 তাঁহাকে কয়েদ ও জোর জবরদস্তী করিয়া পত্র স্বাক্ষর করিয়া
 লন—তাঁহারি প্ররোচনায় তিনি পলায়ন করিয়াছেন । নেপিয়র
 ইহার এক তীব্র ভৎসনাপূর্ণ উত্তর প্রেরণ করেন, এবং অরণ্যে
 গিয়াও ব্রিটিস হস্ত এড়াইবার উপায় নাই ইহা জানাইয়া দিবার
 জন্য একদল সৈন্য পলাতক মীরের পশ্চাৎ ইমামগড়ের কেল্লার
 উপর হুলা করিতে পাঠান । ইমামগড়ের কেল্লা নেপিয়রের

ইমামগড় আক্রমণ } মতে সিন্ধুর Gibraltar । তাহা দখল করিতে
 পারিলে ব্রিটিস গৌরবের সীমা থাকিবে না
 এই ভাবিয়া তিনি দুর্গ আক্রমণ করিয়া বারুদে উড়াইয়া দিয়া
 ফিরিয়া আসেন । এই সাহসের কার্যের জন্য Duke of Wellington
 পর্য্যন্ত নেপিয়রের যুদ্ধ কৌশল প্রশংসা করিয়াছেন কিন্তু মীর
 মহম্মদ যিনি দুর্গের অধিপতি তিনি যখন ব্রিটিস গবর্নমেন্টের
 প্রতি কোন অপরাধ করেন নাই তখন তাঁহার উপর এ অত্যাচার
 আমাদের সহজ বুদ্ধিতে প্রশংসার যোগ্য বলিয়া প্রতিভাত
 হয় না ।

মীর রোস্তমকে রাজ্যচ্যুত ও আমীরদের ভূমি সম্পত্তি হস্ত-

গত করিয়া সন্ধি স্বাক্ষর উদ্দেশে ব্রিটিস সেনাপতি আমীরদিগকে খয়েরপুরে মিলিত হইতে আদেশ করিলেন । তাঁহাদের মধ্যে কেহ কেহ ঐ আদেশ মতে উপস্থিত না হওয়াতে হাইদ্রাবাদ সমিতির স্থান নির্দিষ্ট হইল । তাহার দুদিন পরেই দক্ষিণ সিন্ধুর আমীরদের উকীলেরা সেনাপতি-সন্নিধানে উপস্থিত হইয়া সন্ধিস্বীকার করিবার ইচ্ছা জানাইল । তাহাদের আবেদন গ্রাহ্য করিলে সমস্ত গোল মিটিয়া যায় কিন্তু নেপিয়র বলিলেন তা হইবে না—হাইদ্রাবাদে ফিরিয়া যাও । পরস্পর বিরোধী দুই দলের একত্র সম্মিলনে যে গোলযোগ বাধিবার আশঙ্কা তাহাই ফলে দাঁড়াইল ।

হাইদ্রাবাদ } হাইদ্রাবাদ সমিতিতে আমীরগণ সম্মিলিত !
সমিতি } তাঁহারা আপনাদিগকে নিরপরাধী বলিয়া

উচ্চৈঃস্বরে আৰ্ত্তনাদ করিতে লাগিলেন—যে সকল পত্রে তাঁহাদের দোষ সপ্রমাণ বলিয়া ধার্য্য হয় তাহা দেখিতে চাহিলেন । ১২ই ফেব্রুয়ারি তাঁহারা নব সন্ধিপত্র স্বাক্ষর করিলেন কিন্তু মেজর আউট্রামকে স্পষ্ট বলিলেন যে ব্রিটিসদের আচরণে, বিশেষত মীর রোস্তুমের প্রতি তাহাদের অত্যাচারে, বলোচ সৈন্য ফেপিয়া উঠিয়াছে ; তাহারা যদি হঠাৎ কোন বিদ্রোহাচরণ করে তজ্জন্য তাঁহারা দায়ী নন । এই অবসরে সেনাপতি নেপিয়র স্বীয় সৈন্য সামন্ত লইয়া অগ্রসর হইতেছেন তাহাতে আরো গোল বাধিবার উপক্রম হইল । সন্ধি স্বাক্ষরের পর আউট্রাম যখন কেলা হইতে বাহির হইলেন তখন লোকেরা তাঁহাকে

ঘিরিয়া দাঁড়াইয়া ব্রিটিসদের উপর ধিক্কার ও গালি বর্ষণ আরম্ভ করিল । আমীরেরা অনেক কষ্টে মেজরকে বাটী পৌঁছিয়া না দিলে তাঁহার প্রাণ সঙ্কট উপস্থিত হইত । ইহার তিন দিন পরে এক দল বলোচ সৈন্য রেসিডেন্সি আক্রমণ করে—মেজর অসামান্য সাহস ও পরাক্রমের সহিত প্রবল শত্রু বিরুদ্ধে আত্মরক্ষা করিয়া নদীতে সেনা রক্ষিত ষ্টীমারে উঠিয়া নিস্তার পান ।

মিয়ানির যুদ্ধ { এখন যুদ্ধের সমূহ কারণ উপস্থিত—এম্পার
 কি ওম্পার যুদ্ধে যাহা হয় স্থির হইবে । নেপিয়র রাজধানীর
 দিকে ধীরে ধীরে অগ্রসর হইতেছেন দেখিয়া বলোচ সৈন্য
 দলে বলে আসিতে আরম্ভ করিল । ১৭ই ফেব্রুয়ারি তাহার
 মিয়ানি ক্ষেত্র অধিকার করিয়া দাঁড়াইল—তাহাদের সংখ্যা
 ২০০০০ । নেপিয়র ২৭০০ সেনা লইয়া তাহার সম্মুখীন হই-
 লেন । বলোচেরা বীরোচিত বিক্রম ও সাহসের সহিত যুদ্ধ
 করিতে লাগিল কিন্তু ইউরোপীয়দের শিক্ষিত বল ও মারাত্মক
 শস্ত্রের বিরুদ্ধে তাহাদের বল বিক্রম কতক্ষণ চলিবে ! কয়েক
 ঘণ্টার মধ্যে পরীক্ষা শেষ হইল—বলোচেরা তাহাদের তাঁবু অস্ত্র
 শস্ত্র ব্রিটিসদের হস্তে ফেলিয়া সরিয়া পড়িল । চার্লস্ নেপিয়র
 সৈন্যদের জয় ধ্বনির মধ্যে দিয়া হাইদ্রাবাদ দুর্গ প্রবেশ পূর্বক
 আমীরদের রাজকোষ লুণ্ঠন করিয়া সৈন্যদের মধ্যে পারিতোষিক
 বিতরণ করিলেন । ইহার পর ডব্বায় আর এক যুদ্ধ
 হয়—স্বাধীনতা রক্ষার সেই শেষ চেষ্টাও ব্যর্থ হইল ।

আমীরেরা বন্দীকৃত ও নির্বাসিত হইয়া কষ্ট শ্রমে দিন-পাত করিতে লাগিলেন—সিন্ধু দেশ ব্রিটিস রাজ্যে মিলিত হইল।

ইংরাজ } এই ত ইংরাজদের সিন্ধু বিজয় কাহিনী।
রাজনীতি } ইহাতে কি দেখা যায়? ইংরাজ রাজ্য-

লাভের মূলে যে ঘোর অন্যায় অত্যাচার তাহা কি ইহাতে প্রকাশ পায় না? সর্ চার্লস নেপিয়র পূর্ব হইতেই দেশ দখল করিবার আশয়ে কার্য্যারম্ভ করেন—আমীরদের সঙ্গে তাঁর যে বিবাদ তাহা মেমদলের সহিত ব্যাঘ্রের বিবাদের অনুরূপ। তাঁহার নিজ হস্তাক্ষর হইতেই তাঁহার অভিপ্রায় অবগত হওয়া যায়। তিনি স্পষ্টাক্ষরে লিখিয়া গিয়াছেন—

“আমীরদের দমন করিবার জন্য আমরা কেবল একটা ছুতো চাই। যে রাজ্য দুর্বল সে শীঘ্রই হউক বিলম্বেই হউক বলবানের গ্রাসে পতিত হইবেই হইবে। আমাদের সিন্ধু দেশ অধিকার যদিও অন্যায় কিন্তু এ অন্যায়েও বিস্তর লাভ ও উপকার—এ যে পেজমি এ ভদ্র পেজমি (a humane piece of rascality)”।

তাঁহার নীতি শাস্ত্রে সংকার্য্য সিদ্ধির নিমিত্তে অসং উপায় যোজনা দোষের নহে। *

চতুর্থ ভাগ।

পরিশিষ্ট।

সিন্ধু ভূগোল। } সিন্ধু দেশ (গ্রীকদের সিন্দমানা) প্রাচীন কাল
হইতে তিন ভাগে বিভক্ত ; দক্ষিণ উত্তর ও মধ্য

সিন্ধু। লার, অথবা দক্ষিণ সিন্ধু হাইদ্রাবাদের দক্ষিণ দিকে
বিস্তৃত। করাচী ও ঠাট্টা এই অঞ্চলের দুই প্রধান সহর।

করাচী বন্দর } পূর্বকালে করাচী মক্কা প্রদেশের অন্তর্ভূত
ছিল—ঐ বন্দর খেলাত-সরদারের নিকট হইতে

তালপুর আর্মীরেরা রাজ্যসাং করেন ও এক্ষণে ইহা ইংরাজ
সিন্ধু রাজ্যের রাজধানী। সাগর সান্নিধ্য, উত্তম আবহাওয়া ও
বাণিজ্য ব্যবসার সৌকর্য্য বশতঃ করাচীর উত্তরোত্তর উন্নতি ও
শ্রীবৃদ্ধি হইয়া আসিতেছে। ইহার উত্তর ও দক্ষিণ যেখানে
মিষ্ট জল পাওয়া যায় সেখানে কতকগুলি শাকসবজী ফলের
বাগান দৃষ্ট হয় নতুবা এ অঞ্চল সাধারণতঃ লবণাক্ত মরুভূমি।

মগর পীর } করাচীর তিন ক্রোশ উত্তরে মগর পীর নামক এক
উপত্যকা আছে তাহা দর্শনীয়। ঐস্থানে কুঞ্জবন পরিবৃত একটি
মন্দির ও মন্দিরের কাছে ক্ষুদ্র ক্ষুদ্র দ্বীপ সমন্বিত এক উষ্ণ
জলাশয়, তাহাতে বড় বড় কুম্ভীর (মগর) কুম্ভকর্ণ নিদ্রায় মগ্ন
দেখিতে পাইবে। খর্জুর বন-নিঃসৃত গন্ধকান্ত উষ্ণ প্রস্রবণ
হইতে ঐ জলাশয়ের উৎপত্তি ও উহাতে স্নান মহোপকারী
বলিয়া গণিত। আমি ঐ জলে গিয়া স্নান করিলাম এমন গরম

যে অধিক ক্ষণ তিষ্ঠিতে পারিলাম না। মগরপীর এখানকার তীর্থের মধ্যে গণ্য। কাহারও কোন বাসনা পূর্ণ করিতে হইলে সে মগরপীরে গিয়া ছাগাদি উপহার দানে কুস্তীররাজের পরিতোষ সাধন করে।

হিঙ্গুলাজ } এ অঞ্চলের অপর একটি তীর্থস্থান হিঙ্গুলাজ।
ইহা হিন্দু তীর্থ।

করাচীর পশ্চিম সোন-মিয়ানী বন্দরের অনতিদূরে এই তীর্থ স্থাপিত। হিঙ্গুলা দেবী কালীর নাম বিশেষ। হালা পর্বত শ্রেণীর ধার দিয়া ইহার রাস্তা গিয়াছে ও অঘোর নদ পার হইয়া যাইতে হয়। এই প্রদেশ রাম কাহিনীতে পূর্ণ। নদীর ক্রোড়ে কতকগুলি তরল কর্কম কুণ্ড আছে তাহা “রামচন্দ্রের কূপ” বলিয়া বিদিত। প্রবাদ এই যে রামচন্দ্র হিঙ্গুলাজ তীর্থ যাত্রায় বাহির হন। প্রথমে তিনি সৈন্যে গমনোদ্দ্যোগ করাতে পরাস্ত হইয়া ফিরিয়া আসেন পরে সন্ন্যাসী বেশে গুহায় প্রবেশ লাভ করেন। যে স্থান হইতে তিনি যাত্রারম্ভ করেন তাহার নাম রামবাগ। যাত্রীরা রামবাগে সম্মিলিত হয় ও যে পথ দিয়া রামচন্দ্র যাত্রা করিয়াছিলেন—যেখানে তিনি বিশ্রাম করিয়াছিলেন—যেখানে প্রথমে তাহার সৈন্যের পরাভব হইয়াছিল সেই সেই স্থান দর্শন করত তাহারা পুরোহিত সঙ্গে গমন করে। দ্বারিকা তীর্থ হইতে আরম্ভ করিয়া হিঙ্গুলাজ—হিঙ্গুলাজ হইতে লাহোরের জালামুখী—জালামুখীর পর কুরুক্ষেত্র—কুরুক্ষেত্র হইতে হরিদ্বার—হরিদ্বার হইতে গয়া, কাশী—পরে মহানদী (জগন্নাথক্ষেত্র)

গোদাবরী (নাসিক পঞ্চবটী) প্রভৃতি দর্শন পূর্বক সেতুবন্ধ রামেশ্বর পৌঁছিতে পারিলে ভারতের তীর্থ মণ্ডল এক প্রকার প্রদক্ষিণ করা হইল।

রামবেকিয়া { গ্রীক ইতিহাসে সেকন্দের ভারত যাত্রা উপলক্ষে ‘রামবেকিয়া’ নামক স্থানের উল্লেখ আছে, কনিংহাম সাহেব তাহা রামবাগের অপভ্রংশ বলিয়া স্থির করিয়াছেন। তাহা যদি সত্য হয় তাহা হইলে সেই ২০০০ বৎসর পূর্বে ও এদেশে রামনাম মাহাত্ম্যের প্রমাণ পাওয়া যায়।

ঠাট্টা { ঠাট্টা মুসলমান আমলে দক্ষিণ সিন্ধুর প্রধান সহর ছিল। এক সময়ে সিন্ধুনদী ইহার প্রাচীর দিয়া বহিয়া যাইত ও যে বাণিজ্য এক্ষণে করাচীর ভোগে আসিতেছে তাহা ইহারই দ্বারে আনিয়া ঢালিয়া দিত। এইক্ষণে নদী প্রায় তিন মাইল দূরে চলিয়া গিয়াছে। ১৫২২ অব্দে এই নগর নির্মিত হয় ও ১৭৪২-এ যখন নাদির সা তথায় পদার্পণ করেন তখন সেখানে ৪০০০০ ঘর তাঁতী ২০০০০ অপর শিল্পী ও ৬০০০০ বণিক সৌদাগর বাস করে এইরূপ বর্ণনা আছে।

হাইদ্রাবাদ { হাইদ্রাবাদ ঠাট্টার উত্তরাধিকারী মধ্যসিন্ধুর রাজধানী। ইহা প্রাচীন হিন্দু নগর নীরংকোটের স্থান অধিকার করিয়া আছে ও ১৭৫৮ অব্দে গোলাম সা কাল্‌হোরা ইহার পত্তন করেন। হাইদ্রাবাদ তালপুর আমীরদের প্রিয় নিকেতন ছিল—নদী হইতে তাঁহাদের শীকার স্থানে যাতায়াতের সুবিধা তাহার এক কারণ; ছুর্গের মধ্যে তাঁহাদের যে সকল স্মৃতিস্তম্ভ



বাসগৃহ ছিল তাহা এইক্ষণে প্রায় সকলি বিলুপ্ত হইয়াছে—
মীর নসীর খাঁর প্রাসাদ মাত্র অবশিষ্ট আছে। নিজ সহরে
কতকগুলি মাটির ঘরবাড়ী,—দেখিবার মত ইমারত অট্টালিকা
কিছুই নাই। দুর্গই ইহার মধ্যে শোভন দৃশ্য, সিন্ধু শাখা
ফুলেলী তাহার প্রাচীর পাশ দিয়া বহিয়া যাইতেছে। সহরের
প্রান্তে কাল্‌হোরা ও তালপুর আমীরদের কতকগুলি সমাধি
মন্দির আছে তাহা অতীব মনোহর। নদী সহর হইতে কতক
মাইল দূর। সিন্ধুতীর গিধু বন্দর পর্য্যন্ত দোধারী বৃক্ষ-
শ্রেণীর মধ্য হইতে এক সুন্দর প্রশস্ত রাস্তা গিয়াছে তাহাই
হাইদ্রাবাদের রাজপথ। এই সহর রেশম ও জরির কাপড়—
সূক্ষ্ম মিনার কাজ ও অন্য প্রকার কারুকার্যের জন্য
সুবিখ্যাত।

উত্তর সিন্ধু } উত্তর সিন্ধু দক্ষিণ ভাগ হইতে অনেক তফাৎ ।
হাইদ্রাবাদের উত্তরে আর সমুদ্রবায়ু সেবন
করা যায় না ; গ্রীষ্মকালে বায়ু বন্ধ হইয়া ঐ অঞ্চল উত্তাপকুণ্ডে
পরিণত হয় । ৮৯ মাসব্যাপী গ্রীষ্মকাল—বর্ষা নাই বলিলেই
হয়—কখন একটু মেঘ কিম্বা এক পসলা বৃষ্টি এইমাত্র । শীত-
কাল আবার তেমনি ঠাণ্ডা । মাঝে মাঝে মরুদেশের প্রবল
বালুময় ঝড় উঠিয়া প্রকৃতি রাজ্য তোলপাড় করিয়া তোলে ।
সিন্ধু নদী যেখান দিয়া গিয়াছে তাহার আশ পাশের ভূমি ফল-
বতী—নদী হইতে যত দূরে যাওয়া যায় ততই বালুময় মরুভূমি
স্থায়ী রুদ্র মূর্তি প্রকাশ করিতে থাকে ।

সেওয়ান } উত্তর সিন্ধুতে কতকগুলি নব্য ও প্রাচীন প্রখ্যাত
সহর আছে । নদীর পশ্চিমে সেওয়ান—

আরবদিগের সেউইস্তান । নগরের আশপাশে অনেকগুলি
সুন্দর মসজিদ ও গোরস্থান ও নগরের মধ্যে লাল সাবাজ নামক
মুসলমান পীরের এক সুচারু মসজিদ বিরাজিত । লাল সাবাজ
খোরাসান হইতে সমাগত সিন্ধুর একজন লোকমাত্র পীর,
১২৭৪—এ সেওয়ানে তাঁহার মৃত্যু হয় । তাঁর সমাধি মন্দির
মুসলমানদের এক প্রধান তীর্থক্ষেত্র, বহুদূর হইতে যাত্রীরা তথায়
সমাগত হয় । প্রতিবর্ষে এক একটি তরুণী কন্যকা এই গোরের
সহিত পরিণয় পাশে বদ্ধ হয়—এই বিবাহ নাচ বাদ্য ঘোরঘটা
করিয়া অতি সমারোহ পূর্বক সম্পন্ন হইয়া থাকে । অনেক
ফকীর লাল-সাবাজের শিষ্য মণ্ডলীর মধ্যে পরিগণিত । এই
পন্থী ফকিরের দীক্ষা-বিধি কোঁতুহল জনক । শিষ্যের শিরো-
মুণ্ডন ও মুখের দ্রুত শ্মশ্রু সমুদয় কেশ মোচন হইলে গুরুজী
তাহার মুখে কালি মাখাইয়া গলে একখণ্ড রজ্জু সংলগ্ন করিয়া
সম্মুখে এক দর্পণ ধরিয়া জিজ্ঞাসা করেন “কেমন রূপ দেখ্ছ
বাবা !” সে উত্তর করে “সুন্দর দেখ্ছি !” অনন্তর তাহার
স্বক্ষে তপ্ত লৌহের দাগ দেওয়া হয় ও অঙ্গে ভস্ম লেপন হইয়া
দীক্ষা কার্য সম্পন্ন হয়—ও সে ভিক্ষার ঝুলি লইয়া ফকির
হইয়া বাহির হয় । সেওয়ানে একটি পুরাতন দুর্গের ভগ্নাবশেষ
দেখা যায় । তাহা সেকন্দের নির্মিত দুর্গ বলিয়া অনেকে অনু-
মান করেন ।

সেওয়ান ছাড়াইয়া লাড়খানা—ইহা জলময় শ্রীসমৃদ্ধি সম্পন্ন উর্বরা প্রদেশে প্রতিষ্ঠিত ।

খয়েরপুর } সিন্ধুর পরপার খয়েরপুর অবশিষ্ট তালপুর
রাজ্যের রাজধানী । মীর আলি মোরাদ তাহার
অধিপতি । খয়েরপুরের উত্তরে সন্ধর বন্ধর ও রোঢ়ী মুসলমান
আমলের তিন প্রখ্যাত সহর । বন্ধর সিন্ধুর ক্রোড়ে এক ক্ষুদ্র
দ্বীপ—পূর্বে তাহা দেশের প্রবেশ দ্বার বলিয়া গণ্য হইত ।
এই প্রদেশে মুসলমানদের বিদ্যালয় ও তাহাদের পীর পণ্ডিত-
দিগের বসতি ছিল, তাই অনেকানেক গোর মস্জিদ চতুর্দিকে
বিক্ষিপ্ত দেখা যায় । সন্ধর এইক্ষণকার ইংরাজ সেনালায় এক
বড় কেষ্ট্রণ ।

শিকারপুর } সন্ধরের উত্তর পশ্চিমে শিকারপুর, ইহা উত্তর
সিন্ধুর জজ কালেক্টরের প্রধান মহল । এখান-
কার সৌদাগরেরা বাণিজ্য কার্যে পরিপক—সমরকন্দ প্রভৃতি
দূর দূর দেশে তাহাদের কারবার ও গতিবিধি ।

সিন্ধু নদী } সিন্ধু নদীই সিন্ধুদেশের সর্বস্ব । ইহা স্বীয়
জন্মভূমি তিব্বত হইতে নিঃসৃত হইয়া মধ্যে
মধ্যে শাখা প্রশাখা বিস্তার পূর্বক প্রধান প্রধান নগরের মধ্য
দিয়া উত্তর দক্ষিণ প্রায় ১৭০০ মাইল বহিয়া সহস্রধারে সমুদ্রে
আসিয়া মিলিত হইতেছে । ইহা বহুস্রার ফল শস্য প্রসবিনী—
চলাচলের মার্গ-পরিরক্ষিণী—বাণিজ্য স্ত্রুথ সমৃদ্ধি বৃদ্ধি-কারিণী
অশেষ গুণধারিণী সিন্ধুজননী । উত্তরের বর্ষাবারি ধারা প্রবাহে ও

হিমাচলের বরফ গলিয়া এই নদীতে যে পূর প্রসূত হয় তাহা মার্চ মাস হইতে আরম্ভ—অগস্টে পূর্ণতা প্রাপ্ত ও সেপ্টেম্বর হইতে হ্রাসোন্মুখ হয় । এই কয়েক মাস নদী ভয়ঙ্কর মূর্তি ধারণ করিয়া মহাপূরে ফুলিয়া উঠে ও শ্রোতের বেগে বালুচর ভাঙ্গিয়া ভাসাইয়া লইয়া যায় । এই পূর কতকটা বর্ষার অভাব পূরণ করে । সিন্ধু নদী না থাকিলে সমুদয় দেশ লবণাক্ত মরুভূমিতে পরিণত হইত ।

বাসন্দা পাঠান } সিন্ধুদেশে অধিকাংশই মুসলমান—অন্যত্র হিন্দু
সম্বন্ধে যেমন মুসলমান, এখানে মুসলমান

সম্বন্ধে হিন্দুদের সামাজিক অবস্থা তদ্রূপ । মুসলমানদের মধ্যে কতক আদিম নিবাসী আসল সিন্ধী—কতক বা আফগান বলোচ প্রভৃতি বিদেশী মুসলমান । আফগান বা পাঠান হাইদ্রাবাদ ও উত্তর সিন্ধুতে সচরাচর দৃষ্ট হয় । ইহাদের অনেকে বংশাদি ক্রমে সিন্ধুতে আসিয়া বাস করিতেছে ও অগাধ ভূমি সম্পত্তির অধিকারী । দেখিতে ইহারা বলিষ্ঠ সুগঠন ও সুস্ত্রী—আসল সিন্ধী হইতে ইহাদের পার্থক্য সহজেই প্রতীয়মান হয় ।

বলোচ } কাহ্নেলার রাজ্যের পত্তন কালে সিন্ধুতে বলোচ-বসতি আদবেই ছিল না । কাহ্নেলার বংশধর মীর মহম্মদ অনেক লোভ দেখাইয়া ছুই জন বলোচ সর্দারকে দেশে ডাকিয়া আনেন—সেই যত অনর্থের মূল । এই সময় হইতে বলোচগণ তাহাদের ভিন্ন ভিন্ন দলপতি সঙ্গে দলেবলে সমুপাগত হইয়া

সিদ্ধুর ভিন্ন ভিন্ন উর্বরা প্রদেশ অধিকার করিয়া বসে । অনতিকালের মধ্যে প্রজা রাজা অপেক্ষাও প্রতাপশালী হইয়া উঠিল ও বলোচ সর্দার মীর ফতে আলি খাঁ তালপুর কাহেলারাদের রাজ্যচ্যুত করিয়া বলপূর্ব্বক সিংহাসন অধিকার করিলেন । বলোচেরা সিন্ধীদের অপেক্ষা দ্রুতিষ্ঠ বলিষ্ঠ ও গৌরবর্ণ । শিকার ও যুদ্ধে তাহাদের প্রগাঢ় অনুরাগ । মীরদের আমলে বলোচদের আধিপত্যের সীমা ছিল না । পরে Sir Charles Napier যখন রাজ্যভার গ্রহণ করেন তখন তাঁহার কঠোর শাসনে ঐ জাতি অল্পকালের মধ্যে বশীকৃত হয় । বশীকরণ মন্ত্রের তিন অঙ্গ—প্রথম, তাহাদের অস্ত্রহরণ, দ্বিতীয়, তাহাদের অপরাধানুরূপ দণ্ডবিধান, তৃতীয়, তাহাদের বড় লোকদের হাত হইতে শাসন ক্ষমতা সমস্ত কাড়িয়া লওয়া । এইরূপে তাহাদিগকে নিরস্ত্র নির্ব্বীৰ্য্য ও খর্ব্বাধিকার করিয়া শীঘ্রই তাহাদের বিষদন্ত ভাঙ্গিয়া ফেলেন ।

কাফ্রি { সিদ্ধুতে অনেক কাফ্রিও বসতি আছে ।
আমীরদের সময় বৎসরে বৎসরে আফ্রিকা হইতে ৬০০ । ৭০০ কাফ্রি দাস দাসীর আমদানী হইত । তাহাদের গ্রাসাচ্ছাদন দিয়া মুটে মজুর সইস্ চাকর ছুতার কামার এই সকল কাজে সচরাচর নিযুক্ত করা হইত—কখন কখন নিজ কৰ্ম্মগুণে তাহারা বিলক্ষণ কর্তৃত্বপদেও আরোহণ করিত । সিন্ধী মুসলমান ও হাবসী স্ত্রীর বিবাহে সিদ্ধুদেশে বর্ণসঙ্করের উৎপত্তি হইয়াছে ।

সুফী { সিন্ধুদেশে বহু সংখ্যক মুসলমান সুফী পন্থী।
 প্রচলিত মুসলমান ধর্মের সহিত সুফী ধর্মের অনেক প্রভেদ ;
 এমন কি গোঁড়া মুসলমানেরা সুফীকে সধর্ম্মী বলিয়া স্বীকার
 করিতে চাহে না। স্বরস মধুর কবিত্ব-রস যোগে, কতক বা
 হিন্দু ধর্মের সংস্রবে অথবা অন্য কারণে কঠোর মহম্মদী ধর্ম
 স্থানে স্থানে ভিন্ন আকার ধারণ করিয়াছে। সুফী ধর্ম তাহার
 দৃষ্টান্ত স্থল। এ ধর্মের আকর স্থান হিন্দুস্থান বলিয়া অনেকের
 বিশ্বাস। তাহারা বলে মুসলমানদের আক্রমণ কালে যবন ধর্ম
 গ্রাহী এদেশের জনৈক হিন্দু ঋষি কর্তৃক এই মত প্রবর্তিত হয়।
 বস্তুতঃও ইহার সহিত বৈদান্তিক অদ্বৈতবাদের কতক সাদৃশ্য
 দেখা যায়। সুফীদের ঋজায়ৎ প্রণালী হিন্দু যোগ-শাস্ত্রের
 প্রকারান্তর। এই যোগ বলে জীবাত্মা ঈদৃশ উন্নত অবস্থায়
 উপনীত হয় যে সে স্বৈর ভাবে যথা ইচ্ছা বিচরণ করিতে
 পারে—শত্রু দমন, পীড়া প্রশমন, প্রেম প্রজনন, ব্যোম সঞ্চরণ
 প্রভৃতি বিচিত্র শক্তি উপার্জন করে—ভূত প্রেত প্রভৃতি ইন্দ্রি-
 য়াতীত বিষয় সকল তাহার প্রত্যক্ষ গোচর হয়। সুফী মতে
 জীবাত্মার আদি নাই অন্ত নাই—উহা পরমাত্মার প্রতিকৃতি—
 পরমাত্মাই উহার চরম গতি। সাদী হাফেজ প্রভৃতি বড় বড়
 পারস্য কবি এই ধর্মের অনুরাগী ছিলেন তাহাতেই অনুমান
 হয় ইহাতে অবশ্য কিছু সার থাকিবে। এ ধর্ম প্রেমের ধর্ম—
 সৌন্দর্যের ধর্ম, ভাবুক কবি ইহার পুরোহিত—আধ্যাত্মিক
 মদিরা নৃত্য গীত ইহার অনুষ্ঠানোপকরণ—সুমনন্দ বায়ু-সেবিত,

ফুটন্ত গোলাব স্বাসিত, স্বকণ্ঠ বিহগ-গীত-নিবাদিত স্বরময় উদ্যান কানন ইহার ভজনালয় । হাফেজ যেমন পারস্য দেশের স্বফী কবি সিন্ধুর তেমনি সা ভেতাই । হাফেজের চমৎকার কল্পনা-প্রসার, ঈশ্বর ভক্তি, বিশ্বব্যাপী বিমল প্রেম কোন্‌ সহ-দয় পাঠককে মোহিত না করে ? ভাবুক তাঁহার প্রত্যেক বাক্যে গূঢ় অর্থ দেখিতে পান—ইন্দ্রিয়-স্বথকর সামান্য পদার্থ সকল আধ্যাত্মিক দৃষ্টিতে এক অপূর্ণ রাগে রঞ্জিত হয় । সিন্ধু-দেশে সা ভেতাইয়ের কবিতাও লোকের তদ্রূপ হৃদয়গ্রাহী ।

এ দেশে স্বফী সম্প্রদায়ের দুই শাখা—জলালী ও জমালী । জলালীদের কতকটা শাস্ত্রধরণ—তাহারা অভক্ষ্য ভক্ষণ, অপেয় পান ইত্যাদি দুর্ব্যসন পরবশ, বল্লভ পন্থী বৈষ্ণবদের ন্যায় পুষ্টি-মার্গ বিহারী । জমালীদের অন্য ভাব । ইন্দ্রিয় নিগ্রহ, গুরু ভক্তি, উপোষণ, ভজন পূজন, ধ্যান ধারণ ইত্যাদি সাধনে তাহারা অনুরত । তাহাদের যোগ শিক্ষার নাম স্বগল্—তাহার নানা প্রকরণ আছে । ইহাতে পরিপক্ব হইলে পর সাধক উচ্চতর তপশ্চর্য্যায় নিযুক্ত হন । এইরূপ সাধনাকে “হজুর” বলে কারণ উহাতে সর্বদাই হাজির অর্থাৎ নিবিষ্টচিত্ত থাকিতে হয় । “হজুর” ধ্যানের অনেকগুলি সোপান । গুরু পীর মহাপুরুষদের চিন্তা ধ্যান প্রথম সোপান । তাহার উপরের সোপান মহম্মদে মিলন—জ্ঞান ভাব কার্য্যে তাঁহার সহিত সম্পূর্ণ রূপে মিলিত হওয়া চাই । এই সোপান পরম্পরা হইতে অবশেষে ঈশ্বরে মগ্ন হওয়া—জীব ব্রহ্মে লয়ের ভাব, যে অবস্থায়

সুফী “আত্ম ক্রীড়া আত্মরতি” ব্রহ্মজ্ঞানীর ন্যায় “সোহহং” (আনা’ল্ হক্) জ্ঞানের অধিকারী হইলেন ।

হিন্দু } হিন্দুরা সামান্যতঃ ব্রাহ্মণ বণিক ও শূদ্র এই তিন
বর্ণে বিভক্ত । ব্রাহ্মণদের পোকর্ণ ও সারস্বত
দুই শ্রেণী । পোকর্ণ ব্রাহ্মণেরা মহারাজ-ভক্ত বৈষ্ণব পন্থী ।
ইহারা ভাটিয়া বণিকদের পুরোহিত ।

সারস্বত পঞ্চগৌড় ব্রাহ্মণ প্রায় ২০০ বৎসর হইতে সিন্ধুতে
আসিয়া বাস করিতেছেন । আচার ব্যবহার কুলশীলে ইহারা
বোম্বায়ের সেনাই ব্রাহ্মণদের সমতুল্য, ইহাদের মৎস্য মাংস
ভক্ষণ নিষিদ্ধ নহে ।

বণিক } বণিক জাতির মধ্যে লোহানা ও ভাটিয়া এই দুই
শাখা অগ্রগণ্য । মূলতানের লোহানপুর লোহানা
বণিকদিগের মূল নিবাস । ঐ স্থান হইতেই তাহারা জাতীয়
নাম গ্রহণ করিয়াছে । তাহারা বেলোচস্থান আফগানস্থান
প্রভৃতি দূরদেশে বাণিজ্য ব্যবসা সূত্রে ছড়াইয়া পড়িয়াছে ।
স্বেচ্ছ দেশে গমন করিলে লোহানা জাতিভ্রষ্ট হয় না । তাহা-
দের জাতিভাইদের অন্যান্য হিন্দুদের তুলনায় এই সকল বিষয়ে
অধিকতর উদার দৃষ্টি বলিয়া বোধ হয় ।

লোহানাগণ ব্যবসা অনুসারে আমীল ও বণিক প্রধানতঃ
এই দুই শ্রেণীতে বিভক্ত । বণিকেরা শ্মশ্রু-মুগুন, শিখারক্ষণ
ও হিন্দুদের মত কাপড় ও পাগড়ী পরিধান করে । আমীলদের
চালচলন কতকটা ভিন্ন ।

আমীল* } আমীলেরা সিদ্ধী হিন্দুদের অগ্রণী। মুসলমান রাজত্বকালে এই শ্রেণীর সৃষ্টি হয়। রাজকার্য্যে, বিশেষতঃ হিসাবপত্রের কাজে, মুসলমান রাজাদের হিন্দুর সাহায্য ব্যতীত চলিত না। আমীলেরা আমীরদের মন যোগাইয়া চাকরী আরম্ভ করে ও ক্রমে নিজ বিদ্যাবুদ্ধি চাতুর্য্য প্রভাবে জনসমাজে বিলক্ষণ খ্যাতি প্রতিপত্তি স্থাপন করিয়া লয়। অন্যান্য হিন্দুদের তুলনায় আমীলেরা দেখিতে হস্তপুষ্ট স্ত্রী। মুসলমানদের সংসর্গে ও মুসলমান প্রভুদের অনুরোধে তাহারা মুসলমানদের মত বেশ ভূষা পাগড়ী ও শ্মশ্রুধারণ করে—কপালে তিলক এইমাত্র প্রভেদ। আহাৰ পানে তাহাদের অনেকটা শাক্ত ধরণ—মদ্য মাংসে অরুচি নাই। এইক্ষেণে গবর্ণমেন্ট আফীস ও বিদ্যালয়ে আমীলদেরই প্রাধান্য দেখা যায়। ইংরাজ রাজ্যে কি উপায়ে উন্নতি সাধন করিতে হয় তাহা তাহারা যেমন ভাল বুঝে অন্য জাতিরা তেমন বুঝে না, সুতরাং তাহারা আর সকলকে ছাড়াইয়া উঠিয়াছে—অন্যেরা পিছিয়া পড়িয়া আছে।

শিখ } এই সকল হিন্দু ভিন্ন হাইদ্রাবাদ, সেওয়ান ও অন্যান্য স্থানে অনেক শিখের বসতি প্রত্যক্ষ হয়। খালসা ও নানকসাহী তাহাদের দুই শাখা। হিন্দু মুসলমান খৃষ্টান সকলেই শিখ ধর্ম্ম গ্রহণের অধিকারী। দীক্ষার সময় শিষ্যকে স্নান করাইয়া শিখ ঠিকানায় (ধর্ম্মশালায়) লইয়া যাওয়া হয় তথায়

* আমীল, আমলা, অমলদার, মামলা, মামূল এ সব একই শব্দ মূলক। মূল শব্দ অ-ম-ল।

তিনি গুরু নানককে উপঢৌকন দিয়া নিম্নলিখিত মন্ত্র পাঠ
পুরঃসর শিখ ধর্ম্মে দীক্ষিত হন ।

সংনাম কর্তা পুরুথ
নির্ভউ, নির্বৈর, অকাল মূরত,
অযোনি সন্তব, গুরুপ্রসাদ ।
জপ—আদ সচ্, যুগাদ সচ্,
হৈ ভি সচ্—নানক হোসী ভি সচ্ ।

শিখ ধর্ম্মশালায় উদাসী (আচার্য্য) শিষ্যমণ্ডলীতে পরিবৃত
হইয়া আধিপত্য করেন ।

সিন্ধুদেশে হিন্দু ধর্ম্মের অনুষ্ঠানে অনেক শৈথিল্য দৃষ্ট হয় ।
পূর্ব্বের মত এখন জোর জবরদস্তী নাই তথাপি অনেকানেক
হিন্দু এখনো স্বেচ্ছা-পূর্ব্বক মুসলমানধর্ম্ম আশ্রয় করে—মুসল-
মান হইয়াও প্রায়শ্চিত্তের পর অনেকে হিন্দুধর্ম্মে পুনরায় ফিরিয়া
আসে । বিধর্ম্মীকে স্বদলভুক্ত করা, দায়ে ঠেকিয়া হিন্দুধর্ম্মের
এতটুকু অবনতি স্বীকার করিতে হইয়াছে । মুসলমান ও শিখ-
ধর্ম্মের সম্মিশ্রণে ইহার বিলক্ষণ রূপান্তর ঘটয়াছে । ওদিকে
আবার হিন্দুধর্ম্মের কুসংস্কার সকল মুসলমানদের মধ্যেও প্রবেশ
লাভ করিয়াছে । পৌত্তলিকতার সংশ্রবে মুসলমান ধর্ম্মের
একেশ্বরবাদও কলুষিত হইয়া গিয়াছে । অনেক সময় হিন্দু
যেমন মুসলমানের শিষ্য তেমনি আবার মুসলমানও কখন কখন
হিন্দু আচার্য্যের উপদেশে দীক্ষিত হয় । মুসলমান পীরদের
মধ্যে অনেকের হিন্দু নাম ও কোন কোন পীরস্থানে লিঙ্গ প্রভৃতি
হিন্দুদের দেবচিহ্ন সকল উপলক্ষিত হয় । পীরপূজা সাধারণে



প্রচলিত, ইহা হিন্দু ও মুসলমান ধর্মের যোগ সূত্র । এই সকল পীর ঈশ্বর ও মনুষ্যের মধ্যস্থ হইয়া জীবের সদগতি সাধনে তৎপর এই বিশ্বাসে লোকেরা পীর বিশেষের শরণাপন্ন হয় । পীরেরা অমর—পীরেরা ঐশীশক্তি সম্পন্ন—তঁাহাদেরই অনুগ্রহে যাচকের প্রার্থনা ঈশ্বর সন্নিধানে উপনীত হয় । কত অদ্ভুত ঐন্দ্রজালিক ঘটনা তঁাহাদের জীবনীর সহিত সংশ্লিষ্ট । লোকের পীরমাহাত্ম্যে অগাধ বিশ্বাস । মগরপীরের যে এত মাহাত্ম্য তাহার কারণ এই যে এক জন পীর একটি ফুলকে কুমীর বানা-ইয়া দেন তাহারই বংশজেরা মগরপীর জলাশয়ের অধিবাসী বলিয়া সম্ভজনীয় । এমন অনেকগুলি পীর আছেন যাদের উপর হিন্দু মুসলমানদের সমান ভক্তি, তন্মধ্যে সেওয়ানের পীর লাল সাবাজ একজন গণ্য । লাল-সা'র স্তুতিবাদ পীর-ভক্তির দৃষ্টান্ত স্বরূপ নিম্নে প্রকটিত হইল ।

পীর মহাপীর তুমি রাজ রাজেশ্বর,
শঙ্কট সহায় ভবে সর্ব জুংথ হর ।
তব ধন্য পুণ্য নাম নিখিল প্রচার,
তাপিত জনের তুমি হর তাপভার ।
পাথর স্তবর্ণ হয় তব কৃপাশুণে,
আশ্রয় ভেলায় তব তরে পাপী জনে ।
করুণা অপার স্মরি লয়েছি শরণ,
অন্নদানে বধু মোরে করহ পোষণ ।
মহারাজ বিতর তোমার কৃপাবারি
তরাও ভকতে ওহে বিপদ কাণ্ডারী ।

আমার যে দশা প্রভু জানিছ সকল,
 জীবন শরণ তুমি, সহায় সম্বল ।
 আশালতা নবীন পল্লবে প্রভু ছাও
 কৃপার ছয়ার তব দাও খুলে দাও !
 ভুবন বিদিত নামে ধরেছি আশ্বাস
 অভাগারে কোরো নাহে নিরাশে নিরাশ ।
 হৃথ শোক পাপ তাপ করহ মোচন,
 মেরবন্দ * মীর তুমি ঈশ্বরের জন,
 অগতির প্রতি কর কৃপা বরিষণ !

জেণ্ডা পীর নামে অপর একটি মহাপুরুষ আছেন তাঁহাকে
 স্মরণ করিয়া এই প্রস্তাব উপসংহার করি । এই পীর হিন্দু
 মুসলমান উভয় জাতির পূজার পাত্র । হিন্দুরা ইহাঁকে সিন্ধু
 নদীর অবতার বলিয়া বিশ্বাস করে । ইহাঁর নামে ভক্তেরা যে
 স্ততিমালা পাঠ করেন (পঞ্জারা দরিয়া সা জা) তাহার কিয়দংশ
 ভাষান্তরে উদ্ধৃত করিয়া দিলাম ।

সরিৎ স্নহদ সম কল্যাণ-নিলয়
 মহারাজ মহিমা অপার,
 ঢালিছ অজস্র স্রোত বল বেগময়
 পুরাও হে বাসনা আমার ।

অগণ্য অগণ্য পাপে তাপিত অন্তর
 দূর কর প্রভু পাপভার,

তোমার ছুয়ারে যাচে কত শত নর
পুরাও হে বাসনা আমার ।

দীন হীন অজ্ঞান এজন
জানে না গো ভজন সাধন
স্তুতি মোর শুনহে রাজন্
পুরাও হে বাসনা আমার ।

অধীনে শরণ দেয় মহৎ যে জন ।
উজ্জল তুমি হে তব উজ্জল বরণ,
মর্ত্যধামে নাহি কেহ তোমার মতন
পুরাও হে বাসনা আমার ।

অন্নদাতা তুমি সদা কর অন্নদান
হৃদে দেহ সত্য পুণ্য হার ।
চৌদিকে ঘিরেছে মোরে সঙ্কট মহান্
পুরাও হে বাসনা আমার ।

রাজ রাজেশ্বর তুমি বলী সুলতান
দুর্কলেরে কর বলবান্ ।
সকলি জানিছ প্রভু কি জানাব আর
পুরাও হে বাসনা আমার ।

বিদ্যায় তুমি হে মহামতি
অপার প্রভুতা অপার শক্তি,
মায়াজাল রচয়িতা, অগতির গতি,
পুরাও হে বাসনা আমার ।

তব রূপাঙ্গে তাপিত জুড়ায়
ক্ষুধার্ত জনের অন্ন কষ্ট যায়
ধরে নব বল যবে মৃত প্রায়
পূরাও হে বাসনা আমার।

শরণ পরমগতি বহু শক্তি ধারী,
কর পার অনিবার যত ভগ্ন তরী,
বিপদ তরঙ্গ মাঝে তুমিই কাণ্ডারী
পূরাও হে বাসনা আমার।

থাক মোর সাথে সৰ্ব্বকাল,
লোক মাঝে দেহ দৈর্ঘ্য বল,
সম্পদে বিপদে তুমি একই সম্বল
পূরাও হে বাসনা আমার।

সতত তোমার সখা করিহে স্মরণ
কাঙ্গালের তুমিই আধার।
এ দাসের শুভস্তুতি করহ গ্রহণ
পূরাও হে বাসনা আমার।



বিজাপুর।

প্রথম ভাগ।

সহর।

ষোড়শ শতাব্দীর কিছু পূর্ব হইতে সপ্তদশ শতাব্দীর শেষ-ভাগ পর্য্যন্ত প্রায় দুইশত বৎসর (১৪৯০-১৬৮৬) বিজাপুর দাক্ষিণাত্যের অধীশ্বর ও আদিলসাহি রাজাদের রাজধানী রূপে প্রখ্যাত ছিল। এই সহর সোলাপুরের ৬০ মাইল দক্ষিণে সহর বর্ণনা। } ভীমা ও কৃষ্ণা নদীর মধ্যবর্তী অধিত্যকায় অবস্থিত। ইহা দাক্ষিণাত্যের পূর্বদক্ষিণ রেলওয়ের একটি নামাঙ্কিত ষ্টেশন। ইহার আশপাশে প্রকৃতির শোভাসৌন্দর্য্য বিশেষ কিছুই নাই, বৃক্ষপল্লবপরিবর্জিত তরঙ্গায়মান মাঠময়দান—মধ্যে মধ্যে ছোট ছোট শস্যক্ষেত্র,—এই বা প্রকৃতির মুখচ্ছবি। রেল গাড়িতে যাইতে যাইতে দূর হইতে বিজাপুরের দূত স্বরূপ “গোল গুম্বজ” ইমারত খানি পথিকের নয়ন আকর্ষণ করে—ক্রমে তাহার বিরুদ্ধ আকার দক্ষিণ আকাশ ব্যাপিয়া দৃশ্যপটে উদ্ভাসিত হয়। পরে সহরের যত নিকটবর্তী হওয়া যায়, ততই গোর মসজিদ ও অন্যান্য ছোটবড় ইমারতের ভগ্নমূর্ত্তি সকল নেত্রপথে পতিত হয়। সহরের চতুর্দিকে প্রস্তর প্রাচীর। ইহার পরিধি অনূ্যন ৩ ক্রোশব্যাপী। এই প্রাচীর গভীর প্রশস্ত পরিখায় বেষ্টিত ও বিচিত্রাকার বিচিত্র বলের শতাধিক বুরুজ। } বুরুজে সুরক্ষিত। কথিত আছে ইহার এক একটি

বুরুজ নির্মাণের ভার এক একজন আমীরের হস্তে সংন্যস্ত হয় যাহার যেমন রুচি যাহার যেরূপ ক্ষমতা তদনুসারে সংগঠিত— ইহাদের আকার প্রকারের বৈষম্য ঘটিবার কারণ এই। এই সমস্ত বুরুজের মধ্যে সেরজী, লাণ্ডা কসব, ফিরঙ্গী ও উপরী বুরুজ, আকার বল ও নির্মাণ কৌশলে, এই চারিটি ব্যাখ্যা মালক ময়দান। { যোগ্য। সেরজী (সিংহ রাজ) বুরুজের উপর প্রকাণ্ড বিজাপুর-তোপ “মালক ময়দান” স্থাপিত। এই তোপ কার্যে কত দূর ফলোপধায়ী বলা যায় না, কিন্তু ইহার হুকুমারই শত্রুরা কাছে ঘেঁসিতে সাহস করিত না। কামানটা এত বড় যে একজন মানুষ তাহার গোলার স্থান অধিকার করিয়া অনায়াসে তাহার খোলের মধ্যে নিদ্রা যাইতে পারে। “মালক ময়দানের” নির্মাণকর্তা মহম্মদ রুমি খাঁ। জনশ্রুতি এই যে তিনি আপন পুত্রের বলিদান দিয়া ঐ তোপ নরশোণিতে অভিষিক্ত করেন। এই কামান হিন্দুদের পূজার পাত্র হইয়া দাঁড়াইয়াছে ;—(এমন কি কোন জিনিশ আছে হিন্দুরা যার পূজা করে না)? ছাগবলি, চাউল, নারিকেল, পুষ্পাঞ্জলি প্রদানে “ক্ষেত্রপতির” পূজার্তনা সমাহিত হয়। “উপরি” বুরুজ আলি আদিল সার বিখ্যাত সেনাপতি হাইদর খাঁ কর্তৃক নির্মিত। তালিকোটের যুদ্ধের পর আলি আদিল সা সহরের প্রাচীর নির্মাণে কৃতসংকল্প হইয়া এক এক ভাগ নির্মাণে এক এক জন আমীর নিযুক্ত করেন। সে সময়ে হাইদর খাঁ যুদ্ধ কার্যে ব্যাপ্ত থাকিয়া বিজাপুরে অনুপস্থিত ছিলেন।

ফিরিয়া আসিয়া দেখিলেন যে প্রাচীর নির্মাণ শেষ হইয়া গিয়াছে। তিনি এই মহৎ কার্যে যোগ দিতে পারিলেন না বলিয়া আক্ষেপ করাতে রাজা আদেশ করিলেন “এমন একটা বুরুজ নির্মাণ কর যাহা আর সকলকে ছাড়াইয়া উঠিবে।” এই আদেশের ফল “উপরি” বুরুজ। ইহা সহরের উন্নত ভূমির উপর প্রতিষ্ঠিত; বাস্তবিকই আর সকল বুরুজের উপর টেকা দিতেছে—চারিদিক হইতে ইহা নজরে আইসে ও ইহার পৃষ্ঠ হইতে সহরের প্রাচীরসমেত সমুদয় ক্ষেত্র নেত্রগোচর হয়। ইহার উপর দুইটি তোপ স্থাপিত। তাহার একটা প্রকাণ্ড লম্বা, নাম, “লম্ব-চারী।” লাণ্ডা কসবের পৃষ্ঠেও এক বৃহৎ লৌহ কামান দৃষ্ট হয়। ১৬৮৬ খৃষ্টাব্দে যখন ঔরঙ্গজীব বিজাপুর আক্রমণ করেন, তখন এই বুরুজের উপরেই তাঁহার সমুদায় শস্ত্রবল প্রয়োগ করা হয়—তাঁহার গুলিগোলা নিশান এখনও পর্য্যন্ত ইহার প্রাচীরে ও কামানের গায়ে প্রত্যক্ষ করা যায়। এই বুরুজের অনতি দূরে “মঙ্গল তোরণ” নামক সহরের যে প্রবেশ দ্বার ছিল, ঔরঙ্গজীব সে নাম বদলাইয়া “ফতে ফটক” নামকরণ করেন। বিজয়ী সত্ৰাট এই ফতে ফটকের মধ্য দিয়া বিজাপুর সহরে প্রবেশ পূর্বক স্বকীয় জয় ঘোষণা করেন।

পঞ্চ তোরণের মধ্য দিয়া সহরে প্রবেশ করা যায়। তাহার চারিটা অক্ষত রহিয়াছে; পঞ্চম দ্বার সরকারী আফিস প্রভৃতি ইমারত সম্মুখে বন্ধ হইয়া গিয়াছে। যে দিক দিয়া প্রবেশ

কর সেই দিকেই সহরের এক স্তমহান্ অপরূপ দৃশ্য আবিষ্কৃত হয়। বিজাপুরের প্রাচীর, বুরুজ, ইমারতমালার ভগ্নাবশেষ দৃষ্টে ইহা এক স্তবিস্তীর্ণ জনাকীর্ণ নগর বলিয়া সহসা ভ্রান্তি জন্মে। অন্তরে প্রবেশ করিলে সে ভ্রম দূর হয়। সহরের বসতি গুলি কেমন খাপছাড়া ও গুটি কত প্রাচীন ইমারত ছাড়িয়া দিলে দেখিবার জিনিশ কিছুই নাই। প্রাচীন ও নব্য সহরে আকাশ পাতাল প্রভেদ। সহরের বসতির ঠিকানার বাড়ীঘর গুলি অন্যান্য প্রাচীন কীর্তিস্তম্ভের তুলনায় কি দীন হীন যৎসামান্য রূপে প্রতীয়মান হয়! আধুনিক ঘরবসতি পশ্চিম দ্বারের সম্মিহিত। পশ্চিম লোকালয় ছাড়াইয়া গেলে অন্তরের ভগ্ন-বিজনতা স্পষ্ট ফুটিয়া উঠিয়া চিত্তকে ঘনবিষাদে পূর্ণ করে। নগরের মধ্য ভাগে দোধারী বৃক্ষশ্রেণীর মধ্য দিয়া যে রাজপথ গিয়াছে তাহা পথিককে মধ্য দুর্গে লইয়া যায়। এই দুর্গের নাম “আর্ক কেল্লা”। ইহা গোলাকৃতি ও ইহার আর্ক কেল্লা { বেটন প্রায় ১ মাইল হইবে। আর্ককেল্লায় যত বড় বড় সাহেব স্তবার বাসগৃহ, গবর্ণমেন্টের কার্যালয় প্রভৃতি সার্বজনিক ইমারত শ্রেণী। কেল্লার মধ্যগত “সাত মজলী” প্রাসাদ, “আনন্দ মহল,” “গগণ মহল,” বাহিরে “আসার মহল,” “মালক জাহান” মসজিদ ও আলি আদিল সার অসম্পূর্ণ সমাধিমন্দির মিলিয়া যে সুন্দর সৌধমালা উন্মীলিত হয় তাহা বিজাপুরের প্রাচীন কীর্তি-স্মৃতিতে পূর্ণ। এই পূর্ব গৌরবের কঙ্কাল সকল সহরময় বিক্ষিপ্ত দেখা যায়। কোথাও বা

বনজঙ্গলপরিবৃত ছাদহীন ভগ্ন গৃহ—কোথাও একটি গোর কিস্মা
মসজিদ ঝোপঝাপের মধ্য হইতে উঁকি দিতেছে—কোথাও
ভগ্ন স্তূপের মধ্যে ফোয়ারা ও জলযন্ত্রসংযুক্ত মনোহর উদ্যা-
নের চিহ্ন সকল পড়িয়া আছে! ফোয়ারা ভগ্ন, জল-
যন্ত্র শুষ্ক, ফলফুল বৃক্ষসকল বনজঙ্গলে আচ্ছাদিত, কোন
স্থানে হয়ত অবত্ৰসম্বৃত একটি জুঁইলতা ভগ্ন প্রাচীর বাহিয়া
উঠিয়াছে। হায়! সেই জগদ্বিখ্যাত বিজাপুরের এই দুর্দশা—

যত্নপতেঃ ক গতা মথুরাপুরী
রঘুপতেঃ ক গতান্তরকোশলা
ইতি বিচিন্ত্য কুরু স্বমনস্থিরং
ন সদিদং জগদিত্যবধারণয় ॥

কোথা মথুরাপুরী গেছে
যত্নপতির
রঘুপতির কোশলাও
সেই পথে।
সবে এতেক ভাবি মন
করহ স্থির
জেনো কিছুই স্থির নহে
এ জগতে!

আর্ক কেব্লা বিজাপুরের শোভনতম স্থান—ইমারতরাজির
রত্নভাণ্ডার। য়ুসফ আদিল সা প্রথম সুলতান এই দুর্গ নিৰ্ম্মাণ
আরম্ভ করেন। ইব্রাহিম আদিল সার আমলে ইহার কার্য্য

শেষ হয় । ইহার প্রাচীরে হিন্দু মন্দিরের প্রস্তরগাঁথুনি হইতে হইতে চোরা মাল ধরা পড়ে । দুর্গের অভ্যন্তরে কতকগুলি প্রাচীন হিন্দুমন্দিরের ভগ্নাবশেষ দৃষ্ট হয় ও একটী মন্দির এখনো জীবন্তভাবে অধিষ্ঠিত তাহা নরসোবার মন্দির । কথিত আছে যে দ্বিতীয় ইব্রাহিম বাদসা স্বধর্ম পরিত্যাগ করিয়া এই মন্দিরে আসিয়া হিন্দু মতে পূজা করিতেন । এই মন্দিরে মধ্যে মধ্যে মেলা হয় । সে দিন এক জন সন্ন্যাসী আসিয়াছিল, তাহাকে দেখিতে গেলাম । সে প্রথমে একটুকু দুগ্ধ পান করিয়া থাকিত, তাহাও ক্রমে ছাড়িয়া দিয়া অনাহারে দিন যাপন করিতে লাগিল—শুদ্ধ একটু ভাং মাত্র জীবনের অবলম্বন । ক্রমে তাহার শরীর শুষ্কশীর্ণ হইতে লাগিল । এইরূপ কতক দিন যায়, আমি জিজ্ঞাসা করিলাম “এখানেই কি আপনার সমাধিস্থ হইবার ইচ্ছা ?” সে বলিল, “যত দিন পর্য্যন্ত আমি এক শত সাধুর ভোজের অন্ন সংস্থান করিতে না পারি ততদিন এখান হইতে নড়িব না ।” পরে শুনিলাম সে ইচ্ছামত অর্থ সংগ্রহ করিয়া প্রস্থান করিয়াছে—তাহার অনশন ব্রত উদ্ঘাপিত হইল কি না শুনিতে পাইলাম না । আর্ক কেল্লায় বিশাল, সুন্দর, নানা ধরণের ইমারত একত্রীভূত । চীন মহলের সৌধমালা জজের আদালত, কলেঙ্কর মাজিস্ট্রেটের কাছারীতে পরিণত । চীন মহলের এক কোনে এক সরোবর সাত মজলী { তীরে সপ্ততল প্রাসাদ (সাত মজলী) গগণ ভেদ করিয়া উঠিয়াছে । “গগণ মহল” রাজাদের দরবারশালা ।

গগন মহল } তাহার সম্মুখে যে বিশাল খিলান দ্বার (arch) মুখ-
ব্যাদান করিয়া আছে তাহা বিজাপুরের মধ্যে সর্বোৎকৃষ্ট খিলান।
উদ্যানউৎসযুক্ত সুসজ্জিত “আনন্দ মহল” রাজাদের বিহার-
আনন্দ মহল } ভবন ছিল। ইহা এক প্রকাণ্ড তৃতল গৃহ। রাণী-
দের বায়ু সেবনের জন্য উপরে প্রশস্ত ছাদ—ছাদের উপর হইতে
অদৃশ্যভাবে বাহিরের তামাসা দেখিবার সুবিধা। এই গৃহে কত
সিঁড়ি, কত খুপরি খুপরি ঘর তাহার অন্ত নাই। বোধ হয় যেন
ইহা রাজারাণীদের মিলিয়া লুকাচুরি খেলিবার জন্য নিৰ্ম্মিত।


আর্ক কেল্লার প্রত্যেক গৃহ—প্রত্যেক ভূমিখণ্ড—প্রাচীন
বিজাপুরের সহস্র স্মৃতিতে পরিপূর্ণ। এখানেই রাজবিদ্রোহী
মন্ত্রী কমাল খাঁ বালক সুলতান ইস্মায়লের বিরুদ্ধে ষড়চক্র
করিতে গিয়া স্বয়ং প্রাণ খোয়াইলেন—এখানেই বীরাজনা চাঁদ
সুলতানার দরবার হইত—এখান হইতেই মন্ত্রীর কুহকে পড়িয়া
তিনি বন্দী হইয়া সেতারায় নির্বাসিত হন—এখানেই বিলাসী
মাহমুদ তাহার প্রিয়তমা নায়িকা রস্তার সহিত রঙ্গরসে দিন
যাপন করিতেন। এই দুর্গ আদিলসাহী রাজাদের কত লীলা-
খেলা যুদ্ধবিগ্রহের স্থান—ইহাই আবার সেই রাজবংশ-নিপা-
তের সাক্ষী! এই স্থানে বিজাপুর পতন কালে সুলতান সেক-
ন্দর সহস্র সহস্র প্রজার হৃদয়ভেদী অর্ভনাদের মধ্যে বিজয়ী
ঔরঙ্গজীবের চরণে স্বীয় রাজমুকুট সমর্পণ করেন। যদিও ইহার
সৌধাবলী ভগ্নপ্রায়, ইহার উদ্যানকানন তৃণকণ্টকাক্রান্ত, ইহার
উৎসজলপ্রণালী সকল শুষ্ক, তথাপি এক অনির্বচনীয় মহান্

গম্ভীর ভাব ইহার সহিত সংলিপ্ত—ইহা সেই সমুদ্রত রাজবংশের
সুমহান্ কীর্তিস্তম্ভ রূপে বিরাজমান !

বিজাপুরে যে সমস্ত প্রাচীন ইমারতের ভগ্নাবশেষ বিদ্যমান
তন্মধ্যে গোল গুম্বজই সৰ্ব্বাগ্ৰগণ্য । ইহা সুলতান মাহমুদের
সমাধিমন্দির । সহরের মধ্যে ইহা অদ্বিতীয়—পৃথিবীতেও দুই

“বোল” অথবা } একটা ভিন্ন এমন বিশাল গুম্বজ আর নাই ।
“গোল” গুম্বজ } গুম্বজরাজ বহির্ভাগ হইতে ১৯৮ ফীট উচ্চ ও

যে চতুষ্কোণ প্রাকারের উপর স্থাপিত তাহার প্রত্যেক পার্শ্ব
১৩৫ ফীট দীর্ঘ । ইমারতখানি সমচৌরস ১৮,২২৫ ফীট, রোম
নগরের পাস্ত্রিয়ন অপেক্ষাও বৃহত্তর । বাহিরের চারি কোণে
চারিটা গবাক্ষময় মিনার । ইহার একটীর সিঁড়ি ভাঙ্গিয়া ছ-
তালা পর্যন্ত আরোহণ করিলে ছাদের উপর হইতে চতুর্দিকের
সুবিস্তৃত শোভন দৃশ্য সন্দর্শন করা যায় । নীচের নরকীটেরা
কি ক্ষুদ্র আকার ধারণ করে ! এই গুম্বজে প্রতিধ্বনি গ্যালেরি
এক চমৎকার জিনিস—ছাদের উপর একটা স্ফুঁড়ি পথ দিয়া
গ্যালেরিতে প্রবেশ করিতে হয় । প্রবেশ করিলে এক অদ্ভুত
কাণ্ড প্রত্যক্ষ করা যায় । তথায় প্রতিধ্বনির বিরাম নাই । এক
সীমায় কানে কানে কথা কহিলে সীমান্তর পর্যন্ত স্পষ্ট শুনা যায় !
এক কণ্ঠ বিনির্গত স্রব হইতে শত শত কণ্ঠধ্বনির প্রতিধ্বনি জাগ্রত
হয় । আমাদের সঙ্গে “ক্রগো” কুকুর ছিল, তাহার এক এক
ডাকে শত সহস্র শৃগাল কুকুরের রব উঠিয়া এক অদ্ভুত হাস্য-
রসের অভিনয় হইতেছিল ; বেচারী “ক্রগো” তাহার অদৃশ্য




শত্রুদলের আশ্ফালনে ব্যতিব্যস্ত হইয়া কি করিবে ভাবিয়া পায় না। দক্ষিণ দ্বার দিয়া সমাধিগৃহে প্রবেশ করিয়া এক প্রস্তর মঞ্চের উপর সুলতান মাহমুদ, তাঁহার মহিষী ও পুত্রদের গোর-প্রস্তর সকল দেখা যায়। দক্ষিণ দ্বারের নিকটস্থ প্রস্তরের উপর কতকগুলি পারস্য লেখা আছে। তাহাতে সুলতান মাহমুদের স্বর্গারোহণের তারিখ পাওয়া যায়—তাহা ১০৬৭ অর্থাৎ ১৬৫৬ খৃষ্টাব্দ। দক্ষিণ দ্বারের উপরিভাগে একটা প্রকাণ্ড প্রস্তর খণ্ড লৌহ-শৃঙ্খলে লম্বান। লোকের বিশ্বাস এই পাথরের গুণে গুম্বজরাজ বজ্রবিদ্যুতের উৎপাত হইতে সুরক্ষিত। একবার যদিও ইহার উপর বজ্রপাত হইয়া গিয়াছে তথাপি সে বিশ্বাস চলিয়া যায় নাই।

বোল গুম্বজের পরেই “ইব্রাহিম রোজার” উল্লেখ করিতে হয়—ইহাতে ইব্রাহিম বাদসাহের গোর ও মসজিদ প্রতিষ্ঠিত। বোল গুম্বজ সহরের পূর্ব প্রাচীর ঘেঁসিয়া ভিতরের দিকে,—
 ইব্রাহিম রোজা } ইব্রাহিমের রোজা পশ্চিম প্রাচীরের কিঞ্চিৎ
 বহির্ভাগে অবস্থিত। বোল গুম্বজ অলঙ্কারহীন গুরুভার প্রকাণ্ড
 কাণ্ড—ইব্রাহিম রোজা তাহার উলটা, লঘু ও অলঙ্কারময়।
 ইহার গোর, মসজিদ, উদ্যান, মিনার মিলিয়া দূর হইতে অতি
 মনোহর দৃশ্য আবির্ভূত হয়। বিজাপুর আক্রমণ কালে
 মোগল সৈন্য কর্তৃক এই রোজা অধিকৃত হইয়া মালক ময়দা-
 নের গোলাঘাতে ক্ষতিগ্রস্ত হইয়াছিল। এইক্ষণে মেরামতে
 তাহার পূর্বাবয়ব ফিরিয়া আসিয়াছে।

এই সকল বৃহৎ প্রস্তরের ইমারত, ইহাদের শিল্প নৈপুণ্য দেখিয়া লোকের মনে সহজে কৌতূহল জন্মিতে পারে, কি উপায়ে, কি কলকৌশলে এই সমস্ত কারখানার সৃষ্টি হইল—না জানি কত লোকজন মজুরমিস্ত্রী ইহাতে কাজ করিত—কত না অর্থ ব্যয় হইয়াছে। ইব্রাহিম রোজার এক স্থানে পারস্য ভাষায় একটা শিলালেখ আছে, তাহাতে এই সকল বিষয়ে কিছু কিছু জ্ঞানলাভ হয়। সে লেখ এইঃ—
 “মালিক সান্দাল ১৥০ লক্ষ ৯০০ হুণ ব্যয় করিয়া অনেক পরিশ্রমে এই গোর মন্দির নির্মাণ করেন।” হুনের মূল্য সাত সিলিং করিয়া হিসাব করিলে ৫২,৮১৬ পৌণ্ড দাঁড়ায়—মোটামুটি ধর, সাড়ে পাঁচ লাখ টাকা। কিন্তু এ হয়ত শুদ্ধ গুহাজ নির্মাণের ব্যয়—সমুদায় ইমারতের মূল্য নির্দেশক নহে। সমুদায়টা ধরিতে গেলে এক কোটি মুদ্রারও অধিক হইয়া যায়। ঐ লেখে আরো আছে যে এই কাজে ৬,৫৩৩ লোক খাটিত কার্য শেষ হইতে ৩৬ বৎসর ১১ মাস ১১ দিন লাগিয়াছিল। এই লোক সংখ্যায় মুটেমজুর প্রভৃতি সাধারণ শ্রমজীবী সামিল কি না সন্দেহ—সম্ভবতঃ উহা শিল্পী, রাজমিস্ত্রী প্রভৃতি উচ্চ শ্রেণীর কারিগরের সংখ্যা নিদর্শক। তন্মিত্ত নিকৃষ্ট শ্রমজীবীদের অন্নবস্ত্র দিয়া ইচ্ছামত সংগ্রহ করা যাইত তাহার আর সন্দেহ নাই, নহিলে এই সকল ইমারত নির্মাণ কল্পনা করা দুঃসাধ্য।

জীবিত থাকিতে থাকিতে আপনার সমাধিমন্দির প্রস্তুত



করা মুসলমানদের এক অদ্ভুত রীতি। হিন্দুরা মৃতদেহ ভস্মসাৎ করিয়া মৃত্যুর স্মরণচিহ্ন পর্য্যন্ত বিলুপ্ত করিতে উৎসুক, আলি রোজা } মুসলমানদের বাসগৃহ অপেক্ষা প্রেতালয়ের প্রতি অধিক মনোযোগ। সুলতান মাহমুদের পুত্র আলি আদিল সা গোল গুম্বজের সমস্পর্কী নিজের জন্য এক গোর-মন্দির পত্তন করেন। তাহার ছায়া পিতার গোরমন্দিরের উপর গিয়া পড়ে এই তাঁহার ইচ্ছা ; কিন্তু ছুরদৃষ্টক্রমে সে ইচ্ছা পূর্ণ হইল না। মন্দির প্রস্তুত হইতে না হইতেই রাজা মৃত্যুমুখে পতিত হয়েন ও এই ভগ্ন গৃহেই তাঁহার সমাধি হয়। এই সমাধিমন্দির অসম্পূর্ণ অবস্থাতেই এক্ষণে দৃষ্ট হয়। ইহার নাম “আলি রোজা।” কিন্তু মৃত হস্তীরও লাখ টাকা মূল্য ; সেইরূপ ইহার ভগ্ন মূর্তিও চমৎকার ব্যাপার। ইমারত সম্পূর্ণ হইলে সত্য সত্যই ইহা বোল গুম্বজকে অতিক্রম করিয়া উঠিত—আলিও মনের সাধ মিটাইয়া স্থখে মৃত্যুশয্যায় শয়ান হইতে পারিতেন !


এই অসমাপ্ত সমাধিমন্দিরের এক কোণে একটি চাকচিক্যময় খোদিত হরিৎ প্রস্তরের গোর দৃষ্ট হয়। কেহ কেহ অনুমান করেন যে তাহা হতভাগ্য সেকন্দের গোর প্রস্তর, কিন্তু অনু-
 সুলতান সেকন্দের } সন্ধান জানা গিয়াছে যে বাস্তবিক তাহা
 গোর } নহে। সুলতান সেকন্দের গোর অন্যান্য
 সামান্য গোরশ্রেণীর মধ্যে সহরের অন্যত্রে স্থাপিত।

ইহার উত্তরে মক্কা ফটক হইতে কেল্লার পথ দুটি গোর-

মন্দিরে অলঙ্কৃত—তাহাদের পরস্পর সান্নিধ্য বশতঃ “ছুই বোন” নামকরণ হইয়াছে। দ্বিতীয় আলির সচিবপ্রধান খাওয়াস্ খান ছুই বোন } ও তাঁহার গুরু আবদুল খাদির এই ছুই মন্দিরে শয়ান রহিয়াছেন। ইহাদের গোরপ্রস্তর সকল ভিত্তি-প্রস্তরের মধ্যে প্রচ্ছন্ন—গুম্বজ গৃহ যেন বাসস্থানের জন্য নির্মিত বোধ হয়। বস্তুতঃ ইহার একটি গুম্বজ বাসগৃহে পরিণত হইয়াছে। শ্মশান ভূমির উপর জীবন্ত মনুষ্য বাস করিতেছে !

ছুই বোনের অনতিদূরে প্রাচীরবেষ্টিত একটি উদ্যানের মধ্যে ঔরঙ্গজীবের মহিষীর গোরস্থান। এই গোরের শ্বেত পাষণ দিল্লী হইতে আনীত হয়—ওরুপ প্রস্তর বিজাপুর অঞ্চলে পাওয়া ঔরঙ্গজীবের } যায় না। কেহ কেহ বলেন ইহা সত্ৰাটের মহিষীর গোর } কন্য়ার গোরস্থান। এই সম্বন্ধে একটি প্রবাদ আছে। তাহা এই যে শিবাজী রাজার দিল্লীপ্রবাস কালে রাজকুমারী তাঁহার প্রেমে মুগ্ধ হন। শিবাজী যদি মুসলমানধর্ম স্বীকার করেন, তাহা হইলে তাঁহার সহিত কন্য়ার বিবাহ দিতে ঔরঙ্গজীবের কোন আপত্তি ছিল না। কিন্তু শিবাজী তাহাতে সম্মত হইলেন না। রাজকুমারীর পাণিগ্রহণে অনেকে উৎসুক ছিল, কিন্তু তিনি সেই অবধি আর বিবাহ করেন নাই। অপরিণীত অবস্থাতেই তাঁহার মৃত্যু হয় ও বিজাপুর-বিজয়ের তিন বৎসর পরে ঐ স্থানেই তিনি সমাধিস্থ হন।

এতদ্ভিন্ন “মোতি গুম্বজ,” বারো পায়ার গুম্বজ প্রভৃতি



অপরাপর গোরমন্দির সংখ্যাতীত, প্রস্তাববাহুল্য ভয়ে তাহাদের বর্ণনা হইতে বিরত হইতে হইল ।

প্রাসাদের মধ্যে পূর্বেই দুই চারিটির উল্লেখ করা গিয়াছে । ইহাদের মধ্যে “আসার মহল” অপেক্ষাকৃত অক্ষত অবস্থায় দৃষ্ট হয় । ইহা সুলতান মাহমুদের রচিত । প্রথমে ইহা

“আসার মহল” } আদালতের জন্য নির্মিত হয় ইহার নাম
“আদালত মহল” অথবা “দাদ মহল” ছিল ।

আচ্ছাদিত সেতুবন্ধনে ইহা রাজ বাড়ীর সহিত সংযুক্ত ছিল, পরে এক নূতন আদালত প্রস্তুত হইলে ইহার নাম পরিবর্তন ও কার্যান্তরে নিয়োজন হয় । মহম্মদের শাস্ত্রের দুইটি কেশ ইহার ভাণ্ডারজাত হওয়া ইহার পদোন্নতি ও সৌভাগ্যের মূল । অন্যান্য ইমারতের ন্যায় এই পবিত্র নিকেতনের উপর বিশেষ কোন উপদ্রব ঘটে নাই, মহম্মদের শাস্ত্রের প্রসাদে সে অনেক বিঘ্ন বিপত্তি হইতে উদ্ধার পাইয়াছে । আদালত মহল বিনষ্ট হইয়াছে কিন্তু আসার-মহল আজ পর্য্যন্ত প্রায় যেমন তেমনিই রহিয়াছে । আসার মহল চতুষ্কোণাকৃতি, ১৩৫ ফীট প্রস্থ দ্বিতল গৃহ । ইহার চিত্রিত কাষ্ঠছাদ ৩৫ ফীট উচ্চ চারিটি স্বদৃঢ় কাষ্ঠ স্তম্ভের উপর স্থাপিত । দ্বিতীয় তলে কতকগুলি সুরঞ্জিত প্রকোষ্ঠ আছে, তাহার একটি মহম্মদের শাস্ত্রের ঘর । এই ঘর প্রায়ই বন্ধ থাকে, বার্ষিক উৎসবে ভক্তদের দর্শন জন্য কেবল সম্বৎসরে একবার মাত্র খোলা হয় । আর কতকগুলি প্রকোষ্ঠ কার্পেট, মকমলের চাদর ও বিছানা, চীনের বাসন প্রভৃতি পুরাণ

সামগ্রী সকলের ভাণ্ডারঘর। এই সকল ঘরের প্রাচীর ছাদ প্রভৃতি বিচিত্র লতা পাতা মানুষের ছবিতে চিত্রিত। শেষ প্রকোষ্ঠে প্রাচীরের গায়ে মাহমুদ বাদসাহের ছবি মোগল সম্রাটের বর্ষের হস্তে পড়িয়া নষ্ট হইয়াছে। আর আর চিত্রাবলি কালের দংশনে বিবর্ণ ও বিলুপ্তপ্রায় হইয়া গিয়াছে। আসার মহলে বিজাপুর সম্বন্ধীয় কতকগুলি হস্তাক্ষর লেখা ছিল, তাহার কতক বিনষ্ট কতক বা স্থানান্তরিত হইয়াছে।

আর একটি বাড়ী কারুকার্যের জন্য বিখ্যাত—নাম “মেহতর মহল।” এই নাম সম্বন্ধে নানা মুনির নানা মত। কেহ বলেন এক জন মেথরের নাম হইতে এই নামের উৎপত্তি।

মেহতর মহল” } তার গল্প এই :—ইব্রাহিম বাদসার কুষ্ঠ রোগ হইয়াছিল। অনেক চিকিৎসার পর এক জন গণৎকার তাঁহাকে পরামর্শ দেয় যে শয্যা হইতে গাত্রোত্থান করিয়া মহারাজ প্রথমে যার মুখ দেখিবেন তাহাকে ধন-রত্ন দান করিবেন। পুণ্যকার্যে সেই অর্থ ব্যয় হইলে মহারাজ নিশ্চয়ই আরোগ্যলাভ করিবেন। রাজার রাত্রে ভাল নিদ্রা হয় নাই, প্রত্যুষে গাত্রোত্থান করিয়াই এক জন মেথরের মুখাবলোকন করেন। তাহার যে ধনলাভ হয় সেই ধনে এই মহল নির্মিত—ইহা একটি মসজিদের প্রবেশ দ্বার। অন্তমতে ফকীর-দলের মেহতর অর্থাৎ প্রধান কর্তৃক নির্মিত বলিয়া ইহার নাম মেহতর মহল। নাম যাহাই হউক, ইহার কারুকার্য বাস্তবিক প্রশংসনীয়! দোতালার ছাদ এক অদ্ভুত ব্যাপার! উহা সম-



তল ও কড়িকাঠের উপর অবলম্বিত। কড়িকাঠ বলা ঠিক হইল না, কেন না উহা প্রস্তরময়। এই সকল পাথরের কড়িকাঠ যে কিসের উপর নির্ভর করিয়া আছে, তাহা বোঝা যায় না। পৃথিবী বাসুকীর গৃষ্ঠে—বাসুকীর আশ্রয় কে? মেহতর মহলের ছাদ সম্বন্ধেও এই প্রহেলিকা—ইংরাজ এঞ্জিনিয়রদেরও ধাঁদা লাগিয়া যায়। এই গৃহের শিল্পকার্য্য যে দেখে সেই মোহিত হয়। কাঠের কাজের অনুরূপ পাথরের উপর ফল ফুল প্রভৃতি বিবিধ নক্সা। ফরগসন সাহেব বলেন যে অলঙ্কার ও শিল্পচাতুর্য্যে এই বাড়িটা মিশরের কায়রোর কোন বাড়ীর নিকট হার মানেন না।

এখানকার মসজিদের মধ্যে জুম্মা মসজিদ সর্বপ্রধান। দাক্ষিণাত্যে এমন সুন্দর মসজিদ প্রায় দেখা যায় না। লালিত্য, শিল্পকৌশল ও কার্য্যকারিতা ইহা সর্বপ্রকারেই প্রশংসার্হ।

জুম্মা মসজিদ } এ মসজিদ এক জনের রচনা নহে। প্রথম আলি
আদিল সাহেব } ইহাতে ঔরঙ্গজেব পর্য্যন্ত নৃপতি-
গণের হস্তচিহ্ন সকল ইহাতে বর্তমান। কিন্তু যদিও রাজারা ইহার নির্মাণ ও অলঙ্কার কার্য্যের প্রতি বিশেষ মনোযোগী ছিলেন, তথাপি ইহা অসম্পূর্ণ—বহির্মিনারাভাবে যেন অঙ্গহীন হইয়া রহিয়াছে। প্রধান দ্বার দিয়া চতুষ্কোণ প্রাঙ্গণে প্রবেশ করিয়া দেখিবে তিন দিকে মসজিদের গৃহাবলী, প্রাঙ্গণের মধ্য-
ভাগে একটি শুক্ক ফোয়ারা। মসজিদের খিলান স্তম্ভময় সূদীর্ঘ
শালা, সুন্দর গুম্বজ, সুরাগরঞ্জিত ভজনালয় (মেহরাব) সকলি

চমৎকার ! চকচকে মেঝের উপর এক এক জন বসিবার আঁচড় কাটা আসন আছে, সে সকল গণনা করিলে ইহাতে প্রায় ৪,০০০ উপাসকমণ্ডলীর বসিবার স্থান সংকুলান প্রতীয়মান হয় । মেহরাবে কতকগুলি শিলালেখ আছে, তাহার চারিটি ধর্মনীতি সম্পর্কীয়, দিওয়ান হাফেজের গ্রন্থ হইতে সংগৃহীত ; যথা—

“জীবনে বিশ্বাস নাই—ইহা ক্ষণস্থায়ী”

“ক্ষণভঙ্গুর সংসারে শান্তি নাই”

“সংসার ইন্দ্রিয়সুখের আগার”

“জীবন অমূল্যদান কিন্তু অনিত্য,”

অবশিষ্ট দুইটি লেখ হইতে জানা যায় যে সুলতান মাহমুদের আদেশে তাঁহার ভৃত্য মালিক যাকুব কর্তৃক ১০৪৫ (১৬৩৬) অব্দে এই মেহরাব নির্মিত ও অলঙ্কৃত ।

আর্ক কেল্লার মধ্যভাগে আনন্দ মহলের সন্নিহিতে মক্কা মসজিদ । মক্কায যে মসজিদ আছে তাহার আদর্শে নির্মিত বলিয়া ঐ নাম । ইহা বেশ একটি সুন্দর ছোটখাট মসজিদ,

মক্কা মসজিদ } ঠিক যেন একটি খেলানার জিনিস । ইহার
ভজনকোষ্ঠ বিচিত্র, সুন্দররূপে খোদিত ও

অলঙ্কৃত এবং মসজিদটি উন্নত প্রকারে পরিবেষ্টিত । প্রবাদ এই যে চতুর্দশ শতাব্দীর প্রারম্ভে এক জন খ্যাতনামা পীর এই মসজিদ নির্মাণ করেন । তখন বিজাপুর হিন্দুরাজাদের অধীন ছিল । পীর দলবলে এই স্থানে আসিয়া আড্ডা করিলে

পর হিন্দুরা বিরক্ত হইয়া তাহাদের তাড়াইবার পস্থা দেখিতে লাগিল। বলে না পারিয়া তাহারা ভাবিল ইহাদের অন্নাভাবে শুকাইয়া তাড়াইতে হইবে। যবনদের কিছুই দিব না, তাহাদের নিকট কোন জিনিস বেচিব না গ্রামস্থ লোকদের এই প্রতিজ্ঞা হইল। মুসলমানেরা অন্নকষ্টে পড়িয়া ক্ষুধার জ্বালায় হিন্দুদের একটি গরু ধরিয়া মারে। এই সূত্রে হিন্দু-মুসলমান মধ্যে মহা দাঙ্গাহাঙ্গাম বাধিল। পীরকে রাজা বিজনরাওএর সমক্ষে ধরিয়া আনা হইলে রাজা তাহাদের গোহত্যার কারণ জিজ্ঞাসা করিলেন। পীর উত্তর করিলেন, “আমরা আহাৰাতাবে বাধ্য হইয়া এই কাণ্ড করিয়াছি কিন্তু এই গরু পুনর্জীবিত করিয়া মহারাজকে প্রত্যর্পণ করি” এই বলিয়া প্রেতাহ্নি সকল সংগ্রহ করিয়া মন্ত্রপাঠ করিলেন আর গরুও সজীব হইয়া উঠিল ! রাজা পীরের ঈদৃশ প্রতাপ দর্শনে সন্তুষ্ট হইয়া ভূমিদান ও বাসের অনুমতি করেন। সেই ভূমির উপর মক্কা মসজিদ প্রতিষ্ঠিত হয় ; নিকটে পীরের গোরস্থান।

এতদ্ভিন্ন মালিকা জাহান, মালিক সান্দাল, আন্দু, বোখারা প্রভৃতি আরো কত কত মসজিদ আছে তাহার ইয়ত্তা নাই। বিজাপুর গোর মসজিদে ছয়লাপ।

বিজাপুরে বেড়াইতে আসিয়া কূপ, বাপী, তোপ, বুরুজ, মসজিদ, গুম্বজ, প্রাসাদের মধ্যে দুইটী “গোরখ ইমলি” বৃক্ষ দেখিতে কেহ যেন ভুলিয়া না যান। এই দুই বৃক্ষ আর্ককেল্লার বড় রাস্তার ধারে “দুই বোনের” নিকটবর্তী ময়দানে মাথা তুলিয়া

গোরখ ইমলি বৃক্ষ } আছে। ইহাদের আকারপ্রকার যে কেবল
দর্শনীয় তাহা নহে। তখনকার কালে প্রাণ-
দণ্ডে দণ্ডনীয় ব্যক্তিদের ফাঁসিবৃক্ষ বলিয়া ইহাদের বিশেষ
গৌরব।

বিজাপুরের সুখসৌভাগ্যের সময় মধ্যে মধ্যে এক এক জন
পরিব্রাজক আসিয়া বিস্ময়ানন্দ উচ্ছ্বাসে যে সহরবর্ণনা করিয়া
গিয়াছেন, তাহা হইতে সে কালের অবস্থা কতকটা অবগত
আসাদ বেগের } হওয়া যায়। দৃষ্টান্তস্বলে আসাদ বেগের
বিজাপুর বর্ণনা } লিখিত বিবরণ দেওয়া যাইতে পারে। আসাদ
বেগ লোকটা কে তাহা জানা আবশ্যিক। ১৬০০ অব্দের
বৎসরেক পরে ইব্রাহিম আদিল সা ও সত্ৰাট আকবরের মধ্যে
এক সন্ধিবন্ধন হয়। সেই উপলক্ষে সত্ৰাটের পুত্র রাজকুমার
দানিয়েলের সহিত ইব্রাহিম স্বীয় কন্যার বিবাহ দিতে প্রতিশ্রুত
হন। এই সময়ে আসাদ বেগ মোগল সত্ৰাটের দূত স্বরূপ
বিজাপুরে আসেন। তথায় সুলতান যথোচিত আতিথ্য সৎ-
কারের সহিত তাঁহার অভ্যর্থনা পূর্বক বহুমূল্য উপহার দিয়া
রাজকুমারী সমভিব্যাহারে তাঁহাকে বিদায় করেন। সুপ্রসিদ্ধ
ইতিহাসলেখক ফেরিস্তাও কন্যাযাত্রীর দলে ছিলেন। এই
সঙ্গে মোগল সত্ৰাটের জন্য অমূল্য মণিরত্ন ও বাছা বাছা হস্তী
উপঢৌকন প্রেরিত হয়। হস্তীর মধ্যে একটীর কথা এইরূপ
কথিত যে, তাহার দুই মন পরিমাণ মদ্য পান করিবার অভ্যাস
ছিল, তাহা অনেক হাঙ্গামা করিয়া যোগাইতে হইত। রাজ-

কুমারীর এই বিবাহে মত ছিল না। তিনি ভীমাতীর পর্য্যন্ত আসিয়া ফিরিয়া যাইতে চাহিলেন। রাত্রে এক প্রবল ঝড় উঠিল—তাম্বুকানাত ছিন্নভিন্ন হইল ও রক্ষকেরা ছড়ীভঙ্গী হইয়া পড়িল। এই অবসরে রাজকুমারীও পলায়ন করিলেন। সকালে আবার তাঁহাকে ধরিয়া আনা হয় ও আসাদ বেগ যথানির্দিষ্ট স্থানে রাজকুমার দানিয়েলের নিকট তাঁহাকে পৌঁছাইয়া দেন। আসাদ বেগ বিজাপুর দর্শনে মোহিত হইয়াছিলেন। তাঁহার সহর বর্ণনা এইঃ—“বিজাপুর সমুন্নত প্রাসাদ অট্টালিকাপূর্ণ সুবিস্তীর্ণ নগর। বাজার ৬০ হস্ত প্রস্তু, দুই ক্রোশ পর্য্যন্ত বিস্তৃত। প্রত্যেক দোকানের সাম্মুখে এক একটী ছায়াতরু, ও সমুদায় হাটবাজার পরিষ্কার পরিচ্ছন্ন। এই সকল দোকানে যে সব জিনিস আছে তাহা অন্যত্র সচরাচর দেখা যায় না। গহনা, বস্ত্র, অস্ত্রশস্ত্র, রুটী, মৎস্য, মাংস, মদ্য, মসলায় সুসজ্জিত বিপণীশ্রেণী সহরের শোভা সম্পাদন করিতেছে। গহনার দোকানে নানাবিধ অলঙ্কার ও খড়্গ, ছুরি, দর্পণ প্রভৃতি মণি-মুক্তাখচিত সুন্দর সুন্দর সামগ্রী প্রস্তুত। পরে রুটীওয়ালার দোকান, কাপড়ের দোকান, আতর গোলাবে সুবাসিত চীন কচের শিশিতে সুসজ্জিত আতরের দোকান, ফলমিষ্টান্নভরা ময়রার দোকান, গায়কনর্তকীদের নাট্যশালা এই সকল বর্ণনা করিয়া বলিতেছেন—এক কথায়, সমুদায় মার্কেট সুরা সুন্দরী, আতর গোলাব, বস্ত্রালঙ্কারবিপণীহারে সুশোভিত। কোন স্থানে সহস্র সহস্র লোক নৃত্যগীত আমোদে মত্ত। বিবাদ

নাই, কলহ নাই, অবিরাম আমোদ-প্রবাহ । এরূপ হুচারু দৃশ্য পৃথিবীর অন্য কোথাও আছে কি না সন্দেহ । তিনি যে রূপ বর্ণনা করিয়াছেন তাহা মহম্মদের অবিকল স্বর্গবর্ণনা—মর্ত্যে যদি কোথাও বেহস্ত (স্বর্গ) থাকে তবে তাহা বিজাপুর—

অগর বেহস্ত অন্দর জমীন হস্ত্—

হমীনস্ত্ ও হমীনস্ত্ ও হমীনস্ত্ !

স্বর্গ যদি কোথাও থাকে মর্ত্যধামে

সে তবে এই খানে—এই খানে—এই খানে !

পুরাতন বিজাপুরের কথায় আমরা যেন নিজ্ সহরটুকু কল্পনা করিয়া মনে না করি যে এই সে বিজাপুর । সহর অপেক্ষা সহরতলি ভারি—সহরের শাখাপ্রশাখা অনেক দূর সহরতলি } বিস্তৃত ছিল, আর আমরা যে লক্ষ লক্ষ লোকের বসতির বিবরণ শুনিতে পাই সে সহর, সহরতলি সবটা ধরিয়া । সাহাপুর, জোরাপুর, ইব্রাহিমপুর, নৌরসপুর, আল্লাপুর, আয়না-পুর, প্রভৃতি পুররাজি প্রাচীন বিজাপুরের অন্তর্গত । এই সকলের মধ্যে সাহাপুরই প্রধান । অধুনাতন পাশ্চাত্য চতুঃপুর—সাহাপুর, জোরাপুর, পীর আমীনের দরগা, আফজুলপুর—সেই পুরাণ সাহাপুরের ভগ্নাবশেষ । এই সাহাপুর-বিজাপুর মিলিয়া অনেকটা স্থান জুড়িয়া অবস্থিত এবং সাধারণ বিজাপুর সংজ্ঞায় অভিহিত । ইহাতে প্রায় ১০ লক্ষ লোকের বসতি ছিল । ১৬৩৫ অব্দে মাহমুদ বাদশা মোগল আক্রমণ প্রতিরোধ উদ্দেশে বিজাপুরের আশপাশ অনেক স্থান বিনষ্ট করিয়া

ফেলেন। সেই সঙ্গে সাহাপুরও অনেকাংশে ক্ষতিগ্রস্ত হয়। পরে যখন শত্রু ভয়ে কেল্লার বাহিরে বাস সঙ্কটপূর্ণ হইয়া উঠিল, তখন হইতে ক্রমে সাহাপুর পুরবাসী কর্তৃক পরিত্যক্ত হইল।

সাহাপুরের অন্তর্গত আফজুলপুর শিবাজীর শিকার নামদার আফজুল খাঁর বাসস্থান ছিল। নিজ গ্রামের বিশেষ কিছুই বর্ণনীয় নাই, কিন্তু কিয়দুর্নে নবাব পরিবারের কতকগুলি গোর আফজুলপুর { আছে, তৎসম্বন্ধে এক মজার গল্প আছে। গোরগুলি সকলই স্ত্রীলোকের গোর, আমতৈঁতুলবনপরিবৃত একটী সরোবর তীরে স্থাপিত। তাহার জল এখন শুকাইয়া গিয়াছে। এক লাইনে সাতটী গোর, এমন ১১ লাইন। গোরগুলির সকলেরই আকারপ্রকার প্রায় সমান। গল্পটা এই যে আফজুল খাঁ যখন শিবাজীর বিরুদ্ধে যুদ্ধ যাত্রা করেন, তখন গণৎকারেরা গণিয়া বলে যে এই যাত্রাই তাঁহার শেষ যাত্রা— আর তাঁহাকে দেশে ফিরিতে হইবে না। তাহাদের কথায় প্রত্যয় করিয়া তিনি পূর্ব হইতেই গৃহকার্য্যের ব্যবস্থা করিয়া যাইতে সমুৎসুক হইলেন। তাঁহার সপ্তসপ্ততি বেগম ছিল, তাহাদের গতি কি হইবে? তিনি এক উপায় স্থির করিলেন। বেগমদের পুষ্করিণীর জলে ডুবাইয়া, পুষ্করিণীর ধারে তাহাদের সারি সারি গোর দিয়া, নিশ্চিন্ত হইয়া যুদ্ধ যাত্রায় নিষ্ক্রান্ত হইলেন। গল্পটা সত্য কিনা ঠিক্ বলা যায় না, কিন্তু এক ধরণের এতগুলি সারি সারি স্ত্রীলোকের গোর দেখিয়া ইহা নিতান্ত অমূলক বলিয়া বোধ হয় না।

সাহাপুরের পশ্চিমে নৌরসপুর । দ্বিতীয় ইব্রাহিম বিজাপুর ছাড়িয়া এই এক নূতন রাজধানী পত্তনের সঙ্কল্প করিয়াছিলেন । ঐ উদ্দেশে ঐ স্থানে ১৬০০ অব্দে অনেক বড় বড় নৌরসপুর { ঘরবাড়ী নির্মাণ আরম্ভ হয় । স্থানটি গিরিকাননপরিবৃত, বিজাপুর অপেক্ষা দেখিতে সুদৃশ্য বটে । ইব্রাহিমের সাধ কিন্তু অপূর্ণ রহিল । আবার সেই গণৎকারের অন্তরায় ! তাহারা তাঁহাকে রাজধানী পরিবর্তনে অমঙ্গল বলিয়া সতর্ক করাতে তিনি সে পরামর্শ অগ্রাহ্য করিতে আর সাহস করিলেন না । সে যাহা হউক, এই ধাক্কায় নৌরসপুরে অনেক প্রাসাদউদ্যানগৃহাবলী নির্মিত হইয়া পুরবাসীদের কাজে আসিল । তাহাদের বেড়াইবার জায়গা—আরামবিরামের স্থান ঐ । উহার গৃহাবলীর ভগ্নাবশেষ এই ক্ষণে যাহা দৃষ্ট হয় তন্মধ্যে “সঙ্গীত মহল” প্রাসাদটী অতীব মনোহর, বিজাপুরের কোন প্রাসাদ অপেক্ষা কোন অংশে হীন নহে । বাড়ীর সম্মুখে বেস বড় একটা উৎস ও জলাশয় তোরবীর জলপ্রণালীর সহিত সংযুক্ত । বাড়ীর দুই পাশ দিয়া ক্ষুদ্র নদীশ্রোত বহিতেছে—দূরে পাহাড়ের শোভা—চতুর্দিকের বৃক্ষলতা ভগ্নস্তূপের মধ্যে সঙ্গীত মহলের ‘অকথিত’ সঙ্গীত লহরী সমুখিত হইতেছে !

বিজাপুরের চারিদিকে মরুভূমি সদৃশ শুষ্ক ক্ষেত্ররাজি দেখিয়া আশ্চর্য্য হইতে হয়—কি করিয়া এ স্থান এই বিপুল রাজ্যের রাজধানী রূপে মনোনীত হইল । তাহার এক কারণ মরুদেশে রাজধানী { বোধ করি বিজাপুরে জলের প্রাচুর্য্য ।

বাহিরের দিকটা যেমন শুষ্ক, ভিতরে তেমনি জলের অনেক উৎস। সেই উপলব্ধি পূর্ণ বিশৃঙ্খল কালে ঈদৃশ অবস্থাই তাহার আত্মরক্ষার উপায়। উত্তর দিক হইতে আক্রমণের অধিক সম্ভাবনা—সেই দিকেই ভূমি অনুর্বর—আক্রমণকারী শত্রু-দলের আহার সামগ্রীর অপ্রতুল বশতঃ সে দিকটা সুরক্ষিত। দক্ষিণ হইতে পুরবাসীদের অন্নের সংস্থান ও সহরের মধ্য হইতে জলকষ্ট নিবারণ হইত। নগরের মধ্যে তাজ-বাউড়ী প্রভৃতি যে সমস্ত জলাশয় আছে তাহাতে অকুলান হইবার আশঙ্কায় রাজারা দূর হইতে জল আনা হইবার অশেষ সুবিধা করিয়া দিয়াছিলেন। তোরবী জলপ্রণালীর ভগ্নাবশেষ ও সুলতান মাহমুদের “বেগম ত শাও” এ বিষয়ে তাঁহাদের যত্ন ও উৎসাহের অব্যর্থ প্রমাণ।

দ্বিতীয় ভাগ।

ইতিহাস।

বিজাপুর রাজ্য সংস্থাপক মুসফ আদিল সা তুর্ক সুলতান মুরাদের কনিষ্ঠ পুত্র ছিলেন। ১৪৪৩ অব্দে তাঁহার জন্ম।

মুসফ আদিল সা } সুলতান রাজবংশে একটা মাত্র পুত্র সন্তান
১৪৮৯—১৫১০ } জীবিত রাখিয়া অবশিষ্ট গুলিকে বিনষ্ট
করিবার এক নৃশংস রীতি ছিল। এই প্রথানুসারে সুলতান
মহম্মদ সিংহাসনারূঢ় হইবামাত্র তাঁহার অবশিষ্ট ভ্রাতৃগণের

নিধন সাধনের আদেশ জারী করেন—যুসফ তাহাদের মধ্যে এক জন। যুসফের মাতা সন্তানের প্রাণরক্ষার অনেক চেষ্টা দেখিলেন, কিন্তু কিছুতেই কৃতকার্য হইতে পারিলেন না। নিতান্ত নিরুপায় দেখিয়া তিনি এক কৌশল করিলেন। ইমামুদ্দীন নামক জনৈক পারস্য বণিক কনস্তান্তানিয়ায় বাস করিতেন; তাঁহার সাহায্যে আপন পুত্রের স্থানে অপর একটি বালককে সাজাইয়া দিয়া যুসফকে বণিকের হস্তে সমর্পণ করিলেন। বণিক তাঁহার জীবন রক্ষার্থে প্রতিশ্রুত হইয়া যুসফকে পারস্য দেশে লইয়া যান ও তাঁহার বিদ্যাধ্যয়নের সুব্যবস্থা করিয়া দেন। সেখানেও তাঁহার জীবন-রহস্য প্রকাশিত হইয়া তাঁহাকে আসিল। তাঁহাকে মগ্ন করে। অবশেষে অনেক ফাঁড়া কাটাইবার ঐ। উহার গৃহাবস্থা হয় যে ভারতবর্ষে প্রয়াণেই তাঁহার কল্যাণ, তন্মধ্যে “সঙ্গীত মহা ১৪৬১এ তিনি পারস্য দেশ পরিত্যাগ করিয়া কোন প্রাসাদ অপেরি) উদ্ভীর্ণ হইলেন। তখন তাঁহার বয়ঃক্রম বেস বড় একটি ঐবান্ বিদ্যা বিনয় সম্পন্ন। জনৈক পারস্য বণি-সংযুক্ত। বাস্তবিক্তে তিনি দাতোল হইতে বাহমন-রাজধানী বিদূরে গমন করেন। তথায় রাজমন্ত্রী মহম্মদ গওয়ানের অনুগ্রহে সৈনিক পদে নিযুক্ত হইলেন। সত্বর তাঁহার পদোন্নতি হইল। বিদূর হইতে বহুদূরে গিয়া তিনি ১৫০০ অশ্বের অশ্বপতি ও আদিল খাঁ আখ্যা প্রাপ্ত হইলেন। অনন্তর মহম্মদ গওয়ান তাঁহাকে দৌল-তাবাদের গবর্ণর নিযুক্ত করেন। মহম্মদের মৃত্যুর পর বিজাপুরে বহমনী রাজার অধীনে তাঁহার কর্ম হয়। ১৪৮৯এ তিনি অধী-

নতা-বসন পরিত্যাগ পূর্বক রাজপদবী গ্রহণ ও বিজাপুরে স্বীয় রাজ্য স্থাপন করিলেন। ১৪৯৮এ দক্ষিণ সুলতানেরা বাহমণী রাজ্য আপনাদের মধ্যে বিভাগ করিয়া লন, তখন গোওয়া ও তৎসমীপবর্তী প্রদেশ যুসফের ভাগ্যে আইসে। যখন ভাস্কো ডি-গামা ভারতবর্ষের নূতন পথ আবিষ্কার পূর্বক কর্ণাটক তীরে আবির্ভূত হন, তখন যুসফ বিজাপুরের অধীশ্বর। পোর্তুগীসদের সঙ্গে গোওয়া লইয়া তাঁহার অনেক যুদ্ধ হয়। ১৫০৯এ পোর্তুগীসদের রাজপ্রতিনিধি আলবুকর্ক বিজাপুর বিপক্ষে বিজয়নগরের রাজার সহিত সন্ধি বন্ধন করেন। পর বৎসরে আলবুকর্কের হস্তে বিজাপুর সৈন্যের পরাভব হইয়া গোওয়ায় পোর্তুগীস আধিপত্য সংস্থাপিত হয়।

বিজাপুরে দুই শত বৎসরের মধ্যে নয় জন রাজা সিংহাসনে উপবিষ্ট হন, কিন্তু তাঁহারা নির্বিঘ্নে রাজ্যভোগ করিতে পান নাই। সেকাল স্থখশান্তিভোগের কালই নহে। ঘোর উপদ্রব—তুঘল বিপ্লব—গভীর অশান্তির মধ্যে তাঁহাদের রাজ্য কারবার। হয় বৈরনির্ঘাতনের চেষ্টা, নয় শত্রু হইতে আত্মরক্ষার উপায় চিন্তন। সিয়া ও সন্নী মুসলমানের যুদ্ধ—প্রতিবাসী সুলতানদের সহিত যুদ্ধ—বিজয়নগরের হিন্দু রাজাদের সহিত যুদ্ধ—মোগলদের সহিত যুদ্ধ—এই সকল যুদ্ধ বিগ্রহের মধ্যে বিজাপুর রাজারা কখন যে রাজ্যশাসন—রাজ্যের উন্নতি ও শ্রীবৃদ্ধি সাধনের অবকাশ পাইতেন তাহা ভাবিয়া ওঠা যায় না।

যুসফ আদিল সা পারস্যে বাস ও শিক্ষালাভ করিয়া সিয়া

সিয়া ও সুলতান } ধর্ম্মে অনুরক্ত হইয়াছিলেন। স্বীয় রাজ্যে সিয়া মত সংস্থাপন করিতে গিয়া দেখিলেন যে ব্যাপারটা নিতান্ত সহজ নয়। তাঁহার সেনাদের মধ্যে তুর্ক প্রভৃতি অনেকে সুলতান মুসলমান ছিল, আর প্রতিবাসী সুলতানেরাও এই নূতন মতের প্রতিপোষক ছিলেন না। এই সূত্রে যে যুদ্ধ ঘটনা হয়, তাহা দাক্ষিণাত্যের ধর্ম্মযুদ্ধ নামে অভিহিত। আহমদনগর, গোলকণ্ডা, বিদূরের সুলতানগণ তাঁহার বিরুদ্ধে ধর্ম্মযুদ্ধে অস্ত্র ধারণ করিলে পর যুসুফ অনেক কষ্টে এই ষড়চক্র ভেদ করিয়া পার পাইলেন। ভাগ্যক্রমে তিনি তেমন গোঁড়া সিয়া ছিলেন না—স্বরাজ্যে সিয়া মত সংস্থাপনের সঙ্গে সঙ্গে সুলতানদের ধর্ম্মানুষ্ঠানে হস্তক্ষেপ নিষেধ করিলেন। ধর্ম্মবিষয়ে তাঁহার উদার মত ছিল। তিনি বলিতেন “যেমন স্বর্গের নানা নিকেতন তেমনি ইসলামের নানা সম্প্রদায়।” হিন্দুদের উপর তাঁহার বিশেষ মমতা ছিল, তিনি একজন মহারাষ্ট্রী রমণী বিবাহ করিয়া হিন্দুজাতির সহিত সহানুভূতির পরিচয় দিলেন।

মহারাষ্ট্রী মহিষীর গুহরসে তাঁহার এক পুত্র জন্মে—নাম ইস্মায়ল। যুসুফের মৃত্যুর পর ইস্মায়ল আদিল সা সিংহাসনে ইস্মায়ল আদিল সা } অধিকৃত হইলেন, রাজ্যাভিষেক কালে তিনি ১৫১০—১৫৩৪ } সিয়া, তাঁহার মন্ত্রী কামাল খাঁ সুলতান। রাজা মন্ত্রীর মধ্যে বিষম গোলযোগ উপস্থিত। মন্ত্রীর মতলব স্বয়ং সিংহাসন অধিকার করিয়া বিজাপুরে সুলতানধর্ম্ম প্রত্যাশ্রয় করেন।

বালক সুলতান ও তাঁহার মাতা, কামাল খাঁ কর্তৃক প্রাসাদে

বন্দীকৃত হইলেন। মন্ত্রী স্বয়ং বল পূর্বক রাজ্য লাভের অভিলাষী ছিলেন কিন্তু গণৎকারেরা গণিয়া বলিল এখনো সময় হয় নাই, তাই তিনি নিজগৃহে শুভলগ্ন প্রতীক্ষা করিয়া রহিলেন।

রাজ্ঞী তাঁহার পুত্রের সমূহ শঙ্কট উপস্থিত দেখিয়া একজন বিশ্বাসী তুর্ককে কমালখাঁ বধে নিযুক্ত করিলেন। তুর্ক মক্কা যাত্রার ভান করিয়া মন্ত্রীর সহিত সাক্ষাৎ করিতে যায়। মন্ত্রী তাহাকে সাদরে অভ্যর্থনা করেন। মন্ত্রীবর যেমন তুর্কের হাতে পান দিতে হাত বাড়াইলেন, অমনি সে তড়িতের ঞায় হ্রস্বিত লুপ্তায়িত খড়্গ বাহির করিয়া মন্ত্রীর বুকে বসাইয়া দিল; মন্ত্রীর অনুচরেরা সেই দণ্ডে তুর্ককে কাটিয়া ফেলিল। মন্ত্রী ও তাঁহার হস্তা দুজনেই এক সঙ্গে প্রাণ হারাইলেন।

মন্ত্রীর মাতা, সুলতানা-সদৃশী সাহসিকা ও দৃঢ়প্রতিজ্ঞ ছিলেন। তিনি পুত্র হারাইয়া আপন পৌত্রকে তৎপদে প্রতিষ্ঠিত করিবার মনস্থ করিলেন। পৌত্রের নাম সফদর খাঁ। প্রচার করিয়া দিলেন যে তাঁহার পুত্র কমাল খাঁ মরেন নাই, আহত হইয়াছেন মাত্র। যতদেহ বসন ভূষণে সাজাইয়া বারান্দায় পালঙ্কের উপর বসাইয়া রাখিলেন যেন লোকদের অভিবাদন গ্রহণ করিতে রীতিমত বসিয়া আছেন। এদিকে সফদর খাঁ একদল সৈন্য লইয়া সুলতানের প্রাসাদ আক্রমণ করিতে চলিলেন।

রাজ্ঞীও যুদ্ধের জন্য প্রস্তুত। দিলসদ নামক রমণী তাঁর সখী, এই দুই রমণী যুদ্ধবেশ ধারণ করিয়া গৃহপালদিগকে উৎ-

সাহ দিতে লাগিলেন । ঘরে লোকজন বড় বেশী ছিল না, ভাগ্যবশতঃ বাহির হইতে একদল সিয়া পক্ষপাতী সেনার প্রবেশ লাভে তাঁহাদের বলবৃদ্ধি হইল । সফদর খাঁ যেমন তাঁহার স্ত্রী-দের লইয়া প্রাসাদ আক্রমণ করিবেন অমনি উপর হইতে তাহাদের উপর গোলাগুলি প্রস্তুত বর্ষণ আরম্ভ হইল । সিয়া স্ত্রীদের ঘোরতর সংগ্রাম । অনেকে হত ও আহত হইয়া পড়িল, পরিশেষে সফদর খাঁ দ্বার ভেদ করিয়া অঙ্গনে প্রবেশ করিলেন । এই সময়ে এক বাণে তাঁহার নয়ন বিদ্ধ হইল, তিনি এক প্রাচীরের আড়ালে গিয়া আত্মরক্ষণে তৎপর হইলেন । সেই প্রাচীরের উপর বালক সুলতান উপবিষ্ট । শত্রুর প্রতি লক্ষ্য করিয়া ইস্মায়ল এক বৃহৎ প্রস্তুত খণ্ড উপর হইতে নিক্ষেপ করিলেন তাহা সফদর খাঁর উপর পড়িয়া তাঁহাকে শমন সদনে প্রেরণ করিল । এই বিদ্রোহ নিবারণের পর ইস্মায়ল নির্বিঘ্নে রাজত্ব করিতে লাগিলেন ।

ইস্মায়লের রাজত্ব সম্বন্ধে বিশেষ কিছু লিখিবার নাই । মুসলমান সুলতানদের সহিত তাঁহার যে সকল যুদ্ধ হয় তাহা এস্থলে বর্ণন করা অনাবশ্যক । তিনি সিয়া ছিলেন, পারস্যরাজা তাঁহার সম্মানার্থে বিজাপুরে দূত প্রেরণ করেন ।

ইস্মায়লের পুত্র মল্লু তাঁহার উত্তরাধিকারী । মল্লু উগ্রচণ্ডা দুরন্ত নরপতি ছিলেন । রাজ্য উচ্ছন্ন যায় দেখিয়া স্বয়ং তাঁহার উগ্রচণ্ডা মল্লু } মাতামহী তাঁহাকে রাজ্যচ্যুত করাইবার পরামর্শ দেন । ছয়মাস রাজত্বের পর মল্লু অস্বীকৃত বন্দীকৃত হইয়া

তাঁহার কনিষ্ঠ ভ্রাতা ইব্রাহিমকে সিংহাসন ছাড়িয়া দিতে বাধ্য হইলেন।

ইব্রাহিম স্ত্রী ছিলেন। স্ত্রীদের মানবর্দ্ধন, সিয়াদের নির্যাতন ও অপদস্থ করা তাঁহার কাজ ; এমন কি, অনেক সিয়া মুসলমান তাঁহার রাজ্য ছাড়িয়া বিজয়নগর রাজার অধীনতা

ইব্রাহিম } স্বীকার করে। ১৫৫৭ এ তাঁহার মৃত্যু হয়।
১৫৩৪—১৫৫৭ } অমিতাচারই তাঁহার মৃত্যুর কারণ। তাঁহার

রোগ প্রতীকারে অক্ষম বলিয়া অনেক রাজচিকিৎসকের মুণ্ড-
চ্ছেদন ও হস্তীপদ মর্দনে প্রাণদণ্ড বিধান হয়।

ইব্রাহিম বাদসাহের রাজত্ব কালে বিজয়নগরে ঘোরতর রাজ্যবিপ্লব সংঘটন হয়। চতুর্দশ শতাব্দীর ত্রিংশৎ বৎসর পরে বিজয়নগর } হক্কা ও বুক্কা দুই ভাই শৃঙ্গরি মঠাধিপতির সাহায্যে দাক্ষিণাত্যে বিজয়নগর পতন করেন। ১৩৩৫ এ হক্কা হরিহর রায় নামে বিজয়নগরের রাজা হইয়া মুকুট ধারণ করেন। ঐ সময় আবার হসন গাঙ্গু নামক জনৈক পাঠান আল্লা উদ্দীন নাম ধারণ পূর্বক দক্ষিণে এক বিস্তীর্ণ মুসলমান রাজ্যের সূত্রপাত করেন। হসন গাঙ্গু একজন ব্রাহ্মণ গণকঠাকুরের উপকার ঋণে আবদ্ধ ছিলেন, তাঁহার প্রতি কৃতজ্ঞতা প্রদর্শন মানসে তিনি “বামন” পদবী গ্রহণ করিলেন। তাঁহার বংশ “বাহমণী” নামে বিখ্যাত। বিজয়নগর ও বাহমণী সুলতানদের মধ্যে অনবরত যুদ্ধ-বিগ্রহ চলিত। বিজাপুর স্বতন্ত্র রাজ্য হইয়া দাঁড়াইলে সেও বিজয়নগরের বিষম প্রতিদ্বন্দী হইয়া উঠিল। ইব্রাহিম বাদ-

সাহের সময় দেবরায় বিজয়নগরের রাজা । তিস্মা নামে তাঁহার মন্ত্রী ছিল । দেবরায়ের মৃত্যুকালে তাঁহার কোন প্রৌঢ়বয়স্ক পুত্র ছিল না । তিস্মা একজন বালক-রাজাকে সিংহাসনে বসাইয়া আপনি রাজ্যশাসন করিতে লাগিলেন । রাজা যৌবন প্রাপ্ত হইবামাত্র তাঁহাকে বধ করিয়া আর একটী বালকের মাথায় মুকুট দেওয়া হয়—এইরূপে উপর্যুপরি তিনজন বালক-রাজার অভিষেক ও মৃত্যু হয় । অবশেষে তিস্মা দেবরায়ের এক পৌত্রীর সহিত আপন পুত্র রামরায়ের বিবাহ দিয়া রামরায়কে সিংহাসনে স্থাপন করেন । রাজকুল সমূলে নিম্নলু করা তিস্মার অভিপ্রায় । সে অভিপ্রায় সম্পূর্ণ না হউক অনেকাংশে সিদ্ধ হইল । কেবল তিস্মল নামক একজন আধপাগলা জানোয়ার আর কন্যাকুলের একটী রাজকুমার এই দুই রাজবংশধর অবশিষ্ট রহিল ।

রামরায় অবাধে রাজ্য লাভ করিলেন কিন্তু নিষ্কণ্টকে রাজ্যভোগ তাঁহার ভাগ্যে ছিল না । রাজপদ পাইয়া তিনি প্রগল্ভ ও গর্বিত হইয়া উঠিলেন । প্রজারা তাঁহার উপর চটিয়া তাঁহার বিরুদ্ধে ষড়যন্ত্র আরম্ভ করিল—তাহারা বলিতে লাগিল ইনি কোথাকার জালরাজা, আমরা একজন খাঁটি রাজা চাই । রামরায় বেগতিক দেখিয়া অবশিষ্ট রাজকুমারটীকে সিংহাসনে বসাইয়া মন্ত্রী হইলেন । ক্রমে তাঁহার অরিকুল ধ্বংস করিয়া রাজাকে সরাইয়া পুনর্ব্বার স্বয়ং রাজ্যভার গ্রহণ করিলেন ।

ইহাতেও রাজ্যের শান্তি হইল না । এ দিকে আবার আধ-

পাগলা তিস্মল গোলযোগ আরম্ভ করিল, তাহারও রাজা হইবার চেষ্টা। তিস্মল ও রামরায়ের মধ্যে বিষম দ্বন্দ্ব বাধিয়া গেল। অনেকে রামরায়ের পক্ষ হইয়া তিস্মলের বিরুদ্ধে অস্ত্র ধারণ করিল। তিস্মল এই শঙ্কটে বিজাপুর সুলতান ইব্রাহিমকে অনেক ধনরত্ন উপহার পাঠাইয়া তাঁহার সাহায্য প্রার্থনা করিলেন।

ইব্রাহিম আহ্লাদের সহিত আমন্ত্রণ স্বীকার পূর্বক সৈন্য সামন্ত সমভিব্যাহারে বিজয়নগরে উপস্থিত—তিস্মল তাহাকে স্বাগত বলিয়া বহু সমাদরে অভ্যর্থনা করিলেন।

হিন্দুদের মধ্যে হুলস্থূল বাধিয়া গেল। হিন্দুরাজ্যে এইরূপে যবন রাজের হস্তক্ষেপ সকলেরই অসহ্য হইল। রামরায় ও তৎপক্ষীয় লোকেরা তিস্মলকে সুলতান বিমর্জনে অনুরোধ করিল—বলিল, আমাদের কথামত কাজ করিলে আমরা চিরকাল আপনার অনুগত ভৃত্য হইয়া থাকিব। তিস্মল আশ্বাস পাইয়া লক্ষ লক্ষ টাকা দক্ষিণা দিয়া অনেক কষ্টে ইব্রাহিমকে বিদায় করিলেন। মুসলমানেরা যেমন কৃষ্ণা পার হইল প্রজারাও আপনাদের বচন ভুলিয়া দাঁত দেখাইতে আরম্ভ করিল। জন-রব উঠিল প্রজারা ক্ষেপিয়া উঠিয়া তিস্মলকে ধরিতে আসিতেছে। এই সংবাদে তিস্মল একেবারে অধৈর্য ও কাণ্ডাকাণ্ড বিবেচনা শূন্য হইয়া পড়িলেন। অশ্বগজের চক্ষু উৎপাটন, রাজবাটীর গহনাপত্র জাঁতায় পিষিয়া চুরমার করণ, এইরূপ ক্ষিপ্তের ন্যায় ব্যবহার আরম্ভ করিলেন। পরে শত্রুরা রাজ-

ভবনে প্রবেশ করিবার উদ্যোগ করিতেছে এমন সময় তিনি আত্মহত্যা করিয়া বিপদরাশি হইতে নিষ্কৃতি পাইলেন।

রামরায় এখন নির্ভয়ে রাজত্ব করিতে লাগিলেন—তঁাহার শাসনে রাজ্যের পূর্ব সমৃদ্ধি ফিরিয়া আসিল। মুসলমানদের মধ্যে ঈর্ষা ও ভয়ের সঞ্চার হইল।

এ দিকে ইব্রাহিমের পশ্চাৎ আলি আদিল সা বিজাপুরের আলি আদিল সা } সিংহাসন আরোহণ করিলেন। তিনি প্রথ-
১৫৫৭—১৫৮০ } মতঃ রামরায়ের সহিত মিত্রতা বন্ধন করেন।
হিন্দু মুসলমানের এরূপ মিলন আর কখন শুনা যায় নাই। রামরায়ের পুত্রশোক ঘটনায় আলি বিজয়নগরে রাজার সহিত সাক্ষাৎ করিতে যান। বিজয়নগরের রাজা রাজ্ঞী আলিকে পুত্ররূপে বরণ করেন। আহমদনগরের সহিত আলির যখন যুদ্ধ হয় তখন রামরায় বিজাপুর সুলতানের সহায়তা করেন।

হিন্দুদের গুমর বাড়িয়া উঠিল। যুদ্ধাবসানের পর রামরায় অহঙ্কারে স্ফীত হইয়া যবন রাজ্য তৃণবৎ দেখিতে লাগিলেন—মনে করিলেন ভারতে আমার সমান রাজা আর নাই। মুসলমানদের উপর দৌরাত্ম্য আরম্ভ করিলেন। মসজিদে ঘোড়ার আস্তাবল বসাইয়া তাহাদের ধর্ম্মের অপমান—সুলতানেরা যেন তঁাহার পদানত ভৃত্য—তঁাহাদের দূতের অপমান। তখন সুলতানেরা চটিয়া উঠিয়া প্রগল্ভ হিন্দু রাজাকে দমন করিতে কটিবদ্ধ হইলেন। তঁাহারা পরস্পর বিবাদ বিস-স্বাদ বিসর্জন দিয়া বিদূর ও আহমদনগর, বিজাপুর ও গোলকণ্ডা

এই চতুঃস্বলতান বিজাপুরে আসিয়া একত্র হইলেন। তথা হইতে চারি স্বলতান বিজয়নগরের উপর হুলা করিতে কৃষ্ণানদী পার হইলেন। নদী তীরে আসিয়া দেখেন রামরায়ের সৈন্য-দল পরপারে সন্মিলিত। নদীর ঘাট সুরক্ষিত পারাপার বন্ধ। স্বলতানেরা এক ফন্দী করিলেন। তাঁহারা নদীর কিনারা দিয়া কতক দূর চলিয়া গেলেন যেন পার হইবার অপরাহ্ন অন্বেষণ করিতেছেন। তদর্শনে রামরায়ের সেনাপতি স্বস্থান ছাড়িয়া পরপারে শত্রুর সঙ্গে সঙ্গে যাত্রা করিতে লাগিলেন। তিন দিন এইরূপ চলিল। তৃতীয় রাত্রে স্বলতানেরা সত্বর প্রত্যাবর্তন পূর্বক পূর্ব স্থানে আসিয়া নির্বিঘ্নে নদী পার হইলেন। পর-দিন সন্ধ্যার সময় মুসলমানেরা রামরায়ের সৈন্যের ৫ ক্রোশ দূরে আসিয়া বিশ্রাম করিল।

প্রভাতে দুই প্রতিদ্বন্দী দল পরস্পর সম্মুখীন হইল। উভ-
 তালিকোটের যুদ্ধ }
 ১৫৮৫ } যেই বন্দুক কামান ও নানা অস্ত্রশস্ত্রে হুম-
 জিত। হিন্দুরা মহারোখে আক্রমণ করিয়া
 মুসলমান সৈন্যের বাহুদ্বয় ভাঙ্গিয়া ফেলিল, কিন্তু মধ্যভাগ
 অটল। মধ্যভাগের নেতা আহমদনগরের ‘দিওয়ানা’ স্বলতান
 হুসেন নিজাম সা শীঘ্রই রামরায়ের সৈন্য দলের উপর আসিয়া
 পড়িলেন। তাঁহার সঙ্গে যে কামান ছিল তাহাতে পয়সা
 পুরিয়া হিন্দুদের প্রতি বর্ষণ করিতে লাগিলেন—সেই মারাত্মক
 অর্থপাতে হিন্দু সৈন্যের মধ্যে মহা অনর্থপাত ঘটিল। ক্রমে
 হিন্দুগণ অবসন্ন হইয়া পড়িল। রামরায় তাঁহার পালকীতে

উঠিয়া বেহারাদের দূরে যাইতে আদেশ করিলেন । বেহারাগণ
 খানিক দূর গিয়া পালকী রাখিয়া পলায়ন করিল । রামরায়
 অশ্বারোহণে পলায়নোদ্যত এমন সময় ধৃত হইয়া হুসেন সার
 সমক্ষে আনীত হইলেন । হুসেন সা তাঁহার “দিওয়ানা” উপাধীর
 উপযুক্ত রূপ কার্য্য করত মুগ্ধদের হুকুম দিলেন—তৎক্ষণাৎ
 সে আজ্ঞা পালিত হইল । স্বলতানের অনুচরেরা রামরায়ের ছিন্ন
 মুণ্ড বর্ষাবদ্ধ করিয়া সৈন্যের সম্মুখে তুলিয়া ধরিল । রাজার
 এই দশা দেখিয়া হিন্দুসৈন্য হতাশ্বাসে পলায়নপরায়ণ—
 মুসলমানেরা তাহাদের পশ্চাৎ ধাবমান হইয়া ছিন্ন ভিন্ন করিয়া
 দিল । এই তালিকোটের যুদ্ধ । এই যুদ্ধে দুপক্ষের লোক
 মিলিয়া সমরক্ষেত্রে ন্যূনাধিক দুই লক্ষ সেনার সম্মিলন হয় ।
 হিন্দুসৈন্য বিস্তর মারা পড়ে এবং বিজয়ীদের লুণ্ঠনজাত প্রচুর
 ধনরত্ন লাভ হয় । অতঃপর বিজয়ী সেনাগণ বিজয়নগরে প্রবেশ
 পূর্বক নগর মাঝে যবন-জয়পতাকা উডডীন করিল । সেখান-
 কার লুটপাটের ব্যাপার বর্ণনাতিত । নগরের বাড়ীঘর চুরমার,
 লণ্ডভণ্ড—হিন্দুকীর্তি চিহ্ন সকল চকিতের মধ্যে বিলুপ্ত হইল ।
 রামরায়ের ছিন্ন মুণ্ড জয়স্তম্ভ স্বরূপ আহমদনগরে প্রেরিত ও
 তাহার এক প্রস্তর প্রতিমা বিজাপুরে স্থাপিত হয় । এই
 প্রস্তর মুণ্ড আর্ককেল্লায় সে দিন পর্য্যন্ত অনেকে দেখিয়াছেন ।
 তালিকোটের যুদ্ধেই বিজয়নগরের ধ্বংস । এই যে তাহার
 পতন হইল আর তাহার উত্থানশক্তি রহিল না । দক্ষিণের স্বাধীন
 হিন্দুরাজ্য চিরকালের মত প্রলয় সাগরে ডুবিয়া গেল ।

১৫৮০ অব্দে আলীর মৃত্যু হয়। ইমারত নিৰ্ম্মাণে তাঁহার বিশেষ উৎসাহ ছিল—জুম্মা মসজিদ, তাজ বাউড়ী, সহরের প্রাচীর, জলপ্রণালী প্রভৃতি অনেক জিনিস তাঁহার সময়কার। তাঁহার রাজত্বের শেষ ভাগে দিল্লীস্থর আকবর প্রেরিত কয়েক জন দূত বিজাপুরে আগমন করেন, তাহাদের কি গুঢ় মতলব প্রকাশ পায় নাই। মোগলের গুপ্তচরেরা বিজাপুরের উপর সেই যে শনির দৃষ্টি নিক্ষেপ করিয়া গেল অচিরে তাহার গরল ফল ফলিত হইল।

ইতিহাস।

(উপসংহার ।)

দ্বিতীয় ইব্রাহিম } আলির উত্তরাধিকারী দ্বিতীয় ইব্রাহিম। পিতৃ-
১৫৮০—১৬২৬ } ব্যের মৃত্যুকালে তাঁহার বয়ঃক্রম ৯ বৎসর মাত্র।

তাঁহার নাবালক অবস্থায় আলির মহিষী চাঁদবিবি রাজ্যভার গ্রহণ করেন। কমাল খাঁ সচিব প্রধান, কমাল খাঁর বিদ্রোহ চেষ্টা প্রকাশিত হওয়াতে চাঁদবিবি তাঁহার প্রাণদণ্ড আদেশ করেন। তাঁহার পশ্চাৎ কিশোর খাঁ প্রধান পদে আরুঢ় হইয়া চাঁদ বিবির শত্রু হইয়া দাঁড়াইলেন ও ছলে বলে কৌশলে রাজ্যকে গ্রোণ্ডার করিয়া সাতারা দুর্গে নির্বাসিত করিলেন। মন্ত্রীকে শীঘ্রই এই অত্যাচারের ফলভোগ করিতে হইল। চাঁদবিবি

স্বপক্ষীয় সৈন্য সাহায্যে বন্ধনমুক্ত হইলেন, কিশোর খাঁ প্রাণ-ভয়ে পলায়নান্তর গলকগুয় একজন হস্তারকের হস্তে মারা পড়িলেন। অতঃপর মন্ত্রী দিলাবর খাঁ দক্ষতা ও বিজ্ঞতার সহিত কয়েক বৎসর রাজ্য শাসন করেন। তাঁহার স্মৃশাসনে রাজ্যের শ্রীরুদ্ধি সম্পাদন হইল। তিনি আহমদনগর ও গলকগু সুলতান-দের সহিত সন্ধি স্থাপন করিলেন ও গলকগু সুলতানের ভগিনী চাঁদ সুলতানার সহিত ইব্রাহিমের বিবাহ দিয়া দিলেন। দিলাবর খাঁ ইব্রাহিম বাদসাহের প্রিয়পাত্র ছিলেন না। মন্ত্রীর অধীনতা সহ্য করিতে না পারিয়া রাজা তাঁহার বিরুদ্ধে অভিযোগ করিলেন এবং তাঁহাকে পদচ্যুত ও নির্বাসিত করিয়া স্বয়ং রাজ্যভার গ্রহণ পূর্ব্বক রাজ্য বিস্তারে ব্রতী হইলেন। ১৫৯৪ এ তাঁহার ভ্রাতা ইস্মায়ল বিদ্রোহী হইয়া উঠেন। এই গোল-যোগে আহমদনগর সুলতান বহ্রান নিজাম সা বিজাপুর আক্রমণ করিলেন কিন্তু যুদ্ধে জয়লাভ হইল না; প্রত্যুতঃ এই যুদ্ধই তাঁহার রাজ্য নাশের মূল। যুদ্ধারম্ভের অনতিকাল পরে বহ্রানের মৃত্যু হয়। তাঁহার পুত্র ও রণক্ষেত্রে বিজাপুর সৈন্য হস্তে মারা পড়েন; আহমদনগরে ঘোর বিপ্লব উপস্থিত।

চাঁদ বিবি } বহ্রান নিজাম সার মৃত্যুর পর আহমদনগর ছুই দলে বিভক্ত হয়; চাঁদ বিবি তন্মধ্যে একদলের অধিনায়িকা ছিলেন। অপর দলের দলপতি মোগল সম্রাটের শরণাপন্ন হইয়া আকবরের পুত্র যুবরাজ মোরাদকে পত্র লেখেন। মোরাদ তখন গুজরাটে ছিলেন। মোগলেরা দাক্ষিণাত্যে হস্তক্ষেপ করিবার

অবসর অনেক কাল অন্বেষণ করিতেছিল, তাহারা এই স্বযোগ ছাড়িবার পাত্র নয়। সম্রাটের আদেশ ক্রমে মোরাদ আহমদ-নগরের সম্মুখে সৈন্য উপনীত হইলেন। মোগল আক্রমণ হইতে স্বদেশ রক্ষার একজন প্রধান উদ্যোগী চাঁদ বিবি। তিনি কবচ ধারণ পূর্বক তরবার হস্তে স্বয়ং দুর্গপালদের মধ্যে উপস্থিত থাকিয়া তাহাদের উৎসাহদান ও দুর্গরক্ষণের তত্ত্বাবধান করিতেন। তিনি তাঁর ভ্রাতুষ্পুত্র বিজাপুর সুলতান ইব্রাহিমকে ডাকিয়া পাঠাইলেন; ইব্রাহিম আসিলেন বটে কিন্তু সময় মত আসিতে পারেন নাই। যখন আসিলেন তখন যুদ্ধ শেষ হইয়া গিয়াছে। চাঁদ বিবির যত্ন ও চেষ্টায় মোগলেরা প্রথমবার অল্পে ভুক্ত হইয়া ফিরিয়া যায়। যুবরাজ প্রস্তাব করিলেন যদি বহ্মার-প্রান্ত (Berar) ছাড়িয়া দেওয়া হয় তাহা হইলে তিনি যুদ্ধে ক্ষান্ত দিবেন। চাঁদ বিবি বিজাপুরের সাহায্যলাভে হতাশ হইয়া এই প্রস্তাবে অগত্যা সম্মত হইলেন। এবারকার মত যেন কোন প্রকারে নিস্তার পাইলেন, কিন্তু দুই বৎসর পরে আবার যখন মোগলেরা দেশ আক্রমণ করিল তখন আর শত্রু হস্ত এড়াইতে পারিলেন না। রাজ্যী দেশরক্ষণে প্রাণপণে চেষ্টা করিতে লাগিলেন কিন্তু তাহার সমুদায় চেষ্টা ব্যর্থ হইল। এদিকে বাহিরের শত্রু, তাহার উপর আবার গৃহবিচ্ছেদ; উপায়ান্তর না দেখিয়া মোগলদের সঙ্গে সন্ধি সাধনের উদ্যোগ করিতেছেন এমন সময় সৈন্যেরা ক্ষেপিয়া উঠিল। একজন বিদ্রোহী সৈনিকের খড়গাঘাতে রাণী প্রাণ হারাইলেন; তাহার মৃত্যুর সঙ্গে সঙ্গে আহমদনগর

শত্রুহস্তে নিপতিত হইল। চাঁদ বিবি ভারতবীরনারীদের মধ্যে একটা রত্ন ; দাক্ষিণাত্যে তাঁহার নাম ও যশ চিরস্মরণীয়।

দ্বিতীয় ইব্রাহিম শিল্পবিদ্যা বিশারদ সুশিক্ষিত সুযোগ্য নরপতি ছিলেন। মহারাষ্ট্রী ও পারস্য ভাষা মিশ্রিত ব্রজভাষা সদৃশ ভাষার রচয়িতা বলিয়া তিনি প্রসিদ্ধ। হিন্দুধর্মের প্রতি তাঁহার বিশেষ আসক্তি ছিল। জগদগুরু তাঁহার আখ্যা—লোকে তাঁহাকে ইব্রাহিম জগদগুরু বলিয়া জানে। গুরুচরিত্র নামক গ্রন্থে আছে যে ইনি পূর্ববজন্মে দত্তাত্রয় দেবের একজন অনুগত ভক্ত ছিলেন, দেবতার প্রসাদে নৃপকূলে জন্মগ্রহণ করেন। ইব্রাহিমের রাজত্বকালে দত্তাত্রয়ের (নরসোবা) মন্দির নির্মিত হয় ও কথিত আছে ইব্রাহিম এই মন্দিরে গিয়া পূজা করিতেন। বিজাপুর-মুসলমানদের বিশ্বাস এই যে তিনি ইসলাম পরিত্যাগ করিয়া প্রকাশ্যরূপে হিন্দুধর্ম গ্রহণ করিতেন। তাঁহার সময়কার কোন কোন প্রকাশ্য দলিলের উপর “শ্রীসরস্বতী প্রসন্ন” শিরোনামা দৃষ্ট হয়। ইব্রাহিমের মৃত্যুকালে বিজাপুরের পূর্ণ সৌভাগ্যের অবস্থা—রাজভাণ্ডার পূর্ণ—প্রজাগণ সুখসমৃদ্ধি সম্পন্ন—ছুই লক্ষ পদাতিক ৮০০০০ অশ্বরোহী সৈন্যবল।

মাহমুদ। } ইব্রাহিমের পর মাহমুদ আদিল সা। মাহ-
১৬২৬—১৬৫৬ } মুদের রাজত্বকাল ৩০ বৎসর। ইনি যদিও
যুদ্ধে অনুরক্ত ছিলেন না তথাপি রাজ্যের শ্রীবৃদ্ধি সাধনে তৎপর ছিলেন। তাঁহার সময়ে বাপী সরোবর জলপ্রণালী সমস্ত রচিত হইয়া সহরের জলসৌকর্য্য সম্পাদিত হয়। জুম্মা মসজিদের

স্বর্ণ রঞ্জিত ভজনালায় তাঁহার রচিত । বিপুল কাষ্ঠস্তম্ভাবলম্বিত
উচ্ছাদ-চিত্রিতপ্রকোষ্ঠ-সমন্বিত আসারমহল তাঁহারি কীর্ত্তি-
স্তম্ভ । আর বিজাপুরের বিশেষ ভূষণস্পদ যে গোলগুম্বজ
তাহা তাঁহারি স্রযোগ্য সমাধি মন্দির ।

মাহমুদের রাজত্বকালে মহারাষ্ট্রী বীর শিবাজী আবির্ভূত হন।
তাঁহার পিতা সাহাজী বিজাপুর সুলতানের অধীনে কর্ম্ম করিতেন।
শিবাজী } পিতার সর্ব্ববাদিসম্মত রাজভক্তির আড়ালে ও
মাতার উৎসাহ বাক্যতলে তিনি এক একটা করিয়া পাহাড় দুর্গ
অধিকার পূর্ব্বক বিস্তীর্ণ রাজ্যের পতন করিলেন। লোকে
ভাবে যেন তিনি বিজাপুর রাজার হইয়া কার্য্য করিতেছেন।
তাঁহার নিগূঢ় অভিসন্ধি কেহ সন্দেহ করিতে না করিতেই তিনি
বিস্তৃত প্রদেশ আত্মবশ করিয়া লইলেন। ১৬৪৬এ পুণার
নিকটবর্ত্তী তোরণা দুর্গ অধিকার ও তন্নিহিত গুপ্তধন আবিষ্কার
করিয়া অবধি তিনি বিজাপুর রাজ্যের বিরুদ্ধে স্পষ্ট বিদ্রোহা-
চরণে প্রবৃত্ত হইলেন। কোকণস্থ কল্যাণ হইতে বিজাপুরে
রাজস্ব লইয়া এক দল লোক আসিতেছিল শিবাজী সে ধন লুণ্ঠন
করিয়া লন ও ক্রমে অন্যান্য দুর্গ দখল করিয়া রাজ্য বিস্তার
করিতে থাকেন, এই সকল কাণ্ড দেখিয়া রাজা তাঁহাকে রাজ-
বিদ্রোহী বলিয়া স্থির করিলেন। সাহাজী তখন কণ্ঠাটকে—
তাঁহাকে বিজাপুরে আনাইয়া জেলখানায় বদ্ধ করা হইলও বলা
হইল যে তাঁহার পুত্র যত দিন ধরা না দেন তত দিন তাঁহার মুক্তি-
লাভ নাই। শিবাজী মোগল সম্রাট সাজিহানের নিকট আবেদন

করিয়া অনেক কষ্টে পিতার মুক্তি সাধনে কৃতকার্য হইলেন ও আবার পূর্ববৎ লুট পাটে রাজ্য বুদ্ধি করিবার সন্ধি লাভ করেন।

দ্বিতীয় আলি } মাহমুদের রাজত্বকালে শিবাজীর এই কাণ্ড,—
১৬৫৬—১৬৭২ } দ্বিতীয় আলি আদিল শার সময়ে তাঁহার দৌরাভ্য ক্রমিক বুদ্ধি হইতে লাগিল। মোগল ও মহারাষ্ট্রীদের উপদ্রবে বিজাপুরের মুহুর্তের তরে স্থস্থির হওয়া দুষ্কর। ১৬৫৭ অব্দের পূর্বে শিবাজী বিজাপুরের অধীনস্থ অনেক প্রদেশ অধিকার করিয়া বসেন ও মোগল সম্রাট ঔরঙ্গজীবের নিকট হইতে সনদ আনাইয়া আপন অধিকার বৈধ ও কায়ম করিয়া লন। পরিশেষে শিবাজীকে দমন করিবার ভার বিজাপুর সেনাপতি আফজুল খাঁর হস্তে সংযুক্ত হয়।

আফজুল খাঁ } আফজুল খাঁর যুদ্ধ যাত্রার পরিণাম জানাই আছে। তিনি শিবাজীর বিরুদ্ধে ৭০০০ পদাতিক ৫০০০ ঘোড়সওয়ার কামান অস্ত্রশস্ত্র লইয়া মহা আড়ম্বরে কূচ করত মহাবলেশ্বর পাহাড়ের ক্রোড়ে আসিয়া উত্তীর্ণ হইলেন। শিবাজী দেখাইলেন যেন তিনি প্রাণভয়ে সেনাপতির হস্তে আত্ম সমর্পণে প্রস্তুত, প্রতাপগড়ে তাঁহাদের সাক্ষাৎকার সাব্যস্ত হইল। শিবাজীর অনুরোধ এই যে তাঁহাদের সম্মিলনে অন্য লোক জন উপস্থিত না থাকে। নবাব সাহেব তাহাতেই সম্মত হইয়া সৈন্য সামন্ত পাহাড়ের নীচে রাখিয়া একটা মাত্র সহচর সঙ্গে শিবাজীর সহিত সাক্ষাৎ করিতে যান। শিবাজীকে ভয়ে ভয়ে সম্ভর্পণে পদার্পণ করিতে দেখিয়া নবাব সাহেব তাঁহাকে আগ্রহের সহিত

আলিঙ্গন দিতে অগ্রসর হইলেন। শিবাজীর হাতে বাঘনখ প্রচ্ছন্ন ছিল, কোলাকুলির সময় সেই গুপ্তাস্ত্রে তিনি আফজুলের বক্ষ বিদারণ পূর্বক তাঁহাকে ধরাশায়ী করেন ও ভবানী খড়্গাঘাতে কৰ্ম্ম শেষ করিয়া ফেলেন। এ দিকে তাঁহার সৈন্যগণ ঝোপ ঝাপ অন্তরাল হইতে নিষ্ক্রান্ত হইয়া নবাব সৈন্যের উপর পড়িয়া তাহাদের ছারখার করিয়া চলিয়া যায়। এইরূপ ছলে বলে কার্য্যোদ্ধার করিয়া শিবাজী মহারাষ্ট্র রাজ্যের মূল পত্তন করিলেন। তাঁহার যশের রব চতুর্দিকে বিকীর্ণ হইল। ইহার পরেও বিজাপুরের সহিত তাঁহার অনেক যুদ্ধ হয় কিন্তু যুদ্ধে হারাইয়াও তাঁহার হস্ত হইতে পরিত্রাণ নাই। এক স্থানে পরাভূত হইয়া অপর স্থানে ফুঁড়িয়া উঠিয়া পূর্ববৎ উপদ্রব আচরণ করিতে থাকেন। ১৬৬২ পর্য্যন্ত এইরূপ চলিল, অবশেষে বিজাপুর রাজা হার মানিয়া তাঁহার সহিত সন্ধিবন্ধনে কৃত-নিশ্চয় হইলেন। শিবাজী যে সকল স্থান অধিকার করিয়া-ছিলেন তাহা তাঁহারই হইল। সে রাজ্যের আয়তন কল্যাণ হইতে গোওয়া পর্য্যন্ত সমুদায় কোঙ্কণ তীর ও ভীমা হইতে বর্ণা নদী পর্য্যন্ত ১৩০ মাইল দীর্ঘ ১০০ মাইল প্রস্থ সহ্যাদ্রির উত্তরস্থ ভূমিখণ্ড। শুদ্ধ তাহা নহে শেষে এমন হইল যে শিবাজীর বর্গানিষ্পীড়িত চোঁথাই কর হইতে অব্যাহতি লাভের জন্য বিজাপুর তাঁহাকে বার্ষিক ৩ লক্ষ টাকা ঘুস দিতে প্রতিশ্রুত হইলেন। মহারাষ্ট্রীদের অত্যাচার হইতে নিষ্কৃতি পাইয়াও বিজাপুরের শান্তি নাই। ১৬৬৫ তে সত্ৰাট ঔরঙ্গজীব বিজাপুর

বিজয় মানসে রাজা জয়সিংহকে দক্ষিণে প্রেরণ করেন। আলি যদিও এই মোগল আক্রমণ অনেক কষ্টে প্রতিরোধ করিলেন কিন্তু দেখিলেন দুর্দান্ত দুর্দর্শ মোগলদের হস্ত হইতে তাঁহার রাজ্য রক্ষা স্বকঠিন। দু বৎসর পরে মোগল সম্রাটের সহিত তাঁহার এক সন্ধি হয় তাহাতে তিনি বিজাপুর রাজ্যের অনেক ভাগ ছাড়িয়া দিতে বাধ্য হইলেন। ছাঁটিয়া ছুঁটিয়া ভীমানদী রাজ্যের উত্তর সীমা নিরূপিত হইল। ১৬৭২ অব্দে ১৬ বৎসরের বিচিত্র ঘটনা-পূর্ণ রাজত্বের পর দ্বিতীয় আলি আদিল সা ইহলোক হইতে অবসৃত হইলেন।

সেকন্দর আদিল সা } আলির মৃত্যুকালে তাঁহার পুত্র সেক-
১৬৭২--১৬৮৬ } ন্দরের বয়স ৫ বৎসর। সেকন্দর আদিল

সা বিজাপুরের শেষ সুলতান, ইহাঁর রাজত্ব কালে মোগল সম্রাট ঔরঙ্গজীব বিজাপুর আক্রমণ করেন।

ঔরঙ্গজীব } অনেক দিন হইতে বিজাপুর বিজয়ে তাঁহার
১৬৮৩ } সাধ—যদিও এ পর্য্যন্ত তাঁহার আশানুরূপ ফল

লাভ হয় নাই, তাঁহার সেনাপতিগণ বারম্বার বিফলপ্রযত্নে বিজাপুরের দ্বার হইতে শূন্য হস্তে ফিরিয়া যাইতে বাধ্য হইয়াছেন তথাপি সে চিরপোষিত রাজ্যলোভ নিরস্ত হইবার নহে। ১৬৮৩-তে তিনি দক্ষিণবিজয় উদ্দেশে অসীম সৈন্যসামন্ত সমভিব্যাহারে দিল্লী হইতে নিষ্ক্রান্ত হইলেন—সেই যে দিল্লী ছাড়িলেন আর ফিরিবার অবকাশ পাইলেন না! তখন তাঁহার বয়ঃক্রম প্রায় ৬৩ বৎসর—তাঁহার জীবনের অবশিষ্ট ভাগ পথে পথে তান্মুতে

তান্মুতে অতিবাহিত হইল। অনেক যুদ্ধে তিনি দক্ষিণের মুসল-
মান রাজ্য সকল জয় করিলেন বটে কিন্তু মহারাষ্ট্রীদের দমন
চেষ্টায় তাহার সমস্ত বল হানি, সমস্ত আয়ুঃক্ষয় হইল। পরি-
শেষে প্রায় নব্বই বৎসর বয়সে ঊনশতাব্দী বৎসর রাজত্বের পর
অশেষ বিঘ্ন বিপত্তির মধ্যে তিনি দেহত্যাগ করিলেন। তখন
তাঁহার কি শোচনীয় অবস্থা! অতীতের দৃশ্য কি ভয়ঙ্কর।
ভবিষ্যৎও সকলি নিরাশা-অন্ধকারময়। পুত্রেরা বিদ্রোহী—
উৎপীড়িত হিন্দু রাজগণ প্রতিপীড়নে সমুদ্যত। তিনি যদি
দক্ষিণ সুলতানদের সহিত মিলিয়া মহারাষ্ট্রীদের দমনে সচেষ্ট
হইতেন তাহা হইলে হয়ত কৃতকার্য হইতে পারিতেন কিন্তু
দক্ষিণের মুসলমান রাজ্য সকল গ্রাস করিয়া সে পথ বন্ধ করি-
লেন। তিনি স্বহস্তে প্রলয়ের বীজ বপন করিয়া গেলেন—অল্প
কাল মধ্যেই তাঁহার রচিত প্রকাণ্ড রাজ্য ভগ্ন চূর্ণ হইয়া ধূলিসাৎ
হইল।

ঔরঙ্গজীবের
ক্যাম্প

}

১৭৯৫এ কারেরি নামক ইতালিয়ন পরিব্রাজক

ঔরঙ্গজীবের ক্যাম্প দেখিতে যান তাঁহার ভ্রমণ বৃত্তান্ত হইতে
মোগল সম্রাটের চালচলন ও যুদ্ধ প্রবাসের কতক আভাস প্রাপ্ত
হওয়া যায়। কারেরি রাজদরবারে সম্রাটের সাক্ষাৎকার লাভ
করেন। ঔরঙ্গজীব কুশাঙ্গ, খর্বকায়, বৃহন্নাশা ও বয়োভারে
অবনত—শুভ্রবেশ পরিহিত—মস্তক মুক্তা-জড়িত জরির কিরীট
বিভূষিত। তাঁহার শ্যাম মুখে শুভ্রদাড়ী ফুটিয়া উঠিয়াছে।
দরবার তান্মুর মধ্যে স্রঞ্জিত উচ্চ সিংহাসন—চারিকোণে চারিটি

রজত স্তম্ভ—উঠিবার একটি রজত পাদপীঠ । সত্ৰাট এই সিংহাসনে উপবিষ্ট—আমীর সভাসদেরা তাঁহার আগে আগে চলিয়াছে—দুই জন ভৃত্য চামর ব্যজন করিতেছে, একজন ছত্র ধারণ করিয়া দণ্ডায়মান । ঔরঙ্গজীব সহাস্যবদনে নিজ হস্তে প্রজাদের আজ্ঞা সকল গ্রহণ করিতেছেন—বিনা চসমায় পাঠ করিয়া আপন হাতে হুকুম লিখিতেছেন । কারেরি বলেন সত্ৰাটের সঙ্গে সৈন্যবল দশ লক্ষ পদাতিক—অশ্ব ৬০০০০—মাল বহনের জন্ত ৫০০০০ উষ্ট্র আর হস্তী ৩০০০; সেনা নিবাস ৩০ মাইল বিস্তৃত । এতদ্ভিন্ন ব্যাপারী দোকানদার কারিগর কর্মচারী প্রভৃতি লোক মিলিয়া জনসংখ্যা সর্ব্ব শুদ্ধ ৫০ লক্ষ হইবে । নানাবিধ খাদ্য দ্রব্য ও অন্যান্য সকল প্রকার সামগ্রী সমাকীর্ণ সত্ৰাটের ক্যাম্প এক প্রকাণ্ড জঙ্গম পুরী বলিলেই হয় । হাট বাজার দোকানে ছয়লাপ । আপন আপন অনুচরবর্গের জন্য প্রত্যেক আমীরের আলাদা আলাদা হাট বাজার । সত্ৰাট ও রাজাদের তাম্বু প্রায় ৩ মাইল স্থান জুড়িয়া অবস্থিত ও বিহিত উপায়ে সুরক্ষিত ; তীর ধনুক বর্ষা তরবার পিস্তল বন্দুক—গুরু ও লঘু কামান এই সকল অস্ত্রশস্ত্র । গুরু কামানের উপর পোর্ভুগীস ইংরাজ ওলন্দাজ জর্মন ফরাসিস প্রভৃতি ইউরোপীয় অধ্যক্ষ সকল নিযুক্ত । বিদেশীগণ একবার মোগলের চাকরী গ্রহণ করিলে আর ছাড়িবার পথ পায় না—পলায়ন ভিন্ন অন্য উপায় নাই ।

এই এক দৃশ্য আর মহারাজী সেনাদের ধরণ দেখ । সহস্র

সহস্র অশ্বরোহী সেনা, তাহাদের কোন নিয়ম নাই বন্দেজ নাই—পূর্ব সঙ্কেত অনুসারে হয়ত কোন বিজন প্রদেশে সম্মিলিত। সঙ্গে যৎকিঞ্চিৎ খোরাক—ঘোড়ার জিনের উপর এক একটি কশ্বল মাত্র সম্বল, আর লুটের মাল ভরিবার জন্য এক একটি থলি। রাত্রে কোথাও বিশ্রাম করিতে হইলে ঘোড়ার লাগাম হাতে ধরিয়াই নিদ্রিত—দিবসে গাছতলায় কিশ্বা কশ্বলের আড়ালেই তাহার যথেষ্ট বিশ্রাম—রৌদ্রের উত্তাপে ভ্রক্ষেপ নাই, কোমরে তরবার বাঁধা ও অশ্বের সামনে ভূনিখাত এক একটা বল্লম। এই সব সামান্য সরঞ্জাম লইয়া মহারাষ্ট্রী বীরেরা যুদ্ধ যাত্রায় বাহির হইতেন, মোগলদের অচল দলবল কিছুতেই তাহাদের সঙ্গে পারিয়া উঠিত না। অনেক বৎসর যুদ্ধ সংগ্রামের পর মোগল সম্রাট আপনার ক্যাম্পেই বন্দী হইয়া পড়িলেন, মহারাষ্ট্রী সেনাগণ মুগ্ধ সম্রাটের চতুর্দিকে বীরদর্পে নৃত্য করিতে করিতে মোগলদের নাজেহাল পিশেহাল করিয়া তুলিল।

বিজাপুর বিজয় } এই সব উড়' উড়' কথার পর এখন প্রকৃত প্রস্তাবের অবতারণা করা যাক! ১৬৮৯ এ রাজকুমার আজম সোলাপুর আক্রমণ করিয়া বিজাপুর বিজয় যুদ্ধ আরম্ভ করেন। সোলাপুর হস্তগত হইলে তিনি বিজাপুরের উপর গিয়া পড়েন কিন্তু সে আক্রমণে বিলক্ষণ বাধা পড়িল। মোগলদের আগমনে বিজাপুরের লোকেরা বিবাদ কলহ দলাদলি ভুলিয়া ঐক্য বন্ধনে মিলিত হইল। বিজাপুর সৈন্যের প্রতিঘাতে মোগলেরা বিপদগ্রস্ত

হইয়া ভীমার উত্তরে হটিয়া গেল। বর্ষ শেষে আজম পুনর্ব্বার সৈন্য সহ প্রত্যাগত হইলেন। এবার বিজাপুর সেনারা আর এক কৌশল অবলম্বন করিল। তাহারা সীমান্তে মোগলদের প্রতিরোধ না করিয়া রাজধানী মধ্যেই বলসঞ্চিত রাখিয়া তাহাদের প্রতীক্ষা করিয়া রহিল। এইরূপ আচরণের সফল আপনা হইতেই ফলিল। বিজাপুরের উত্তর অঞ্চলে ধান্য শস্য জলের অভাব—অত বড় মোগল সৈন্যের আহাৰ যোগান’ বিষয় দায়। সোলাপুর হইতে তাহাদের সকল আহাৰ সামগ্রী সংগ্রহ করিতে হইত—এ দিকে বিজাপুরের অশ্বারোহী দল অন্নবাহক লোকদের কাটিয়া ফেলে—মহা উৎপাত ! অবশেষে আহমদনগর হইতে অনেক কষ্টে এক বোম্বাই ধান্য আমদানী হওয়ায় মোগল সৈন্য রক্ষা পায়। ইত্যবসরে সম্রাট স্বয়ং রঙ্গভূমিতে অবতীর্ণ হইলেন। তখন হাইদ্রাবাদের বিরুদ্ধে তিনি যুদ্ধের আয়োজন করিতেছিলেন তাহা কোনমতে তালিভুলি দিয়া শেষ করিয়া সৈন্য যুদ্ধযাত্রায় বাহির হইলেন। আসিয়া দেখেন তাঁহার পুত্র আজমের সৈন্য বিজাপুর এক প্রকার ঘিরিয়া দাঁড়াইয়াছে—সে সৈন্যের যে সমস্ত অভাব ছিল তাঁহার আগমনে তাহা দূর হইল। সহরের দক্ষিণে প্রাচীর ভেদযোগ্য কামানসজ্জা প্রস্তুত হইল ও তাহার বলপ্রয়োগে প্রাচীর স্থানে স্থানে শীঘ্রই ক্ষত বিক্ষত হইয়া পড়িল। তিনি দেখিলেন সম্মুখ যুদ্ধের প্রয়োজন নাই—ভিতরে অন্নকষ্টেই কার্য্যোদ্ধার হইবার সম্ভাবনা ; “সবুরে মেওয়া ফলে” এই বাক্য স্মরণ করত পরিণাম প্রতীক্ষা

করিতে লাগিলেন। তাঁহার মনোরথ অবিলম্বে সিদ্ধ হইল। যেমন অশ্রুভাব দিন দিন বাড়িতে লাগিল বাধা দিবার ক্ষমতাও সেই পরিমাণে কমিয়া আসিল। ১৬৮৬, ১৫ অক্টোবরে নগর-পালেরা হার মানিয়া সত্ৰাটের চরণে আত্ম-সমর্পণ করিল। ঔরঙ্গজীব তাঁহার আমীর উমরা প্রধান প্রধান সৈনিক সহচরে পরিবৃত হইয়া মহাসমারোহে বিজিত বিজাপুরে প্রবেশ করিলেন। প্রজাবর্গের বিলাপধ্বনির মধ্যে আর্ককেল্লার গগন মহলে উপনীত হইয়া প্রধান প্রধান সরদারদের নজরানা গ্রহণ করিলেন। অভাগা সেকন্দর বিজিত রাজার ন্যায় সম্মানিত হওয়া দূরে থাকুক, বন্দীকৃত বিদ্রোহীর ন্যায় রজত শৃঙ্খলে সত্ৰাটের সমক্ষে আনীত হইলেন। সত্ৰাট তাঁহাকে বসিবার আসন ও অভয় বচনে সান্ত্বনা দিয়া তাঁহার এক লক্ষ টাকা বার্ষিকী বাঁধিয়া দিলেন। ইহার কয়েক বৎসর পরে সেকন্দর লোকা-ন্তর গমন করেন। তাঁহার ইচ্ছামতে সহরের উত্তর পূর্বে আপন গুরুর গোরের সন্নিহিত এক সামান্য গোরস্থানে তাঁহার সমাধি ক্রিয়া সম্পন্ন হয়। জীবদ্দশার অনুরূপই তাঁহার চরম-গতি। তাঁহার প্রবল-প্রতাপ পূর্ব পুরুষদের সমুলত সমাধি মন্দির সকল আজও সগর্বে মস্তক উত্তোলন করিয়া দণ্ডায়মান আর আদিলসাহী বংশের শেষ রাজা হতভাগ্য সেকন্দরের মৃতদেহোপরি অন্ত্যেষ্টির চিহ্ন স্বরূপ একটা প্রস্তর খণ্ডও দৃষ্ট হয় না।

এই সময় হইতে স্বতন্ত্র রাজ্য বলিয়া বিজাপুরের নাম ইতি-

হাসের পৃষ্ঠা হইতে অপনোদিত হইল, এই যে তাহার ভাগ্য-লক্ষ্মী ছাড়িয়া গেল আর ফিরিল না। ঔরঙ্গজীব তাহাকে পুনর্জীবিত করিতে বিস্তর প্রয়াস পাইয়াছিলেন। বিজাপুর সেনাদের আশ্রয়দান—আমীর ওমরাদের মান মর্যাদা রক্ষণ, ভূমি সম্পত্তি নগদ টাকা ইনামে প্রজা রঞ্জন, বসতি বিস্তারের উদ্ভেজন ইত্যাদি নানা উপায় অবলম্বিত হইল কিন্তু কিছুতেই কিছু হইল না। ভাস্ক্রা যেমন সহজ, গড়া তেমন সহজ নয়। স্বাধীনতা নষ্ট হইয়া অবধি সহরের জীবন বিনষ্ট হইল, তাহার শ্রীসৌভাগ্য চলিয়া গেল। মানুষের অত্যাচারের উপর আবার প্রকৃতির উপদ্রব। ঔরঙ্গজীব থাকিতে থাকিতেই এমন এক ভয়ঙ্কর মহামারী উপস্থিত হইল যে তাহাতে লক্ষাধিক লোক মারা পড়ে ও অনেকে সহর পরিত্যাগ করিয়া পালায়। ঔরঙ্গজীবের মহিষীও এই মড়কের গ্রাসে পতিত হইয়া প্রাণত্যাগ করেন। তাহার গোরের কথা পূর্বেই উল্লেখ করা গিয়াছে। মড়ক থামিয়া গেলে সম্রাটের আদেশে জনসংখ্যা গণনা করিয়া দেখা গেল যে লোক সংখ্যা সর্বশুদ্ধ ১০ লাখের কিছু কম; মাহমুদ আদিলশার রাজত্ব কালে বিজাপুর ও তৎপ্রান্তবর্তী সাহাপুর মিলিয়া যে লোক সংখ্যা নির্ণীত হয় তদপেক্ষা প্রায় ১০ লক্ষ ১৬ হাজার লোক কমিয়া গিয়াছে। মোগল হইতে মহারাষ্ট্রীদের হস্তে পড়িয়া বিজাপুর দিন দিন আরো অবসাদ-হিমে ল্লান হইতে লাগিল। মোগলদের সময় তাহার শ্রীসৌভাগ্যের যাহা কিছু অবশিষ্ট ছিল বর্গীদের অত্যাচারে তাহাও

ক্রমে লোপ পাইল। পেশওয়ার অধিকার গিয়া সাতারার রাজাদের আমল আরম্ভ। সাতারার শেষ রাজা সাহাজী। ১৮৪৮ এ সাহাজীর নিপুত্রিক মরণানন্তর ইংরাজেরা সাতারা আত্মসাৎ করেন সেই সঙ্গে বিজাপুরও ইংরাজ রাজ্যে মিলিত হইল।

ইংরাজ রাজ্য } এই বিখ্যাত প্রাচীন সহর এইক্ষণে নব্য ইংরাজ মহলে পরিণত হইয়াছে। জিলার রাজধানী হইয়া বিজাপুরের শ্রী ফিরিয়াছে, তাহার পাশ দিয়া লৌহ পথ মুক্ত হওয়াতে বাণিজ্য ব্যবসায়ের উত্তেজন হইয়াছে, তাহার জীর্ণ ভগ্ন গৃহাবলি কতক বাসোপযোগী কতক বা সরকারী কার্যালয় রূপে রূপান্তরিত হইয়াছে। মুসলমান রাজভবন সকল জজ কলেक्टर মাজিষ্ট্রেট পোলিষাধ্যক্ষ প্রভৃতি গবর্ণমেন্ট কর্মচারীদের বাসগৃহ, নবাব মুস্তাফা খাঁর পান্থশালা জেলখানায় পরিণত। গবর্ণমেন্ট এঞ্জিনিয়রগণ গোর মসজিদ প্রভৃতি ধর্ম সম্বন্ধীয় ইমারতের উপর হস্তক্ষেপ করিতেও কুণ্ঠিত হন নাই। বোখারা মসজিদে পোস্ট অফিস—ওরঙ্গজীবের ভজন-গৃহে পুলিশ সিপাহীদের বাস, ‘ছুই বোন’ গোরস্থানের এক বোন স্বয়ং এঞ্জিনিয়ার সাহেবের বাসস্থান। কিন্তু এই সকল উপায়ে কি এই শবপুরীতে প্রাণ সঞ্চার হইবে? বিজাপুর কি নবজীবন পাইয়া পুনর্ব্বার পূর্ব গৌরবে সমুখিত হইবে? সে আশা ছরাশা মাত্র। লোকদের সে জীবন্ত ভাব কোথায়? সে স্বাধীন ক্ষুণ্ণ কোথায়? এই পুরীর ভগ্ন গৃহের উপর কারিগরি মৃত

দেহে ফুলসজ্জা সদৃশ বিসঙ্গত বোধ হয়। নাভের মধ্যে পি,
ডব্লু, ডির দৌরাঅ্যে বিজাপুরের পুরাতনের মাধুর্য্য তিরোহিত
হইয়াছে, কিছু দিন পরে সে বিজাপুর আর চেনা যাইবে না।
কিন্তু আধুনিক কারিগরেরা স্বীয় কারুকার্য্যের যতই বাহার
বাহির করুক না কেন, কল্পনা এ সকল ছাড়িয়া ইতস্ততঃ বিক্ষিপ্ত
ভগ্ন স্তূপের উপরেই অতীতের সহিত ক্রীড়ামোদে মত্ত হয়।*

* Bombay Gazetteer Vol. 23, Bijapur.

Wheeler's history of India Vol 4 Part I.

বোম্বাই সহর ।

প্রথম পরিচ্ছেদ ।

উপক্রমণিকা ।

বোম্বাই নাম কোথা হইতে হইল ? এ নামের উৎপত্তি নাম } বিষয়ে মতভেদ দৃষ্ট হয় । ইউরোপীয়দের মধ্যে অনেকের মত এই যে পোর্তুগীজেরা বোম্বায়ের সুন্দর উপসাগর (Bon-bay) দেখিয়া এই দ্বীপের নামকরণ করে । কেহ কেহ বলেন যে মুম্বা দেবীর মন্দির হইতে এই নামের সৃষ্টি হইয়াছে । এই মন্দির অদ্যাপি নগরীর মধ্যভাগে বিদ্যমান । ইহা এক পুরাতন মন্দির । প্রবাদ এই যে ৪০০, ৫০০ বৎসর পূর্বে এই মন্দিরে দেবী প্রতিষ্ঠা হয় । ইহা প্রথমে ধোবিতলাও (যেখানে ধোপারা কাপড় কাচে) নামক স্থানে প্রতিষ্ঠিত ছিল—শতাব্দিক বৎসর হইল স্থানান্তরিত হইয়াছে । দেবীর নাম পর্য্যন্ত পরিবর্তিত হইয়াছে । কুলীদের উপাস্ত্র দেবতা ‘মুঞ্জা’ ব্রাহ্মণ হস্তে পড়িয়া ‘মুম্বা’ নাম ধারণ করিলেন । সে যাহা হউক, সকল জিনিসের ‘কেন’ বের করা সহজ নয় আর উহার আবিষ্কারও সকল সময়ে সম্ভাব্যকর হয় না । ভারতের রাজধানীর নাম কলিকাতা কেন হইল তাহা কি তুমি বলিতে পার ? সুন্দর-বন্দর যদি বোম্বাই নামের অর্থ হয় তাহাই যথার্থ নাম বলা যাইতে পারে ও তাহা জানিয়াই আপাততঃ আমাদের সন্তুষ্ট থাকা উচিত ।

ইতিহাস } বোম্বাই দ্বীপ ১৫৩০ খৃষ্টাব্দে অথবা তৎসমীপ-
 বর্তী কালে পোর্তুগীজদের হস্তে পতিত হয়। ১৪৯৮ খৃষ্টাব্দে
 নাবিকশ্রেষ্ঠ বাস্কো ডি গামা কালিকটে পদার্পণ করেন। যে
 ইউরোপীয় জাতির বিদ্যা, বুদ্ধি ও ভাগ্যবলে উত্তমাশা অন্তরীপ
 হইতে ভারতের প্রবেশ পথ উন্মুক্ত হইল তাহাদের প্রতাপ সেই
 অবধি ভারতসাগরে ক্রমিকই বিস্তারিত হইতে চলিল। সর্ব-
 প্রথমে পোর্তুগীজদের লক্ষ্য বোম্বায়ের দক্ষিণ মালাবার তীর-
 বর্তী প্রদেশেই বদ্ধ ছিল; কালিকট, কানানোর, গোওয়া
 প্রভৃতি স্থানেই তাঁহারা উপনিবেশ পত্তন করেন। ১৫৩০
 খৃষ্টাব্দের দুই চারি বৎসর পরে বোম্বাই পোর্তুগীজদের হস্তগত
 হয়। কিন্তু তাহাদের সমস্পর্কী আর এক ইউরোপীয় জাতি
 বাণিজ্যচ্ছলে ভারতবর্ষে অবতীর্ণ হইল। ষোড়শ শতাব্দীর
 / অন্তে ইংরাজেরা এ দেশে প্রবেশ করে—আসিয়া অবধি তাহা-
 দের লোভদৃষ্টি বোম্বায়ের উপরে নিপতিত হয়। দুই একবার
 বোম্বাই দখল করিবার চেষ্টা করিয়াও কৃতকার্য হইতে পারে
 নাই; অবশেষে দ্বিতীয় চার্লসের বিবাহ-যৌতুক স্বরূপে
 বোম্বাই ইংরাজের হস্তাধীন হইল। ১৬৬১ খৃষ্টাব্দে ব্রিটিশ ও
 পোর্তুগীজ রাজার মধ্যে যে বিবাহসন্ধি সম্বন্ধ হয় তাহা
 হইতেই বোম্বায়ে ব্রিটিশ অধিকারের সূত্রপাত, যদিও
 এই দ্বীপ ইংরাজদের হাতে আসিতে আরো ৪, ৫ বৎসর
 বিলম্ব লাগে। তখন বোম্বাই দ্বীপ এমন হতাদরের বস্তু
 ছিল যে ইংলণ্ডের রাজা ১০ পৌণ্ড বার্ষিক করের বিনি-

ময়ে ইহা অকাতরে কোম্পানি বাহাদুরের করে সমর্পণ করিলেন।

সেকাল } বোম্বাইয়ের সেকাল আর একাল কত তফাৎ !
আর একাল }

আকাশ পাতাল প্রভেদ। রাজা যে তুচ্ছ তাচ্ছিল্য করিয়া এই দ্বীপকে হস্তান্তর করিলেন তাহা আশ্চর্য্য নহে। যখন ইংরাজেরা প্রথম বোম্বাই অধিকার করিল তখন তাহা কি অকিঞ্চিৎকর বস্তু ! কি সম্পত্তি তাহাদের করতলগত হইল ? একটা পাকাবাড়ী (ভবিষ্যতে গবর্ণ-মেন্ট হৌস)—তাহার চারিদিকে বাগান—ছু চারিটি তোপ, নারিকেল বনের মধ্যে বিক্ষিপ্ত কতকগুলি ঘর—কতকগুলি জেলের কুটীর ও প্রচুর পরিমাণে জ্বীয়ন্ত ও পচা মাছ—এই যা ইংরাজদের ভোগে আসিয়াছিল। তথাকার জনসংখ্যা পলাতক ও তস্কর মিলিয়া বড় জোর দশ হাজার। এইদ্বীপে জন সংখ্যা প্রায় তাহার ৭০ গুণ অধিক হইবে। আব-হাওয়া মারাত্মক—তাহার কারণ স্বাস্থ্য-বিজ্ঞানের অভাব, যে বিজ্ঞান-প্রভাবে এখন সহরের আশ্চর্য্য রূপান্তর। অনেক কষ্টে ৩০০০০ টাকা বার্ষিক কর আদায় হইত। বোম্বাইয়ের ভূমি এমন স্বস্তা ছিল যে সমুদায় মালাবার হিলের ইজারার টাকায় এক্ষণে অর্দ্ধ কাটা ভূমিখণ্ড পাওয়া যায় কি না সন্দেহ। ইংরাজ-দের অধীনে আসিয়া শীঘ্রই তাহার শ্রী ফিরিল। দুর্গ ও গৃহ নির্মাণ, বন্দর স্থাপন, বাণিজ্য ব্যবসায়ে উৎসাহবর্দ্ধন এই সকল কার্য্যানুষ্ঠানে ইংরাজ রাজ্যের স্রফল ফলিতে লাগিল। ইংরাজ-

রাজ্য ব্যবস্থার এক প্রধান গুণ এই যে তাহা কাহারো ধর্ম্মানুষ্ঠানে হস্তক্ষেপ করে না । যাহার যে ধর্ম্ম সে তাহা অকাতরে পালন করিতে পারে । মতভেদের জন্য কাহাকেও যন্ত্রণা ভোগ করিতে হয় না । বিজিত প্রজা বলপূর্ব্বক জেতৃধর্ম্মে দীক্ষিত হয় না । সেকালে অঙ্গিয়র (Aungier) নামে একজন প্রতিভাশালী স্মৃচতুর গবর্ণর ছিলেন । তাঁহার সময়ে দিউ হইতে বণিকেরা বোম্বায়ে আসিয়া বাণিজ্য করিতে চাহে । তাহাদিগকে উৎসাহ দানার্থ গবর্ণর সাহেব তাহাদের সঙ্গে যে করার বন্দন করেন তাহা হইতে তাঁহার বুদ্ধিমত্তার বিলক্ষণ পরিচয় পাওয়া যায় । তাহার মর্ম্ম এই যে বণিকেরা স্বাধীন ভাবে তাহাদের শবদাহন ও ধর্ম্মানুষ্ঠান করিতে পারিবে । যে কোন ধর্ম্মাবলম্বী হউক না কেন—তাহার জাতি ও অবস্থা যাহাই হউক, বলপূর্ব্বক কাহাকেও খৃষ্টান করা যাইবে না । এই করার পত্রের তারিখ ২২ মার্চ ১৬৭৭ । বণিকেরা সেই অবধি এপর্য্যন্ত ‘ব্যাক্‌বের’ তীরে অবাধে তাহাদের শবদাহন করিয়া আসিতেছে ও ইচ্ছানুরূপ নিজ নিজ ধর্ম্ম অনুষ্ঠান করিতেছে ।

পোর্্তুগীজদের শাসন অন্তরূপ । তাহাদের এক হাতে তলবার এক হাতে বাইবেল—হয় খৃষ্টান হও নয় মর । তাহারা বলে, আমার রাজ্যে বাস করিতে চাও ত আমার ধর্ম্মগ্রহণ কর । ফলে কি হইল—ইংরাজের জয়—পোর্্তুগীজদের পতন । ৩০০ বৎসর পূর্ব্ব যে জাতি ধন মান বৈভবে সর্ব্বগ্রগণ্য ছিল—যাহার দোদ্দণ্ড প্রতাপে ভারতের দক্ষিণ প্রদেশ কম্পমান তাহার

নাম পর্য্যন্ত এক্ষণে শ্রুতিগোচর হয় না । তাহাদের রাজধানী গোওয়ার কি দশা হইয়াছে ? তাহাদের দৌরাভ্যে কত লোকে দেশ ছাড়িয়া পালায় তার ঠিকানা নাই । আর ইংরাজ স্বশাসনে এক্ষণে বোম্বায়ের অবস্থা দেখ । সাগরগর্ভ হইতে এই চির-বসন্ত স্নন্দর পুরী সমুখিত হইল । বিশাল সুরম্য সৌধাবলীতে পরিপূর্ণ ; শ্রমের জয়স্তম্ভ স্তূপ ও কাপড়ের কল ও অন্যান্য কারখানা চতুর্দিকে বিরাজমান ; নানা জাতির আবাসস্থান এই বোম্বাই পুরী সমুদ্রের উপরে রত্নদ্বীপতুল্য শোভা পাইতেছে ।

মানচিত্র } একটা হস্তীদেহের পার্শ্বদেশ—মাথা হইতে সামনের পা পর্য্যন্ত মনে করিলে বোম্বায়ের আকার মোটামুটি কল্পনা করিতে পার । মনে কর শুঁড় ততটা নীচে ঝুলিয়া নাই পা বক্রভাবে আর একটু নীচের দিকে গিয়াছে । শুঁড় ও পায়ের মধ্যস্থিত অর্দ্ধচক্র Backbay উপসাগর ও মাথার বহির্ভাগে Breach Candy; শুঁড়ের প্রান্তভাগে মালাবার কোণ অথবা বিন্দু যেখানে গবর্ণমেন্ট হোঁস সংস্থিত । তাহার উপরের বালুকেশ্বর-রাস্তা ধরিয়া গেলে মালাবার হিলে উত্তীর্ণ হওয়া যায় । তাহার উত্তরে খম্বালার পাহাড় । এই দুই পাহাড়ের উপর ভাল ভাল বাঙ্গলা আছে—ইংরাজ কর্মচারী ও অন্যান্য বড়লোকের বাস-স্থান । মালাবার হিল বোম্বায়ের মধ্যে লোভনীয় রমণীয় জায়গা । গজ মুণ্ডের উপর মহালক্ষ্মীর মন্দির । হাতীর পায়ের ভাগটা কোলাবা, যাহার সমীপ-সমুদ্রের উপর দীপস্তম্ভ প্রতি-ষ্ঠিত । কোলাবার উপরিভাগে ময়দান (Esplanade) যাহা বোম্বা-

য়ের কৰ্মক্ষেত্র । ঐখানেই বণিক ও নাবিকদের কার্যালয়, হাইকোর্ট, ইউনিবর্সিটি স্তম্ভ ও ইমারত, সেক্রতার আফিস, বড় বড় দোকান ও হোটেল প্রভৃতি সংস্থাপিত । আর একটু উপরে অর্থাৎ দেহের মধ্যভাগে দিশি পাড়া, ভরপুর বসতির স্থান, সহরের হৃৎপিণ্ড । ধোবিতলাও, খেতবাড়ী, গিরগাম, কামাতীপুর ওপাড়ার এই সব নাম, সেখানে মার্কেট বাজার দোকান, সহরের গিলিজ ও ধূলি । এই পাড়ার উত্তর দিকে ভয়কলা, যে অঞ্চলের অলঙ্কার বিক্টোরিয়া উদ্যান ও এলফি-নিফ্টন কালেজ । উহার কাছাকাছি যে রাস্তা গিয়াছে তাহাই পারলের রাস্তা, পারল আর একটি গবর্ণমেণ্টের আড্ডা । মান-চিত্রে এই সকল স্থান স্পষ্ট দেখিতে পাইবে ।

জনতা } বোম্বায়ে কতপ্রকার জাতি একত্র হইয়াছে
তাহা গণনা করা দুঃসাধ্য । এমন জীবন্ত জ্বলন্ত ভাব এদেশের অন্য কোন নগরে লক্ষিত হয় না । ইংরাজ শাসনে ভারতবর্ষের বর্তমান অবস্থা ইহাতেই নুর্ভিমতী । লোকদের আচার ব্যবহার আহার পরিচ্ছদ, বাণিজ্য ব্যবসার উৎকর্ষ, সার্বজনিক কার্যে উৎসাহ ও অনুরাগ এই সকল বিষয়ে ইংরাজ শাসনের সফল প্রত্যক্ষ করা যায় । কতপ্রকার বিভিন্ন জাতি আছে তাহাদের ভিন্ন ভিন্ন ভজনালয়ই তাহার সাক্ষ্য দিতেছে । কেবল হইতে বাহির হইয়া কাল্কাদেবীর রাস্তা ধরিয়া পারল পর্য্যন্ত দুই এক ক্রোশ চলিয়া যাও—কত জাতির মন্দির দেখিতে পাইবে । চিত্র বিচিত্র হিন্দু মন্দির হইতে ঢং ঢং ঘণ্টা ধ্বনি উঠিতেছে ।

হাবসী আরব ও মুসলমানদের মসজিদ, পারসীদের অগ্নিগৃহ, ইহুদীদের সিনাগোগ, ইংরাজ গিরজা এসব একে একে দৃষ্টি পথে পতিত হইবে। ময়দানে দেখিবে মুসলমান সন্ধ্যানামাজের জন্য কার্পেট বিছাইতেছে তাহার পাশে হয়ত একজন পারসী অস্ত্রাচল চূড়াবলস্বী দিনমণির স্তুতিমন্ত্র পাঠ করিতেছে। আর এক দৃশ্য দেখা যায়, নানা জাতীয় ভদ্র কুলকামিনীগণ এখানে অপেক্ষাকৃত স্বাধীন ভাবে বিচরণ করে। রুমাল-মণ্ডিতকেশা রঙ্গীন রেশমসাড়ী-যুতচারুবেশা সুরূপা পারসী স্ত্রী এই দৃশ্যের বিশেষ শোভা। নগরবাসীগণ বাঙ্গালীদের মত স্বল্পবস্ত্র শূন্যশির নহে। বহুরূপী পাগড়ী তাহাদের শিরোভূষণ, এক এক জাতির এক এক ধরণের পাগড়ী। গুজরাতীদের গজমুণ্ড, মহারাষ্ট্রীদের রথচক্র, সিন্ধিদের বিপর্য্যস্ত ইংরাজি হ্যাট, মুসলমানদের জরির মোগলাই পাগড়ী, পারসীদের লম্বা দ্বিকোণ-টুপী। তুমি শুনিয়া থাকিবে পশ্চিমের লোকেরা বাঙ্গালীদের লজ্জাশির বলিয়া উপহাস করে। কলিকাতা ও বোম্বাইয়ের ভাব এ বিষয়ে অনেক ভিন্ন। এই দুই সহরের বাহ্য প্রভেদ ছুঁকথায় নির্দেশ করিতে হইলে বলা যাইতে পারে—কলিকাতা আটপোরে—বোম্বাই পোষাকি সহর।

দ্বিতীয় পরিচ্ছেদ ।

ইতিহাস ।

যখন ইংরাজেরা বোম্বাই অধিকার করিয়া প্রথমে ভারতবর্ষে প্রবেশ লাভ করে তখন নিরাপদে রাজ্যভোগের সময় নহে— চতুর্দিকে বিভীষিকা, পদে পদে বিঘ্নবাধা ; উত্তর দক্ষিণ পূর্ব ইংরাজ } পশ্চিম জলে স্থলে চারিদিকেই শত্রু । বোম্বাই-
ভাগ্যলক্ষ্মী } যের শৈশবকাল কত বাড় তুফান কত প্রকার
বিপদের মধ্য দিয়া অতিবাহিত হইয়াছে—সে সময়ে এই দ্বীপ অন্য এক প্রবল জাতির গ্রাসে কেন যে পতিত হয় নাই সে কেবল ইংরাজ ভাগ্যলক্ষ্মীর প্রসাদে । ইংরাজের এমনি ভাগ্য-
বল যে এই বিপদরাশি অতিক্রম করিয়া—এই কঠোর অগ্নি-
পরীক্ষা উত্তীর্ণ হইয়া বোম্বাই সহর ক্রমে পশ্চিম ভারতবর্ষের রাজধানী হইয়া ইংরাজ-রাজ-মুকুটের অত্যুজ্জ্বল মণিরূপে শোভা পাইতে লাগিল—সকল শত্রু একে একে পরাস্ত হইল—সমুদ্র জলদস্যু হইতে মুক্ত হইয়া বাণিজ্যের পথ নিরুপক হইল—পরস্পরবিরোধী যোদ্ধৃদলের মৃত দেহের উপর দিয়া ইংরাজ আধিপত্য ভারতভূমিতে বদ্ধমূল হইল । উত্তর হিমসাগরের ক্ষুদ্র দ্বীপবাসী কোথাকার মানুষ এদেশে সামান্য বণিক বেশে প্রবেশ করিয়া শতাব্দীর মধ্যে ভারতের অধীশ্বর হইয়া দাঁড়াইল ।

তিন শত্রু } তখনকার কালে এ অঞ্চলে ইংরাজদের প্রধান
তিন শত্রু পোর্তুগীস, মোগল ও মহারাষ্ট্রী ।

পোর্তুগীস } পোর্তুগীসদের কথা পূর্বেই উল্লেখ করিয়াছি।
 বিদেশীয়েদের মধ্যে তাহারাই ইংরাজের প্রধান প্রতিদ্বন্দ্বী—
 ইংরাজ-ফরাসীদের বিবাদ-ক্ষেত্র স্বতন্ত্র। পোর্তুগীসেরা প্রথমে
 ত ইংরাজদের রীতিমত বোম্বাই দখল দিতেই চায় না। সন্ধি
 স্থাপন হইবার অনতিকাল পরে যখন ইংরাজ রাজ-পুরুষ পঞ্চ
 রণতরী ও পাঁচ শত সেনা সমভিব্যাহারে বোম্বাই দ্বীপ অধি-
 কার করিতে আসেন তখন পোর্তুগীস গবর্নর দ্বীপটুকু ছাড়িয়া
 দিতে প্রস্তুত, তাহার আনুষঙ্গিক সালসেট প্রভৃতি আর কয়েকটি
 স্বাম সঁপিবার প্রস্তাবে তিনি কোন মতেই সম্মত হইলেন না।
 এই বিবাদে পোর্তুগীসদের প্রতিজ্ঞাই বজায় রহিল। ইংরাজ
 সৈন্য এদেশে সেই প্রথম পদার্পণ করে, পোর্তুগীসদের বিপক্ষে
 তাহাদের কোন বল খাটিল না। আর কোথাও দাঁড়াইবার
 স্থান না পাইয়া বহু কষ্টে কারওয়ারের সমীপস্থ আজমেরীতে
 উত্তীর্ণ হইয়া সৈন্যাধ্যক্ষ সমেত অনেকেই কালকবলে পতিত
 হইল। বোম্বাই দ্বীপ মাত্র দখল পাইয়া ইংরাজগণ তখন সন্তুষ্ট।
 এইরূপে প্রথম হইতেই ভারতক্ষেত্রে এই দুই ইউরোপীয় জাতির
 মধ্যে রেযারেযি—কে কাহার উপর প্রাধান্য লাভ করে স্থিরতা
 নাই। ঠাণা—বান্দরা, সালসেট, কারাজা প্রভৃতি বোম্বায়ে
 নিকটস্থ প্রদেশ সকল তখন পোর্তুগীসদের অধীন স্ততরাং তাহারা
 নানা প্রকারে বোম্বাইবাসীদের উৎপীড়নে সক্ষম ছিল।

জিজিরার } এইরূপ কলহে কিছু কাল গত হইলে জিজিরার
 কাফ্রীনবাব } কাফ্রী নবাব পোর্তুগীস-শত্রু বিরুদ্ধে অস্ত্র ধারণ

করিলেন । নবাব মোগল সম্রাটের পোতাধ্যক্ষ । সেকালে স্থলে যেমন ইংরাজ বণিকের প্রতাপ—জলেও তেমনি ইংরাজ জলদস্যুর উপদ্রব । সেই সকল দস্যুদের শাসন করিবার উদ্দেশে ১৬৮৮ অব্দে কাফ্রী নবাব ঔরঙ্গজীব বাদসাহের আদেশ ক্রমে বোম্বাই দুর্গ আক্রমণ করেন । ইংরাজেরা তখন অতি দুর্বল, নবাবের সঙ্গে যুদ্ধে পারিয়া উঠেন না, কৌশল ক্রমে সম্রাটের প্রসন্নতা লাভ করিয়া তাঁহার প্রত্যাদেশে এই বিপদ হইতে উদ্ধার পাইলেন । বোম্বাইয়ের উপর দিয়া সেই এক ভয়ানক ধাক্কা গিয়াছিল । নবাবের আক্রমণ নিষ্ফল দেখিয়া পোর্তুগীসরা ইংরাজদের উপর আরো জুলিয়া উঠিল ; সাধ্যমত বৈরনির্ধাতনে বিরত হইল না কিন্তু তাহাদের জোরজার মন্ত্র তন্ত্র সকলি ব্যর্থ হইল । পোর্তুগীস রাজ্য এদেশে আর অধিক কাল টিকিতে পারে নাই । দিন দিন বর্দ্ধনশীল মহারাষ্ট্রীয় প্রতাপের নিকট ফিরিঙ্গিদিগকে শীঘ্রই নতশির হইতে হইল । তাহাদের অধীনস্থ স্থান সকল একে একে মহারাষ্ট্রীদের হস্তগত হইল । পাণিপত যুদ্ধের কথা অবশ্য শুনিয়া থাকিবে, সে যুদ্ধে আহমদ সা আবদালীর হস্তে মহারাষ্ট্রী সৈন্যের সম্পূর্ণ উচ্ছেদ সাধন হইয়া মোগল রাজ্যের স্থানে হিন্দুরাজ্য স্থাপনের আশা চিরকালের জন্য বিলুপ্ত হইয়া যায় ; তার কয়েক বৎসর পূর্বে—১৭৫৬ খৃষ্টাব্দে—মহারাষ্ট্রীদের মহোন্নতির কাল । তাহারা হিন্দুস্থানের আর আর সকল জাতিকে ছাড়াইয়া উঠিয়াছে—দক্ষিণে কর্ণাটক হইতে উত্তরে আগ্রা দিল্লী পর্য্যন্ত

তাহারা রাজ্য বিস্তার করিয়াছে—হোলকার, শিন্দে, গাইক-ওয়াড় ভিন্ন ভিন্ন প্রদেশ অধিকার করিয়া বসিয়াছে—আশা হইতেছে, হিন্দু-রাজা কর্তৃক স্বেচ্ছগণ বহিষ্কৃত হইয়া স্বাধীনতা পতাকা ভারতে পুনরুড্ডীন হইবে। এই সময়ে পোর্ভুগীসদের উপর মহারাষ্ট্রীদের প্রধান আক্রোশ। পোর্ভুগীসদিগকে যুদ্ধে পরাজয় করিয়া তাহাদের অধিকারবর্তী মালসেট, বাসীন, ঠাণা, কারাঞ্জা প্রভৃতি স্থান কাড়িয়া লইয়া মহারাষ্ট্রীগণ শীঘ্রই তাহাদের বিষদন্ত উৎপাটন করিল। অষ্টাদশ শতাব্দীর অর্দ্ধভাগ গত হইতে না হইতেই ইংরাজেরা তাহাদের ঘোরতর প্রতিদ্বন্দ্বীর উৎপাত হইতে বিনা ক্লেশে নিষ্কৃতি পাইল।

ভারতবর্ষের } ইংরাজদের আগমন কালে ভারতবর্ষের অব-
অবস্থা } স্থার প্রতি একবার মনোনিবেশ কর; করিলে
সহজে বুঝিতে পারিবে ইংরাজরাজ্য এদেশে কি রূপে প্রতি-
ষ্ঠিত হইল। অতীতের আলোচনা বিনা বর্তমান যথাযথ বোধ-
গম্য হয় না তাই কতকটা প্রাচীন কাল হইতে আরম্ভ
করা আবশ্যক। যতদূর পারা যায় সংক্ষেপ সমালোচনাই
আমার উদ্দেশ্য কিন্তু ঘটনার গুরুত্ব অনুসারে প্রকৃত প্রস্তাব
ছাড়িয়া যদি একটুকু দূরে গিয়া পড়ি তাহা হইলে কিছু মনে
করিও না।

সপ্তদশ শতাব্দীর প্রারম্ভে মোগল সম্রাট ভারতের সর্বোচ্চ
শিখরে আরুঢ়। দাক্ষিণাত্য তখনও মোগল-যুগ স্কন্ধে বহন

করে নাই, ক্রমে দিল্লীর সম্রাট দক্ষিণ ভারতবর্ষে স্থায়ী আধিপত্য বিস্তারে ত্রুতী হইলেন । ১৩৪৭ খৃষ্টাব্দে সুলতান আল্লাউদ্দীন দক্ষিণের সুবিস্তৃত প্রদেশ অধিকার করিয়া ‘বামন’ রাজবংশ সংস্থাপন করেন । দেড় শত বৎসরের কিছু পরে দক্ষিণের সেই মহাবল পরাক্রান্ত ‘বামন’ বংশ ধ্বংস হইয়া তাহার ভ্রাতৃবংশে হইতে বিজাপুর, আহমদনগর, গলকণ্ডা প্রভৃতি পঞ্চ মুসলমান রাজ্য সমুৎপন্ন হইল । ১৫৬৫ অব্দে মুসলমান রাজারা দলবদ্ধ হইয়া বিজয় নগরের হিন্দু রাজাকে তালিকোট যুদ্ধে পরাভূত করিয়া দক্ষিণে মুসলমানদের একাধিপত্য স্থাপন করিলেন । দক্ষিণ রাজকুলের শ্রীরুদ্ধি দেখিয়া মোগল সম্রাটের ঈর্ষানল উদ্দীপ্ত হইল । আকবরের সময় হইতেই তাহাদের বশীকরণ চেষ্টা প্রবর্তিত হয় ও তাঁহার পৌত্র সাহা জিহানের রাজত্বকালে আহ-
 / চাঁদবিবি } মদনগর মোগল রাজ্য ভুক্ত হয় । আহমদনগর
 আক্রমণ সময়ে সুলতান চাঁদবিবি যে অসাধারণ বীরত্ব, অটল
 উদ্যম, ও জ্বলন্ত দেশানুরাগের পরিচয় দিয়াছিলেন তাহাতে
 তাঁহার নাম ও-অঞ্চলে চিরস্মরণীয় হইয়া রহিয়াছে । মোগলেরা
 আহমদনগর দুইবার আক্রমণ করে । প্রথম বারের আক্রমণ
 চাঁদবিবির অনিবার্য্য যত্নে নিবারিত হইল । তিনি তাঁহার আত্মীয়
 বিজাপুর সুলতানের সাহায্য প্রার্থনা করিয়া ও অন্যান্য বিচ্ছিন্ন
 দল একত্রিত করিয়া সর্বসংহারক মোগল বলের বিপক্ষে কটি-
 বদ্ধ হইয়া দাঁড়াইলেন । এদিকে যুবরাজ মুরাদ সৈন্যসামন্তে নগর
 দুর্গ বেঁটন করিয়াছেন, স্থানে স্থানে স্তূপ প্রস্তুত, বারুদে সমুদায়

ভূর্গ ভূর্গবাসীশুদ্ধ উড়াইয়া দিবার উপক্রম, কিন্তু চাঁদবিবি কিছু-
তেই বিচলিত হইবার নহেন। প্রত্যহ অশেষ সঙ্কটের মধ্যে
কেল্লা পর্য্যবেক্ষণ করিয়া তাহার বলাধানের উপায় দেখিতে-
ছেন। মোগলবল-খণিত দুই স্তূপ দেখিতে পাইয়া তাহার
প্রতিবিধানের উপায় যোজনা করিলেন। তৃতীয় স্তূপের
বিরুদ্ধে কল চালাইবার পূর্বেই শত্রুগণ তাহা উড়াইয়া দেও-
য়াতে সেই সঙ্গে অনেক ভূর্গপাল বিনষ্ট হইল—প্রাচীরে বৃহৎ
ছিদ্র দেখা দিল। লোকেরা প্রাণভয়ে পলায়নোদ্যত। চাঁদ-
বিবি কবচ ধারণ পূর্বক মুখের উপর একটা ঘোমটা ফেলিয়া
খোলা তলবার হস্তে সেই ক্ষতস্থানে গিয়া উৎসাহ বাক্যে
সকলকে ডাকিয়া আনেন—তাহার দৃষ্টান্তে ভীর্ণও সাহস
পাইল—গুলি গোলা তীর যাহা কিছু ছিল শত্রুদের উপর বর্ষণ
হইতে লাগিল। অবশেষে ঘোরতর যুদ্ধের পর মোগল সৈন্য
পিছু হটিয়া গিয়া সেদিনকার মত নিরস্ত হইল। চাঁদবিবি সে
রাত্রে সমস্ত রাত্রি অবিশ্রান্ত কাজ করিতেছেন, পরদিন প্রভাতে
মোগলেরা দেখিতে পাইল প্রাচীরের ছিদ্র অনেকাংশে বুজিয়া
গিয়াছে—তাহাদের প্রবেশ দ্বার রুদ্ধ, নূতন স্তূপ না করিলে
আর প্রবেশের উপায় নাই, যুবরাজ ভাবিলেন গতিক বড় ভাল
নয়। প্রস্তাব করিয়া পাঠাইলেন বহ্লাড় (Berar) প্রান্ত দিল্লীশ্বরকে
ছাড়িয়া দিলে তিনি আর অধিক কিছু চান না। সুলতানা
তাহাতে সন্মত হইলে যুবরাজ অল্পক্ষণ যথালোভে সন্তুষ্ট হইয়া
সসৈন্যে ফিরিয়া গেলেন। চাঁদ সুলতানা সেবারকার মত

নিস্তার পাইলেন কিন্তু সে ক্ষণকালের জন্য ! তাহার দুই বৎসর পরে মোগলেরা ফিরিয়া আসিয়া আবার নগরের উপর হস্তা করিল । এবার আর চাঁদবিবির বল খাটিল না । বাহিরের শত্রু দমন করা সহজ যদি ঘরে শান্তি ও ঐক্য থাকে, কিন্তু ঘরের শত্রুর সঙ্গে পারিয়া ওঠে কাহার সাধ্য ? এবার ঘরাও বিচ্ছেদ— চাঁদবিবি দেখিলেন এবার আর রক্ষা নাই । কেহ কেহ তাঁহাকে পলায়নের পরামর্শ দিতেছে । কিন্তু তাহা বলিয়া তাঁহার আত্মীয় স্বজন অনুচরবর্গ ফেলিয়া ভীকুর ন্যায় পলায়ন করা— তা কি কখন হয় ? প্রাণ বাঁচাইয়া কি হইবে যদি মানরক্ষা না হইল ? অবশেষে সুলতান অপর্যায়মানে মোগলদের সহিত সন্ধি করিবার চেষ্টা দেখিতেছেন এমন সময় নিজ সৈন্যদলের মধ্যে বিপ্লব উপস্থিত হওয়ায় সেই গোলযোগেই তিনি প্রাণ হারাইলেন । এই পাপের ফল সদ্যই ফলিল । অল্প দিনের মধ্যেই দুর্গভেদ করিয়া নগর অধিকার ও নাবালক রাজাকে বন্দী করিয়া মোগল সৈন্য জয়লাভ করিল ।

দাক্ষিণাত্যে চাঁদবিবির অতুল কীর্তি অদ্যাপি জনহৃদয়ে মুদ্রিত রহিয়াছে । তাঁহার নগর সংরক্ষা-কাহিনী শীঘ্র বিলুপ্ত হইবার নহে । যে সকল বীরাজ্ঞা সময়ে সময়ে উদ্ভূত হইয়া ভারতের ইতিহাস-পৃষ্ঠায় স্বর্ণাক্ষরে স্বনাম অঙ্কিত করিয়া গিয়াছেন, চাঁদবিবি তাঁহাদের মধ্যে গণনীয় । তাঁহার ভ্রাতুষ্পুত্র বিজাপুরের সুলতান ইব্রাহিম চাঁদবিবির যে স্তুতিগান রচনা করেন তাহা এই স্থলে ভাষান্তরে উদ্ধৃত করিয়া দিলাম ।

স্মর-কাননে অপসরা

আছে নানা,

মর-ভবনে রূপবতী

কত আছে ।

বিজাপুরের রাণী চাঁদ

সুলতানা,

রূপে সবাই হার মানে

তঁার কাছে ॥

সদা সাহসে ক্রব তঁার

ঘোর রণে,

গৃহে শাস্তি দয়া যেন

শোভমানা ।

আহা, করুণা কত তঁার

দীন জনে,

বিজাপুরের রাণী চাঁদ

সুলতানা ॥

যথা, ফুলের মাঝে চাঁপা

সেরা মানি,

তরু-মাঝারে সহকার

সবে জিতে ।

তথা, রাণীর মাঝে রাণী

চাঁদরাণী,

কেবা পারে গো তঁার গুণ

বাধানিতে ॥

যিনি জননী সম স্নেহে
 স্বভবনে,
 মোরে বিদেশে পালিলেন
 সযতনে।

আমি দ্বিতীয় ইব্রাহিম
 স্মরি সে কথা,
 তাঁর চরণে সঁপিলাম
 স্মরণ-গাথা ॥

বোম্বায়ে যখন ইংরাজ-অধিকার স্থাপন হয় বিজাপুর ও গলকণ্ডা তখনও স্বাধীন। সম্রাট ঔরঙ্গজীব তাহাদের বশীকরণ মন্ত্রণা করিয়া অনেক চেষ্টায় সেই রাজ্যদ্বয়কে দিল্লীসাৎ করেন। ১৫ অক্টোবর ১৬১৫ অব্দে বিজাপুর, বর্ষেক পরে গলকণ্ডা মোগলরাজ্যে ভুক্ত হয়। এইরূপ রাজ্য বিস্তারই মোগল রাজের অধঃপাতের কারণ হইল। মুসলমানদের যুদ্ধ বিগ্রহের মধ্যে মহারাষ্ট্রীরা মস্তক তুলিয়া উঠিবার সন্ধি পাইল। যদি দক্ষিণে মুসলমান রাজ্য সকল অক্ষত থাকিত তাহা হইলে হিন্দু-রাজ্য পুনর্জীবিত হইয়া উঠিত কি না সন্দেহ—ভারতের ইতিহাস হয়ত আর এক ধরণে সংগঠিত হইত। ঔরঙ্গজীবের মৃত্যুর সঙ্গে সঙ্গে মোগল সাম্রাজ্য আত্মরক্ষায় অসমর্থ হইয়া ভগ্নদশা প্রাপ্ত হইল। এদিকে মোগল সূর্য্য অস্তোন্মুখ, ওদিকে কোথা হইতে কাল মেঘ উঠিয়া অল্পকাল মধ্যে দিগ্বিদিক্ আচ্ছন্ন করিয়া ফেলিল।

শিবাজী } ঐ কাল মেঘ শিবাজী ভৌসলে। শিবাজী এক-
ভৌসলে } জন অসাধারণ প্রতিভাসম্পন্ন বীর পুরুষ ছিলেন।

তঁাহার জীবনরত্ন উপন্যাসের মত মনোহারী। একটু বেশী করিয়া বলিলে ক্ষতি নাই, তঁাহাকে ছাড়িয়া দিলে মহারাষ্ট্র ইতিহাস অসম্পূর্ণ থাকে। তঁাহাকে দেখিতে মধ্যমাকৃতি কিন্তু স্তর্গঠন ও গৌরবর্ণ—লক্ষ্যভেদী জ্বলজ্বল চক্ষু, কলম ধরিতে জানেন না কিন্তু সকল প্রকার শস্ত্রচালনায় বিলক্ষণ মজবুত, তীক্ষ্ণবুদ্ধি, দূরদর্শী, দৃঢ় প্রতিজ্ঞা ও অধ্যবসায়পূর্ণ, উপায়ের খনি—ধূর্তশিরোমণি। তঁাহার প্রগাঢ় মাতৃভক্তি ছিল—জননীর চরণধূলি ও আশীর্ব্বাদ না লইয়া কোন মহৎকর্মে প্রবৃত্ত হইতেন না।

তঁাহার পিতা সাহজী বিজাপুর সুলতানের অধীনে জায়গীরদার ছিলেন। পুণায় তঁাহার জাহাগীর, তথায় দাদাজী কোণ্ডু নামক আচার্য্যের হস্তে শিবাজীর শিক্ষার ভার সংস্থাপ্ত হইল। কিন্তু সেই দুর্দান্ত বালকের উপর দ্রোণাচার্য্যের শাসন কতদিন খাটে? মাওলী নামক চাসার দল তঁাহার সঙ্গী—লুটপাঠ ডাকাতি শীকার এই সকল কাজেই তঁাহার বিশেষ উৎসাহ। খর্ব্বকায় অথচ দ্রুতিষ্ঠ বলিষ্ঠ মাওলীদের হস্তে অস্ত্র দিয়া শিবাজী তাহাদের মধ্য হইতে রামের বানর-সৈন্যবৎ সৈন্য প্রস্তুত করিলেন। পাহাড়ে দেশে তঁাহার জন্ম—পশ্চিম ঘাট অঞ্চলে যে সকল প্রকৃতির দুর্গ আছে তাহা একে একে হস্তগত করিতে লাগিলেন। পাহাড় দুর্গে তঁাহার বাস—লুটের মাল হইতে তঁাহার ভাণ্ডার

সদাই পূর্ণ । যখন যেমন সুবিধা—কখন বিজাপুরের পক্ষ হইয়া মোগলের বিরুদ্ধে, কখন মোগল সম্রাটের অধীনে বিজাপুরের বিরুদ্ধে অস্ত্রধারণ করিয়া নিজ কাজ সাধিয়া লইতেন । অবশেষে যখন নিজের বল বুঝিলেন—যখন দেখিলেন “পাহাড়ে আগুণ লাগিয়াছে” (ডোঙ্গরাস্ লাভিলে দিবা)—সকলি প্রস্তুত—তখন মুখোষ ফেলিয়া দিয়া নিজমূর্তি ধারণ করিলেন ।

আফজুল খাঁ } ক্রমে শিবাজীর দৌরাভ্য অসহ্য হইয়া উঠিল, বিজাপুর সুলতান আর ধৈর্য্য রাখিতে পারিলেন না । শিবাজীকে দমন না করিলে সে সর্বদমন হইয়া উঠিবে এইরূপ চিহ্ন দেখিয়া সুলতান শিবাজীর বিরুদ্ধে সৈন্য প্রেরণ করিলেন । সেনাপতি আফজুল খাঁ কোমর বাঁধিয়া শিবাজীকে ধরিতে বাহির হইলেন ।

প্রতাপগড় } সে সময়ে শিবাজী প্রতাপ গড়ের পাহাড়ে, মহাবলেশ্বর হইতে অনতিদূর । পশ্চিমঘাট শ্রেণীর মধ্যে অনেক সুশোভন পাহাড় দৃষ্ট হয় কিন্তু মহাবলেশ্বর সকলের সেরা । এই পর্বতের শিখর পঞ্চনদীর আকর স্থান । তথায় মহাবলেশ্বর নামে দেবমন্দির বিরাজিত, তাহা হইতেই এই পাহাড় স্বনাম গ্রহণ করিয়াছে । এই পাহাড় বোম্বাই প্রেসিডেন্সির বিহার ভূমি—গ্রীষ্ম ঋতুতে অনেকে নিম্নদেশ হইতে উত্তাপ নিবারণের জন্য মহাবলেশ্বরের জোড়ে গিয়া বাস করে । সুন্দর রাস্তা, বিপণী, বাঙ্গলা, উদ্যান, পাহাড়ের গায়ে ছড়াইয়া আছে, কিন্তু শিবাজীর সময় এ সব কিছুই ছিল না । গাড়ী করিয়া পাহাড়ে চড়িবারও সুবিধা ছিল না—তখন তাহা দুর্গম তীর্থ স্থান । কিন্তু

প্রকৃতির শোভা সেইরূপই আছে । পাহাড়ের প্রান্তবর্তী ভিন্ন ভিন্ন কোণ হইতে প্রকৃতির যে কঠোর সুন্দর মূর্তি দৃষ্টিগোচর হয় তাহা তখনো যেমন এখনো তেমন । কতক গাছপালা-শূন্য কঠোর পর্বতশ্রেণী ;—কোন কোন পাহাড় দুস্তর বন জঙ্গলের মধ্যে দিয়া গভীর পাতালে নামিয়া গিয়াছে । মহাবলেশ্বরের পশ্চিমে প্রতাপগড়ের পাহাড় বনরাজির মধ্য হইতে গগন ভেদ করিয়া উঠিয়াছে । সেই পাহাড়ের উপর দুর্গ নির্মিত হইয়া প্রকৃতির বলের উপর কৃত্রিম বল যোজিত হইয়াছে । শিবাজী এই দুর্গে ব্যাঘ্রের ন্যায় বসিয়া শিকার নিরীক্ষণ করিতেছেন ।

আফজুল খাঁ তাঁহাকে ধরিতে আসিতেছেন । পথিমধ্যে তুলজাপুরের মন্দির আক্রমণ করিয়া হিন্দুদের যথেষ্ট অপমান করিয়াছেন । স্নেচ্ছদের উপর হিন্দুদের জাতিবৈর দ্বিগুণ জ্বলিয়া উঠিয়াছে । শিবাজী চর-মুখে সকল সংবাদ পাইতেছেন । আফজুল খাঁ অনেক সৈন্য সামন্তে পরিবৃত, তাঁহার সঙ্গে সম্মুখ যুদ্ধে জয় লাভের সম্ভাবনা নাই, ছলে ও কৌশলে তাঁহাকে মারিতে হইবে । শিবাজী নবাব সাহেবের নিকট দূত পাঠাইলেন ও ভয়ের ভান করিয়া এইরূপ দেখাইতে লাগিলেন যে তিনি নবাবের অধীনতা স্বীকারে এখনি প্রস্তুত, কেবল প্রাণ-ভয়ে ধরা দিতে নারাজ । খাঁ সাহেব যদি প্রতাপগড়ে অধীনের সাক্ষাৎকারে সম্মত হন তাহা হইলে মুখে সকল কথা হইবে ! অবশেষে তাহাই সাব্যস্ত হইল । নবাব কোন ছুরভিসন্ধি মনে না আনিয়া শিবাজীর সহিত সহজভাবে সাক্ষাৎ করিতে চলি-

লেন—একজন মাত্র সঙ্গী, পরিচ্ছদের মধ্যে এক পাতলা মসলিনের কাপড়, আর একটা সোজা তলবার—সে শুধু অলঙ্কারের জন্য ব্যবহারের মানসে নয়। বেহারাগণ যথানির্দিষ্ট স্থানে পাক্কী নামাইল কিন্তু শিবাজী সেখানে নাই। দূর হইতে দুজন মানুষ দেখা যাইতেছে—ভয়ে ভয়ে অতি সন্তর্পণে তাহাদের পাদক্ষেপ। বাহিরে দেখিতে শিবাজী নিরস্ত্র কিন্তু ভিতরে ভিতরে তাঁহার ‘ভবানী’ তলবার ও ‘বাঘনখ’ গুপ্তাস্ত্রে স্তম্ভিত। বাহিরে সামান্য শুভ্রবেশ কিন্তু ভিতরে লৌহবর্ষে আচ্ছাদিত। শিবাজী ক্রমে অগ্রসর হইলেন—খাঁ সাহেব তাঁহার সঙ্গে দস্তুরমত কোলাকুলি করিতে গেলেন। কিন্তু শিবাজীর সে ভাল্লুকের আলিঙ্গন—তাঁহার হস্তে প্রচ্ছন্ন ‘বাঘনখ’ ছিল তাহার আঘাতে নবাবের উদর বিদীর্ণ করিলেন। বাঘনখে যাহা হইবার বাকী ছিল ‘ভবানী’ খড়্গে তাহা শেষ করিয়া ফেলিলেন।

এ দিকে পূর্ব সঙ্কেত অনুসারে ভেঁপু বাজিয়া উঠিল। কামানের ধ্বনিতে পাঁচবার দিগ্দিগন্ত ধ্বনিত হইল। নীচে মুসলমান সেনা অপ্রস্তুত ভাবে ছিল, শিবাজীর মাওলীরা চারিদিক্ হইতে তাহাদের উপর পড়িল। প্রত্যুষে ১৫০০ অশ্বরোহী সেনা মহাদর্পে কূচ করিয়া পাহাড়ের নীচে আসিয়া বিশ্রাম করিয়াছিল, তাহাদের মধ্যে সেই দুর্দশার কাহিনী বলিবার জন্য যে ফিরিয়া যাইবে এমন অল্প লোকই অবশিষ্ট রহিল।

এই জয়লাভে শিবাজী সোভাগ্যের সোপানে আর একধাপ

উচ্ছে উঠিলেন । তাঁহার যশোরব চতুর্দিকে প্রসারিত হইল । বিশ্বাসঘাতকতা যদিও এই জয়ের মূল কিন্তু শিবাজী তাহা পাইয়া নিদ্রিত রহিলেন না । তাঁহার সাধ যে পাহাড় দুর্গ হস্তগত করা—তাহা অবাধে মিটাইতে পারিলেন । এখনো কিন্তু সকল সঙ্কট দূর হয় নাই—বিজাপুরের আক্রমণ হইতে রক্ষা পাইয়া আবার মোগলের কোপচক্রে পতিত হইলেন । এক ফাঁড়া গিয়া আর এক ঘোরতর ফাঁড়া উপস্থিত । এই বিষম সঙ্কট হইতে কি কৌশলে উদ্ধার পাইলেন তাহা বর্ণনা যোগ্য ।

সায়েন্তা খাঁ } দক্ষিণের মোগল প্রতিনিধি সায়েন্তা খাঁ শিবাজীকে শাসন করিতে সৈন্য সামন্ত সমভিব্যাহারে বাহির হইলেন । শিবাজীর সৈন্য ছিন্ন ভিন্ন করিয়া নবাব পুণায় আসিয়া আড্ডা করিলে শিবাজী তাঁহার সিংহগড় কোটরে প্রবেশ করিলেন । নবাব তাঁহাকে লিখিয়া পাঠান—“তুমি মর্কট বানরের মত পাহাড়ের উপর বসে থাক—যুদ্ধের বেলায় কেবল্য বন্দ থেকে এগোতে সাহস কর না এবার আমি তোমাকে গ্রেপ্তার না করে ছাড়ব না ।” শিবাজী উত্তর করিলেন—“আমি বানর সত্য কিন্তু সেই রাম সৈন্য বানরের জাত যারা রাবণ বধ করে লক্ষা জয় করে ছিল । আমি তোমাকে এমন জব্দ করব যে পালাবার পথ পাবে না ।” বাস্তবিক তাহাই হইল । নবাব যে বাড়ীতে ছিলেন তাহা এক সময়ে শিবাজীর বাসগৃহ ছিল, নাম লালমহল, তিনি তাহার অন্তর বাহির সকলি তন্ন তন্ন করিয়া জানিতেন । সায়েন্তা খাঁ সেনা পরিবৃত—বাহির হইতে

শত্রুর আক্রমণ নিবারণের জন্য যাহা কিছু করা যাইতে পারে সকল উপায় যোজনা করিতে ক্রটি করেন নাই । শিবাজী এক রাত্রে অন্ধকারে হঠাৎ তাঁহার দুর্গ হইতে নিজ্জালন্ত হইয়া পথিমধ্যে স্থানে স্থানে সৈন্যদল স্থাপন করিয়া ২৫ জন মাওলী সঙ্গে এক বিবাহের বরযাত্রী দলে মিশিয়া নগরে প্রবেশ লাভ করেন । কেহ কিছু সন্দেহ করিবার পূর্ব্বে পশ্চাতের এক দ্বার দিয়া নবাবের গৃহে প্রবেশ করিলেন । সায়েস্তা খাঁ এইরূপ আকস্মিক বিপদ দেখিয়া পালাইবার পথ পাইলেন না । শেষে আপনার শয়নগৃহের গবাক্ষ হইতে বাঁপ দিয়া নীচে পড়িয়া খড়্গাঘাতে দুইটি অঙ্গুলি মাত্র হারাইয়া কোন মতে পার পাইলেন । এই উপপ্লবে নবাবের পুত্র ও অনুচরবর্গ নিহত হইল । শিবাজীর চকিতের ন্যায় উদয়—চকিতের ন্যায় অন্তর্ধান । তাঁহার অনুচরগণের জয়ধ্বনি ও মসালের আলোকের মধ্যে মোগলদের চক্ষুর শূল হইয়া মহাসমারোহে স্বীয় দুর্গে পুনঃ প্রবেশ করিলেন । এই অদ্ভুত সাহসিক কার্যের আশাভীত ফল লাভ হইল । মোগল সৈন্যগণ আপনাদের মধ্যে বিশ্বাসঘাত সন্দেহ করিয়া ছড়ীভঙ্গী হইয়া পড়িল । শিবাজীর সাহস এমনি বাড়িয়া উঠিল যে কিছুকাল পরেই তিনি চতুঃসহস্র অশ্বরোহী সঙ্গে হঠাৎ স্মরাটে উপস্থিত হইয়া ছয় দিন ধরিয়া মনের সাধে নগর লুণ্ঠন করিয়া অগাধ ধন রত্নে তাঁহার রায়গড় কেল্লার ধনাগার পূর্ণ করিলেন । এই আক্রমণ কালে ইংরাজেরা অতুল বিক্রম ও সাহসের সহিত আপনাদের স্মরাটের কুঠি রক্ষা করিয়াছিলেন, কাহার সাধ্য

ব্রিটিশ সিংহের গহ্বরে প্রবেশ করে ! শিবাজী এই কাণ্ড করিয়া দিল্লীর সম্রাটকে পত্র লেখেন—“আমি আপনার মাতুল সায়েস্তাকে শাসন করিয়াছি—স্বরতকে বে-স্বরত করিয়া আসিয়াছি । হিন্দুস্থান হিন্দুদের দেশ আপনার তাহাতে কোন অধিকার নাই ।” অমিতবীর্য্য দিল্লীশ্বরের প্রতি এইরূপ অপমান-পুঞ্জ লিপিবাদ সন্ধান করা—শিবাজীর মত মর্কটের মোগল শার্দূলের সহিত গায়ে পড়িয়া কলহে প্রবৃত্ত হওয়া সামান্য স্পর্ধা ও দুঃসাহসের কার্য্য নহে ।

এই ঘটনার বৎসরেক পরেই দেখিতে পাই শিবাজী মোগল সম্রাটের কুহকে পড়িয়া আছেন । মোগল সেনাপতি জয়সিংহের সঙ্গে মিলিয়া তিনি বিজাপুর আক্রমণ করেন । এই উপলক্ষে মহারাষ্ট্রীরা এমন বীরত্ব প্রকাশ করিয়াছিল যে দিল্লী সম্রাট সম্ভ্রম হইয়া শিবাজীকে স্বহস্তে দুই অভিনন্দন পত্র লিখিয়া সেই সঙ্গে তাঁহাকে দিল্লীতে আমন্ত্রণ করিয়া পাঠান । শিবাজী স্বীয় পুত্র শম্ভোজীকে সঙ্গে করিয়া দিল্লী যাত্রা করেন । গিয়া দেখিলেন—যাহা ভাবিয়াছিলেন তাহা কিছুই নয়,—যেরূপ মান-মর্য্যাদা পাইবার আশা ছিল তাহা পাইলেন না । রাজদরবারে তৃতীয় শ্রেণীর সরদারদের সহিত একাসনে বসিতে হইল, বাদসাহ তাঁহার প্রতি ভ্রক্ষেপও করিলেন না । শিবাজীর মনে এমনি আঘাত লাগিল যে তিনি সেইখানেই মুচ্ছিত হইয়া পড়িলেন । বাসায় গিয়া দেখেন তাঁহার গৃহের চারিদিকে সিপাই সাত্তরীর পাহারা, পালাইবার পথ নাই । তিনি তখন

বুঝিতে পারিলেন দিল্লী আসিয়া ভাল কাজ করেন নাই, পলা-
 ইবার পছন্দ দেখিতে লাগিলেন। তিনি পীড়ার ছল করিয়া
 আশ্চর্য্য পলায়ন } শয্যাগত রহিলেন। কয়েকজন বৈদ্য তাঁহার
 চিকিৎসা করিতে আসিত, তাহাদের দিয়া বাহিরের মিত্রবর্গের
 সহিত ষড়যন্ত্র করিবার সুযোগ হইল। তিনি আর একটা ফন্দী
 করিলেন। গরীব ফকীর-কাস্তালিদের মিষ্টান্ন ও অন্যান্য খাদ্য
 দ্রব্য বিতরণ করা তাঁহার এক কাজ হইল—এ সকল সামগ্রী
 বড় বড় চুবড়ী করিয়া পাঠান হইত। এইরূপ কিছু দিন যায়,
 এক রাত্রে তিনি নিজে একটা চুবড়ীর মধ্যে লুকাইয়া পুত্রবরকে
 আর একটায় পুরিয়া দুই বাহকের স্কন্ধে বাহির হইলেন—দ্বার-
 পালেরা অভ্যাসবশতঃ ওদিকে বড় লক্ষ্য করিল না। তাঁহার
 শয্যায় একজন ভৃত্যকে রাখিয়া দিলেন, অনেকক্ষণ পর্য্যন্ত
 তাঁহার পলায়ন কেহ সন্দেহ করিতে পারে নাই। তাঁহার জন্য
 এক স্থানে অশ্ব প্রস্তুত ছিল, তাহাতে আরোহণ করিয়া পুত্রকে
 পৃষ্ঠদেশে রাখিয়া সেই যে একটানা চলিলেন আর কেহই
 তাঁহাকে ধরিতে পারিল না। মথুরায় আসিয়া মস্তক মুণ্ডন ও
 ভাস্ম লেপন পূর্ব্বক সন্ন্যাসীর বেশ ধারণ করিলেন। তথা হইতে
 আলাহাবাদ—আলাহাবাদ হইতে বারাণসী—বারাণসী হইতে
 গয়া তীর্থ—গয়া হইতে কটক,—কটক হইতে হাইদ্রাবাদ—
 এইরূপে ৮ মাসের মধ্যে স্বদেশে প্রত্যাগত হইলেন। ফিরিয়া
 আসিয়া রাজগড়ের কেলায় তাঁহার মাতা জীজাবার সহিত
 সাক্ষাৎ করিতে যান। একদিন হঠাৎ দুই জন বৈরাগী জীজা-

বার দ্বারে আসিয়া উপস্থিত। জীজাবা তাহাদের ডাকিয়া পাঠাইলে একজন দস্তুর মত তাঁহাকে আশীর্বাদ করিলেন—অন্য জন পাগড়ী খুলিয়া তাঁহার চরণে প্রণত হইলেন। মাথার চিহ্ন দর্শনে আপনার পুত্র বলিয়া চিনিতে পারিয়া জীজাবা তাঁহাকে স্নেহভরে আলিঙ্গন করিলেন। অনেক দিন পরে পুত্রকে পাইয়া জীজাবার আর আনন্দের সীমা রহিল না। সে দিন কান্সালীদের অন্নদান—তোপধ্বনি—বাদ্যোদ্যমের ধুম লাগিয়া গেল—ছোট বড় সকল লোকেই আনন্দোৎসবে মত্ত হইল।

এই প্রকারে অশেষ বিঘ্ন বিপত্তি অতিক্রম করিয়া শিবাজী অল্পে অল্পে তাঁহার রাজ্য বিস্তার করিতে লাগিলেন। নর্মদা হইতে কৃষ্ণানদী পর্য্যন্ত দক্ষিণ ভারতবর্ষ তাঁহার অধীন হইল। তিনি রাজ্য পদবী গ্রহণ করিয়া ৬ জুন ১৬৭৪ খৃষ্টাব্দে রায়গড়ে মহা ধুমধাম করিয়া রাজ্যাভিষিক্ত হইলেন। সেই উপলক্ষে আপনাকে স্বর্ণস্তূপে ওজন করিয়া স্থায় দেহভার স্বর্গুরাশি ব্রাহ্মণদের মধ্যে বিতরণ করত অতুল খ্যাতি প্রতিপত্তি লাভ করিলেন। শিবাজী রাজার রাজ্য লাভে যেমন চাতুর্য্য, রাজ্য সংগঠনেও তেমনি দক্ষতা, কিন্তু বাহুল্য ভয়ে তদ্বিষয়ে হস্তক্ষেপ করিতে বিরত হইলাম।

—

তৃতীয় পরিচ্ছেদ ।

(ইতিহাস-অনুক্রম)

শিবাজীর প্রতিভা গুণে এই যে মহারাষ্ট্রী রাজ্যের সূত্রপত্তন হইল, তাহা অনতিকাল মধ্যেই সমুদায় ভারতে বিস্তীর্ণ হইয়া পড়িল । কিন্তু বলিতে কি, শিবাজীর বংশজ রাজগণের মধ্যে কেহই তাঁহার মত বীর ও যশস্বী হয় নাই। তাঁহার পুত্র শম্ভোজী শম্ভোজী; নিকট আমোদাসক্ত নিতান্ত অকর্ম্মণ্য ছিলেন । সঙ্গমেশ্বরে আমোদ প্রমোদে মত্ত আছেন, এমন সময় জনৈক মোগল সরদার সন্ধান পাইয়া তাঁহাকে বন্দী করিয়া ঔরঙ্গ-জীবের নিকট ধরিয়া আনে । শম্ভোজীর প্রাণ রক্ষার্থে বাদসাহকে অনেক অনুরোধ করাতে সম্রাট বলিয়া পাঠাইলেন “তোরা জীবন মরণ আমারি হাতে তা তুই জানিস্ । যদি মুসলমান হতে রাজী হোস্, তা হলেই তোরা প্রাণ রক্ষা, নতুবা জল্লাদের হাতে তোরা মৃত্যু ।” শম্ভোজী উত্তর দিলেন “বাদসা যদি আপন কন্যাকে আমার সঙ্গে বিবাহ দিতে রাজী হন, তা হলে আমি মুসলমান হই ।” এই উত্তরে ঔরঙ্গজীব ক্রোধান্বিত হইয়া শম্ভোজীর প্রাণদণ্ড আদেশ করিলেন ।

সাহ ১৭০৭ } শম্ভোজীর পুত্র সাহ শৈশবকালে ঔরঙ্গজীবের হস্তে পতিত হইয়া অনেক বৎসর কারাবাসে কালাতিপাত করেন । ঔরঙ্গজীবের মৃত্যুর পর তিনি বন্ধনমুক্ত হইয়া স্বরাজ্য ফিরিয়া পাইলেন কিন্তু মোগলদের মধ্যে সুদীর্ঘ কারাবাস

প্রযুক্ত তাঁহাতে আর কোন পদার্থ ছিল না। রাজদণ্ড ধারণ সামর্থ্যভাবে ক্রমে রাজ্যভার সচিব-প্রধান পেশওয়ার হস্তে

প্রথম পেশওয়া
বালাজী বিশ্বনাথ
১৭১৪

} সংন্যস্ত হইল। প্রথম পেশওয়া বালাজী বিশ্বনাথ। ১৭১৪ এ বালাজী প্রধান মন্ত্রী পদে প্রতিষ্ঠিত হইয়া ক্রমে নৃপতিকে অতিক্রম করিয়া উঠিলেন। পেশওয়া পদ তাঁহার বংশানুগামী হইল। সাহু কেবল নামে ছত্রপতি—তাঁহার রাজ্যাধিকার গেল—স্বাধীনতা পর্য্যন্ত অপহৃত হইল। শেষে এমন হইল সাতারার রাজা সাতারায় বন্দী—পেশওয়াই সর্বময় কর্তা। নূতন পেশওয়ার অভিষেক কালে অভিষেক-বসন মহারাজের নিকট হইতে আনান হইত এই বা রাজমর্যাদার অবশিষ্ট রহিল। ১৭১৮ এ বালাজী পেশওয়া সহইদ ভ্রাতৃদ্বয়ের পোষকতায় সৈন্য দিল্লী যাত্রা করেন। তার বৎসর দুই পরে দাক্ষিণাত্য রাজ্যের চোখ আদায়ের বাদসাহী পরওয়ানা লাভ করেন। তাঁহার প্রযত্নে পুণা ও সাতারার অধীনস্থ প্রদেশ সগৃহে মহারাষ্ট্র রাজপতাকা বিধিমত বন্ধমূল হইল।

বালাজীর পুত্র বাজিরাও দ্বিতীয় পেশওয়া। ইনি একজন

দ্বিতীয় পেশওয়া বাজিরাও } অসাধারণ ধীশক্তি-সম্পন্ন তেজীয়ান
১৭২১—৪০ } পুরুষ ছিলেন। যোগ্য পিতার যোগ্য-
তর সন্তান। মহারাষ্ট্রা আধিপত্য উত্তর হিন্দুস্থানে সংস্থাপিত করা বাজীরায়ের প্রধান লক্ষ্য ছিল। মোগল রাজ্যের ভগ্ন জীর্ণদশা তিনি বিশিষ্টরূপে অবগত ছিলেন। তিনি কথায়

কথায় সাহু রাজাকে বলেন “এই আমাদের সময় । ভারত ভূমি হইতে বিদেশীদিগকে বহিস্কৃত করিয়া অক্ষয় কীর্তি উপার্জনের এই অবসর । শুষ্ক তরুণুলে কুঠারাঘাত কর শাখা সকল আপনা হইতেই পড়িয়া যাইবে ।” তাঁহার উৎসাহ বাক্যে সাহুর চিত্ত পিতামহোচিত জ্বলন্ত উৎসাহে ক্ষণকালের নিমিত্তে উত্তেজিত হইল । তিনি উত্তর করিলেন “তুমি পিতার যোগ্য পুত্র, তুমিই স্বহস্তে মহারাষ্ট্র জয়ধ্বজা হিমালয় বক্ষে নিখাত করিবে ।” বাজিরায়ের বলবীর্য্যে মহারাষ্ট্রী রাজ্য বিপুল বিস্তার লাভ করিল । ১৫ বৎসরের মধ্যে তিনি বাদসাহী মুলুক হইতে মালব ছিনিয়া লন ও বিক্ষ্যাচলের উত্তর পশ্চিম নর্মদা হইতে চম্বল পর্য্যন্ত রাজ্য বিস্তার করেন । ১৭৩৯এ পোর্তুগীস নিকট হইতে বাসীন অধিকার করেন । এই সকল দেখিয়া মহারাষ্ট্রী রাজ্যের উপর ইংরাজদের কটাক্ষ পড়ে । বাসীন বিজয়ানন্তর ইংরাজেরা সাহু রাজার নিকটে দূত প্রেরণ করেন । দূতের প্রতি উপদেশ এই :—

“রাজ সভায় বাজিরায়ের শত্রু আছে কি না সন্ধান নিবে । পোর্তুগীস মুলুক জয়ে দিন দিন তাঁহার বলবৃদ্ধি হইতেছে, তাঁহার গর্ব্ব খর্ব্ব করা সর্ব্বতোভাবে যুক্তিসিদ্ধ । তাঁহার বিরুদ্ধে লোকের ঈর্ষা জ্বালাইয়া দিবার সুযোগ পাইলে অমন সুবিধা যেন ছাড়া না হয়, কিন্তু সাবধান তিনি যেন আমাদের শত্রু হইয়া না দাঁড়ান তাহা হইলে আমাদের সমূহ ক্ষতি ।”

১৭৩৯ এ পেশওয়ার সহিত সন্ধিবন্ধনে মহারাষ্ট্রে ইংরাজ

বাণিজ্য প্রমুক্ত হইল। এই সন্ধির এক বৎসর পরে বাজিরায়ের মৃত্যু।

বাজিরাও রূপবান্ বীৰ্য্যবান্ অমায়িক সরলান্তঃকরণ ছিলেন। যুদ্ধযাত্রা কালে তিনি বীরোচিত কঠোর ব্রত পালন পূৰ্ব্বক আড়ম্বরশূন্য সহজ ভাবে চলিতেন। তাঁহার চরিত্র সম্বন্ধে একটা গল্প আছে—তাঁহার সহিত নিজাম-উদ্-দৌলতের প্রথম যুদ্ধারম্ভে নিজাম একজন সুবিখ্যাত চিত্রকরকে ডাকাইয়া আদেশ করেন “বাজিরাওকে গিয়াই যে ভাবে দেখিবে সেই ভাবে তাঁহার ছবি তুলিয়া আনিবে।” চিত্রকর দেখিলেন বাজিরাও বল্লম স্কন্ধে দুই হাতে জোয়ারীর দানা ভাঙ্গিয়া চিবাইতে চিবাইতে অশ্বপৃষ্ঠে সামান্য সেনার মত চলিয়াছেন—এই ভাবে তাঁহার চিত্র চিত্রিত হয়।

বাজিরায়ের তিন পুত্র—তন্মধ্যে জ্যেষ্ঠ বালাজী তাঁহার উত্তরাধিকারী। তাঁহার দ্বিতীয় পুত্র রঘুনাথ রাও (রাঘোবা) মহারাজ্যে যে অপূৰ্ব নাট্যাভিনয় করিয়া গিয়াছেন তাহা পরে প্রকাশ পাইবে। এখানে এইটুকু বলিয়া রাখি যে এই রাঘোবা ইংরাজ মহলে বিশেষ পরিচিত ছিলেন। ইংরাজদের ডাকিয়া ইনিই রাজ্য নাশের সূত্রপাত করেন—ইহার পুত্র দ্বিতীয় বাজিরাও পিতার কার্য্য শেষ করিয়া রাজ্যের সমাধি স্বহস্তে প্রস্তুত করেন।

তৃতীয় পেশওয়া

বালাজী বাজিরাও (নানা সাহেব)

১৭৪০—৬৯

} বালাজীর অপর নাম নানা সাহেব।
নানার রাজত্ব কালে মহারাজ্যবল

মোগল রাজ্যে প্রবেশ করিয়া তাহার হুৎকম্প উৎপাদন করে । ১৭৪১-৪২এ নাগপুর শাখীয় সেনাপতি ভৌসলা বাঙ্গলায় মুর-সিদাবাদ পর্য্যন্ত লুণ্ঠপাঠ করিয়া ফিরিয়া আসেন । আমাদের শিশু ঘুমপাড়ানী গান ও “মারাট্টা ডিচ” নামক নগর সংরক্ষণী খন্দকে বর্গীদের উৎপাতের স্মৃতিচিহ্ন অদ্যাপি বর্তমান । ১৭৫১এ নবাব আলিবর্দীর নিকট হইতে তাঁহার বাঙ্গলার চৌধ ও উড়িষ্যায় অধিকার লাভ করেন ।

জলদস্যু আঙ্গু } নানার শাসনকালে ইংরাজেরা জলদস্যু আঙ্গু
১৬৯০—১৮৪০ } দমনে পেশওয়ার সহযোগিতা করেন । পূর্বে
সমুদ্রের উপর জিজিরা নবাবের আধিপত্য ছিল । মোগল সাম্রাজ্য পতনের পর মহারাষ্ট্রী সরদার আঙ্গু তাহার স্থান অধিকার করেন । ১৬৯০ হইতে ১৮৪০ পর্য্যন্ত, কানোজী হইতে রাঘোজী পর্য্যন্ত, আঙ্গু বংশের আধিপত্যকাল । রাঘোজীর মরণান্তর তাঁহার বংশ লোপ পাইয়া ডালহৌসী রাজনীতি অনুসারে আঙ্গু-রাজ্য ইংরাজ হস্তগত হয় । আঙ্গু বংশের আদি পুরুষ কানোজী সামান্য লোক ছিলেন না । বোম্বায়ের কাছাকাছি বত জাহাজ আসিত, তাহার তাঁহার লৌহহস্ত এড়াইতে পারিত না । দ্রাবাক্ষর হইতে বোম্বাই পর্য্যন্ত পশ্চিম কূলের প্রধান প্রধান নগর এই জলদস্যুর উপদ্রবে শশব্যস্ত । আঙ্গুর হস্তে ইংরাজদেরও অনেক কষ্ট ভোগ করিতে হইয়াছিল । ১৭২৪ ও ১৭৫৪র মধ্যে দুই ইংরাজ রণতরী আঙ্গু কর্তৃক ধৃত হয় । কলিকাতাবাসীগণ যেমন বর্গীদের উৎপাত

ভয়ে সহরের চারিদিকে গর্ভ খনন করিয়া সুরক্ষিত হন, বম্বের বণিকগণও আঙ্গুর আক্রমণ শঙ্কায় সেইরূপ উপায় অবলম্বন করিতে বাধ্য হইয়াছিলেন। একবার ইংরাজ পোর্ভুগীস মিলিত হইয়া তাঁহার বিরুদ্ধে যুদ্ধযাত্রা করেন, কিন্তু তাহার কোন ফল হইল না। ১৭৫৫ অব্দে কানোজীর পুত্র তুলাজীকে বশে আনিবার জন্য ইংরাজেরা পেশওয়ার সহিত যোগ দেন; পর বৎসরে স্বর্ণদুর্গ ও বিজয়দুর্গ (ঘেরিয়া) তাঁহার প্রধান দুই দুর্গ বিজিত হয়। স্বর্ণদুর্গ হারাইয়া তুলাজী সাগর পরিরক্ষিত বিজয়দুর্গের আশ্রয় গ্রহণ করিলেন। আডমিরল ওয়াটসন ও কর্নেল ক্লাইব মিলিয়া—ওয়াটসন জলে ক্লাইব স্থলে আক্রমণ করত দুর্গ দখল করেন। অতঃপর ইংরাজগবর্ণর বিজয়দুর্গ লাভ লালসে পেশওয়াকে বিস্তর অনুরোধ করেন কিন্তু তাহা যদিও পাইলেন না, তৎপরিবর্তে বোম্বায়ের দক্ষিণস্থ বাকোট ও অপর কতকগুলি গ্রাম উপার্জনে ক্ষতিপূরণ করিয়া লইলেন। অপিচ পেশওয়ার নিকট হইতে এইরূপ বচন পাইলেন যে ওলন্দাজেরা মহারাষ্ট্র রাজ্যে প্রবেশ ও বাসের অনুমতি পাইবে না—তাহাদের বাণিজ্য পর্য্যন্ত বন্ধ করিয়া দিবেন। পোর্ভুগীসদের দুর্দশার কথা পূর্বেই বলিয়াছি। পোর্ভুগীসদের পতন ও মহারাষ্ট্রীদের সহিত উক্তরূপ সন্ধিস্থাপন বশতঃ অন্যান্য প্রতিদ্বন্দ্বী ইউরোপীয় জাতির মধ্যে ইংরাজদের প্রভুত্ব বলবত্তর হইয়া উঠিল।

নানা সাহেবের শেষ দশা শোচনীয়। তিনি পাণিপতের

যুদ্ধে স্বজাতির অধঃপাত স্বচক্ষে দর্শন করিয়া হতাশ হইয়া ফিরিয়া আইলেন—ভারতবর্ষে স্বাধীন হিন্দুরাজ্য পুনঃস্থাপনের আশা জলাঞ্জলি দিতে হইল। ইহার পর নানাসাহেব আর অধিক দিন জীবিত থাকেন নাই। এই মর্মান্তিক আঘাতে তাঁহার বুদ্ধি শুদ্ধি লোপ পাইল। তিনি আন্তে আন্তে পুণায় ফিরিয়া শয্যাগত হইয়া পড়িলেন ও কয়েক মাসের মধ্যেই পার্বতী মন্দিরে দেহত্যাগ করিলেন।

চতুর্থ পেশওয়া

বড় মাধবরাও ১৭৬১—৭২

নানার জ্যেষ্ঠপুত্র পাণিপতের যুদ্ধে মারা পড়েন—তাঁহার দ্বিতীয় পুত্র মাধবরাও পেশওয়া পদে অধিকৃত হইলেন। তখন তাঁহার বয়ঃক্রম ১৭ বৎসর। তাঁহার পিতৃব্য রাঘোবা পেশওয়াকে হাতে রাখিয়া স্বয়ং কর্তা হইবার প্রয়াসী ছিলেন কিন্তু তাহাতে কৃতকার্য হইতে পারেন নাই। মাধবরাও স্বহস্তে রাজ্যভার গ্রহণ পূর্বক অসামান্য চাতুর্যের সহিত রাজকার্য্য নির্বাহ করিতে লাগিলেন। মহারাষ্ট্রীদের দিন দিন শ্রীসমৃদ্ধি দর্শনে ইংরাজেরা সশঙ্কিত, কিন্তু এই সময়ে তাঁহারা হাইদর আলির উপদ্রব নিবারণে সমুৎসুক। হাইদর দমনে মহারাষ্ট্রীদের সহিত সদ্ভাব বন্ধন প্রয়োজন স্তরাং তাঁহাদের মনোগত ভাব মনেই সংবৃত করিতে বাধ্য হইলেন; সদ্ভাবব্যঞ্জক দৌত্যে পেশওয়াকে কোন মতে থামাইয়া রাখিবার চেষ্টা। ইংরাজ দৌত্যের ৫ বৎসর পরে মাধবরাও লোকান্তর গমন করেন। তিনি সন্তান সন্ততি রাখিয়া যান নাই। তাঁহার স্ত্রী রমাবাই অত্যন্ত পতিব্রতা ছিলেন,

মৃতপতির অনুসৃত্য হইয়া চিতানলে দেহত্যাগ করেন।
মাধবরাও পেশওয়া ন্যায়পরায়ণ শাসনকর্তা বলিয়া প্রখ্যাত ;
বলবানের বিরুদ্ধে দুর্ব্বলের, ধনীর বিরুদ্ধে দরিদ্রের সহায়
ছিলেন। এই ন্যায়ী সাহসী প্রজাবল্লভ দৃঢ়মতি নৃপতি বিয়োগে
রাজ্যের যত হানি হয়, পাণিপতের যুদ্ধেও তেমন হইয়াছিল কি
না সন্দেহ।

পঞ্চম পেশওয়া নারায়ণরাও } ১৭৭২এ মাধবরায়ের কনিষ্ঠ ভ্রাতা
১৭৭২—৭৩ } নারায়ণরাও অষ্টাদশ বর্ষ বয়সে

সিংহাসন আরোহণ করেন। তিনি রাঘোবা কাকার ষড়বস্ত্রে
অকালে কালকবলে পতিত হন। রাঘোবাপত্নী আনন্দীবাই
এই কাণ্ডের মূলকারণ বলিয়া লোকের বিশ্বাস। মাধবরাও
পেশওয়া ছরন্ত রাঘোবাকে বশে রাখিবার জন্য কয়েদ করিতে
বাধ্য হইয়াছিলেন, অবশেষে স্বীয় মৃত্যু সন্নিকট জানিয়া তিনি
রাঘোবাকে ডাকাইয়া ভাইটিকে তাঁহার হস্তে সঁপিয়া যান।
কতককাল খুড়া ভাইপোর মধ্যে মৌখিক সদ্ভাব বজায় ছিল
কিন্তু নারায়ণরায়ের মাতা গোপিকাবাই ও রাঘোবার স্ত্রী
আনন্দীবাই এই দুজনের মধ্যে বনিবনাও ছিল না। মন্ত্রীবর্গের
সঙ্গেও রাঘোবার মনান্তর এই সকল কারণে তিনি পুনর্ব্বার
প্রাসাদে বন্দীকৃত হইলেন। তদবধি তিনি ভ্রাতুষ্পুত্রের অনিষ্ট
সাধনের উপায় দেখিতে লাগিলেন। সেনাদের ঘুস দিয়া বশ
করা তাঁহার প্রথম চেষ্টা। হঠাৎ একদিন গোল উঠিল পেশ-
ওয়ার সৈন্যদল ক্ষেপিয়া উঠিয়াছে। নারায়ণরাও তখন প্রাসাদে

নিদ্রিত ছিলেন । বিদ্রোহীদের নেতা সমরসিংহ । তুলাজী পওয়ার নামক রাঘোবার অনুচর সমরসিংহের সহযোগী । বিদ্রোহীগণ সম্মুখ দ্বার ছাড়িয়া অন্তর দ্বার দিয়া প্রাসাদে প্রবেশ লাভ করত পেশওয়ার শয়নগৃহের দিকে ধাবিত হইল । নারায়ণরাও তাহাদের গোলমাল শ্রবণে ভীত হইয়া কাকার প্রকোষ্ঠে প্রবেশ করিলেন—সমরসিং তাঁহার পশ্চাৎ পশ্চাৎ চলিল । যুবক কাকার পায়ে কাঁদিয়া পড়িয়া কাতর স্বরে প্রাণ-ভিক্ষা চাহিলেন । রাঘোবা সমরসিংহকে ক্ষান্ত হও বলিয়া অনুরোধ করিলেন কিন্তু সে অনুরোধ শোনে কে ? সমরসিং উত্তর করিল “এতদূর আসিয়া এখন কি আমি নিজেই মরিতে যাইব; ছাড়িয়া দেও নতুবা ভূমিও মারা পড়িবে ।” রাঘোবা ছাড়াইয়া ছাতে গিয়া লুকাইয়া রহিলেন । নারায়ণরাও পলায়নোদ্যত কিন্তু পাষণ্ড তুলাজী তাঁহার পা টানিয়া তাঁহাকে ধরাশায়ী করিল । এমন সময় চাপাজী নামক একজন বিশ্বাসী রাজভৃত্যের প্রবেশ । তার হাতে যদিও কোন অস্ত্র শস্ত্র নাই, সে দৌড়িয়া গিয়া তাহার প্রভু ও অস্ত্রধারীদের মধ্যে ব্যবধান হইল । তাহাকে দেখিয়া নারায়ণরাও তাহার গলা জড়াইয়া ধরিলেন—চাকর মনিব দুজনেই নরাধম নির্ধুর হস্তারকদ্বয় কর্তৃক নিহত হইল ।

রাঘোবা এই হত্যাকাণ্ডে সংলিপ্ত কি না তাহার কোন প্রমাণ ছিল না—রামশাস্ত্রীর উপর অনুসন্ধানের ভার দেওয়া হইল । রামশাস্ত্রী আয়বানু সত্যনিষ্ঠ স্পষ্টবাদী সুবিজ্ঞ বিচারপতি—
 রামশাস্ত্রী } পুণাদরবারে বশিষ্ঠস্বরূপ ছিলেন । ছোট বড়

সকলেই তাঁহাকে ভক্তি ও ভয় করিয়া চলিত। অনুসন্ধানে তিনি শেষে জানিতে পারিলেন রাঘোবা নারায়ণরায়ের বধের আদেশ দেন নাই—তাঁহাকে ধরিবার অনুমতি দিয়াছিলেন মাত্র। তাঁহার আজ্ঞাপত্রে “ধরিবে” এই কথা বদলাইয়া “মারিবে” এই কথা কে একজন লিখিয়া দিয়াছে। প্রসিদ্ধি এইরূপ যে রাঘোবার পত্নী পিশাচিনী আনন্দীবাই এই জালের জনয়িত্রী। এই ঘটনার কতক দিন পরে রাঘোবা রামশাস্ত্রীকে জিজ্ঞাসা করিলেন, এ পাপের প্রায়শ্চিত্ত কি? শাস্ত্রী মহাশয় উত্তর করিলেন “তোমার নিজের প্রাণ উৎসর্গ ভিন্ন ইহার প্রায়শ্চিত্ত নাই। তোমার জীবনে আর সুখ নাই—তোমার কিস্বা তোমার রাজ্যের কল্যাণ নাই। তুমি যতদিন কৰ্ত্তা থাকিবে ততদিন আমি এ সরকারে চাকুরী করিব না—আর এ মুখো হইব না।” শাস্ত্রী তাঁহার বচন রক্ষা করিলেন। সেই অবধি তিনি রাজকার্য্য পরিত্যাগ পূর্ব্বক পুণা ছাড়িয়া বিজন গ্রামে একান্তে অবশিষ্ট জীবন অতিবাহিত করেন।

ষষ্ঠ পেশওয়া
রঘুনাথরাও (রাঘোবা) } রঘুনাথরাও পেশওয়া পদে আরুঢ় হইলেন
১৭৭৩—৪ } কিন্তু বিস্তর দিন টিকিতে পারেন নাই।

তিনিও যেমন যুদ্ধযাত্রায় পুণার বাহির হইলেন, তাঁহার বিপক্ষ-দলও শির উত্তোলন করিল। মন্ত্রী-প্রধান খ্যাতনামা নানা ফর্ণবীস সে দলের নেতা। রাঘোবার সহচর অনুচরগণ একে একে তাঁহার পক্ষ পরিত্যাগ করিল। রাঘোবা বেগতিক দেখিয়া সিন্দে হোলকর ও ইংরাজদের শরণ ভিক্ষায় কৃতসঙ্কল্প হইলেন।

এই সময় হইতে পেশওয়া বংশের অবনতি। প্রথমে যখন

পেশওয়া বংশের } বাজিরাও রাজ্যের সর্বোচ্চ শিখরে আরোহণ
অবনতি } করেন, তখন সেনাপতি রাঘোজী ভোঁসলা

বহ্রাড় প্রান্তের জায়গীরদার ছিলেন। তিনিও পেশওয়ার
দৃষ্টান্তে স্বাধীন রাজ্য স্থাপনে প্রবৃত্ত হইলেন। পেশওয়ার
অধীনস্থ অপরাপর কর্মচারীরাও প্রভুর দৃষ্টান্ত অনুসরণ করিতে
তৎপর হইল। ক্রমে মহারাষ্ট্র রাজ্যে পঞ্চশাখা বিস্তৃত হইল।

পঞ্চশাখা } পেশওয়া তাহার মধ্যবিন্দু, তাঁহার রাজধানী পুণা।

ভোঁসলার রাজধানী নাগপুর। সিন্দে গোওয়ালিয়ের আধিপত্য

পাইলেন। হোলকর ইন্দোরে, বরদায় গাইকওয়াড় স্ব স্ব
আধিপত্য স্থাপন করিলেন। পেশওয়া চিতপাবন ব্রাহ্মণ,

অন্যান্য সরদারগণ শূদ্রজাতীয় মহারাট্টা। মহলাররাও হোলকর

হীনবর্ণ সেনা ছিলেন; রাণোজী সিন্দে পেশওয়ার পাছুকাধারী;

পিলোজী গাইকওয়াড় রাখালরাজ। ইহারা সকলেই দীনহীন

সামান্য শ্রমজীবির জীবিকা হইতে স্বভূজবলে রাজসিংহাসন

উপার্জন করেন, নীচকূলে জন্মগ্রহণ করিয়া রাজবংশ পত্তন

করিয়া যান। পেশওয়া প্রথমতঃ এই সকল বীরদিগকে দেশ-

বিজয়ে নিযুক্ত করেন, তাঁহাদের উপর সৈন্য সংস্থানের ভার।

তাঁহারা দূরে দূরে থাকিয়া কার্য্য করিতেন, পেশওয়া তাঁহাদের

উপর কর্তৃত্ব খাটাইবার সুবিধা পাইতেন না। পেশওয়ার

অজ্ঞাতসারে স্বেচ্ছানুসারে তাঁহারা সন্ধি বিগ্রহ করিতে লাগি-

লেন ও রাজ্য রক্ষার্থে সেনা নিয়োগ না করিয়া স্বার্থ সিদ্ধি-

তেই নিযুক্ত করিলেন। কালক্রমে তাঁহারা নিজে নিজেই সর্বেসর্ব্বা হইয়া উঠিলেন—পেশওয়ার অধিকার নাম মাত্র। সাতারার রাজা সম্বন্ধে যেমন পেশওয়া, পেশওয়া সম্বন্ধে তদ্রূপ তাঁহার ভৃত্যবর্গ।

পুণায় দলাদলি } পুণা দরবার দুই দলে বিভক্ত—একদল রাঘোবার পক্ষ—অপর দল মৃত নারায়ণরায়ের পত্নী গঙ্গাবাইয়ের পক্ষ। গঙ্গাবাই তখন গর্ভবতী, সুরক্ষিত ভাবে পুরন্দর দুর্গে অবস্থিতি করিতেছিলেন। রাঘোবা সৈন্য সামন্ত লইয়া স্বপক্ষ সমর্থনে যত্নশীল হইলেন; প্রথম প্রথম কতকটা কৃতকার্য্যও হইলেন। তিনি যুদ্ধে অরিদল জয় করিয়া বিপক্ষ সেনাপতিকে গ্রেপ্তার করিলেন। কিন্তু বিধাতা তাঁহার প্রতিকূল। পুণার সিংহাসন স্পর্শ করেন করেন, ইতিমধ্যে তাঁহার মাথায় বজ্রপাত সদৃশ সংবাদ আসিল যে রাণীর পুত্র-সন্তান জন্মিয়াছে—৪০ দিন গত হইলে শিশু রাজার রীতিমত সপ্তম পেশওয়া } রাজ্যাভিষেক ক্রিয়া সম্পন্ন হইল। জ্যেষ্ঠা সওয়াই মাধবরাও } অপেক্ষাও বড় এই অর্থে “সওয়াই” মাধবরাও ১৭৭৪—১৭৭৫ } নামে শিশুর নামকরণ হইল। এই সঙ্কটে হোলকর সিন্দিয়ার সাহায্য লাভে নিরাশ্বাস হইয়া রাঘোবা ইংরাজদের শরণাপন্ন হইলেন। বম্বে গবর্ণমেন্ট অর্থ ও ভূমিলাভ লালসায় তাঁহার পক্ষে অস্ত্রধারণে প্রতিশ্রুত হইলেন।

রাঘোবা ও } ১৭৭৫এ রাঘোবা ও বম্বে গবর্ণমেন্টের মধ্যে
বম্বে গবর্ণমেন্ট } সন্ধিস্থাপন হয়, নাম সুরাট সন্ধি। সন্ধির

তাৎপর্য্য এই, ইংরাজেরা রাঘোবাকে সসৈন্য পুণায় পৌঁছাইয়া দিয়া পেশওয়া-সিংহাসন প্রত্যর্পণ করিবেন—রাঘোবা ইংরাজদের পুরস্কার স্বরূপ বাসীন সালসেট প্রভৃতি কতকগুলি লোভনীয় স্থান ছাড়িয়া দিবেন । ইংরাজ ও মহারাষ্ট্রীদের মধ্যে যুদ্ধের এই সূত্রপাত ।

সুপ্রীম গবর্ণমেন্ট } রাঘোবার সহিত এইরূপ বন্দবস্ত সুপ্রীম গবর্ণমেন্টের মনঃপূত হয় নাই । তাঁহারা সন্ধি প্রত্যাখ্যানের আদেশ জারী করিলেন । তাঁহাদের আদেশ ক্রমে পুণা দরবারের সহিত কথাবার্তা স্থির হইয়া পুরন্দরের সন্ধি সন্ধায়িত পুরন্দরের সন্ধি } হইল ।

পুরন্দরের সন্ধি মৌখিক ও ক্ষণস্থায়ী । রাঘোবাকে দিয়া কার্য্যোদ্ধার করা ইংরাজদের প্রকৃত অভিপ্রায় । এই সময় আবার সেন্ট লুভিন নামক একজন ফরাসিস্ পুণায় আসিয়া গোলবোগ আরম্ভ করেন । পুণায় একটা ফরাসিস্ কুঠী স্থাপন করা ও কুঠী রক্ষণে ফরাসিস্ সৈন্য নিয়োগ করা তাঁহার আগমনের উদ্দেশ্য । পেশওয়া তাঁহাকে মহা ধুমধাম করিয়া অভ্যর্থনা করেন । মন্ত্রীবর নানাকর্ণবীস তাঁহার পোষক । এই সব দেখিয়া ইংরাজেরাও পুণা দরবারে প্রবেশ লাভে সমুৎসুক হইলেন । মন্ত্রীবর্গের মধ্যে বিচ্ছেদ-সূত্রে তাঁহাদের অভীকৃত সিদ্ধির সুবিধাও হইল । রাঘোবার পক্ষপাতী সখারামরাও বশে গবর্ণমেন্টের সহিত কুমন্ত্রণায় প্রবৃত্ত হইলেন । বশে গবর্ণমেন্ট সুপ্রীম গবর্ণমেন্টের মত চাহিয়া পাঠাইলেন । সুপ্রীম গবর্ণ-

মেণ্টের মতের ঐক্য নাই । দুজন কৌন্সলর একদিকে, তাঁহাদের মতে পুরন্দর সন্ধি ভঙ্গ করা “অবৈধ, অন্যায় ও অনিষ্টকারী,” অপর দুজনার স্বতন্ত্র মত । যখন দুই পক্ষ সমান সমান, তখন গবর্ণরজেনেরল যে পক্ষে যোগ দেন সেই পক্ষই বলবত্তর । হেষ্টিংস সাহেবের অনুকূল মতেই বম্বে গবর্ণমেণ্টের প্রস্তাব গ্রাহ্য হইল । ১৪ নবেম্বর ১৭৭৮এ রাঘোবার সহিত নূতন সন্ধি । মহারাট্টাদের সহিত ইংরাজদের এই প্রথম যুদ্ধ ।

প্রথম মহারাট্টা যুদ্ধ }
১৭৭৯—৮১

সুপ্রীম গবর্ণমেণ্ট বম্বের সাহায্যে একদল সৈন্য প্রেরণ করিলেন । তাহাদের আগমন অপেক্ষা না করিয়া বোম্বাই গবর্ণমেণ্ট যুদ্ধে কটিবদ্ধ হইলেন । বম্বের সৈন্যাধ্যক্ষ কর্ণল এজরটন । তাঁহার যে একাধিপত্য তাহা নহে, তাঁহার উপর আবার এক যুদ্ধ কমিটির অধিকার । এই অল্প সৈন্য লইয়া মহারাষ্ট্র-গর্ত্তে প্রবেশ করা যত সহজ মনে হইয়াছিল, ফলে দেখা গেল তত সহজ নয় । ব্রিটিস সৈন্য যত অগ্রসর হয়, মহারাট্টারা আশপাশ প্রদেশ অগ্নিসাং করত তত পিছু হটে । ইংরাজ সৈন্য তলেগাম গিয়া দেখে সকলি ভস্মরাশি—লোকজন গ্রাম ছাড়িয়া পলায়ন করিয়াছে । দু দিন পরে কমিটি হইতে সৈন্য প্রত্যাবর্তনের হুকুম আসে । যদিও কোন কোন বিচক্ষণ ব্যক্তির ইহাতে অমত ছিল, তথাপি এই আদেশ মত কার্য্য করিতে হইল । রাত্রে ভারি ভারি তোপ সকল ডোবার মধ্যে নিষ্ফিণ্ড হইল । বেশীর ভাগ জিনিস পত্র অগ্নিকুণ্ডে আহুতি দিয়া ব্রিটিস সৈন্য ফিরিল । কমিটি

মনে করিয়াছিলেন সৈন্যেরা নিঃশব্দে ফিরিয়া আসিবে, কেহ কিছু জানিতেও পারিবে না। সকাল হইতে না হইতেই শত্রু-দলের গোলাবৃষ্টিতে ইংরাজ সৈন্যের স্বপ্নভঙ্গ হইল। সন্ধ্যার সময় সে সৈন্য অনেক কক্ষে বড়গাম পৌঁছে। পরদিন প্রভাত হইতে তাহাদের উপর পুনর্ব্বার গোলাবর্ষণ হইতে লাগিল— অবশেষে ব্রিটিশ সেনা হার মানিয়া সন্ধির প্রস্তাবে সম্মত হইল। ইংরাজদের এমন হার আর কখন হয় নাই। মহারাষ্ট্রীরা বাহা চাহিলেন তাহা পাইলেন। ইংরাজেরা সালসেট্ প্রভৃতি তাঁহাদের কতকগুলি অধিকৃত প্রদেশ ফিরিয়া দিতে স্বীকৃত হইলেন। সিন্দের ভোগে ভরুচ অর্পণ এবং তাঁহার অনুচরবর্গের মধ্যে প্রচুর অর্থ বিতরণে তাঁহার মনস্তৃষ্টি সাধিত হইল।

ইংরাজদের দর্প চূর্ণ। এই কলঙ্কপূর্ণ বড়গাম সন্ধি বোম্বাই গবর্ণমেন্ট অনুমোদন করিলেন না। সুপ্রীম গবর্ণমেন্ট অন্যতর প্রস্তাব করিয়া পাঠাইলেন তাহা মহারাষ্ট্রীদের অগ্রাহ্য হইল। পুনর্ব্বার যুদ্ধারম্ভ।

জেনেরল গডার্ড } এই সঙ্কটে জেনেরল গডার্ড বম্বে সৈন্যের
১৭৮০—৮১ } সাহায্যে আগমন করেন। তিনি তখন বন্দেলখণ্ডে ছিলেন। তথা হইতে বিশ দিনের মধ্যে একেবারে ৩০০ মাইল কূচ করিয়া সুরাটে আসিয়া পড়িলেন। প্রথমে গুজরাট, পরে কোঙ্কন তাঁহার রণক্ষেত্র। ১৭৮০ অব্দে তিনি মহারাষ্ট্রীদের উপর জয়লাভ করিয়া বাসীন অধিকার করেন।

হাইদর আলি } এই সময় হাইদর আলির কর্ণাটক আক্রমণ
সংবাদ বশ্বে পৌঁছে। হাইদর দমনে ইংরাজদের সমুদায় বল
সমুদায় শক্তি প্রয়োগ করা চাই, মহারাষ্ট্রীদের সঙ্গে বিবাদ
ভঞ্জন প্রয়োজন। সেনাপতির প্রতি মহারাষ্ট্রীদের সহিত সন্ধি
বন্ধনের অনুমতি হইল। মনোমত কার্যোদ্ধার করিতে হইলে
পেশওয়াকে ভয় দেখান আবশ্যিক এই বিবেচনায় গডার্ড সৈন্য
সামন্ত লইয়া বরঘাটের অভিমুখে যাত্রা করিলেন। আপনি
ঘাটের নীচে অবস্থিতি করিয়া একদল সেনা উপরে খণ্ডালায়
প্রেরণ করিলেন। মহারাষ্ট্রীরা তাঁহার দুর্বলতা বুঝিয়া বোম্বাই ও
গডার্ড সৈন্যের মাঝখানে ঝুঁকিয়া পড়িল। পলায়ন শ্রেয় বিবেচ-
নায় গডার্ড ফিরিয়া যাইতে কৃতনিশ্চয় হইলেন। বরং অল্প সৈন্য
লইয়া সম্মুখ-যুদ্ধে জয়ের সম্ভাবনা কিন্তু মহারাষ্ট্রীদের কাছে
পিছন ফিরিলে আর রক্ষা নাই। গডার্ড তাহাই ঠেকিয়া শিখি-
লেন। এই প্রত্যাবর্তনে ব্রিটিস সৈন্যের সমূহ ক্ষতি। দেশী
ইউরোপীয় সর্বশুদ্ধ ৪৬১ জন সেনা হত—কামান ও অন্যান্য
জিনিসপত্র শত্রু হস্তে পতিত হইল।

সালবাই সন্ধি } এই দুই হারের পর সালবাই সন্ধি। এই
১৭৮২ } সন্ধিমার্গে ইংরাজ মহারাষ্ট্রীদের মধ্যে দেশের
আদান প্রদান হইল। ইংরাজেরা রাঘোবার পক্ষ পরিত্যাগ
করিলেন—তিনি অতঃপর পেন্সন-ভোগী হইয়া গোদা-
বরীতীরে কালাতিপাত করিতে লাগিলেন। অন্য ইউ-
রোপীয় জাতির সহিত মিত্রতা বন্ধন করিবেন না, পেশওয়া

এইরূপ বচন দিলেন। এই সন্ধি করিয়া ইংরাজেরা হাইদরের বিপক্ষে অবাধে অস্ত্র চালনা করিবার সুযোগ পাইলেন।

সালবাই সন্ধি সাধনে মহারাষ্ট্র পক্ষের প্রধান উদ্যোগী মহাদাজী সিন্দে। এই সন্ধি-সূত্রে সিন্দিয়ার গুমর বাড়িয়া উঠিল। মহাদাজী (আসল নাম মহাদেব) প্রথমে সামান্য পাটেল মহাদাজী সিন্দে } ছিলেন, গাঁয়ের মড়ল বৈ নয়—পেশওয়া সরকারের চাকর; এইক্ষণে তিনি স্বাধীন রাজা, মহারাষ্ট্র সরদারদের অধিনায়ক হইয়া দাঁড়াইলেন। উত্তরোত্তর তাঁহার পদবৃদ্ধি, বলবৃদ্ধি, ঐশ্বর্য্য বিস্তার হইতে চলিল। এই মহাদাজী সিন্দে মহারাষ্ট্রে বিপুল কীর্ত্তি রাখিয়া গিয়াছেন—জাতীয় বীরের মধ্যে ইনি শিবাজীর নীচেই গণনীয়; ইহার কার্য্য কলাপ এইস্থলে কিঞ্চিৎ প্রদর্শন করা অসম্ভব হইবে না।

মহাদাজী সিন্দে উত্তর হিন্দুস্থানে স্বীয় আধিপত্য বিস্তার করত পাণিপতের কলঙ্ক মোচনে ব্রতী হইলেন। সময় অনুকূল। মোগল রাজ্য জীর্ণ শীর্ণ ভগ্ন চূর্ণ, চতুর্দিকে অরাজকতা—যার বল তারই জয়, জোর যার মুল্লুক তার। উত্তর হিন্দুস্থান ঘন মেঘাচ্ছন্ন—সেই মেঘের মধ্য দিয়া ঘোর উপপ্লবের চিহ্ন সকল সূচিত হইতেছে; কত বাড়ী ঘর লণ্ডভণ্ড, পরিবার ছারখার, কত শস্যক্ষেত্র মরুভূমিতে পরিণত—কত নির্দোষী ব্যক্তির রক্তপাত হইতেছে। কিন্তু এই সকল সত্ত্বেও দিল্লী সিংহাসনের উপর লোকের অটল অনুরাগ। দিল্লীস্থর বীর্য্যহীন ঐশ্বর্য্যহীন কিন্তু তখনো তাঁহার নাম-মাহাত্ম্য ভারতভূমিতে প্রসারিত।

দিল্লীশ্বরের নামে সকলেই মোহিত—তঁাহার সহযোগী হইয়া কার্য্য করিতে লোকে উৎসাহিত—তঁাহার প্রদত্ত মানার্জনে মহা মহা আমীরও আপনাকে গৌরবান্বিত মনে করেন। সিন্দিয়াও অবসর বুঝিয়া কার্য্যারম্ভ করিলেন। দিল্লীর বাদসা সা আলম—তঁাহার উজীর নজফ খাঁর সম্প্রতি মৃত্যু হইয়াছে, এই ঘটনায় উজীর পদের জন্য মহা বিবাদ বিসম্বাদ চলিতেছে। নজফের উত্তরাধিকারী আফ্রাসিয়াব। মহম্মদ বেগ তঁাহার প্রতিদ্বন্দ্বী এই প্রতিদ্বন্দ্বী দমন মানসে আফ্রাসিয়াব সিন্দিয়াকে ডাকিয়া পাঠান। মন্ত্রীরা আমন্ত্রণে সিন্দে সৈন্য সামন্ত সমভিব্যাহারে আগ্রায় গিয়া বাদসাহের সহিত সাক্ষাৎ করেন। কিছু পরেই আফ্রাসিয়াব শত্রুহস্তে নিহত হওয়ায় রাজ্যবিপ্লব দ্বিগুণতর জ্বলিয়া উঠিল। সকলেই সিন্দিয়ার দিকে তাকাইয়া, সিন্দের সাহায্যে নিজ নিজ কাজ সাধিবার চেষ্টায় ফিরিতেছে। সিন্দে দিল্লী প্রয়াণ করিয়া পেশওয়ার তরে “বাদসাহী উজীর” পদবী আদায় করিলেন—স্বয়ং বাদসাহী সেনাপতি পদ গ্রহণ করিলেন। সৈন্য সংরক্ষণে আত্মা দিল্লীর রাজস্ব নিয়োজিত হইল, এইরূপে গঙ্গা যমুনার মধ্যবর্তী দোআব প্রদেশ তঁাহার বশবর্তী হইল। বাদসা সৈন্য মাঝে সঙের মত এদিক্ ওদিক্ ফিরিতে লাগিলেন—সিন্দিয়া মথুরাধামে নিজ নিকেতন স্থাপন করিলেন। তিনি নিশ্চেষ্ট রহিলেন তাহা নহে, ডিবইন নামক জনৈক ফরাসিসকে পাইয়া সুশিক্ষিত প্রবল সৈন্যদল গড়িয়া লইলেন—সে সৈন্য শীঘ্রই কাজে লাগিল। দিল্লীতে অশান্তির আর অন্ত

নাই । বাদসাহের উপর রোহিলা দলপতি গোলাম কাদরের প্রচণ্ড দৌরাভ্য সিদ্দিয়ার কর্ণগোচর হইল । এই গোলাম কাদর দিল্লীতে প্রবেশ করিয়া যে ভয়ানক মারকাট অত্যাচার জারী করে তাহার তুলনা পাওয়া ভার । কতক দিন ধরিয়া নগর লুণ্ঠন, প্রাসাদ লুণ্ঠন ; লুণ্ঠনে আশানুরূপ ধন লাভে নিরাশ হইয়া গুপ্ত ধন বাহির করিবার অভিপ্রায়ে বাদসাহের উপর, রাজ-পরিবারের উপর অকথ্য দারুণ উৎপীড়ন প্রবর্তিত হয় । এই সকল অত্যাচারে জর জর হইয়া বেচারী সা আলম মনস্তাপে বলিয়া উঠিলেন—“এ দৃশ্য দেখা অপেক্ষা আমার অন্ধ হওয়া ভাল ছিল”—এই কাতরোক্তি শ্রবণে নৃশংস কাদর তরবার দিয়া তাঁহার চক্ষুদ্বয় উৎপাটন করিয়া সেই দণ্ডে তাঁহাকে অন্ধ করিয়া ছাড়ে । মড়ার উপর আবার খাঁড়ার ঘা না দিয়া সে সন্তুষ্ট নয় । সেই শোণিতাক্ত অন্ধ বাদসাকে পাষণৎহৃদয় পাষণ্ড আবার উপহাসচ্ছলে জিজ্ঞাসা করিল “এখন বাবা কি দেখিতেছ ?” বাদসা উত্তর করিলেন “তোমার আমার মাঝখানে আমি বাপু কোরাণ দেখিতেছি ।” সমর্পক উত্তর, কেননা কোরাণ ছুঁইয়া শপথের পর গোলামের শেষে এই আচরণ । এই দুরাত্মাকে শীঘ্রই তাহার পাপের শাস্তি ভোগ করিতে হইল । সিদ্দিয়ার সৈন্যাগমে সে দিল্লী ছাড়িয়া পালায় এবং কতকদিন পরে ধৃত হইয়া স্বীয় পাপানুরূপ কঠোর প্রাণ-দণ্ডে দণ্ডিত হয় । মহাদাজী অন্ধ বৃদ্ধ বাদসাহকে মহা সমারোহে দিল্লীর সিংহাসনে পুনঃস্থাপন করিয়া যথোচিত সান্তনা

সহকারে তাঁহার কষ্ট লাঘব করেন । এই অসহ্য দুঃখ ক্লেশের
পর সা আলম যে গভীর শোকোচ্ছ্বাসময় কবিতা উদগার করি-
য়াছিলেন, তাহার কিয়দংশ উদ্ধৃত হইল ।

বিষয় বিভব যাহা আছিল তা বালাই আমার ।

কৈন্থ কত পাপ, পাইন্থ মনস্তাপ,

যেমন করম তার প্রতিফল যোগ্য

ক্ষমাগুণে এবে প্রভু তারিলে হে, আনিলে আরোগ্য ।

ছপ দিয়ে পুষেছিহু সাপ,

সেই বিষে পাই শেষে কত শোক তাপ ।

* * * *

পাঠান হানিয়া বাণ, রাজ্য মোর করে ছারখার ;

তুমি বিনা আর, প্রভুহে আমার

আছে কেবা ত্রিভুবনে করিতে উদ্ধার ।

হয়ত তাইমূর আসি, কাটিবেন দুঃখ রাশি,

ঘুচিবে যন্ত্রণা জ্বালা লভিয়ে সহায় ;

না হয় মহাদাজী, পুত্রসম আজি

• প্রতিশোধ তুলি বীর বাঁচাবে আমায় ;

* আসফ রাখিবে লাজ, অথবা ইংরাজ রাজ

করে ত্রাণ রহে, প্রাণ ধ'রে সে আশায় ।

* * * *

† মিহির রে, আজি তোরে ভাগ্য দোষে ঘিরিল হৃদিনে

এ ঘোর তিমির রহিবে কি চির—

সুদিন দেখিবি, পুণ প্রকাশিবি তুই, বিভূ রূপাণ্ডনে ।

* আসফ-উদ্দৌলা ।

† মূল ভাষায় আফতাব—সূর্য্য—বাদসার অগ্র নাম ।

সিন্দিয়ার মথুরা প্রবাস কালে ব্রিটিস গবর্ণমেন্ট পুণাদরবারে একজন ইংরাজ রেসিডেন্ট বসাইবার চেষ্টায় মহারাজা সিন্দের সন্নিধানে দূত প্রেরণ করেন। ব্রিটিস দূত ম্যালেট সাহেব মথুরায় সিন্দিয়ার সহিত সাক্ষাৎ করেন। মোগল সম্রাট সা আলম তখন সিন্দের ক্যাম্পে, তাঁহার সহিতও সাক্ষাৎ হয়। কয়েক বৎসরের মধ্যে কি অগাধ পরিবর্তন! ৪০ বৎসর পূর্বে মহারাষ্ট্র বীরেরা তাহাদের কোটর হইতে বিনির্গত হইয়া ভারতক্ষেত্রে অবতীর্ণ হয়। তখন দিল্লীশ্বরের মহিমা-মিহিরে দিগ্বিদিক্ ঝলসিত—এই অল্পকাল মধ্যেই তাঁর সমস্ত মহিমা অন্তমিত। সেই দিল্লী সম্রাট এখন বর্গীদের অনুগ্রহ ভিখারী, সিন্দিয়ার ক্যাম্পে আবদার করিতে আসিয়াছেন। সে যাহা হউক সিন্দিয়ার প্রসাদে ব্রিটিস দৌত্য সফল হইল। ম্যালেট সাহেব ব্রিটিস কার্য্যকর্তা হইয়া পুণায় প্রবেশ লাভ করিলেন। ছুঁচ হইয়া প্রবেশ সঙ্গীন হইয়া বাহির হওয়া, ইংরাজদের এই আশ্চর্য্য নয় কৌশল ভারত ইতিহাসে পদে পদে প্রত্যক্ষ করা যায়।

পুণা দরবারে } ম্যালেট সাহেব পুণাদরবারে ব্রিটিস দূত-
ব্রিটিস দূত ১৭৮৫ } রূপে কয়েক বৎসর দক্ষতার সহিত কার্য্য
করেন। লর্ড কর্ণওয়ালিস যখন টিপুসুলতানের সঙ্গে দুর্দান্ত
সমরে প্রবৃত্ত হন, তখন ম্যালেটের মন্ত্রণায় পেশওয়া ও নিজাম
ইংরাজদের সহিত যোগ দিয়া চলেন। ফেব্রুয়ারি ১৭৯২ এ
কর্ণওয়ালিস শ্রীরঙ্গপট্টন আক্রমণ করিয়া টিপুর উপর জয়লাভ

করেন। টিপু হার মানিয়া ১৯ মার্চ ইংরাজদের কথামত সন্ধি লিখিয়া দেন। ইংরাজ ভাগ্যে সুলতান রাজ্যের বহুতর প্রদেশ পতিত হয়। এই যুদ্ধে ইংরাজেরা যে সকল স্থান জয় করেন, তাহার তৃতীয়াংশ পেশওয়াকে ছাড়িয়া দেওয়া হইল। ব্রিটিস গবর্ণমেন্ট আরো অনেক প্রদেশ ছাড়িয়া দিতে প্রস্তুত ছিলেন, কিন্তু তাঁহারা চান যে নিজামের দৃষ্টান্তের অনুগামী হইয়া পেশওয়াও ইংরাজ সৈন্য পোষণে স্বীকৃত হন। ইংরাজেরা এইরূপ নানা প্রলোভন দেখাইতে লাগিলেন কিন্তু সিন্দিয়ার চতুর পরামর্শে এ প্রস্তাব অগ্রাহ বলিয়া পরিত্যক্ত হইল।

উত্তর হিন্দুস্থানে কিয়ৎপরিমাণে শান্তি শৃঙ্খলা স্থাপনান্তর
 সিন্দের পুণাগমন } মহাদাজী সিন্দে দক্ষিণাভিমুখে প্রস্থান করি-
 ১৭৯২ } লেন। ১৭৯২ অব্দে তিনি পেশওয়ার হস্তে
 দিল্লীশ্বর প্রদত্ত নূতন পদমর্যাদা প্রদান উপলক্ষে পুণায় পদা-
 'র্পণ করেন। এই অভিষেক ক্রিয়া মহা সমারোহে সম্পন্ন হয়।
 পুণায় এমন ধুমধাম আর কখনও হয় নাই। প্রথমে পেশওয়ার
 “বাদসাহী উজীর” পদবী গ্রহণ। সিন্দিয়া অনুষ্ঠানের কোন
 ক্রটি করেন নাই। উৎসবের জন্য সারি সারি চিত্র বিচিত্র তাম্বু
 পড়িয়াছে। প্রাস্তবর্তী তাম্বুতে এক স্বর্ণ সিংহাসন প্রস্তুত, তৎ-
 সমীপে বাদসাহী সনদ, বসন ভূষণাদি উপহার সামগ্রী সকল
 বিরচিত। পেশওয়া সিংহাসনের সমক্ষে দাঁড়াইয়া তিনবার
 সেলাম করিয়া শতৈক স্বর্ণ মোহর নজরাণা দিয়া বাম পাশ্বে
 উপবিষ্ট হইলেন। পরে বাদসাহী পরওয়ানা পাঠিত হইল।

ইহার শেষ ভাগে হিন্দুস্থানে গোহত্যা নিষেধের অনুষ্ঠান ছিল, পাঠক যখন সেই ভাগে আসিয়া উপনীত হইলেন তখন সভা-সজ্জনের উল্লাসের আর সীমা রহিল না । তৎপরে আড়ালে গিয়া অভিষেক বসন ভূষণ সাজ সজ্জা করিয়া দরবারে পেশ-ওয়ার পুনঃ প্রবেশ, সভাস্থ সরদারদের অভিবাদন ও দস্তুরমত নজর দান । অনন্তর তিনি দিল্লীস্থর প্রেরিত অশ্ব রথ-গজ, ঢাল তলবার, বসন ভূষণ, চামর নিশান প্রভৃতি বিবিধ উপহার সামগ্রী গ্রহণ করিলেন । সভা ভঙ্গ করিয়া পেশওয়া যখন সহরে প্রবেশ করেন, তখন সমস্ত পথ লোকে লোকারণ্য—বাদ্যধ্বনি, তোপ-ধ্বনি, পৌরজনের জয়ধ্বনি মিলিত হইয়া যে কি গগনভেদী গভীর নাদ সমুখিত হইল, তাহা বর্ণনাতীত । প্রাসাদে গিয়া উজীরের প্রতিনিধি পদে সিন্দের বরণ । এই উপলক্ষে ও অন্যান্য প্রসঙ্গে সিন্দিয়ার বিনয় অভিনয় অতীব কৌতুকাবহ । পাত্র মিত্রে সভাসৎ সমস্ত লোকে তাঁহার সম্মানার্থে যেমন ব্যগ্র, সিন্দে নিজ পদ-লাঘব বজায় রাখিতে তেমনি তৎপর । সমবেত আমীর ওমরাদের মধ্যে নিকৃষ্ট আসন গ্রহণ করা—স্বভূজার্জিত উচ্চ পদবী সকল তুচ্ছ করিয়া আপনার পাটেল নাম লোক মধ্যে ঘোষণা করা—মোরচল (ময়ূর পুচ্ছের চামর) ধরিয়া পেশ-ওয়ার পান্ধীর সঙ্গে সঙ্গে চলা—পৈতৃক রীতি অনুসারে পেশ-ওয়ার পার্শ্বে পাতুকা ধরিয়া দাঁড়ান, ইত্যাদি বিনয় ভাগে তিনি লোকরঞ্জনর চেষ্টা করেন, কিন্তু তাহার ফল উন্টাই হইল—অতি ভক্তি চোরের লক্ষণ, এ ত ধরা কথা । সিন্দে যেমনই

অভিনয় করুন না কেন, নানা ফর্ণবীসের ন্যায় দূরদর্শী চতুর লোকের তাঁহার গুঢ় অভিসন্ধি তলাইয়া বুঝিতে আর বাকী রহিল না এবং ফলেও প্রকাশ পাইল, পুণায় থাকিয়া প্রধান মন্ত্রী-রূপে রাজকার্য্য নির্বাহ করেন, এই তাঁহার ভিতরকার মতলব।

নানা ও সিন্দের মধ্যে মহা রেবারেষি—পেশওয়া বেচারার ভাবিয়া পান না কোন্ দিক্ রক্ষা করেন—তুই জন তাঁহার তুই বাহু। নানার বিপক্ষতা সত্ত্বেও পুণা দরবারে সিন্দের আধিপত্য দিন দিন বৃদ্ধি হইতে চলিল। পেশওয়াকে তিনি শিকার, ব্যায়াম চর্চা, নানাপ্রকার প্রদর্শন, আমোদ প্রমোদে ভুলাইয়া তাঁহার মমতা আকর্ষণ করেন—নানা ফর্ণবীসের মহিমা লান। মহাদাজীর প্রভুত্ব নানার অসহ্য হইয়া উঠিল—এমন কি তিনি রাজ্য কারবার ছাড়িয়া কাশীবাসের সঙ্কল্প করিলেন। পেশওয়া তাঁহাকে অভয় বচন দিয়া অনেক করিয়া সান্ত্বনা করেন। তাঁহাদের পরস্পর বৈমনস্য প্রকাশ্য লাঠালাঠিতে পরিণত হইবার উপক্রম, এমন সময় যমদূত আসিয়া নানার পক্ষ অবলম্বন করিল। সিন্দিয়া সহসা জ্বররোগে আক্রান্ত হইয়া মানবলীলা সম্বরণ করিলেন। নানার একমাত্র অপ্রতিহত প্রতিদ্বন্দী সরিয়া যাওয়াতে তাঁহার প্রভুত্বের পথ নিষ্কণ্টক হইল।

মহাদাজীর মৃত্যুর অনতিকাল পরে পেশওয়া ও নিজামের মধ্যে চোঁথ লইয়া যুদ্ধ বাধিবার উপক্রম। নিজাম আলি ব্রিটিস সিংহকে স্বপক্ষে টানিবার অনেক চেষ্টা করিয়াও কৃতকার্য্য হইলেন না। তখনকার বড় লাটসাহেব সর জন শোর এ বিবাদে

হস্তক্ষেপ করা যুক্তিসিদ্ধ নহে, এই বলিয়া মনকে প্রবোধ দিলেন। শীঘ্রই যুদ্ধারম্ভ হইল। মহারাত্রীয় মহা মহা বীরেরা পেশওয়ার পতাকাতলে এই শেষ বারের বার সম্মিলিত খড়্গ নবাবী যুদ্ধ } হইলেন। মহাদাজীর উত্তরাধিকারী দৌল-
 ১৭৯৩ } তরাও সিন্দে তথা তুকার্জী হোলকর পুণাতেই ছিলেন। নাগপুর রাজা ভৌসলাও তাঁহাদের মধ্যে আসিয়া জুটি-
 লেন। গোবিন্দ রাও গাইকওয়াড় গুজরাট হইতে কোঁজ পাঠা-
 ইলেন। রাস্তে ও পটবর্দ্ধন, মালেগাম ও বিধুরপতি, পন্ত প্রতি-
 নিধি, পন্ত সচিব, নিম্বালকর, পাটনকর, ষাটগে, ডফলে, থোরাতি,
 পওয়ার প্রভৃতি বড় বড় শূর সরদার জায়গীরদার স্বস্ব দলবল
 লইয়া রণ-সজ্জায় সজ্জিত হইলেন। অশ্ব পদাতিক সর্বসমেত
 প্রায় দেড় লক্ষ সেনা একত্রিত। পরশুরাম ভাউ সেনাপতি।
 আহমদনগর জিলার অন্তর্গত খড়্গ যুদ্ধ সংঘটন হয়। এই যুদ্ধে
 বড় একটা রক্তপাতের প্রসঙ্গ আসে নাই। যেমন গর্জন, তেমন
 বর্ষণ নয়। কোন পক্ষের বিশেষ রণ-চাতুরীও প্রকাশ পায়
 নাই। নিজামের অকারণ ভীৰুতা ও ভয়ে পলায়ন বশতঃ মহা-
 রাষ্ট্রীরা সুলভ মূল্যে জয় ক্রয়ে সমর্থ হইল। বিলাসী নবাব
 তাঁহার জনানা সমাগমে রণস্থলে সমাগত। বেগম-প্রধানা রণ-
 বিভীষিকা দর্শনে মুছাঁপন্বা, প্রাণনাথের শরণাপন্বা; নবাব
 প্রিয়াকে সামলাইবেন, না যুদ্ধ করিবেন—কি করেন, ভাবিয়া
 পান না। শেষে পলায়নই সাব্যস্ত হইল। তাঁহার সেনানী
 বেচারী অপ্রস্তুত! মহারাষ্ট্রীগণ অবসর পাইয়া কার্যোদ্ধার

করিয়া লইল । মহারাষ্ট্রীদের বীরত্ব প্রকাশ যেমনই হউক, তাহারা এই যুদ্ধে নিজাম সরকার হইতে দৌলতাবাদ প্রভৃতি ভূমিখণ্ড ও বিস্তর নগদ টাকা মিলিয়া বিলক্ষণ এক কামড় আদায় করিয়া লইল । নানার গৌরবের আর সীমা রহিল না । কোন বিদেশী রাজার সাহায্য বিনা অমন প্রবল শত্রুর পরাভব ! ধন্য নানার নয় কোশল ! তাঁহার সৌভাগ্য-শশী স্বচ্ছ গগনে পূর্ণ কলায় প্রকাশিত । দৌলতরাও সিন্দিয়া তাঁহার প্রতি প্রসন্ন—তুকার্জী হোলকর তাঁহার বাধ্য—রঘুজী ভৌসলা ও অপরাপর ব্রাহ্মণ সরদারগণ তাঁহার অনুরক্ত । পেশওয়ার রাজ্যে অদৃষ্ট-পূর্ব্ব গৌরব সঞ্চারের সকলি অনুকূল । এই সমস্ত শুভ লক্ষণ সম্বন্ধেও কোথা হইতে আচম্ভিতে এক দুর্ঘটনা ঘটয়া নানার আশা ভরসা বন্ধ্যায় ভাসাইয়া দিল ;—তাঁহার জীবন শ্রোত—ভারতের ইতিহাস শ্রোত—চকিতের মধ্যে উন্টাইয়া ফেলিল ।

পেশওয়ার আত্মহত্যা } যে অনর্থ ঘটনার কথা সূচিত হইল, তাহা মাধবরাও পেশওয়ার আত্মহত্যা । তাঁহার বয়স যদিও বিংশতি বৎসর, তথাপি নানা তাঁহার সঙ্গে নাবালকের মত ব্যবহার করিতেন, তাঁহাকে স্বাধীনভাবে কার্য্য করিতে দিতেন না । এই অধীনতা-যন্ত্রণাই তাঁহার অকাল মৃত্যুর নিদানভূত । মহাদাজী সিন্দের প্রতি নানার কটু ব্যবহারে পেশওয়ার মনে যে অসন্তোষের বীজ রোপিত হয়, সিন্দের মৃত্যুর পর অন্য কারণে তাহা অঙ্কুরিত হইয়া উঠিল । তাহার বৃত্তান্ত এই—নানার ষড়চক্রে রাঘোবার তিন পুত্র কয়েদ ছিলেন, তাহাদের মধ্যে

বাজিরাও একজন । এই বাজিরাও শাস্ত্রালাপ, শস্ত্রনৈপুণ্য, রূপে গুণে বিখ্যাত, বাহিরের চাকচিক্যে লোকের মন ভুলান বিদ্যায় বিলক্ষণ ব্যুৎপন্ন ছিলেন । মাধবরাও সর্বদাই তাঁহার গুণানুবাদ শুনিতে পাইতেন । কিসে তাঁহার কারামুক্তি হয়, তাঁহার সহিত দেখা সাক্ষাৎ আলাপ পরিচয় হয়, পেশওয়ার আন্তরিক ইচ্ছা । নানার মত ইহার সম্পূর্ণ বিপরীত । তিনি জানেন রাঘোবাই যত অনর্থের মূল—তাঁহার পুত্রদের দিয়া দেশের কল্যাণ কখনই হইবার নহে । তাঁহার পুত্রদের প্রশ্রয় দানে রাজ্যের অনিষ্ট ভিন্ন ইষ্টসিদ্ধির সম্ভাবনা নাই । তিনি এই ধূয়া ধরিয়া পেশওয়াকে কত উপদেশ দেন, কিন্তু কিছুতেই কিছু হয় না । পেশওয়াকে যতই বুঝাইবার চেষ্টা করেন, ভ্রাতার প্রতি অনুরাগ তাঁহার ততই আরো বৃদ্ধি হয় । বাজীরাও 'অবসর বুঝিয়া পেশওয়াকে চরের হাত দিয়া পত্র লিখিয়া পাঠান, এই রূপে গোপনে তাঁহাদের পত্ন ব্যবহার প্রবর্তিত হয় । এক পত্রে বাজীরাও লেখেন “আমরা দু জনেই বন্দী—তুমি পুণায়, আমি জুনরে ; কিন্তু আগাদের মন স্বাধীন—ভালবাসার উপর পরের কোন অধিকার নাই । পরস্পরের প্রতি আমাদের অনুরাগ যেন অটল থাকে । আমরা যদি আগাদের পিতৃ পিতামহের কীর্তি রক্ষা করিয়া চলি, সময়ে আমরাও কৃতী হইব ।” নানা এই ব্যাপার জানিতে পারিয়া রাগে জ্বলিয়া উঠিলেন—বাজীরায়ে বন্ধন দ্বিগুণিত করিলেন—মাধবরাওকে নানা প্রকার তিরস্কার করিতে লাগিলেন । মাধবরাও রাগ করিয়া ঘরে বন্ধ হইয়া

রহিলেন। দশারার দিন দস্তুরমত দরবার হইল। পেশওয়া যদিও সে উৎসবে বাধ্য হইয়া যোগ দিলেন, কিন্তু কিছুতেই তাঁহার মনের কষ্ট নিবারণ হইল না। তিনি জীবনের প্রতি আত্মশূন্য উদাস হইয়া দশারা উৎসবের দু দিন পরে প্রাসাদের ছাতের উপর হইতে পড়িয়া আত্মহত্যা প্রাণত্যাগ করিলেন।

এই ঘটনায় পুণায় হুলস্থূল বাধিয়া গেল। রাজসিংহাসনে কে বসিবে, এই এক বিষম সমস্যা। রাঘোবার জ্যেষ্ঠ পুত্র বাজিরাও তাহার ন্যায় অধিকারী, কিন্তু মন্ত্রীবর্গের মধ্যে আর এক প্রস্তাব উঠিল। তাঁহাদের মন্ত্রণা এই যে, মৃত মাধবরায়ের পত্নী যশোদাবাই বাজিরায়ের কনিষ্ঠ চিম্নাজীকে পোষ্য পুত্র গ্রহণ করেন, এবং চিম্নাজীকে পেশওয়া পদে অভিষিক্ত করা হয়। নানাও এই প্রস্তাবের পোষকতা করিলেন—তাহা কার্য্যেও পরিণত হইল। এদিকে আবার দৌলতরাও সিন্দে বাজিরায়ের পক্ষ গ্রহণ করায় নানা বলবানের পক্ষ সমর্থন মানসে ফিরিয়া সেই দিকেই যোগ দিলেন। এইরূপ অশেষ উৎপাতের হস্ত এড়াইয়া অবশেষে ৪ঠা ডিসেম্বর ১৭৯৬এ বাজিরাও পেশওয়া সিংহাসনে অধিরূঢ় হইলেন। অতঃপর দৌলতরাও সিন্দে বল-পূর্ব্বক উজীর পদ গ্রহণ করেন। তাঁহার কোপে পড়িয়া নানা ফর্ণবীস নগর দুর্গে বন্দীকৃত হন, বাজিরাও অনেক টাকা ঘুস দিয়া সিন্দের হস্ত হইতে তাঁহার মুক্তিসাধন করেন—ইত্যাদি অনেক ফাঁড়া কাটাইয়া নানা পরিশেষে প্রধান পদে নিযুক্ত হইলেন। বাজিরাও পেশওয়া—নানা ফর্ণবীস তাঁহার উজীর।

শেষ পেশওয়া বাজিরাও } ১৭৯৮ এর মে মাসে লর্ড মর্গিণ্টন
 ১৭৯৬—১৮১৭ } (ভাবী ওয়েলেসলী) চতুর্থ গবর্ণর জেনে-

রল ভারতে সমাগত হন। আসিয়াই তিনি ন্যায় সত্যের দোহাই দিয়া অমৃত মধুর বাক্যে পেশওয়াকে পত্র লেখেন, কিন্তু ইংরাজদের মধুর বচনে রাজাদের তখন আস্থা নাই। ওয়েলেসলীর আগমনকালে ব্রিটিস রাজ্য ঘোর সঙ্কটে পরিত। টিপু, নিজাম, সিন্ধে সকলেই ফরাসিস মন্ত্রণার বশবর্তী। ফরাসিস রণপণ্ডিতেরা তাঁহাদের সৈন্য সংগঠনে নিযুক্ত। এই সকল রাজা মিলিত হইয়া ইংরাজদের বিরুদ্ধে অস্ত্র ধারণ করিলে বিষম বিভ্রাট। গবর্ণর জেনেরল প্রথম হইতেই তাহার নিরাকরণে মনোনিবেশ করিলেন। ফরাসিদের বিদায় দিয়া তৎপদে ইংরাজ সৈন্যাধ্যক্ষ, ইংরাজ সৈন্য-বল নিযুক্ত করা, এই তাঁহার প্রথম চেষ্টা। নিজাম সহজে নতগ্রীব হইলেন। নানার পরামর্শে পেশওয়া সতর্ক ছিলেন, তিনি এখনো পর্য্যন্ত ফাঁদে পা বাড়াইতে সম্মত হইলেন না।

এই সময় টিপুর সহিত ইংরাজদের শেষ যুদ্ধ। রাজাদের ভিতরে ভিতরে টিপুর দিকে বিলক্ষণ টান, কিন্তু প্রকাশ্যে কিছু করিতে সাহস করিতেছেন না। পেশওয়া ও সিন্ধের মধ্যে এ বিষয়ের কিংকর্তব্য পরামর্শ চলিতেছে—এমন সময় শ্রীরঙ্গপটনের পতন বার্তা সমুপাগত। বাজিরাও বাহ্যিক বড়ই আত্মলাদ প্রকাশ করিলেন। তিনি যদিও এ যুদ্ধে বিশেষ কোন সহায়তা করেন নাই, তথাপি সৈন্য পোষণ সন্ধিযুগে বদ্ধ

করিবার আশয়ে গবর্নর জেনেরল তাঁহাকে বিজিত প্রদেশের ভাগ দিতে সম্মতি প্রদর্শন করিলেন ; কিন্তু পেশওয়া কিছুতেই ধরা দিলেন না । প্রধান অন্তরায় নানা ফর্গবীসের দূরদর্শিতা । নানার মৃত্যু ঘটনায় ইংরাজদের চিরবাহিত মনস্কাম সিদ্ধ হইল ।

নানা ফর্গবীস— } পুণা দরবারে নানা ফর্গবীস একমাত্র পরি-
মৃত্যু ১৮০০ } গামদর্শী বিচক্ষণ পরামর্শদাতা ছিলেন ।

তাঁহার সঙ্গে সঙ্গে পেশওয়া রাজ্যের জীবন, বল গৌরব যাহা কিছু অবশিষ্ট ছিল, সকলি বিনষ্ট হইল । নানা দীর্ঘাকৃতি, কৃশাঙ্গ, লক্ষ্যভেদী-উজ্জ্বল-তীক্ষ্ণ-দৃষ্টি, শ্যামবর্ণ পুরুষ ছিলেন । ইংরাজদের প্রতাপ ও সত্যনিষ্ঠার প্রতি তাঁহার যথেষ্ট শ্রদ্ধা ছিল ; কিন্তু অমন প্রবল শত্রুকে বক্ষে স্থান দিলে বিষম বিপাকের আশঙ্কা বিবেচনায় তিনি ইংরাজদিগকে সাধ্যমত দূরে রাখিতে সচেষ্ট ছিলেন । তিনি তাঁহার জীবনের প্রথম ভাগে প্রথম মাধবরাও প্রণীত রাজ্য-ব্যবস্থা সংরক্ষণে বিশেষ মনোযোগী ছিলেন, শেষাশেষি নানা কারণে রাজ্যে বিশৃঙ্খলা উৎপন্ন হইল । দৃষ্টান্তস্বরূপ সহরে ঘাসীরাম কোতওয়ালের অত্যাচার উল্লেখ করা যাইতে পারে । এই কোতওয়ালের দৌরাভ্যে লোকেরা, বিশেষতঃ ব্রাহ্মণবর্গ এরূপ উদ্বেজিত হইয়াছিল যে, বিচারের অপেক্ষা না রাখিয়া পুরবাসীগণ স্বহস্তে প্রস্তর প্রহারে তাঁহার প্রাণদণ্ড করে । বাজিরায়ের আমলে নানা ফর্গবীস রাজ্যের হিত কামনায় পেশওয়াকে স্বার্থ-নিরপেক্ষ সংপরামর্শ

দানে সঙ্কুচিত ছিলেন না। কিন্তু রাজা যখন অব্যবস্থিত, ব্যস-
নাসক্ত, হীনমতি—তখন মন্ত্রী আর কত পারিয়া উঠিবেন ?

নানার মৃত্যুর পর মহারাষ্ট্রে ভয়ঙ্কর অরাজকতা প্রসূত হইল।
পেশওয়ার শাসন নির্জীব অন্তঃসার-শূন্য, চতুর্দিকেই বিপ্লব, যে
যেখানে পারে, সৈন্যবল সংগ্রহ করিয়া নিজ নিজ স্বাধীনতা
সাধিয়া লইতে তৎপর। ১৮০১এ আর এক নূতন বীর সমর-

যশবন্ত হোলকর } ক্ষেত্রে অভ্যুদিত হইলেন—যশবন্ত হোলকর।

১৮০১—২

} সিন্দিয়া এতদিন হোলকরকে বশে রাখিয়া-

ছিলেন, যশবন্তরাও সহসা স্বাধীন ক্ষুভিতে সমুখানপূর্বক
সিন্দের বিরুদ্ধে কটিবদ্ধ হইলেন। যশবন্তের রণকাহিনী বর্ণন
করিবার পূর্বে এই স্থলে ক্ষণেকের জন্য তাঁহার পূর্ব-পুরুষদের
অবতারণা করিতে ইচ্ছা করি।

হোলকর বংশ } হোলকর বংশ আসলে ধনগর গয়লা-জাতীয়
মহারাট্টা। পুণা সন্নিহিত নীরা নদী তীরবর্তী হোল গ্রামে
তাঁহাদের আদিম নিবাস ও সেই গ্রাম হইতে তাঁহাদের কুল-
নামের উৎপত্তি। হোলকর বংশের মুখ-উজ্জ্বলকারী মহলাররাও
১৬০০ খৃষ্টাব্দের শেষ ভাগে জন্মগ্রহণ করেন। তিনি বাল্য-

মহলাররাও

১৬২৩—১৭৬৯

} কালে খানদেশে তাঁহার মামার মেঘপালক-
রূপে নিযুক্ত ছিলেন। একদিন মধ্যাহ্নে

মাঠের মধ্যে নিদ্রিত আছেন, এমন সময় এক বৃহৎ অজগর
সর্প তাঁহার মুখের উপর আতপত্র-রূপে ফণা ধরিয়া থাকে।
এই শুভ লক্ষণ দৃষ্টে উৎসাহিত হইয়া তিনি অন্য চাকুরীর

চেষ্টা দেখিতে লাগিলেন। প্রথমে তিনি একজন মহারাষ্ট্রী সরদারের নিকট ঘোড়সওয়ারের কৰ্ম পান। এই সময় হইতে তাঁহার ভাগ্য ফিরিল। ১৭২৪এ বাজিরাও পেশওয়ার অধীনে ৫০০ অশ্বের অশ্বপতি, ক্রমে উচ্চ হইতে উচ্চতর পদে আরোহণ ও বিস্তর ভূমি-সম্পত্তি উপার্জন করেন। ১৭৩২এ তিনি পেশওয়ার প্রধান সেনাপতিরূপে মালবের মোগল প্রতিনিধিকে যুদ্ধে পরাভব করেন। ১৭৫০এ মালব বিজয়ানন্তর সিন্দে ও হোলকর তাহা আধাআধি ভাগ করিয়া লন, তাহাতে প্রায় ৭৫ লক্ষ টাকা মুনাফার প্রদেখে তাঁহার অধিকার বিস্তৃত হয়। এইরূপে তাঁহার রাজ্য ও বল বৃদ্ধি হইতে লাগিল, এবং ইন্দোর তাঁহার রাজধানী হইয়া দাঁড়াইল। পাণিপতের যুদ্ধে যে অল্প কয়েকজন মহারাষ্ট্রী বীর ভালএ ভালএ দেশে ফিরিয়া আসিয়াছিলেন, মল্লাররাও তাহাদের মধ্যে একজন। তিনি ঐ যুদ্ধে বড় একটা যোগ দেন নাই—তাহার কারণ এইরূপ রাষ্ট্র যে, এই যুদ্ধে তিনি যেরূপ পরামর্শ দেন মহারাষ্ট্রী সেনাপতি সদাশিব ভাউ “গয়লার কথা কে মানে?” এই বলিয়া সে পরামর্শ অগ্রাহ্য করেন। তাঁহার পরামর্শ এই—পাঠানদের সহিত সম্মুখ যুদ্ধে প্রবৃত্ত না হইয়া তাহাদের বিবিধ উপায়ে হায়রাণ করা—বল অপেক্ষা কৌশলে তাহাদের দমন করা—পলায়নচ্ছলে অরিদল আকর্ষণ করিয়া অবসর বুঝিয়া তাহাদের উপর হস্তা করা; “স্বরায় অনর্থাশঙ্কা বিলম্বে কার্য্যসিদ্ধি” এই তাঁহার উপদেশ। এই সুপরামর্শ অগ্রাহ্য করিয়া সেনাপতি তাড়াতাড়ি রণে

মাতিয়া গেলেন—শীঘ্রই তাহার বিষম ফলভোগও করিলেন । পাণিপতের যুদ্ধের পর মল্লাররাও মধ্য-হিন্দুস্থানে নিজ রাজ্যের ব্যবস্থা ও শৃঙ্খলাবন্ধনে কতিপয় বৎসর অতিবাহিত করেন—তাহার তাহাতে সম্যক্ সিদ্ধিলাভ হইয়াছিল । কেননা মল্লাররাও উদারচেতা, বিনয়ী, অথচ দৃঢ়মতি, অশেষ গুণসম্পন্ন নরপতি ছিলেন । রণে যেরূপ সাহস ও বীরত্ব, রাজ্য-শাসনেও তাহার সেইরূপ অসাধারণ ক্ষমতা ছিল । ৭৬ বৎসর বয়সে তাহার মৃত্যু হয় ।

মল্লাররায়ের পুত্র খণ্ডেরাও পিতার আগেই মরণ প্রাপ্ত হন, তাহার পৌত্র মালীরাও তাহার উত্তরাধিকারী । মালীরাও নির্বুদ্ধি ক্ষিপ্তপ্রায় ছিলেন, অধিক কাল রাজ্য ভোগ করিতে পারেন নাই । মালীরায়ের মৃত্যুর পর তাহার মাতা খ্যাতনামা অহল্যাবাই রাজ্যভার গ্রহণ করেন । তুকাঙ্গীরাও তাহার সেনাপতি । উভয়ে মিলিয়া অশেষ ক্ষমতা ও দক্ষতার সহিত ৩০

অহল্যাবাই } বৎসর কাল রাজকার্য্য নির্বাহ করেন । তুকা-
১৭৬৫—২৫ } জীর দাক্ষিণাত্যে অবস্থান কালে সাতপুরা

শ্রেণীর দক্ষিণস্থ সমস্ত প্রদেশ তাহার শাসনাধীন—তাহার উত্তরস্থ প্রদেশ সমূহের তত্ত্বাবধান করা—করদ রাজ্য সকল হইতে কর গ্রহণ করা—এ সকল অহল্যাবাই করিতেন । যখন তুকাঙ্গী উত্তর হিন্দুস্থান পরিদর্শনার্থে গমন করিতেন, তখন মালব, নিম্ন প্রভৃতি প্রদেশের সমগ্র কার্য্যভার রাজ্ঞীর হস্তে সমর্পিত—সমুদায় দাক্ষিণাত্যে তাহার শাসন বিস্তৃত । রাজকোষ তাহার

হস্তাধীন—রাজ্যের আয় ব্যয় হিসাব নিয়ম পূর্বক রক্ষিত হইত। কোন গুরুতর রাজকার্য উপস্থিত হইলে তুকার্জী রাজ্ঞীর পরামর্শ ভিন্ন কার্য করিতেন না এবং পর রাজ্যে যে সকল কর্মকর্তা নিয়োগ করিতে হইত, তাহা অহল্যাবাই স্বয়ং করিতেন। তাঁহার অনুপম নয়কৌশলে পররাজ্যের সহিত মিত্রতা গ্রন্থির কোন শৈথিল্য ঘটে নাই। এ দিকে আবার স্বরাজ্যে প্রজাদের সুখশান্তি বর্দ্ধনেও তাঁহার অশেষ যত্ন। এক দিকে অতিরিক্ত করভার হইতে রায়ৎদের অব্যাহতি-দান—অন্য দিকে জমিদারদের বিবিধ স্বত্ব রক্ষণ, এই দুই দিক রক্ষা করিয়া চলিতেন। রাজ্ঞী যেরূপ প্রজাবৎসলা, সতত প্রজাহিত-নিরতা—প্রজারাও তাঁহাকে নীতিপ্রজ্ঞা-মূর্তিমতী জননী-সমান জ্ঞানে শ্রদ্ধা ভক্তি করিত। তিনি অর্থী প্রত্যর্থীদিগকে আদালত, পঞ্চায়ৎ অথবা মন্ত্রীবর্গের বিচারে সঁপিয়াই নিরস্ত থাকিতেন না; অক্ৰোধ-কলুষিত সদা-হৃষ্টচিত্ত এই দয়াবতী রাজ্ঞী যথানির্দিষ্ট সময়ে প্রকাশ্য দরবারে ন্যায় বিতরণ করিতেন—যাহার যে কোন আবেদন, তাহা স্বকর্ণে শ্রবণ করিয়া যথোচিত প্রতিবিধানে তৎপর ছিলেন—শক্তের ভক্ত হইয়া দুর্বলের প্রতি অন্যায় পীড়ন অনুমোদন করিতেন না—স্ত্রীজন-চিত্ততোষী তোষামোদেও তাঁহাকে ন্যায় মার্গ হইতে বিচলিত করিতে পারিত না। এই রূপবতী, গুণবতী, ধর্মনিষ্ঠ রাজ্ঞী মহারাষ্ট্র দেশকে শোকসাগরে ভাসাইয়া ১৭৯৫ অব্দে ষষ্টি বৎসর বয়সে সংসার যাত্রা হইতে অপস্থত হন। সেনাপতি তুকার্জীকে তিনি অত্যন্ত

স্নেহ করিতেন কিন্তু কি করেন—সে বয়সে বড়, তাহাকে পোষ্যপুত্র গ্রহণ করা সম্ভব হয় না—এই হেতু তাঁহাকে মহলার রায়ের পুত্র ও উত্তরাধিকারীরূপে বরণ করিয়া যান। প্রথম মহারাষ্ট্রী সমরে তুকার্জী হোলকর ও মহাদাজী সিন্দে উভয়ে মিলিয়া একমনে কার্য্য করেন। শেষাশেষি তাঁহাদের পরস্পর মনান্তর ও বৈরভাব সংঘটন হয়। মহাদাজীর মৃত্যুর কয়েক বৎসর পরে তুকার্জী পরলোক গত হয়েন।

তুকার্জীর চারি পুত্র। কাশীরাও ও মহলাররাও দুই ঔরস-জাত—যশবন্ত ও বিঠোজী দুই দাসীপুত্র। কাশীরাও মহলার-রাও দুই ভাইয়ের রাজ্য লইয়া কাড়াকাড়ি—জ্যেষ্ঠের সহায় দৌলতরাও সিন্দে—কনিষ্ঠের পক্ষে নানা ফণবীস। একবার দুই ভাইয়ের মধ্যে মিলনের চেষ্টা হয়, কিন্তু সে চেষ্টা ব্যথা। যে দিনে দুই ভ্রাতা তাহাদের পরস্পর বিরোধানল নির্বাপনোদ্দেশ্যে সৌহার্দবন্ধন শপথ গ্রহণ করিলেন, তার পর দিনেই মহলাররাও সিন্দিয়ার সৈন্য হস্তে নিহত হন। যশবন্তরাও মহলার রায়ের পক্ষ ছিলেন, তিনি এই গোলযোগে পলায়ন করিয়া নাগপুর রাজার শরণাপন্ন হইলেন। সেখানে শরণ-লাভ দূরে থাকুক, তাঁহার ভাগ্যে কারা-লাভ ঘটিল—দেড় বৎসর পরে বহু কষ্টে পলায়নে মুক্তি লাভ করেন। এই সময় হইতে তিনি তাঁহার ভ্রাতুষ্পুত্র খণ্ডোরাওএর নামে সৈন্য সংগ্রহ করিতে আরম্ভ করেন। ক্রমে মহারাট্টা, রাজপুত, পাঠান, ভিল, পিণ্ডারী প্রভৃতি ফৌজ একত্রিত করিয়া তিনি তাহাদের দলপতি হইয়া

দাঁড়াইলেন। পরে ইউরোপীয় নেতৃগণের সাহায্যে এই ফৌজ হইতে রণদক্ষ শিক্ষিত সৈন্যদল প্রস্তুত করিয়া লইলেন। আমীর খাঁ নামক জনৈক মুসলমান সরদারকে সহায় পাইয়া তাঁহার বল পুষ্ট হইল; দুই জনে মিলিয়া সিন্দিয়ার রাজ্যে ঘোরতর লুটপাট অত্যাচার আরম্ভ করিয়া দিলেন। এই প্রবল রিপু দমন উদ্দেশে সিন্দিয়া পুণা হইতে স্বরাজ্যে সৈন্য প্রেরণ করিলেন। মালবে সিন্দে হোলকরের মধ্যে তুমুল সংগ্রাম, বিস্তর শোণিতপাত হয়। চপলা রণলক্ষ্মী কখন সিন্দিয়ার পক্ষে, কখনো বা হোলকরের পক্ষে, কখন কাহার প্রতি প্রসন্ন কিছুই স্থিরতা নাই। উহার এক যুদ্ধে সিন্দিয়ার রাজধানী উজ্জয়িনী হোলকরের হস্তগত হয়। ইন্দোরের নিকট অপর যুদ্ধে হোলকর আবার সিন্দিয়া কর্তৃক পরাভূত হইয়া মহা বিপদে পড়েন। পরিশেষে অশেষ বিপদ-জাল অতিক্রম করিয়া যশবন্তরাও পুণা-গগনে ধূমকেতুর ন্যায় সহসা সৈন্যে আবির্ভূত হইলেন। তাঁহার পুণা আক্রমণের এক

<p>হোলকরের পুণা আক্রমণ— ১৮০২</p>	}	<p>বিশেষ কারণ উপস্থিত হইল। তাঁহার ভ্রাতা বিঠোজী কোন এক</p>
--------------------------------------	---	----------------------------------------------------------------

বিদ্রোহাচরণে ধরা পড়িয়া দণ্ডনীয় হন, বাজিরাও তাঁহার প্রাণদণ্ড আদেশ করেন। প্রাণদণ্ড সাধারণ নয়—তাঁহার উপর যতদূর অপমান, যতদূর নিষ্ঠুর নির্বাতন সম্ভবে, তাহা আচরিত হইল। গজপদে শৃঙ্খল-বদ্ধ বিঠোজী রাজপথ দিয়া টানা হিঁছড়া হইয়া চলিয়াছেন, বাজিরাও প্রাসাদ-বাতায়ন হইতে সেই

তামাসা দেখিতেছেন । তাঁর হঠাৎ কেন এরূপ খেয়াল হইল কে জানে ? সিন্দের তুষ্টিসাধন যদি তাঁর অভিপ্রায় হয়, তাহা সিদ্ধ হইল বটে, কিন্তু কি এক দুরন্ত কাল ভুজঙ্গকে ঘাঁটাইয়া উত্তেজিত করা হইল, তাহা তখন তিনি ভাবেন নাই । সিন্দিয়ার রাজ্য লুণ্ঠন স্থগিত রাখিয়া যশবন্তরাও পুণার দিকে ধাবমান হইলেন । তাঁহার গতি-রোধ-সাধন মানসে পেশওয়া ও সিন্ধে উভরে আলিবেল ঘাটে সৈন্য প্রেরণ করিলেন ; তিনি আর একদিব্ দিয়া ঘুরিয়া সৈন্যহস্ত এড়াইয়া পুণার দেড় ক্রোশ পূর্বে ২৩ এ অক্টোবরে আসিয়া তাম্বু গাড়িলেন । দুই দিন পরে দুই সৈন্যের সংঘটন । ঘোরতর সংগ্রামের পর যশবন্ত জয়ী হইলেন । সিন্দিয়া কামান ও অন্যান্য জিনিস পত্র ফেলিয়া রণক্ষেত্র হইতে পলায়ন করিলেন । পুণার পথ উন্মুক্ত । পরদিন ব্রিটিশ রেজিডেন্ট কর্ণেল ক্লোজ সাহেব হোলকরের সহিত সাক্ষাৎ করিতে যান—গিয়া দেখেন কর্দমাক্ত ক্ষত বিক্ষত শরীর অন্ধবীর * এক ক্ষুদ্র তাম্বুতে শয়ান—যেন শরশয্যাগত ভীষ্মদেব ভূতলে অবতীর্ণ হইয়াছেন । হোলকর কর্ণেল সাহেবকে পুণায় থাকিবার জন্য বিস্তর অনুরোধ করিলেন—তাঁহাকে মধ্যস্থ মানিতে ঔৎসুক্য দেখাইলেন, কিন্তু তিনি সে অনুরোধ না মানিয়া কয়েক দিবসের মধ্যে পুণা ছাড়িয়া চলিয়া গেলেন । হোলকর তখন স্বীয় অভীষ্ট সিদ্ধির পূর্ণ অবকাশ পাইলেন ।

* ইতি পূর্বে ঘটনাক্রমে বন্দুক ছুটিয়া যাওয়াতে তিনি এক চক্ষু হারাইয়া ছিলেন ।

প্রথমে তিনি বাজিরায়ের ভ্রাতা অম্বতরাওকে মসনদে বসাইয়া দিন কতক ধৈর্য্য ধরিয়া থামিয়া থাকেন, ক্রমে নিজ মূর্ত্তি ধারণ পূর্ব্বক পৌরজন-ধন-রত্ন-শোযী নিদারুণ নগর-লুণ্ঠনে তাঁহার অর্থ-লালসা ও প্রতিশোধ-পিপাসা ছুই একত্রে প্রশমিত করিলেন।

বাজিরাও হোলকরের বিজয় বার্তা শুনিয়া অবধি ভয়ে আকুল। তিনি বিঠোজীর প্রতি যে ভয়ানক অত্যাচার করিয়াছিলেন, তাহা তাঁহার অন্তরে বিঁধিতেছিল। এখন হোলকরের পালা। যশবন্তরাও ভ্রাতৃ-হত্যার প্রতিশোধ তুলিতে উদ্যত। বাজিরাও প্রাণভয়ে পলায়ন করিলেন। পুণা হইতে সিংহগড়—সিংহগড় হইতে রায়গড়—রায়গড় হইতে রত্নগিরি সমীপস্থ স্বর্ণ দুর্গ—পরিশেষে ৬ই ডিসেম্বরে ব্রিটিস পোতে বাসীনে উত্তীর্ণ হইয়া ইংরাজ চরণে আত্মসমর্পণ করিলেন। মাসের বাসীন সন্ধি—

৩১ ডিসেম্বর, ১৮০২ } শেষ দিনে বাসীন সন্ধি। এই সন্ধি যোগে পেশওয়ার স্বাধীন রাজ্য বিলুপ্ত হইল।

সন্ধির মর্ম্ম এই—ইংরাজেরা পেশওয়াকে পৈতৃক সিংহাসনে বসাইয়া দিবেন—পেশওয়া স্বীয় রাজধানীতে ব্রিটিস সৈন্য পোষণ করিবেন এবং তাহার ব্যয় নির্ব্বাহার্থে ২৬ লক্ষ টাকা বার্ষিক আয়শীল ভূমি সম্পত্তি গচ্ছিত রাখিবেন। ব্রিটিস গবর্ণ-মেণ্টের অনুমতি ভিন্ন সন্ধি বিগ্রহে হস্তক্ষেপ করিতে পারিবেন না। এইরূপে স্বাধীনতায় জলাঞ্জলি দিয়া বাজিরাও পুণায় প্রত্যাগত হইলেন। তাঁহার মসনদ প্রাপ্তি ঘোষণার্থে ১৯ তোপ-

ধ্বনি ধ্বনিত হইল। প্রকৃত পক্ষে এ তাঁহার সম্মানার্থে নহে—
ইহা ইংরাজদের রাজ্যলাভ-সূচক জয়ধ্বনি।

সিন্দে, হোলকর ও আর আর মহারাষ্ট্রী সরদারগণ সকলেই
স্তুভিত। ব্রিটিস অনুগ্রহে পেশওয়ার সিংহাসন প্রাপ্তি সন্ধ্যা-
লেরই মনঃশল্যের কারণ হইল। সিন্দিয়া, হোলকর প্রভৃতি
বীরগণ তখনো ইংরাজ-লৌহ-হস্তের গুরুভার অনুভব করেন
নাই, তাই তাঁহারা সাহস করিয়া যুদ্ধের জন্য কোমর বাঁধি-
লেন। সিন্দে হোলকর একে একে পরাস্ত হইলেন। তাঁহা-
দের দমন করিতে ইংরাজদের অধিক সময় লাগে নাই।

দ্বিতীয় মহারাষ্ট্রী যুদ্ধ } জেনেরল ওয়েলেসলি দক্ষিণে আসাই ও
১৮০৩—৪ } আড়গামে—জেনেরল লেক উত্তরে লসও-

য়ারী ও দিল্লীতে সমবেত মহারাষ্ট্রী দলবল ছিন্ন ভিন্ন করিয়া
ফেলিলেন। ১৮০৪এ ভরতপুর সন্ধিহিত চিগের রণক্ষেত্রে
হোলকরের বিষদন্ত উৎপাটিত হইল। এই সকল যুদ্ধে ইংরা-
জদের অশেষ রাজ্য লাভ—ফরাসিদের প্রভুত্ব নাশ—ইংরাজ
পদতলে দিল্লীশ্বরের অবলুণ্ঠন—দ্বিতীয় মহারাষ্ট্রী যুদ্ধের এই
পরিণাম। এখন তৃতীয় ও শেষ যুদ্ধের বিবরণ বলি শুন।

বাজিরাও সিংহাসন ফিরিয়া পাইয়া যে বিশেষ কিছু লোভ-
নীয় সামগ্রী লাভ করিলেন, তাহা নহে। তাঁহার রাজ্যের
অবস্থা তখন অতীব শোচনীয়। কায়দা নাই, কানুন নাই,
কোন প্রকার শাসন নাই—লুণ্ঠনে উদরপূরণ কর, নতুবা গুলি-
ইয়া মর, প্রজাদের এই অবস্থা। পুণার আশপাশ পল্লীগাম

সকল দক্ষ্য তক্ষরের আবাস—রাজপুরুষেরা তাহাদের লুঠের ভাগী প্রত্নয়দাতা। পেশওয়ার নিজের রাজ্য শাসনের ক্ষমতা নাই। পুণা দরবারে অপর কোন যোগ্য শাসনকর্তার নাম গন্ধ নাই। বাজিরাও অত্যন্ত বিলাস-প্রিয় ইন্দিয়-পরতন্ত্র ছিলেন। তাঁহার নিজের আগোদ প্রমোদের জ্ঞাত্য অর্থ সংগ্রহ করাই তাঁহার রাজত্বের একমাত্র উদ্দেশ্য। নিলামে যে ব্যক্তি সকলের বেশী ডাকিবে, তাহার হস্তেই পেশওয়া তাঁহার পরগণা সকল সপিয়া দিতেন—এইরূপে এককোটি বিশ লক্ষ টাকা রাজস্ব আদায় হইত। এই সকল জমিদারদের দেওয়ানী ও ফৌজদারী অধিকার—প্রজা নিষ্পীড়ন করিয়া অর্থ সংগ্ৰহেই সে অধিকার খাটান তাহাদের কাজ। পুণার আদালত নাম মাত্র, যাহার পয়সা—তাহার জয়। এদিকে বাজিরাও আবার ধর্ম্মানুষ্ঠানের এমন ভড়ং করিতেন যে, লোকের মাঝে সাধু বলিয়া তাঁহার খ্যাতি ছিল। ব্রাহ্মণ ভোজন—ব্রাহ্মণদের দক্ষিণা ও ভূমি দান—পুণায় সহস্র সহস্র আত্ম বৃক্ষ রোপণ—তীর্থ সংরক্ষণ ইত্যাদি উপায়ে তিনি দুর্ব্বাসন-জনিত অপযশ মোচনে উদ্যুক্ত ছিলেন। কেহ কেহ বলেন, নারায়ণরাও পেশওয়া-হত্যা যে তাঁহার পিতা মাতার মহাপাতক, তাহার প্রায়শ্চিত্ত স্বরূপ অথবা প্রেত-শান্তি উদ্দেশে উক্ত রূপ দান ধ্যান পুণ্য কার্য্য অনুষ্ঠিত হইত। সে যাহা হউক, এই সমস্ত সাধনে রাজ্য রক্ষা হয় না।

ত্রিশকজী } দুর্ভাগ্যক্রমে ত্রিশকজী ডাঙ্গলিয়া নামক এক ব্যক্তি
আবার তাঁহার মোসাহেব ও কুমল্লী আসিয়া জুটিল। এ ব্যক্তি

প্রথমে সামান্য চরের কাজে নিযুক্ত ছিল। ক্রমে তোষামোদ-পটুত্ব গুণে বাজিরায়ের প্রধান প্রিয়পাত্র হইয়া দাঁড়াইল। সে জাঁক করিয়া বলিত প্রভুর তুষ্টি সাধনে আমি গোহত্যা পর্যন্ত করিতে প্রস্তুত। ত্রিষকজীর উপর পেশওয়ার অগাধ নির্ভর—অপার অনুগ্রহ। যেমন রাজা—তার উপযুক্ত মন্ত্রী। তাহাকে ভয় করিবার কোন কারণ নাই। যাহাতে ঈর্ষার উদ্রেক হয়, তাহার এমন কোন গুণ নাই; বিপক্ষতাচরণে রুষ্ট হইয়া যে দংশন করে, এরূপ তাহার সামর্থ্যও নাই সুতরাং যেমনটি চাই, বাজিরাও তেমনি ভৃত্য পাইলেন। ১৮১৯ অব্দে ত্রিষকজী, পেশওয়া ও ব্রিটিস গবর্নমেন্টের মধ্যে কার্য্যকর্ত্তারূপে নিয়োজিত হইলেন। এই সময়ে পেশওয়া ও গাইকওয়াড় সরকারের মধ্যে রাজস্ব সম্বন্ধে বিবাদ উপস্থিত। বাসীন সন্ধি অনুসারে ঈদৃশ বিবাদ কল্পে ইংরাজদের মধ্যস্থ মানিবার কথা। বাজিরাও গাইকওয়াড়ের উপর চৌথ প্রভৃতি বিবিধ প্রকার পুরাতন দাবী করিয়া পাঠান। গাইকওয়াড়ের তরফ হইতে গঙ্গাধর শাস্ত্রী এই বিবাদ ভঞ্জন কার্য্যে পুণায় আগমন করেন কিন্তু পেশওয়ার দর-গঙ্গাধর শাস্ত্রী

১৭১৫ } বারের উপর লোকের এমনি অবিশ্বাস যে ব্রিটিস গবর্নমেন্টকে তাঁহার প্রাণ রক্ষার দায়িত্ব গ্রহণ করিতে হইল। শাস্ত্রীর আগমন পেশওয়ার মনঃপূত হয় নাই—তিনি শেষে নানানু আপত্তি উত্থাপন করিতে লাগিলেন। তাহাতে কৃতকার্য্য না হইয়া শাস্ত্রীর প্রতি স্বীয় অসন্তোষ নিদর্শক অভদ্রতাচরণে প্রবৃত্ত হইলেন। শাস্ত্রী আসিয়া দেখেন

গতিক বড় ভাল নয়। পেশওয়ার যেরূপ রুষ্ট ভাব, তাহাতে নিজ কার্য্য সিদ্ধি দুইট বিবেচনায় স্থির করিলেন তাঁহার বরদায় ফিরিয়া যাওয়াই শ্রেয়ঃকল্প এবং তিনি উপস্থিত বিষয়ে ব্রিটিস গবর্ণমেন্টের মধ্যস্থতা প্রার্থনা করিলেন। এই প্রস্তাবে বাজিরায়ের কার্য্য-প্রণালী ফিরিয়া গেল—তিনি আর এক মূর্তি ধারণ করিলেন। ইতিপূর্বে যেমন ব্রাহ্মণের প্রতি হতাদর, এখন তেমনি ভণ্ডতপস্বী ব্রাহ্মণের ন্যায় ভালমানুষি-ভান করিতে লাগিলেন। অশেষ আদর ও যত্ন দেখাইয়া—এমন কি, শাস্ত্রীর সহিত কুটুম্বিতা পর্য্যন্ত বন্ধন করিয়া বাজিরাও তাঁহার বশীকরণে সচেষ্ট হইলেন। সে যত্ন, সে আদর মৌখিক মাত্র—ভিতরে ভিতরে তাঁহার বধোপায় প্রবর্তিত হইল। বাজিরায়ের নিমন্ত্রণে শাস্ত্রী মহাশয় পণ্ডুরপুর তীর্থে গমন করেন। ১৪ই জুলাই দুজনের একত্রে পান ভোজন হয়। সন্ধ্যার সময় শাস্ত্রী বিঠোবা মন্দিরে পেশওয়ার সহিত সাক্ষাৎ করিতে যান। পেশওয়ার মধুরালাপে প্রীত হইয়া বিদায় লইয়া যেমন মন্দিরের বাহির হইবেন অমনি জল্লাদের খড়্গাঘাতে ব্রাহ্মণের অপঘাত। কি ভয়ানক অমানুষিক কাণ্ড! এই অঘোর কৃত্যের মূল প্রবর্তক নরাদম ত্রিষকজী। পেশওয়াও যে নিতান্ত নির্দোষী ছিলেন, তাহা নহে—তাঁহাকে সত্ত্বর এ পাপের প্রায়শ্চিত্ত ভোগ করিতে হইল। বাজিরায়ের রাজ্যে শমন-ডঙ্কা বাজিয়া উঠিল।

রেজিডেন্ট
এল্‌ফিনিষ্টন

} সুবিচক্ষণ এল্‌ফিনিষ্টন সাহেব তখন পুণায়
ব্রিটিস কার্য্যকর্তা। ত্রিষকজী এই হত্যাকাণ্ডের

মূল প্রবর্তক সপ্রমাণ হওয়াতে এল্ফিনিফ্টন তাহাকে পেশওয়ার নিকট হইতে চাহিয়া পাঠান। বাজিরাও প্রথমতঃ ইতস্ততঃ করেন, পরে যখন “যুদ্ধং দেহি” বলিয়া তাঁহাকে ভয় দেখান হইল, তখন অগত্যা প্রিয়তম ত্রিম্বকজীকে ইংরাজ হস্তে সমর্পণ করিতে বাধ্য হইলেন। ত্রিম্বকজী থানার দুর্গে রুদ্ধ থাকেন— তাঁহার উপর ইউরোপীয় সান্দ্রীদের চৌকী পাহারা। কতক দিন পরে তিনি ইউরোপীয় গার্ডদের চক্ষে ধূলি দিয়া পলায়ন পূর্বক পাহাড় পর্বতে অদৃশ্যভাবে ফিরিতে লাগিলেন। বাজিরাও তাঁহাকে গোপনে প্রত্নয় দিতে ক্রটি করেন নাই।

বাজিরাও এইক্ষণে ইংরাজদের তাড়াইবার নানান পন্থা দেখিতে লাগিলেন। সিন্দে, হোলকর, নাগপুর রাজা, পিণ্ডারী দল এই সকল লোকের সঙ্গে যড়যন্ত্র জারী হইল। তাঁহার সৈন্য সংখ্যা দিন দিন বৃদ্ধি হইতে চলিল এবং কুলিভীল প্রভৃতি বন্যজাতিদের মধ্য হইতে সৈন্য সংগ্রহ উদ্দেশে ত্রিম্বকজীকে অর্থ সাহায্য প্রেরণ করা হইল। এল্ফিনিফ্টন সাহেব চর মুখে সমস্ত বৃত্তান্ত অবগত হইতেছেন। বাজিরাও এইরূপ আচরণে নিজের কত হানি করিতেছেন—রাজ্যকে কি ঘোর সঙ্কটে ফেলিবার উদ্যোগ করিতেছেন, ইত্যাদি তাঁহাকে কত বুঝাইলেন। তাহাতে যখন কোন ফল হইল না তখন পেশওয়াকে স্পষ্ট বলা হইল “যদি ত্রিম্বকজীকে দেশ বহিস্কৃত না কর, তাহা হইলে ইংরাজদের সঙ্গে নিশ্চয়ই যুদ্ধ বাধিবে। এই করারের বন্ধকস্বরূপ দুর্গত্রয় আমাদের হস্তে না দিলে পুণা এখন সৈন্য

বেষ্টিত হইবে।” এদিকে বড়লাট সাহেবের হুকুম আসিল “এরূপ কঠোর সন্ধি বন্ধনে বাজিরাওকে আঁফে পৃষ্ঠে বাঁধিয়া ফেলা হয় যে তাঁহার পার্শ্ব পরিবর্তনের শক্তি না থাকে,।” এই আদেশক্রমে পুণার সন্ধি স্বাক্ষরিত হইল। তাঁহার স্বাধীনতার যাহা কিছু অবশিষ্ট ছিল, তাহা সমূলে নিশ্চল।

পুণার সন্ধি } বাজিরাও এই লোহ শৃঙ্খল গলে পরিয়া পণ্ডর
১৮১৭ } পুরে তীর্থ করিতে চলিলেন।

এই সময়ে (১৮১৬—১৮) পিণ্ডারী দস্যু দমনে সমস্ত ব্রিটিস
পিণ্ডারী যুদ্ধ } বল নিয়োজিত হয়। পিণ্ডারীগণ দেশের অরা-
১৮১৬—১৮ } জকতার সুযোগ পাইয়া দলে দলে দেশলুণ্ঠন,
প্রজাপীড়ন আরম্ভ করিয়া দেয়। হেষ্টিংস সাহেব লক্ষাধিক
সেনা ৩০০ কামান লইয়া তাহাদের বিরুদ্ধে যুদ্ধ যাত্রায় বাহির
হইলেন। পূর্ব পশ্চিম উত্তর দক্ষিণ চারিদিক হইতে ব্রিটিস
সৈন্য এই দস্যুদল শীকারে নিযুক্ত হইল। পিণ্ডারীগণ মধ্য-
হিন্দুস্থানের পাহাড়, পর্বত, অরণ্য দেশ দেশান্তরে তাড়িত
ধাবিত হইল। তাহাদের দলপতি চিতু রাজপুতানা হইতে
গুজরাট, গুজরাট হইতে মালওয়া এইরূপে পলাইয়া বেড়ায়।
তাহার সহচরেরা তাহাকে পরিত্যাগ করিল—কতিপয় মাস সে
মালওয়ায় একাকী বনে বনে ভ্রমণ করত পরিশেষে সাতপুরা-
চলে ব্যাঘ্রমুখে পতিত হইয়া পঞ্চস্থ পায়। ক্রমে অন্যান্য
দলপতিগণ একে একে কেহ ধৃত, কেহ হত হয়—তাহা-
দের দল বল ছিন্ন ভিন্ন হইয়া যায় ও ইংরাজ বলে

এদেশ এই প্রবল দস্যুদলের উৎপাত হইতে মুক্তি লাভ করে ।

এলফিনিষ্টন সাহেব বাজিরাওকে পরামর্শ দেন—যদি ইংরাজদের প্রসন্নতা চাও তাহা হইলে এই পিণ্ডারী যুদ্ধে তাহাদের সাহায্যে সৈন্য প্রেরণ কর । রাজিরাও “মুখে মধু হৃদে ক্ষুর” । যখন সর জন ম্যালকম পুণায় আসিয়া তাঁহার সহিত সাক্ষাৎ করেন তখন তাঁহাকে মিষ্ট ভাষায় এমনি জল বুঝাইয়া দিলেন যে, তিনি ভাবিলেন ইনি ত আমাদেরই দলের লোক । কিন্তু এলফিনিষ্টন সাহেব বাজিরাওকে বিলক্ষণ চিনিতেন, তিনি সহজে ভুলিবার পাত্র নন । বাজিরাও যে মতলবে সৈন্য সংগ্রহ করিতেছেন, তিনি তাহা বুঝিতে পারিয়া তাড়াতাড়ি বস্বে হইতে একদল ইউরোপীয় ফৌজ আনাইয়া পুণার ক্রোশ দুই দূরে থিড়কী ক্ষেত্রে আড্ডা গাড়িলেন । ৫ই নবেম্বর যুদ্ধারম্ভ ।

থিড়কীর যুদ্ধ	}	ইংরাজদের সৈন্য বল সবশুদ্ধ ২৮০০
নবেম্বর ১৮১৭		পদাতিক, তন্মধ্যে ৮০০ ইউরোপীয় সেনা ।

মহারাজীদের ১৮০০০ অশ্বরোহী ও পদাতিক ৮০০০ । পুণা হইতে থিড়কীর পথ পর্য্যন্ত সেনায় সেনায় ছায়িত । পুরোৎপীড় প্রবাহিনীর ন্যায় অপূর্ব দৃশ্য উদ্ভাসিত হইয়াছিল । বাপু গোখলা মহারাজী সেনাপতি । তিনি সৈন্যদলের মধ্যে ইতস্ততঃ সঞ্চরণপূর্বক উৎসাহ বাক্যে সকলকে উত্তেজিত করিতেছেন—মধ্যে মধ্যে অশ্বগণের হ্রেবা রবে দিক্ বিদিক্ প্রতিধ্বনিত হইতেছে । কিছু পরেই যুদ্ধ বাধিল । গোখলা একদল সিপাহীর প্রতি লক্ষ্য

করিয়া তাহার বিরুদ্ধে ৬০০০ বাছা বাছা অশ্ব চালনা করিলেন—
 সওয়ারেরা মহা রোখে হুলা করিয়া চলিল—সেই সঙ্গে নয় মুখী
 কামান-ব্যাটরি হইতে গুলি গোলা বর্ষিত হইল। এই অশ্ব-চাল
 চালনে আশানুরূপ ফলোদয় হইল না, বরং উণ্টোৎপত্তি হইল।
 যে চালে মহারাষ্ট্রী সেনাপতি কিস্তিমাৎ করিবার মতলব করিয়া-
 ছিলেন, তাহাতে নিজেই বাজী হারিলেন। দুই সৈন্যের মাঝ-
 খানে একটা প্রকাণ্ড গর্ভের মতন ছিল, কতকজন সওয়ার প্রথম
 ঝাঁকে তাহার মধ্যে পড়িল, কতক বা গুলী খাইয়া ধরাশায়ী
 হইল—অবশিষ্ট সওয়ারেরা পিছু হটিয়া গেল। সওয়ারদের
 পরাভবে মহারাষ্ট্রীরা এমন দমিয়া গেল যে আর কেহই এগো-
 ইতে সাহস করিল না। সন্ধ্যার মধ্যে এই বিপুল সৈন্যের
 শরীরে অন্তর্ধান। ইংরাজেরা রিপু-শূন্য সমরক্ষেত্র অধিকার
 করিয়া রহিল। এই রণে ইংরাজদের সামান্য ক্ষতি, মহারাষ্ট্রী-
 দের ৫০০ লোক মারা পড়ে। এরূপ “বহ্মারস্ত্রে লঘুক্রিয়া”
 কেহ কখন দেখিয়াছে কি না সন্দেহ। পর্বতের প্রসব বেদনায়
 মূষিকের উৎপত্তি। পেশওয়া সেনামণ্ডলী-পরিবৃত হইয়া
 পার্বতী মন্দির হইতে খিড়কীর যুদ্ধ দেখিতেছিলেন। সূর্যো-
 দয়ে তাহার সৈন্যদলের উৎসাহ কোলাহলে আকাশ পূর্ণ—
 সূর্যাস্তের মধ্যে সে সমস্ত সৈন্য ছিন্ন ভিন্ন হইয়া কোথায় গেল,
 তাহার চিহ্নমাত্র রহিল না।

প্রভাতে গণিয়া সেনা হরষে বিহ্বল।

ভাঙ্গু যবে অস্তাচলে কোথায় সে দল !

বাজিরায়ের গ্রহ মন্দ । ইংরাজদের প্রসাদে তিনি সিংহাসন লাভ করিলেন—ইংরাজদের মারিতে গিয়া নিজে মরিলেন । ১৫ নবেম্বর ব্রিটিস সৈন্যের পুণা অধিকার, তখন হইতে মহারাষ্ট্র রাজ্য ইংরাজদের করতল-ন্যস্ত হইল । নববর্ষারম্ভে পুণার অনতিদূর কোরেগামে আর এক যুদ্ধ হয়, তাহাতে দুর্ধর্ষ ইংরাজবলের দ্বিতীয় বার পরিচয় পাইয়া বাজিরাও সেই যে স্বদেশ ছাড়িয়া উর্দ্ধ্বাশ্বাসে পালাইলেন, আর ফিরিলেন না । দেশাান্তরে তাড়িত হইয়া অবশেষে তিনি সর জন ম্যালকমের হস্তে আত্মসমর্পণ করিলেন এবং অতঃপর উদার পেন্সন ভোগে কানপুর সম্মিহিত বিথুরে কাল হরণ করিতে লাগিলেন । পেশওয়া বালাজী বিশ্বনাথের প্রপৌত্রের এই শেষ দশা । সিপাহী বিদ্রোহের সূত্রধার দুরাচার নানা সাহেব এই বাজিরায়ের পোষ্যপুত্র । শত বর্ষায়ত পেশওয়া বংশ তাঁহাতেই বিলীন হইল ।

এইরূপে অল্পে অল্পে ইংরাজেরা পশ্চিম ভারতবর্ষের অধীশ্বর হইলেন । বোম্বাই তাহার রাজধানী । বোম্বাই যে কি অমূল্য রত্ন, তাহা তাঁহার পূর্ব হইতেই বুঝিতে পারিয়াছিলেন । তাহার ভাবি গৌরব তাঁহাদের কল্পনাপটে প্রতিবিম্বিত হইয়াছিল । যখন মোগল, মহারাষ্ট্র, পোর্্তুগীস লোকেরা পরস্পর যুদ্ধ বিগ্রহে রত থাকিয়া আপনাদের অধঃপাতের সোপান প্রস্তুত ইংরাজ রাজ্য } করিতেছিল, তখন হইতে ইংরাজেরা ঐ রত্ন অতি যত্নের সহিত রক্ষা করিয়া আসিতেছেন । শেষে তাঁহা-

দেরই জিত—আর সকলের হার। ইংরাজদের এইরূপ প্রাধান্য লাভের কারণ কি? আলোচিত ঘটনাসূত্রই তাহা এক প্রকার নির্দেশ করিতেছে। দেখিবে গৃহবিচ্ছেদই আমাদের সর্বনাশের মূল। ইংরাজেরা আমাদের নিজের হাতিয়ার লইয়াই আমাদের উপর জয়যুক্ত হইলেন। আমাদের মধ্যে জাতীয় ঐক্য থাকিলে বিদেশী রাজা এদেশে তিলার্ক স্থান পাইতেন না—বিদেশীয় বল বিশ কোটি প্রজাপুঞ্জের এক ফুৎকারে উড়িয়া যাইত। ভারতে ইংরাজ আগমনের কিছু পরেই মোগল রাজ্য পতনোন্মুখ—তাহার আনুসঙ্গিক অরাজকতা হইতে ইংরাজেরা স্বরাজ্য স্থাপনের সন্ধি পাইলেন। সে সন্ধি তাঁহারা ছাড়িবার পাত্র নন। এই বিপুল রাজবিপ্লবের মধ্যে তাঁহারা অবাধে রাজ্য পত্তন করিয়া লইলেন। তাঁহাদের প্রতিদ্বন্দী রিপুদল একে একে পরাস্ত হইল—কেহ বা অদূরদর্শিতা বশতঃ হাল ছাড়িয়া দিল, কেহ বা ইংরাজ বলে বিদলিত হইয়া পরাভব স্বীকার করিল। দৈববলে, বাহুবলে, গভীর নয়কৌশলে ইংরাজদের সে রাজ্য ক্রমে বদ্ধমূল হইয়া বিস্তার লাভ করিল; দেখিতে দেখিতে ভারতের এক সীমা হইতে সীমান্তের পর্য্যন্ত অরি-বিরহিত, সুশাসন-পরিরক্ষিত, শান্তি-ফলপ্রদ একছত্র ব্রিটিশ সাম্রাজ্য সমুদিত হইল। সংক্ষেপে বলিতে গেলে, আমাদের লোকদের পরস্পর জাতিবৈর—তত্পরি পরিপক্ক ইংরাজী রাজনীতি, এই উভয় সূত্রে ইংরাজদের ঐশ্বর্য্যলাভ। সে নীতির সার মর্ম্ম এই—শত্রুদল বিচ্ছিন্ন করিয়া একের

সাহায্যে অপরকে জয় কর, অনন্তর অবসর বুঝিয়া বন্ধুটিকেও পদতলে আনিয়া দলিত কর।

ইংরাজ রাজ্য স্থাপন বৃত্তান্ত বর্ণিত হইল, এ সম্বন্ধে আর অধিক কথা বলিবার নাই। ১৮১৯ অব্দে মহারাষ্ট্র সমরে লর্ড-প্রতিষ্ঠ মহাত্মা এলফিনিষ্টন সাহেব বোম্বাই গবর্ণরের পদে লর্ড এলফিনিষ্টন } প্রতিষ্ঠিত হইয়া এ দেশে ফিরিয়া আসেন।
বোম্বাই গবর্ণর }
১৮১৯ } তাঁহার সময় হইতে বোম্বায়ের সৌভাগ্য-সূর্যের উদয়। পথ, ঘাট, গৃহ নিৰ্ম্মাণ, শিল্প বাণিজ্যের শ্রীবৃদ্ধি সাধন, বিদ্যা শিক্ষার নব-প্রণালী উদ্ভাবন, আইন-সংস্করণ ইত্যাদি কার্যের অনুষ্ঠান হেতু তাঁহার শাসন বোম্বাইবাসী-দিগের বিশেষ আদরণীয়। তিনিই নব্য বঙ্গের সূত্রপাত করিয়া যান—সর বার্টল্ ফ্রেয়রের আমলে বোম্বাই সহর উন্নতির পরাকাষ্ঠা লাভ করে।

চতুর্থ পরিচ্ছেদ।

সম্প্রদায়।

জন সংখ্যা } বোম্বাই সহর এই দুই শত বৎসরের মধ্যে যে কি আশ্চর্য্য উন্নতি ও শ্রীবৃদ্ধি লাভ করিয়াছে তাহা তাহার পূর্বোক্ত জনসংখ্যার তুলনা হইতে স্পষ্ট অনুভূত হইবে। যখন বোম্বাই দ্বীপ প্রথমে ইংরাজ রাজ্যভুক্ত হয় তখন বসতির

হিসাবে উহা এক সামান্য পল্লী বলিলেও অভ্যুক্তি হয় না। দশসহস্র লোকের আবাস স্থানকে আর সহরের মধ্যে গণ্য করা যায় না। কিন্তু এই জনসংখ্যার উত্তরোত্তর বৃদ্ধি হইয়া আসিতেছে; ১৭১৬ খৃষ্টাব্দে বোম্বাইবাসীর সংখ্যা, ১৬০০০, শতাব্দী পরে তাহা দেড় লক্ষেরও অধিক। ১৮৭২ অব্দে যে লোকসংখ্যার তালিকা প্রকাশিত হয় তাহাতে বোম্বাইয়ের প্রজাপুঞ্জ ৬ লক্ষ ৪৪ হাজার ও ১৮৮১র তালিকায় ৭ লক্ষ ৭৩ হাজার নির্ণীত হইয়াছে। অতএব দেখ ১০ বৎসরের মধ্যে বোম্বাইয়ের লোকসংখ্যা লক্ষাধিক বাড়িয়া উঠিয়াছে। এই দশাব্দীর মধ্যে কলিকাতায় জনসংখ্যার ত্রাসবৃদ্ধি লক্ষিত হয় না। লোকসংখ্যা অনুসারে বোম্বাই মাদ্রাজ ও কলিকাতা এই তিন সহরের পরস্পর দশ বৎসরের তুলনা করিয়া দেখিলে প্রতীতি হইবে, বোম্বাই বৃদ্ধিশীল—মাদ্রাজ হ্রাসোন্মুখ, কলিকাতা নিশ্চল। বোম্বাইয়ের এই বিপুল প্রজাপুঞ্জ বিভিন্ন ধর্ম্মাবলম্বী বিচিত্র বর্ণ বিচিত্র জাতির সম্মিশ্রণে সংগঠিত। হিন্দুদের মধ্যে গুজরাতি বণিক ও মহারাষ্ট্রী ব্রাহ্মণ রীতি চরিত্রে কেমন ভিন্ন। মুসলমানদের মধ্যে দেশীয় মুসলমান একদিকে—অন্যদিকে পাঠান তুরক আরব পারস্য প্রভৃতি বিদেশী মুসলমান। তন্মধ্যে ইহুদী পোর্তুগীস আরমানী পারসী, এই সমস্ত জাতি এই বিচিত্র জনতার অন্তর্ভূত। বোম্বাইয়ে যে সকল জাতি সচরাচর দৃষ্ট হয় তাহাদের বিস্তারিত বিবরণ বলিতে গেলে প্রস্তাব স্তূদীর্ঘ হইয়া পড়ে—বাছিয়া বাছিয়া সংক্ষেপে যথাসাধ্য বর্ণনা করা যাইতেছে।

জৈন } জৈনসম্প্রদায় হইতে আরম্ভ করা যাক্ । সমুদায় ভারতবর্ষে জৈনসংখ্যা বিশলক্ষ * বলিয়া প্রসিদ্ধ—বোম্বাই দ্বীপে প্রায় ১৮০০০ । জৈনদের প্রধান আড্ডা গুজরাত—তাহাদের মধ্যে অনেকে ব্যবসাদার ও শ্রীমন্ত । জৈনধর্ম হিন্দু ও বৌদ্ধধর্মে মিশ্রিত, বৌদ্ধধর্মের জ্ঞানকাণ্ড ও হিন্দুধর্মের পৌরাণিক ভাগ উহার সঙ্গে অনুসৃত । বৌদ্ধদের মত জৈনেরা নিরীশ্বর-বাদী অর্থাৎ জগতের আদিকারণ ঈশ্বরের অস্তিত্ব অঙ্গীকার করে না । কিন্তু জৈনদের শাস্ত্রোক্ত মত যাহাই হউক, বাস্তবিক ধরিতে গেলে তাহারা ঘোর পৌত্তলিক ; ঈশ্বরারাধনার পরিবর্তে জৈন ধর্মে বীর-পূজা স্থান পাইয়াছে । কর্মের প্রাধান্য বৌদ্ধ জৈন উভয় ধর্মেই দৃষ্ট হয় । উভয়েই আপন আপন কর্মানুসারে পুনঃপুনঃ জন্মগ্রহণ ও স্বর্গ নরক ভোগ বিশ্বাস করে । যে সকল সাধু পুরুষ স্বকীয় কর্মগুণে জিতেন্দ্রিয় হইয়া নিরুত্তি লাভ করিয়াছেন তাহারাই জিন—জিনের অনুচর জৈন । জিনের অপর নাম তীর্থঙ্কর । যুগে যুগে এইরূপ ২৪ জন তীর্থঙ্কর উদয় হইয়াছেন ও ভাবিযুগে ২৪ জন উদয় হইবেন । জৈন মন্দিরে এই সকল তীর্থঙ্করের পাষাণময় বিশাল প্রতিমূর্তি স্থাপিত । ইহাদের মধ্যে ত্রয়োবিংশ ও চতুর্বিংশ জিনদ্বয়, পার্শ্ব-

* এবিষয়ে আমার সন্দেহ আছে । পালিতানার ঠাকুর কর্তৃক উত্থাপিত হইয়া জৈনেরা ঠাকুরের বিপক্ষে বোম্বাই গবর্ণমেন্টে যে আবেদন করে সেই উপলক্ষে ভারতবর্ষের জৈনসংখ্যা বিশলক্ষ বলিয়া কথিত হয় কিন্তু হন্টর সাহেব কৃত Gazetteer-এ তাহার চতুর্থাংশ নির্দিষ্ট হইয়াছে । ইহার সঙ্গে যদি বৌদ্ধসংখ্যা যোগ করা যায় সে স্বতন্ত্র কথা ।

নাথ ও মহাবীর, জৈনদের বিশেষ পূজার্থ । বাঙ্গলাদেশে পার্শ্বনাথ, কাঠেওয়াড়ে গিরনার ও শত্রুঞ্জয়—উত্তর গুজরাতে আবুর পাহাড় ইত্যাদি জৈন তীর্থ ভারতবর্ষে বিক্ষিপ্ত । পালিতানার অধীনস্থ শত্রুঞ্জয় ইহাদের মধ্যে সুপ্রসিদ্ধ । এই সকল স্থানে বহুমূল্য সুন্দর জৈন মন্দির সকল প্রত্যক্ষ করা যায় । মন্দিরের মধ্যে আদিনাথ ও অন্যান্য তীর্থঙ্করের শান্তিপূর্ণ গম্ভীর পাষাণ মূর্তি রজত দীপালোকে আলোকিত হইয়া অনতিব্যক্ত অক্ষুট কান্তি ধারণ করে ; ধূপধূনার গন্ধে বায়ু সুবাসিত ; জৈন-তপস্বিনীগণ সুবর্ণরঞ্জিত লোহিত বসন পরিধান পূর্বক সূচিকণ পাষণের উপর দিয়া নিঃশব্দ পদসঞ্চারে ঘুরিয়া ঘুরিয়া সমস্বরে গান করিতে থাকে ।

বৌদ্ধদের মত জৈনদের অহিংসাই পরম ধর্ম । কায়মনো-বাক্যে সর্বজীবে দয়া প্রকাশ এ ধর্মের উপদেশ । প্রাণীর কষ্ট নিবারণ উদ্দেশে জৈনগণ প্রভূত কষ্ট, অর্থব্যয় ও ত্যাগ স্বীকারে প্রস্তুত । তাহাদেরই বহু ও ব্যয়ে বোম্বায়ে পশুর হাঁসপাতাল (পিঞ্জরাপোল) স্থাপিত ও সুরক্ষিত । পাছে দীপানলে কীট পতঙ্গ বিনষ্ট হয় এই হেতু সূর্যাস্ত পরে জৈনদের আহার নিষেধ । অনেক জৈন সম্প্রদায়ী এই অহিংসা ধর্মের অতিমাত্র কঠোর নিয়মাবলী অবলম্বন করিয়া চলে । বর্ষার চতুর্মাস কীট পতঙ্গের সমধিক প্রাদুর্ভাব এই কারণে কোন কোন জৈনগৃহে রাত্রে দীপালোকে কিরণমাত্রও দৃষ্টি হয় না । কোন কোন স্থানে ঐকালে কনুর ঘানি কুস্তকারের চাক বন্ধ । কথিত আছে এই

অতিমাত্র অহিংসা নিয়ম জৈনদের রাজ্যনাশের মূল। অনুহল-
বাড়ার শেষ রাজা কুমার পাল একজন গোঁড়া জৈন ছিলেন,
বর্ষাকালে জীবহিংসা ভয়ে তিনি নিজ সৈন্য সামন্তের গতিবিধি
নিবারিত করিয়া মহা অনর্থ ঘটাইয়াছিলেন।

জৈন ধর্মের উৎপত্তি বিষয়ে দ্বিবিধ মত প্রচলিত। কোন
কোন পণ্ডিতের মত এই যে জৈনধর্ম বৌদ্ধ ধর্মের শাখা মাত্র কিন্তু
একথা অপর পণ্ডিতেরা অস্বীকার করেন। তাঁহারা বলেন যে বৌদ্ধ-
ধর্ম প্রতিষ্ঠিত হইবার বহুকাল পূর্ব হইতে এদেশে জৈনধর্ম চলিয়া
আসিতেছে। একজন * মাননীয় লেখকের মত এই যে অশোক
রাজা প্রথমে জৈন ছিলেন, রাজত্বের শেষভাগে বৌদ্ধধর্ম অব-
লম্বন করেন; অশোক রাজার অনুশাসন-লিপি হইতে তিনি
স্বীয় মত প্রতিপাদন করিবার চেষ্টা করিয়াছেন। জৈনেরা
নিজে তাঁহাদের তীর্থঙ্কর মহাবীরকে শাক্যসিংহের গুরু বলিয়া
বিশ্বাস করেন। বৌদ্ধমত ভ্রান্ত বলিয়া তাঁহাদের অগ্রাহ্য।
ইতিহাসে পাওয়া যায় বৌদ্ধ সম্প্রদায়ের অবনতির সঙ্গে সঙ্গে
জৈনদের উন্নতি। সপ্তম শতাব্দীতে কান্যকুজাধিপতি শ্রীহর্ব
পূর্বাবলম্বিত বৌদ্ধধর্ম পরিত্যাগ করিয়া জৈনধর্ম গ্রহণ করেন।
ঐ সময়ের পর যে জৈন সম্প্রদায়ের প্রাচুর্য্য হয়—মহীসূর,
আবু, বিজয়নগর প্রভৃতি অনেক স্থানের খোদিত লিপিতে তাহা
স্বস্পষ্ট প্রদর্শন করিয়া দিয়াছে। কামতী মাছুরা পাণ্ডুরাজ্যে

* Thomas on Jainism or the Early faith of Asoka.

বৌদ্ধ সম্প্রদায়ের পতন হইয়া জৈন সম্প্রদায়ের প্রাভুর্ভাব হয়। পূর্বের গুজরাতে বৌদ্ধ রাজাদের অধিকার ছিল, খৃষ্টাব্দের দ্বাদশ শতাব্দীতে তথায় জৈন সিংহাসন প্রতিষ্ঠিত হয়।

সে যাহা হউক, জৈনধর্ম ও বৌদ্ধধর্মে যে ঘনিষ্ঠ সম্বন্ধ তাহার আর সন্দেহ নাই। তাহাদের মধ্যে পিতাপুত্রের সম্বন্ধ না থাকুক—উভয়কে পরস্পরের জাতিভাই বলিয়া মানিতেই হইবে। বীরপূজা ও অপর কতকগুলি বিশেষ বিধানে বোধ হয় যেন সার্বভৌমিক বৌদ্ধধর্ম জৈন সম্প্রদায়ে পরিণত হইয়াছে।

হিন্দু } বোম্বাইয়ের হিন্দুগণ শৈব ও বৈষ্ণব সামান্যতঃ এই দুই প্রধান সম্প্রদায়ে বিভক্ত হইতে পারে। কোন হিন্দু শৈব কি বৈষ্ণব তিলক দেখিলেই অক্লেশে জানিতে পারা যায়। বৈষ্ণবেরা নাসামূল হইতে কেশ পর্যন্ত বিষ্ণুর পদাঙ্কসূচক উর্দ্ধ-রেখা করেন আর শৈবেরা ললাটে বামপার্শ্ব হইতে দক্ষিণ পার্শ্ব পর্যন্ত বিভূতি দিয়া তিনটি তির্যক্ রেখা করিয়া থাকেন। প্রথমোক্ত তিলককে উর্দ্ধ পুণ্ড্র ও শেষোক্ত তিলককে ত্রিপুণ্ড্র বলে।

শঙ্করাচার্য্য } শৈবদের গুরু জগৎগুরু শঙ্করাচার্য্য। শঙ্করাচার্য্য একজন প্রথর বুদ্ধিসম্পন্ন মহোৎসাহী ধর্মোপদেশক ছিলেন কিন্তু দুর্ভাগ্যক্রমে আমাদের দেশে জাতিগতই হউক ব্যক্তিগতই হউক, ইতিহাস মাত্রই এরূপ অযত্নের বস্তু যে এমন লোকের প্রকৃত জীবনবৃত্তান্ত কালের সহিত বিলীন হইয়াছে। আনন্দ-গিরিকৃত শঙ্করদীপ্তিজয় প্রভৃতি কতিপয় গ্রন্থে শঙ্করাচার্য্যের চরিত

বর্ণনা আছে বটে কিন্তু তাহা এত অদ্ভুত অলৌকিক ব্যাপারে জড়িত যে সত্য মিথ্যা পৃথক করা সহজ নহে । তাঁহার জীবন-চরিত যতদূর জানা গিয়াছে তাহার সারাংশ এই । খৃষ্টাব্দের অষ্টমশতাব্দীর শেষ অথবা নবম শতাব্দীর প্রথম ভাগে তিনি প্রাদুর্ভূত হন । কেরল (মালাবার) প্রান্তে ব্রাহ্মণকুলে তাঁহার জন্ম । অনধিক কালের মধ্যেই তিনি একটা তেজীয়ান্ ক্ষমতা-পন্ন লোক হইয়া উঠিয়াছিলেন । তিনি সন্ন্যাসাশ্রম গ্রহণ করিয়া ভারত-ভূমির অন্তর্গত নানা দেশ ভ্রমণ ও সে সময়ের প্রচলিত নানা মত খণ্ডন করিয়া স্বীয় মত সংস্থাপন করেন । তিনি কাঞ্চী, কর্ণাট, কাশী, কামরূপ প্রভৃতি ভারতবর্ষের নানা স্থানে পরিভ্রমণ পূর্বক জীবনের শেষভাগে কাশ্মীররাজ্যে গমন করেন এবং তথায় প্রতিপক্ষদিগকে বিচারে পরাস্ত করিয়া সর-
'স্বতীপীঠে অধিষ্ঠিত হন । তথা হইতে বদরিকাশ্রমে চলিয়া যান ও অবশেষে হিমালয়স্থিত কেদারনাথে গিয়া ৩২ বৎসর বয়ঃক্রমের সময় প্রাণত্যাগ করেন । বেদান্ত শাস্ত্রের প্রচার ও তত্ত্বজ্ঞান প্রচলন উদ্দেশে তিনি চারি স্থানে চারিটি মঠ প্রতিষ্ঠিত করেন । মহীশূরস্থ শৃঙ্গগিরির মঠ তন্মধ্যে সর্বপ্রধান । শৃঙ্গ-গিরি ঋষিশৃঙ্গ মুনির জন্মস্থান ও বিভাগুক ঋষির তপোভূমি বলিয়া প্রখ্যাত ; শৃঙ্গগিরি মঠাধিপতি শঙ্করাচার্যের অনুশাসন এ অঞ্চলে শৈবদের মধ্যে প্রচলিত । শৃঙ্গগিরি হইতে তিনি জাতি সম্বন্ধীয় বিহিত বিধান প্রচার করেন । সমাজ সংস্কর্তাগণ তাঁহার সহযোগিতা পাইবার জন্য ব্যস্ত । তাঁহার মানমর্যাদা

ঐশ্বর্যের সীমা নাই। যখন অর্থ সংগ্রহের প্রয়োজন হয় তখন শৃঙ্গগিরি হইতে শিষ্যবর্গের মধ্যে অবতরণ পূর্বক ভাণ্ডার পূর্ণ করিয়া ফিরিয়া যান।

শঙ্করাচার্য্য জীবব্রহ্মে অভেদমূলক অদ্বৈতবাদের প্রধান প্রবর্তক। তিনি বেদান্ত দর্শন, উপনিষদ ভাষ্য, ভগবদগীতা ভাষ্য— ইত্যাদি আত্মজ্ঞান বিষয়ক পুস্তক প্রস্তুত করেন। যদিও অদ্বৈত ব্রহ্মজ্ঞান তাঁহার প্রকৃত মত ও নিগূঢ় উপাসনা প্রচার করা এই সমস্ত মঠ স্থাপনের উদ্দেশ্য কিন্তু দেখা যায় সাকার দেবতার উপাসনায় তাঁহার কিছুমাত্র বিদ্বেষ ছিল না। এই সকল উচ্চ উপদেশ অজ্ঞান জনসাধারণের ধারণাতীত তাহা তিনি বিলক্ষণ অবগত ছিলেন। যাহারা নিগূঢ় তত্ত্বজ্ঞানের অনধিকারী তাহাদের জন্য তিনি সুলভ মার্গ প্রদর্শন করিয়াছেন। তাই দেখি যে, সকল সম্প্রদায়ের লোকই তাঁহার প্রতি গুরুভক্তি প্রকাশ করে। তাঁহার নাম ষণ্মতস্থাপক। লিখিত আছে শঙ্করাচার্য্যের শিষ্যেরা তদীয় আদেশানুসারে নানা দেশ ভ্রমণ ও তত্রস্থ পণ্ডিতগণের সহিত বিচার করিয়া শিব বিষ্ণু প্রভৃতি সাকার দেবতার উপাসনা প্রচার করেন। কিন্তু তাঁহার শিষ্যবর্গের অনেকেই শিব পক্ষপাতী ও শিবোপাসক দৃষ্ট হয়। শৈবেরাই শঙ্করাচার্য্যকে আচার্য্যপদে বিশিষ্টরূপে বরণ করেন— এমন কি, শঙ্করের অবতার বলিয়া তাঁহাকে দেবাসনে পর্য্যন্ত প্রতিষ্ঠিত করিয়াছেন।

বৈষ্ণবেরা দ্বৈতবাদী ও ভিন্ন ভিন্ন সম্প্রদায়ে বিভক্ত। তাহা-

দের আচার্য্যও বিভিন্ন । কিন্তু বোম্বাই ও গুজরাতে বল্ল-
 বল্লভাচার্য্য } ভাচার্য্যের বিশেষ প্রভাব লক্ষিত হয় । বহুতর
 স্বর্ণ বণিক ও ব্যবসায়ী লোক বল্লভাচার্য্যের মতাবলম্বী । শিষ্য-
 দের উপর গৌঁসাইদের অত্যন্ত প্রভুত্ব দেখা যায় । বল্লভাচার্য্যের
 উত্তরাধিকারী আচার্য্যগণ সগর্বে ‘মহারাজ’ উপাধি ধারণ
 করিয়াছেন । খৃষ্টাব্দের পঞ্চদশ শতাব্দীর ন্যূনাধিক অশীতি
 বৎসরে বল্লভাচার্য্য চম্পারণ্যে জন্মগ্রহণ করেন । তাঁহার চরিত
 সম্বন্ধে নানা অলৌকিক কাহিনী প্রচলিত আছে । তাঁহার
 ধীশক্তি এমন প্রবল যে কথিত আছে সাত বৎসর বয়ঃক্রমের
 সময় তিনি বিদ্যাভ্যাস আরম্ভ করিয়া চতুর্শ্বাসের মধ্যে চারি
 বেদ, ষড়্দর্শন ও অষ্টাদশ পুরাণ কণ্ঠস্থ করেন । তিনি বৈষ্ণব-
 ধর্ম্মের নূতন পন্থা প্রস্তুত করিয়া শীঘ্রই দেশ দেশান্তরে স্বমত
 প্রচারে বাহির হইলেন । ভক্তমালাে লিখিত আছে, তিনি
 ভারতবর্ষের দক্ষিণ খণ্ডে বিজয়নগরাধিপতি কৃষ্ণ দেবের সভায়
 উপস্থিত হইয়া তথাকার স্মার্ত ব্রাহ্মণদিগকে বিচারে পরাস্ত
 করেন এবং তত্রত্য বৈষ্ণবগণের আচার্য্যপদে অভিষিক্ত হন ।
 তথা হইতে উজ্জয়িনী নগরে গমন করিয়া শিপ্ৰাতটে অস্থখ
 বৃক্ষতলে অবস্থিতি করেন । তথায় ভগবান শ্রীকৃষ্ণ তাঁহার অচলা
 ভক্তিতে পরিতুষ্ট হইয়া অতি মনোহর অপূর্ব্বরূপে দর্শন দিয়া
 তাঁহাকে বালগোপালের সেবা প্রচার করিতে আদেশ করিলেন ।
 এই উদ্দেশে তিনি ভারতবর্ষের নানা স্থানে পরিভ্রমণ পূর্ব্বক
 অবশেষে কাশীবাসে জীবন উৎসর্গ করেন । কাশীতেই তাঁহার

মৃত্যু হয়। বল্লভাচার্যের মৃত্যুঘটনাবিষয়ক আখ্যান এই; তিনি মর্ত্যলীলা সম্পন্ন করিয়া এক দিবস হনুমান ঘাটে গঙ্গাসলিলে অবতীর্ণ হইলেন এবং অবগাহন করিতে করিতে এক কালে অন্তর্হত হইয়া গেলেন। তাঁহার অবগাহন স্থান হইতে এক দীপ্যমান অগ্নিশিখা উখিত হইল এবং তিনি বহুতর দর্শক-সমক্ষে স্বর্গারোহণ করত আকাশে লীন হইয়া গেলেন।

বল্লভাচার্যের ধর্ম বিলাসের ধর্ম—ঐশ্বর্য্যবান্ ও ভোগবান্ গৃহস্থেরা ঐ ধর্মে অনুরক্ত। অন্যান্য পণ্ডিতেরা বলেন ধর্মের পথ শাণিত ক্ষুরধারের ন্যায় কঠিন (দুর্গম্পথস্তং কবয়ো বদন্তি) বল্লভাচার্য্যনির্দিষ্ট মার্গ সেরূপ নহে—তাহাকে পুষ্টিমার্গ বলে। তিনি কহিয়া গিয়াছেন পরমেশ্বরের উপাসনাতে উপবাসের আবশ্যকতা নাই—অন্নবস্ত্রের ক্লেশ পাইবারও প্রয়োজন নাই—বনবাস স্বীকার পুরঃসর কঠোর তপস্যাতেও ফলোদয় নাই। উত্তম বসন পরিধান ও সুখাদ্য অন্নভোজনাদি সমস্ত বিষয়স্বখ সম্ভোগ পূর্বক তাঁহার সেবা কর। উচ্চাঙ্গ বৈষ্ণব ধর্মের মতে রাধাকৃষ্ণের প্রেম রূপকচ্ছলে গৃহীত—তাহা পরমাত্মার প্রতি জীবাত্মার প্রেমের আদর্শ। বল্লভাচার্যের ধর্মে এই প্রেম পার্থিব ধূলির সহিত মিশ্রিত হইয়া ইহার আধ্যাত্মিক স্বর্গীয় ভাব লোপ পাইয়াছে।

এই বিলাস ধর্ম হইতে নানা প্রকার অনীতি অত্যাচার প্রসূত হইয়াছে। গোঁসাইজী মহারাজ স্বয়ং কৃষ্ণ ভগবানের পার্থিব প্রতিনিধি; শিষ্যেরা তনমনধনে তাঁহার সেবায় রত থাকিবে এই-

রূপ বিধান আছে । এই সকল বৈষ্ণবমন্দিরে দেখিবে মহারাজই দেবতা—তিনিই পূজার পাত্র । তাঁহার পদধূলি সেবন ও চরণা-
মৃত পান—তাঁহাকে নৈবেদ্য অর্পণ—তাঁহার উচ্ছিন্ন ভোজন—
আরতি রাসদোলা প্রভৃতি দেবারাধন উপকরণে তাঁহার অর্চনা,
এই সমস্ত অনুষ্ঠানে শিষ্যগণ আপনাদিগকে পুণ্যবস্ত কৃতকৃতার্থ
মনে করেন । এ অপেক্ষাও সহস্রগুণে নিন্দনীয় জঘন্য পাপাচার
যাহা উল্লেখ করিতেও হৃৎকম্প হয় তাহা এই, যে বৈষ্ণব কুলবধু-
গণ মহারাজকে শ্রীকৃষ্ণ নির্বিশেষ মানিয়া তাঁহার সেবায় আপন
সতীত্ব পর্যন্ত উৎসর্গ করিতে সঙ্কুচিত হন না ।

কতক বৎসর হইল গুজরাতের প্রসিদ্ধ সমাজসংস্কারক মৃত
করসন দাস মূলজী বোম্বাই সুপ্রীমকোর্টে মহারাজ লাইবেল
মকদ্দমায় বল্লভাচারী বৈষ্ণবদিগের নীতিবিরুদ্ধ আচারগুলি
উদ্ঘাটিত করিয়া গুজরাত সমাজের বিস্তর উপকার সাধন করিয়া
গিয়াছেন, সেই অবধি মহারাজদিগের বিষম অত্যাচার কতকটা
প্রশমিত দেখা যায় । *

স্বামী নারায়ণ } বৈষ্ণব সম্প্রদায়ের এই সকল অনীতিগর্ভ বিশ্বাস
ও ব্যবহার বিরুদ্ধে খড়গ ধারণ করিয়া গুজরাতে স্বামীনারায়ণ
সম্প্রদায় সমুখিত হয় । সহজানন্দ স্বামী এই সম্প্রদায়ের সৃষ্টি-
কর্তা । গুজরাতে তাঁহার প্রায় দুই লক্ষ অনুচর দৃষ্ট হয় ।
তাঁহার উত্তরাধিকারী আচার্য্যগণ বল্লভাচার্য্যদের দৃষ্টান্তে মহারাজ

* অল্প দিন হইল ব্রজেশজী নামক একজন মহারাজ জেলে গিয়া তাঁহার
শিষ্যবর্গের মধ্যে হলুদ্বল বাধাইয়াছিলেন । সম্প্রতি তাঁহার মৃত্যু হইয়াছে ।

পদবী গ্রহণ করিয়াছেন। সহজানন্দস্বামী রামমোহন রায়ের সমসাময়িক ছিলেন। † যে সময়ে রামমোহন রায় স্বদেশে আচার ব্যবহার ধর্মাদি সংশোধন করিয়া উন্নত ব্রাহ্মধর্মের অঙ্কুর রোপণ করিতে কৃতসংকল্প হন, সহজানন্দ স্বামীও তখন গুজরাতে বৈষ্ণব ধর্মের অনীতি কলঙ্ক অপনোদন করিয়া বিশুদ্ধ নীতিমার্গ প্রদর্শন করিতে তৎপর থাকেন। সহজানন্দ অযোধ্যা প্রদেশের চপাই নামক গ্রামে ১৭৮০ খৃষ্টাব্দে জন্মগ্রহণ ও ৪৯ বৎসর বয়ঃক্রমে গুজরাতে মানবলীলা সম্বরণ করেন। বর্তমান শতাব্দীর প্রারম্ভে তিনি জন্মভূমি পরিত্যাগ করিয়া গুজরাতে আসিয়া উপস্থিত হন। তাঁহার কি-এক সরল সাধুভাব ও আকর্ষণী শক্তি ছিল কতিপয় বৎসরের মধ্যেই অনুরক্ত শিষ্যদলে তিনি পরিবেষ্টিত হইলেন। ‡ তাঁহার খ্যাতি প্রতিপত্তি দিন দিন বর্দ্ধিত হওয়াতে আহমদাবাদের ব্রাহ্মণ ও কর্তৃপক্ষদের ঈর্ষানল উদ্দীপ্ত হইল। তিনি অত্যাচার ভয়ে পলায়ন পূর্বক আহমদাবাদের ৬ ক্রোশ দক্ষিণে জয়তলপুর গ্রামে আসিয়া অধিষ্ঠান করেন ও তথায় এক মহা যজ্ঞের অয়োজন করিয়া পার্শ্ববর্তী ব্রাহ্মণদিগকে আমন্ত্রণ করিয়া পাঠান। এইরূপ সমাগমে বিভিন্ন সম্প্রদায়ীদের মধ্যে গোলযোগ আশঙ্কা করিয়া কর্তৃপক্ষেরা স্বামীকে ধৃত ও কারারুদ্ধ করেন। কিন্তু তাহার ফল উল্টা

† রামমোহন রায়ের জন্ম ১৭৭৪, মৃত্যু ১৮৩৩।

‡ বিশপ হীবরের গ্রন্থে এই খৃষ্টীয় ও হিন্দু আচার্যের সাক্ষাৎকার সংঘটন বর্ণিত হইয়াছে।

হইল। লোকের হৃদয় তাঁহার প্রতি সমধিক আকৃষ্ট ও তাঁহার আধিপত্য শতগুণ বৃদ্ধি হইল। শীঘ্রই তিনি কারামুক্ত হইলেন ও ভক্তমণ্ডলী তাঁহার চতুর্দিকে আসিয়া জুটিল। অনন্তর বর্তাল নামক এক বিজন পল্লীতে তাঁহার শিষ্যগণ সমভিব্যাহারে উপনীত হইয়া তথায় লক্ষ্মীনারায়ণের মন্দির প্রতিষ্ঠা ও তথা হইতে ধর্ম প্রচার আরম্ভ করিলেন। এক্ষণে বর্তালগ্রামে স্বামীনারায়ণ সম্প্রদায়ীদের দুইটি মন্দির দৃষ্ট হয়। মন্দিরের মধ্যে শ্রীকৃষ্ণের দক্ষিণে রাধিকা ও বামপার্শ্বে স্বামী নারায়ণের প্রতিমূর্তি প্রতিষ্ঠিত। দেখ কত অল্পকাল মধ্যে কেমন সহজে সহজানন্দস্বামী হিন্দু দেবমণ্ডলীর মধ্যে প্রবেশ লাভ করিলেন। ভারতবর্ষে নূতন সম্প্রদায়ের সৃষ্টি প্রকরণ স্বামীনারায়ণ সম্প্রদায়ের উৎপত্তি হইতে সুস্পষ্ট নিরীক্ষণ করা যায়। এই সম্প্রদায়ীদের দুই শ্রেণী=সাধু ও গৃহস্থ। সাধুরা অবিবাহিত, গেরুয়া বসনধারী, সন্ন্যাস ধর্ম্যানুরক্ত, প্রচার কার্যে নিযুক্ত। তাহাদের সংখ্যা প্রায় ১০০০। এই সকল সাধুরা সমুদায় সংসার-বন্ধন ছেদন করিয়া ধর্মপ্রচারেই জীবন উৎসর্গ করিয়াছেন। এই কার্যে তাঁহারা অশেষ কষ্ট অশেষ ত্যাগ স্বীকার পূর্বক পদব্রজে দূরে দূরে গমন করেন, সঙ্গে কেবল দণ্ড, কমণ্ডলু, ভিক্ষার ঝুলি ও তাঁহাদের এক একখানি ধর্মগ্রন্থ পথের সম্বল। তাঁহাদের উপদেশ ও দৃষ্টান্তে চামা কুলি প্রভৃতি নীচজাতি মধ্যে এই ধর্মের প্রচার হইয়া মহৎ উপকার সাধিত হইয়াছে সন্দেহ নাই। স্বামী-

নারায়ণ ধর্মগ্রন্থের নাম শিক্ষাপত্রী। এই গ্রন্থ সহজানন্দস্বামী কর্তৃক সংস্কৃত ও প্রাকৃত ভাষায় বিরচিত।

বিষ্ঠল ভক্ত } মহারাষ্ট্র প্রদেশে বিষ্ঠল ভক্ত নামে একটি
অথবা বারকরী } সম্প্রদায় আছে। গুজরাত কর্ণাটে এই সম্প্র-
দায়ী অনেক লোক দেখিতে পাওয়া যায়। ইহাদের উপাস্য
দেবতার নাম বিষ্ঠল বা বিঠোবা। ইহারা তাঁহাকে বিষ্ণুর
অবতার বলিয়া বিশ্বাস করে। দক্ষিণপথে ভীমা নদীর দক্ষিণ
তীরে পণ্ডরপুরে ঐ বিষ্ঠল দেবের একটি মন্দির আছে।
পণ্ডরপুর মহারাষ্ট্র দেশের এক প্রসিদ্ধ তীর্থস্থান। আষাঢ়ী ও
কার্ত্তিকী পূর্ণিমায় অসংখ্য অসংখ্য যাত্রী বিঠোবা দর্শনে সমাগত
হয়। এই স্থানে পুরাকালে হয়ত বৌদ্ধদের ধর্মক্ষেত্র ছিল।
কথিত আছে যে বুদ্ধদেবের প্রতিমূর্ত্তির স্থান এক্ষণে বিঠোবাদেব
অধিকার করিয়া সকল জাতির পূজার পাত্র হইয়া দাঁড়াই-
য়াছেন। এই সম্প্রদায়ীগণ জাতিভেদ প্রথা ক্রিয়দংশে অবমাননা
করেন—মহোৎসবের সময় জগন্নাথক্ষেত্রের ন্যায় পণ্ডরপুরস্থিত
দেবমন্দিরের চতুষ্পার্শ্বে বিষ্ঠল ভক্তেরা পরস্পর পরস্পরের
অন্ন গ্রহণ করিতে পরান্মুখ হয় না।

তুকারাম } সুবিখ্যাত মহারাষ্ট্রীয় কবি তুকারামের কবিতা-
বলি বিঠোবার স্তুতি-গীতে পূর্ণ। তুকারাম ২৫০ বৎসর পূর্বে
পুণার সন্নিকটস্থ দেছগ্রামে বৈশ্যকুলে জন্মগ্রহণ করেন। শিবা-
জীর রাজত্ব কালে তিনি প্রাদুর্ভূত হন ও প্রায় ৫০০০ গাথা রচনা
করেন। এই সকল স্মৃতি ও ভক্তিরসে পরিপূর্ণ “অভঙ্গ”

কবিতাবলী মহারাষ্ট্র দেশে সর্বসাধারণে সমাদৃত। ছ একটী
দৃষ্টান্ত দিলেই হইবে।

১ ভক্তি ভরে গান কর, শুদ্ধ কর মন,
হরি যদি পেতে চাও এই সে সাধন।
নম্র হও, থাক সদা সাধু পদচ্ছায়,
কান পাতিও না কভু পর-চরচায়।
তুকা বলে—কর ভাই পর উপকার,
অন্ন হোক, বেশী হোক, যা সাধ্য তোমার।

২ হে ঈশ্বর, এই কর তোমারে না ভুলি,
তব গুণগান যেন করি প্রাণ পুলি।
আর কিছু নাহি চাই, এই এক আশ,
ধন সম্পদের তরে না রাখি প্রয়াস।
নির্কাণ করিতে লাভ বাসনা যে নাই,
দুর্লভ জনম হ'তে মুক্তি নাহি চাই।
বৈচে থেকে করি শুধু তব গুণগান,
সাধুসঙ্গ ভোগ করি এই চাহে প্রাণ।

পঞ্চম পরিচ্ছেদ ।

জাতি ।

বোম্বায়ে গুজরাত মহারাষ্ট্র কর্ণাট প্রভৃতি ভিন্ন ভিন্ন প্রদেশ হইতে নানাজাতীয় হিন্দু একত্রিত । গুজরাতীদের অধিকাংশ বাণিজ্য ব্যবসায়ে রত । বাণিজ্য সম্বন্ধীয় ভাষা গুজরাতী । গুজ-গুজরাতী বণিক } রাতী বণিকদিগের যে সমস্ত জাতি বিভাগ আছে তাহা এস্থলে উল্লেখ করা অভিপ্রেত নহে । তাহাদের অর্জন-স্পৃহা অত্যন্ত প্রবল । সাইলকসদৃশ অর্থলোভ ও ক্রুরতা বণিক জাতির জাতীয় ধর্ম কিন্তু তাহার সঙ্গে সঙ্গে তাহাদের উদ্যম ও কর্মদক্ষতা প্রশংসার যোগ্য । পারস্য উপসাগর ও ভারত সাগরের উপকূলস্থ প্রদেশের সহিত বাণিজ্যসূত্র পুরাকাল হইতে এই সকল বণিকদের হস্তে নিহিত এবং এ কালেও পূর্ব আফ্রিকা, দক্ষিণ ও পূর্ব আরব্যের বাণিজ্য জাঞ্জিবার মস্কট প্রভৃতি স্থানে এই সকল বোম্বাই-বণিকদের এজেন্ট কর্তৃক নিষ্পন্ন হয় । ইয়োরোপীয়েরা প্রথমে যখন এদেশে পদার্পণ করে তখন বণিকদের সঙ্গেই তাহাদের প্রধান কারবার । তাহাদের একজন এক প্রবাদ লিখিয়া গিয়াছেন—“ইহুদি তিন এক চীন—তিন চিনে এক বেনে ।” মধ্য হিন্দুস্থান হইতে বহু সংখ্যক মারওয়াড়ী এদেশে আসিয়া বাস করিতেছে—বণিকদের সঙ্গে তাহাদের রীতি চরিত্রে অনেক সৌসাদৃশ্য দৃষ্ট হয় । প্রত্যুত মারওয়াড়ী মধ্য ভারতের স্বর্ণবণিক । তাহারা একজাতীয়

মাকড়সা—একবার তাহাদের ঋণজালে বদ্ধ হইলে আর রক্ষা নাই, ধন প্রাণে বিনষ্ট হইতে হয় ।

মহারাষ্ট্র } মহারাষ্ট্রীদের দলও সামান্য প্রবল নহে । তাহাদের ভাষা দক্ষিণে কৃষ্ণানদী হইতে উত্তরে তাপী পর্য্যন্ত বিস্তৃত । মহারাষ্ট্রীরা বাণিজ্য-ব্যবসায়ে সুদক্ষ নহে । তাহাদের মধ্যে বণিক ব্যবসায়ী দোকানদার অধিক নাই । ইংরাজ অধিকারের পূর্বে তাহাদের যে শৌর্য্য বীর্য্য রাজনীতিকুশলতা দৃষ্ট হইত এক্ষণে তাহা বিলুপ্তপ্রায় হইয়াছে । মফঃস্বলে অনেকে মেম-পালন ও কৃষিকার্য্যে রত—নাগরিকদের মধ্যে যাহারা ভদ্রলোক তাহারা কেরাণিগিরি ও আইন ব্যবসায়ে নিযুক্ত—ছোট লোকেরা অনেকে সইস কোচমান । এদেশের পূর্ব বীরত্ব অন্তর্মিত হইয়াছে । শিবাজীর সে মাওলী সেনার বংশ এক্ষণে কোথায় ? সমস্ত ভারতের ত্রাসদায়ক সাহসী বর্গীরা এক্ষণে কৃষকের হলধারণ করিয়া দীনহীন ভাবে যথাকথঞ্চিৎ দিনপাত করিতেছে । এ অবস্থা ব্রিটিস শাসনের অব্যর্থ ফল । এই সুগভীর শান্তির মধ্যে সেই সমস্ত বীরপুরুষদের দাঁড়াইবার স্থান নাই—আইনের বলে তাহারা নিরস্ত্র ; শান্তিভঙ্গকারীদের গতি মাজিস্ট্রেটের কোর্ট অথবা জেলখানা । এইরূপ নির্বীর্য্যতা ইংরাজ রাজপুরুষদিগের প্রার্থনীয় বটে ; ইহাতে প্রজা শাসন বিনা ক্রেশে সম্পাদিত হয় । যতদিন ইংরাজ রাজ্য বিদ্যমান ততদিন কোন ভাবনা নাই কিন্তু যদি কখন এমন কাল উপস্থিত হয় যে ইংরাজেরা এদেশ ছাড়িয়া যাইতে উদ্যত—

যদি অন্তর কিস্বা বাহির হইতে এমন কোন বিপদ ঘটে তাহা হইলে আত্মরক্ষায় অসমর্থ এই কোটি কোটি প্রজাপুঞ্জের যে কি দশা হইবে তাহা কল্পনা করিতেও ভয় হয়। যাঁহাদের হস্তে ভারতবর্ষের হিতাহিত সমস্ত নির্ভর তাঁহাদের কি দূরদৃষ্টি দিয়া এ বিষয়ে একটীবার দৃকপাত করা বিধেয় না? এখন হইতে ইহার প্রতিবিধানের উপায় চেষ্টা কি যুক্তিসঙ্গত নয়?

ব্রাহ্মণদের মধ্যে মহারাষ্ট্রী, গুজরাতী, কনোজ, তৈলঙ্গী প্রভৃতি ভিন্ন ভিন্ন জাতির ব্রাহ্মণ দৃষ্টিগোচর হয়। মহারাষ্ট্রী ব্রাহ্মণের, দেশস্থ কোকণস্থ ও কহ্লাড় এই তিন প্রধান শাখা। তাঁহাদের পরস্পর পান ভোজন চলে কিন্তু আদান প্রদান বড় একটা নাই। আগাদের দেশে রাঢ়ী ও বারেন্দ্র শ্রেণীর মধ্যে মেলামেশা যেরূপ প্রার্থনীয় ইহাদের মধ্যে বনিষ্ঠতা বন্ধনও তদ্রূপ এবং সংস্কারকর্তাদের লক্ষ্য ওদিকে দেখা যায়, নিদান কথায় তাঁহারা ঐক্য বন্ধনের আবশ্যকতা স্বীকার করেন। শুনিতে পাই, শঙ্করাচার্য্য ঐ বিষয়ে অনুকূল ব্যবস্থা দিয়াছেন। গুজরাতী ব্রাহ্মণদের মধ্যে নাগর ব্রাহ্মণ সর্বপ্রধান। সেনওয়ারী নামে একজাতীয় ব্রাহ্মণ আছেন, তাঁহারা আপনাদিগকে গোড় ব্রাহ্মণ বলিয়া পরিচয় দেন। যদিও তাঁহারা অন্যান্য ব্রাহ্মণের দেখাদেখি শুদ্ধাচারের তান করিয়া থাকেন তথাপি তাঁহাদের জাতিতে আমিষ ভক্ষণ, বিশেষতঃ মৎস্যাহার নিষিদ্ধ নহে। সম্ভবতঃ তাঁহারা বাঙ্গালা দেশ হইতে এদেশে আসিয়া পুরুষানুক্রমে বাস করিতেছেন। উচ্চ শ্রেণীর ব্রাহ্মণেরা সেনাইকে

আমিষভোজী আচারহীন বলিয়া অবজ্ঞা করে—তাহাদের চক্ষে সেনই ব্রাহ্মণ ব্রাহ্মণই নয়। আমার একটা সেনই বন্ধু মফস্বলের কোন হাইস্কুলের প্রধান শিক্ষক, সে দিন তাঁহার সহিত আমার এ বিষয়ে কথা হইতেছিল। তিনি বলিলেন, “এ অঞ্চলে আমার স্বজাতীয় লোক কেহই নাই, এক প্রকার নির্বাসন যন্ত্রণা ভোগ করিতেছি। কখন কখন কোন ব্রাহ্মণের বাটীতে নিমন্ত্রণ হয় কিন্তু দেখিলাম তাহাদের সঙ্গে আমাদের মেলামেশা সম্ভবে না। ব্রাহ্মণ মহিলারা আমার স্ত্রীকে দূরে দূরে রাখিতে চেষ্টা করে যেন স্পর্শেও মহা দোষ। ভোজনের সময় আমাকে সমান পংক্তিতে বসিতে দেয় না—আমার স্বতন্ত্র আসন—স্বতন্ত্র বাসন হইতে পরিবেশন এই সকল দেখিয়া আমি আর থাকিতে পারিলাম না। নিমন্ত্রণে ডাকিয়া এইরূপ অপমান করা ইত্যাদি দুই এক কথা বন্ধুকে খুব শুনাইয়া দিলাম। সেই অবধি প্রতিজ্ঞা করিয়াছি বামন বাড়ীতে আর নিমন্ত্রণ খাওয়া নয়।” এই এক উদাহরণ হইতে এদেশে জাতি ভেদের কঠোর নিয়ম বিলক্ষণ উপলব্ধি করা যায়।

ব্রাহ্মণ, কায়স্থ ও শূদ্র জাতির বিবরণ ক্রমান্বয়ে বলিতে গেলে অনেক কথা বলা আবশ্যক তাহার স্থানও নাই সময়ও নাই। এই স্থলে দাক্ষিণাত্যের লিঙ্গায়ৎ জাতির উল্লেখ করিয়া লিঙ্গায়ৎ} এ ভাগ সমাপ্ত করা যাক। লিঙ্গায়তেরা শিব-উপাসক কিন্তু সাধারণ হিন্দুসমাজ বহির্ভূত, বৈদিক অনুষ্ঠান-

বিরহিত স্বতন্ত্র সম্প্রদায়। তাহারা স্ত্রী পুরুষ সকলেই গলদেশে শিবলিঙ্গ ধারণ করে তাহা হইতে তাহাদের নাম লিঙ্গায়ৎ। শিব ও শিবের পরিবারস্থ পার্ৱতী গণপতি তাহাদের উপাস্য দেবতা ও শিবের বাহন নন্দীর উপর তাহাদের প্রগাঢ় ভক্তি। তাহাদের আদিগুরু নাম বৃষভ * (বসন্তা বৃষভের অপভ্রংশ) লিঙ্গায়তেরা তাঁহাকে নন্দীর অবতার বলিয়া বিশ্বাস করে। তিনি বিজাপুর অঞ্চলে একটি শৈব ব্রাহ্মণের বংশে জন্মগ্রহণ করেন ও ১১৬৮ খৃষ্টাব্দে মৃত্যুমুখে পতিত হন। তাঁহার পিতা মাতা অত্যন্ত শিবপরায়ণ ছিলেন। তাঁহাদের শিবভক্তির পুরস্কার স্বরূপ শিববাহন নন্দী তাঁহাদের পুত্র রূপে জন্মগ্রহণ করেন। বাসব (বৃষভ) নামে পুত্রের নামকরণ হইল। কথিত আছে যে উপনয়নের সময় বালক বাসব গায়ত্রী মন্ত্র পাঠ করিয়া উপবীত ধারণ করিতে কোন মতেই স্বীকৃত হইলেন না—বলিলেন ঈশ্বর ভিন্ন আমার কোন গুরু নাই। এই অপরাধে পিতা তাঁহাকে গৃহ হইতে বহিস্কৃত করিয়া দেন। বাসব পলায়ন করিয়া বিজ্জল রাজার শরণাপন্ন হন। বিজ্জলের রাজধানী কল্যাণ। তথায় বাসবের এক মাতুল পুলিষাধ্যক্ষ ছিলেন তাঁহার বাটী গিয়া রহিলেন এবং তাঁহাকে মুরব্বি

* এই নামের নানারূপ দৃষ্ট হয়। বাঙ্গলায় লিখিতে গেলে বাসব লেখাই সহজ, অক্ষয় বাবুর সম্প্রদায় পুস্তকে তাহাই আছে কিন্তু মনে রাখা উচিত যে এ শব্দ ‘বসু’ মূলক নহে, “বৃষভ” নামের অপভ্রংশ মাত্র। কানাড়ী ভাষায় বৃষভকে “বসব” বলে।

ধরিয়া সরকারী চাকরী ও ধন সম্পত্তি লাভ করিলেন। পরে তাঁহার উপার্জিত বিত্ত দান ধর্ম্মে ব্যয় করিয়া লোকের প্রিয়পাত্র হইয়া উঠিলেন। যখন তাঁহার খ্যাতি প্রতিপত্তি দৃঢ়প্রতিষ্ঠ হইল তখন জৈন স্মার্ত্ত বৈষ্ণব ধর্ম্মের বিরুদ্ধে তাঁহার নূতন মত প্রচার আরম্ভ করিলেন। লিঙ্গোপাসনা—শোচাশোচ অবমাননা—বেদ ব্রাহ্মণ নিন্দা—স্ত্রী-পুরুষের সমান অধিকার ইত্যাদি উপদেশ সেই মতের অঙ্গীভূত। ক্রমে তিনি জৈন ও অপর পন্থী লোকদের বিদ্রোহভাজন হইয়া উঠিলেন। তাহার। তাঁহার বিপক্ষে রাজার নিকট অভিযোগ করিল। রাজার কোপানলে পড়িয়া অবশেষে তাঁহাকে কল্যাণ ছাড়িয়া পলাইতে হইল। কিন্তু তাঁহাকে নির্যাতন করিতে গিয়া রাজা স্বয়ং প্রাণ হারাইলেন। বাসবের অভিসম্পাতে কল্যাণ নগরের এমন দুর্দশা হইল যে রাত্রে কুক্কটধ্বনি, দিবসে শৃগাল নাদ, বাটিকা গ্রহণ ভূমিকম্প প্রভৃতি উৎপাতের আর অবধি রহিল না, প্রজারা শোক সন্তাপে মুহমান। পরিশেষে বাসবের শিষ্য-কর্ত্তক রাজা নিজ প্রাসাদেই নিহত হন। লিঙ্গায়ৎ গ্রন্থে এই বলে, জৈন লেখ্য রাজ-হত্যার বিবরণ স্বতন্ত্র। সে যাহা হউক এই গল্প হইতে বাসবের প্রতাপ প্রভুত্বের প্রমাণ বিলক্ষণ উপলব্ধি হয়। বাসব কল্যাণ ছাড়িয়া কৃষ্ণা ও মলপ্রভার সঙ্গম-স্থল সঙ্গমেশ্বরে বাস করিতেছিলেন সেখানেই তাঁহার মৃত্যু হয়। তাঁহার জীবনের কার্য্য শেষ হইলে তিনি মুক্তিলাভের জন্য শিবের আরাধনা করিলেন, শিবপার্বতী লিঙ্গ হইতে সশরীরে

বাহির হইয়া তাঁহাকে লইয়া অন্তর্ধান হইলেন ; আকাশ হইতে পুষ্প বৃষ্টি বর্ষণ হইল আর তাঁহাকে দেখা গেল না।

বৃষভ পুরাণ নামক একখানি পুরাণে বাসবের চরিত্র বর্ণনা আছে। এই পুরাণ লিঙ্গায়ংদিগের ধর্মগ্রন্থ। এই পুরাণের মতে জাতিভেদ, প্রায়শ্চিত্ত, তীর্থভ্রমণ, ব্রাহ্মণ ভোজন ও উপবাস, শৌচাশৌচ, অন্ত্যেষ্টিক্রিয়ার আবশ্যিকতা, স্ত্রীলোকদের অপদস্থতা প্রভৃতি সাধারণ হিন্দুধর্মের বিধি ও উপদেশ ভ্রমাত্মক বলিয়া পরিত্যক্ত। কিন্তু ধর্মের উপদেশ যতই উচ্চ হউক না কেন, তাহা অনুষ্ঠানে পরিণত বলিয়া বোধ হয় না। ফলে এই সকল উপদেশের বিপরীত আচরণ দৃষ্ট হয়। হিন্দুদের মত সেই জাতিভেদ, সেই ক্রিয়াকাণ্ড, সেই তীর্থভ্রমণ—সেই স্ত্রীপুরুষের ভিন্নাধিকার লিঙ্গায়ং সম্প্রদায়ে প্রবিষ্ট হইয়াছে। একমাত্র শিবের পূজার উপরে অন্যান্য দেব দেবী ও সাধু ভক্তের পূজা স্থান পাইয়াছে।

লিঙ্গায়ং পুরোহিতের নাম জঙ্গম। জঙ্গমের মধ্যে গৃহস্থ ও বিরক্ত দুই শ্রেণী। গৃহস্থ জঙ্গম বিবাহ করে, বিরক্ত জঙ্গম অবিবাহিত। লিঙ্গায়ংদের শবদাহন প্রথা নাই—গোর দেওয়া তাহাদের রীতি। মৃত্যু তাহাদের নিকট ভয়ের বস্তু নহে। মৃত্যুতে তাহাদের অশৌচ হয় না। প্রত্যুতঃ মৃত্যুর সোপান হইতে জীবাত্মা কৈলাস সদনে অধিরোহণ করে এই বিশ্বাস বশতঃ মৃত্যুতে তাহাদের অভিনন্দন। লিঙ্গায়ং মৃত্যুগৃহে অদ্ভুত দৃশ্য দর্শন করা যায়। একদিকে বিধবার ক্রন্দনধ্বনি—

অন্য দিকে বাদ্য সমারোহে জঙ্গমদের ভোজ লাগিয়া গিয়াছে । মৃত্যুর পর দেহ পুষ্প চন্দন বসন ভূষণে সজ্জিত হইয়া বিমানে করিয়া সমাধি স্থলে সমানীত হয় । সম্মুখে বাদ্যের ঘটা, পশ্চাতে শবযাত্রী চলিয়াছে । পুরোহিতদিগের এমনি প্রভুত্ব যে গুরুর পাদোদক মৃতদেহের উপর সিঞ্চিত হয় ও শিবের প্রতি তাঁহার আজ্ঞাপত্র দেহোপরি সংলগ্ন হয় । সে পত্র প্রাপ্তি মাত্র মহাদেব জীবাত্মাকে নিজ নিকেতনে সাদরে ডাকিয়া লইবেন এই বিশ্বাস । সমাধি স্থলে পুরোহিতেরা উপস্থিত থাকিয়া আত্মার সদগতি সাধনের বিহিত উপায় যোজনা করিতে থাকেন ।

ভারতবর্ষের দক্ষিণ পশ্চিম স্থিত কর্ণাট প্রদেশে এই সম্প্রদায় ক্রমশঃ প্রাদুর্ভূত হইয়া মহারাষ্ট্র গুজরাত ও অন্যান্য দেশে বিস্তৃত হইয়া পড়িয়াছে ।

মুসলমান } বোম্বাই বাসীর পঞ্চমাংশ মুসলমান । মুসলমানদের প্রধান দুই শ্রেণী—সুন্নী ও সিয়া । মহম্মদের উত্তরাধিকারী কালিফদের লইয়া এই দুই সম্প্রদায়ের মতভেদ । সুন্নী মুসলমানেরা আবুবকর, ওমার প্রভৃতি পরম্পরাগত ইমামগণের প্রতি বিশ্বাস ও ভক্তি স্থাপন করে । সিয়া মুসলমানদের বিশ্বাস এই যে, মহম্মদের জামাতা—তাঁহার প্রিয়তম ছহিতা ফতেমার স্বামী যে আলী তিনিই তাঁহার সিংহাসনাধিকারী যথার্থ ইমাম । আলির অভাগা পুত্রদ্বয় হাসেন হোসেন শত্রুহস্তে নিহত হয়, এই ঘটনা স্মরণ করিয়া মহরমের সময় সিয়া মুসলমানেরা বক্ষাঘাত ও আর্তনাদ দ্বারা হৃদয়-বিদারক শোক প্রকাশ করিয়া

থাকে। ঐ উপলক্ষে বিরুদ্ধ মতাবলম্বী স্ত্রীদিগের উল্লাস ও অভিনন্দন। তুর্ক ও আরবজাতি প্রধানতঃ স্ত্রী মুসলমান, পারসীকেরা প্রায় সিয়া সম্প্রদায়ী। বোম্বায়ে সিয়া মুসলমান-দের সংখ্যা সম্ভবতঃ অধিক।

বোম্বাইবাসী মুসলমান অন্যতর প্রণালী অনুসারে শ্রেণীবদ্ধ হইতে পারে—দেশী ও বিদেশী মুসলমান। যাহাদের আসলে হিন্দুকুলে জন্ম ও যাহাদের পূর্বপুরুষেরা স্বেচ্ছাক্রমে অথবা বলপূর্বক মুসলমান ধর্ম স্বীকার করিয়াছে তাহাদের দেশী মুসলমান বলা যাইতে পারে—তদ্বিন্ন আর সকলে বিদেশী শব্দের বাচ্য। এই সমস্ত মুসলমান জাতির মধ্যে পরস্পর বিবাহ সম্বন্ধ হইয়া এক্ষণে যদিও মিশ্র জাতিই অধিক দৃষ্ট হয় তথাপি তন্মধ্যে কতকগুলি সম্প্রদায় অবিমিশ্র থাকিয়া এখনো পর্যন্ত স্বতন্ত্রতা রক্ষা করিয়া আসিতেছে। যথা কোঙ্কনী মুসলমান, দক্ষিণী মুসলমান, কচ্ছী, মেমন ইত্যাদি। বোহরা বলিয়া একজাতীয় মুসলমান যাহারা “হকর”দের মত দ্বারে দ্বারে জিনিস বেচিয়া বেড়ায় তাহাদের অধিকাংশ মূল গুজরাতী হিন্দুবংশীয়, একাদশ শতাব্দীতে মুসলমান ধর্মে দীক্ষিত হইয়াছে। তাহারা সিয়া সম্প্রদায়ী। তাহাদের প্রধান আবাস স্থান সুরাট ও সুরাটের মুল্লা সাহেব তাহাদের ধর্মবাজক। তাহাদের ভাষা গুজরাতী। বোরারা অত্যন্ত কাজের লোক—এমন স্থান নাই যেখানে তাহাদের গতি নাই। এমন জিনিস নাই যা তাহাদের নিকটে পাওয়া যায় না। দিল্লীর সোনা রূপার

গহনা—কাশ্মীরের সাল—রামপুর চাদর—চাকাই মলমল—
 বোম্বাই কচ্ছ কাশ্মীরের শিল্প ও কারুকার্য, চীন ও ইউ-
 রোপের পশম ও রেসমের কাপড় আরো কত রকম জিনিস
 এই সকল ভ্রমণকারী বোরার বোচকার মধ্যে গচ্ছিত, তাহার
 ঠিকানা নাই। কিন্তু ক্রেতাদিগকে একটী বিষয়ে সাবধান
 থাকিতে হয়। বোরার কোন জিনিসের নিয়মিত দরদাম
 নাই—খরিদদার বুঝিয়া দর ডাকিয়া বসে ও এতগুণ বেশী
 ডাকা হয় যে হাজার কমাইলেও তাহার বিলক্ষণ লাভ হাতে
 থাকে। ইংরাজ মহিলা বোরার প্রধান খদ্দের। বোম্বায়ে
 দেখিবে মেম সাহেবের দরজায় দোকান খুলিয়া বোরাঙ্গী ধন্য
 দিয়া বসিয়া আছেন।

খোজা নামক আর একটী সম্প্রদায় আছে তাহারাও হিন্দু-
 মুসলমান। খোরাসান হইতে সমাগত পীর সদরুদ্দীন কর্তৃক
 তাহাদের পূর্বপুরুষগণ চারি শত বৎসর পূর্বে মুসলমান ধর্মে
 দীক্ষিত হয়। যদিও খোজারা আপনাদিগকে মুসলমান বলিয়া
 পরিচয় দেয় কিন্তু তাহাদের আচার ব্যবহার ও ধর্ম্মানুষ্ঠান হিন্দু
 ও মুসলমান উভয় ধর্ম্মমিশ্রিত। কাজীরা তাহাদের উদ্বাহক্ৰিয়া
 নির্বাহ করিয়া দেয় বটে কিন্তু অনেক বিষয়ে ব্রাহ্মণ
 পণ্ডিতের ব্যবস্থা গ্রহণ করা হইয়া থাকে। সন্তান ভূমিষ্ঠ
 হইলে পর হিন্দুমতানুসারে জাতক্ৰিয়ার অনুষ্ঠান ও মুমূর্ষু
 ব্যক্তির নিকট কোরাণের কিয়দংশ ও দশাবতারের উপা-
 খ্যান উভয়ই পঠিত হয়। মৃত্যু ঘটিলে পর হিন্দু ও মুসল-

মান উভয় শাস্ত্রানুযায়ী অন্ত্যেষ্টিক্রিয়াদি সম্পন্ন হইয়া থাকে। খোজারা হিন্দু ও মুসলমান উভয় তীর্থই পর্য্যটন করে ও হিন্দুশাস্ত্রোক্ত দায়াধিকার প্রভৃতি ব্যবহার প্রণালী অবলম্বন করিয়া চলে। মহম্মদের জামাতা আলীর প্রতি তাহাদের বিশেষ ভক্তি। আলী কঙ্কী অবতার হইয়া ভূমণ্ডলে অবতীর্ণ হইয়াছিলেন এই তাহাদের বিশ্বাস। পারস্য রাজবংশীয় আগা খাঁ খোজাদের ধর্মগুরু ও আলির প্রতিনিধি স্বরূপে পূজিত। আগা-খানের পুত্র ও উত্তরাধিকারী আগাআলী সা খোজামণ্ডলীকে শোকসাগরে ভাসাইয়া * সম্প্রতি মৃত্যুমুখে পতিত হইয়াছেন।

মুসলমানদের বিবরণ বলিতে গিয়া তাহাদের ইদানীন্তন শোচনীয় দৈন্য দশার উল্লেখ না করিয়া থাকা যায় না। সে দিন যাঁহার। সর্দার জাহাঙ্গীরদার সুবেদার সৈন্যাধ্যক্ষ ছিলেন এই-ক্ষণে তাঁহার। অধিকাংশ পেয়াদা ও খানসামার কাজে দীনহীন ভাবে জীবন-যাত্রা নির্বাহ করিতেছেন। যাঁহাদের সধর্ম্মীগণ পুরাকালে কাব্য সাহিত্য বিজ্ঞান ক্ষেত্রে অক্ষয় কীর্তি লাভ করিয়া গিয়াছেন, তাঁহাদের বিদ্যা শিক্ষায় মনোযোগ নাই; কোরাণের দুই পাতা উন্টাইয়াই আপনাদিগকে সর্ব্বশাস্ত্র-বিশারদ মনে করেন। অনেকে নিষ্কর্মা উদ্যোগশূন্য; অন্যেরা নির্ধন, অন্নচিন্তায় আকুল। যাঁহার। উহার মধ্যে শ্রীমন্ত তাঁহার। অর্থের সদ্যবহার জানেন না—নিষ্কৃষ্ট আমোদ প্রমোদে প্রচুর

অর্থ ব্যয় করিয়া প্রায়ই ঋণজালে আবদ্ধ হইয়া পড়েন । এই জাতির উদ্ধারের উপায় কি ? তাহাদের দলপতিদিগকে মধ্যে মধ্যে গবর্ণমেন্টের নিকট কাতরস্বরে ক্রন্দন করিতে দেখা যায় কিন্তু গবর্ণমেন্ট যতদূর করিবার তাহা করিতেছেন । আমি বলি যে হে ভ্রাতৃগণ ! তোমাদের নিজের হাতেই তোমাদের মুক্তি । তোমরা আপনাদিগকে আপনারা না সামলাইলে গবর্ণমেন্টের সাহায্য প্রার্থনা বৃথা । তোমরা সরকারী চাকরী লাভের জন্য উৎসুক কিন্তু বিদ্যা ও যোগ্যতা ব্যতীত সরকারী চাকরী আদায় করা যায় না । কুলমর্যাদা ও সুপারিসের বলে এখন কিছুই হয় না । অতএব তোমাদের পুত্রদিগকে বিদ্যা-ধ্যয়নে নিযুক্ত কর । যদি উচ্চ শ্রেণীর পদাকাঙ্ক্ষা থাকে, যদি তোমাদের নষ্ট সম্পত্তির কিয়দংশ ফিরিয়া পাইবার বাসনা থাকে তবে উচ্চ শিক্ষা উপার্জনে যত্নশীল হও—ব্রিটিশ রাজ্যে যে উন্নতির পথ হিন্দু মুসলমান সকল জাতির জন্যই উন্মুক্ত রহিয়াছে তাহা অবলম্বন কর—অতীত সিদ্ধির আর উপায়ান্তর নাই ।

পারসী } কিন্তু বোম্বায়ে যে জাতির বিশেষ প্রভাব লক্ষিত হয়, যাহার অধিষ্ঠানে বোম্বায়ে বোম্বায়ত্ব বলিলেও বলা যায় সে পারসী জাতি । এ জাতির সংখ্যা সামান্য, সমস্ত হিন্দুস্থানে মিলিয়া ১ লক্ষ হয় কিনা সন্দেহ কিন্তু ইহাঁদের অসামান্য উদ্যম অধ্যবসায় কার্যনিষ্ঠতা ও বদান্যতা গুণে ইহাঁরা এদেশীয় জনপদের অগ্রগণ্য তাহার সন্দেহ নাই । পারসীরা যেরূপে এদেশে প্রবেশ

লাভ করিল তাহার বৃত্তান্ত এই । সপ্তম শতাব্দীতে পারস্য দেশ মুসলমান জাতি কর্তৃক বিজিত ও তাহার শেষ রাজা রাজ্যভ্রষ্ট হইলে পর অবশিষ্ট অগ্নি-উপাসক ধর্ম্মনাশভয়ে দেশত্যাগী হইয়া বন জঙ্গল পাহাড় পর্বতের আশ্রয় গ্রহণ করিলেন । এই-রূপে কতক বৎসর অতি কষ্টে অতিবাহিত করিয়া তাঁহাদের এক দল লোক ভারতবর্ষে কাঠেওয়াড় প্রান্তের দিউ নামক বন্দরে আসিয়া অবতীর্ণ হন । তথায় তাঁহারা উনবিংশতি বৎসর যাপন করিয়া জনৈক পারসী জ্যোতিষীর পরামর্শে সেস্থান হইতে গুজরাতে প্রস্থান করেন । এই বাত্রীদল সমুদ্রের উপর প্রবল ঝড় তুফানে আক্রান্ত হইয়া পরিশেষে গুজরাটের অন্তর্গত সঞ্জান নামক স্থানে নির্বিশেষে উপনীত হইলেন । সেই প্রদেশ তখন যাদু রাণা নামে এক ক্ষত্রিয় রাজার শাসনাধীন ছিল । যখন পারসীরা যাদু রাণার শরণ প্রার্থনা করিলেন তখন রাজা তাঁহাদের রীতি নীতি ধর্ম্মাদি জানিবার ইচ্ছা প্রকাশ করাতে তাঁহারা নিজ জাতি-বৃত্তান্ত ষোড়শ সংস্কৃত শ্লোকে সন্নিবিষ্ট করিয়া রাজার কর্ণগোচর করেন । এই সকল শ্লোক হইতে পারসীদের আচার ব্যবহার বিশ্বাস ও ধর্ম্ম বিষয়ের কতক আভাস পাওয়া যায় । দেখিবে তাঁহারা “গৌরা ধীরাঃ সুরীরা বহুবল নিল-য়াস্তে বহুং পারসীকাঃ” বলিয়া কেমন গর্ব্বের সহিত আপনাদের পরিচয় দিয়াছেন । ইহার কতিপয় শ্লোক নিম্নে উদ্ধৃত হইল ।

১। স্বর্য্যং ধ্যায়ন্তি যে বৈ হতবহমনিলা ভূমিকাকশমাদাং

তোয়েশং পঞ্চতন্ত্বং ত্রিভুবনসদনং ন্যায়মন্ত্রে ত্রিসন্ধ্যং

শ্রীহোর্মজ্জদং সুরেশং বহু গুণ গরিমাণস্তমেকং রূপালং
গৌরা ধীরাঃ স্রবীরা বহুবলনিলয়াস্তে বয়ং পারসীকাঃ ।

আমরা সূর্য্য, অগ্নি, অনিল, জল স্থল আকাশ পঞ্চভূত ও
বহুগুণযুক্ত সুরেশ হোর্মজ্জদকে ন্যায় মন্ত্র দ্বারা ত্রিসন্ধ্যা ধ্যান
করি । আমরা সেই গৌর ধীর স্রবীর বহুবলনিলয় পারসীক ।

৩। রম্যং স্বাদ্বে স্রবস্তং কবচ গুণময়ং কঙ্কং যে ধরন্তি
যুক্তামূর্ণাং স্রপুষ্ঠামহিনুখমনিতাং বন্ধনং সর্ষকট্যাং
মূর্ণাং চিত্রবষ্ট্রৈঃ পটয়গলতলৈ শ্ছাদয়ন্তীহ নিত্যং
গৌরা ধীরাঃ স্রবীরা বহুবলনিলয়াস্তে বয়ং পারসীকাঃ ।

আমরা স্বদেহে কবচ গুণনয় কঙ্ক, কটিদেশে অহিনুখ রেশ-
মের কটিবন্ধ, মস্তকে পট যুগল চিত্রবস্ত্র ধারণ করি; আমরা সেই
গৌর ধীর স্রবীর বহুবলনিলয় পারসীক ।

১৩। উর্ণাক্রপাং স্রবর্ণাং স্রললিতকলদাং জংঘবীমানপুণ্যাং
নেষাণাং চৈব পুংসাং ঘনগুণরচিতাং হেমবর্ণাঞ্চ রম্যাং
নাগাকারাং বিশালাং গুরুজনবচনৈর্ মেথলাং ধারয়ন্তি
শাস্ত্রোক্তাং শ্রোণিদেবে চ্যরুতর জঘনে গৌরধীরাঃ স্রবীরাঃ ॥

আমরা গুরুজন বচনে শ্রোণি দেশে নাগাকার স্রললিত
কলদা স্রবর্ণা উর্ণা পুণ্য মেথলা ধারণ করি ।

১০। বেষ্ট্রাভির্গৈব সঙ্গং পিতৃসমশুচিতা শ্রাদ্ধকালে হৃষিচিন্তা
নোমাংসং যজ্ঞবাহুং স্বপিতি নহি ধরায়ামহো পুস্পনারী
বৈবাহে লগ্নশুদ্ধি শুশুচি নহি মতা তর্কহীনা পুরন্দ্রী
যেষামাচার এবং প্রতিদিন মুদিতো গৌরধীরাঃ স্রবীরাঃ ॥

বেষ্ট্রাসঙ্গ বর্জন, পিতৃসম শুচিতা, শ্রাদ্ধকালে অগ্নিচিন্তা, যজ্ঞ

মাংস ভোজন, ঋতুকালে নারীর ধরাশয়্যা বর্জন, বিবাহে লগ্ন-
শুদ্ধি, ভর্তৃহীনা পুরস্ক্রী শুচিমতা এই আমাদের আচার।

১১! চত্বারিংশদিনানি প্রচরতি ন বধু পাককার্য্যে প্রসূতা
মৌনাত্যা স্বল্পনিদ্রা জপবিধিনিরতা স্নানসূর্য্যার্চনেষু
ধ্যায়ন্তে চৈব নিত্যং মরুদনলধরাতোয়চন্দ্রার্কযজ্ঞং
যেষাং বর্ণো ন হীনঃ সততমভয়তো গৌরধীরাঃ সূবীরাঃ ॥

বধু প্রসূত হইলে চল্লিশ দিন পর্য্যন্ত পাককার্য্য হইতে বিরত,
মৌনাত্য, স্বল্পনিদ্রা, স্নান সূর্য্যার্চনা জপবিধি নিরত, মরুৎ অনল
ধরা তোয় চন্দ্রার্ক ধ্যান মগ্ন, সদা অহীনবর্ণ আমরা সেই গৌর-
ধীর সূবীর।

১৬। শ্রীহোর্মজ্জদেজ্যামৃগাঃ সকলবিজয়কৃৎ পুত্রপৌত্রেষু বৃদ্ধি
দাতা শ্রী পাতৃ বোয়ং বহুধনকলকরশ্চতু ক্লেপপাপং
তে সর্পে পারসীকাঃ সতত বিজয়িনঃ শ্রী জয়েচৈব নিতাং
গৌরা ধীরাঃ সূবীরা বহুবলানিলয়াস্তে বয়ং পারসীকাঃ ॥

সেই সকল বিজয়কৃৎ বহুধন ফলদ শ্রী হোর্মজ্জ্ তোমার-
দিগকে রক্ষা করুন ও তোমার পাপ তাপ নাশ করুন ইত্যাদি।

রাজা সন্তুষ্ট হইয়া তাঁহাদিগকে স্বীয় রাজ্যে বাস করিবার
অনুমতি প্রদান করিলেন ও তাঁহাদের বাসযোগ্য একখণ্ড ভূমি
নির্দিষ্ট করিয়া দিলেন। কিন্তু এইরূপ অনুমতি দিবার পূর্বে
তাঁহাদের নিকট হইতে কতকগুলি করার আদায় করিয়া লই-
লেন। যথা

তাঁহারা স্বভাষা ছাড়িয়া দেশভাষা ব্যবহার করিবেন, শস্ত্র

পরিত্যাগ করিবেন, তাঁহাদের স্ত্রীগণ হিন্দু নারীদের বেশ ধারণ করিবে, রাত্রে বিবাহ লগ্ন পরিপালিত হইবে এইরূপ কতকগুলি নিয়ম পালন করিতে তাঁহারা অগত্যা প্রতিশ্রুত হইলেন। অল্প কাল মধ্যে তাঁহাদের অগ্নিমন্দির প্রতিষ্ঠিত হইল। তাঁহাদের যত্ন পরিশ্রমে ও অঞ্চলের শ্রী ফিরিল। বন জঙ্গল পরিষ্কার হইয়া ফলপুষ্পশোভিত উদ্যান, পতিত ভূমি শস্যশালিনী উর্বরা ভূমিতে পরিণত হইল। এই ঘটনার তারিখ বিষয়ে মতভেদ দৃষ্ট হয় কিন্তু তাহা মোটামুটি অষ্টম শতাব্দীর মধ্যভাগ মানিয়া লওয়া যাইতে পারে। সঞ্জানে কিছু কাল বাস করিয়া পারসীরা ক্রমে উত্তর গুজরাটের নওসাদী, ভরুচ, খম্বায়ৎ প্রভৃতি স্থানে ব্যবসাদার ও বাসন্দা রূপে ছড়াইয়া পড়িলেন।

“ ইহার ছয় শত বৎসর পরে আল্লাউদ্দীন বাদসাহের সেনাপতি আলপ্ খাঁ সঞ্জান আক্রমণ করেন। সে সময়ে পারসীদের বীরত্বের পরিচয় পাওয়া যায়। রাণার আদেশক্রমে ১৪০০ কবচধারী অশ্বরোহী পারসী সেনা সজ্জীভূত হইল—আর্দেসীয়ার পারসী তাঁহাদের নেতা। তাঁহাদের বলবিক্রমে প্রথমে মুসলমান সৈন্য বিপর্যস্ত পরাজিত ও তাড়িত হয়। কিন্তু আলপ্ খাঁ সহজে ছাড়িবার পাত্র নন, পর দিবস ভগ্নসেনা একত্র করিয়া পুনরায় যুদ্ধারম্ভ করেন। সেই যুদ্ধে হিন্দুদের পরাজয়। বীর আর্দেসীয়ার বাণাঘাতে হত হইলেন ও সঞ্জান মুসলমানদের হস্তে পতিত হইল। পারসীরা তাঁহাদের সাধের সঞ্জান হইতে নির্বাসিত হইয়া অন্যত্র বাসস্থান অন্বেষণ করিতে

বাধ্য হইলেন। এইক্ষণে সজ্ঞানে একটা মাত্র পারসীরও বসতি নাই—কেবল পারসী শবাগারের ভগ্নাবশেষ তাঁহাদের কীর্তিস্তম্ভ স্বরূপ বিদ্যমান রহিয়াছে।

ইহার পর শতাব্দী পর্য্যন্ত পারসী ইতিহাস সম্বন্ধে বিশেষ কিছুই অগতিগোচর হয় না। ১৪১৯ খৃষ্টাব্দে তাঁহাদের পূতায়ি সজ্ঞানের অগ্নি মন্দির হইতে নওসাড়ীতে স্থানান্তরিত হয়।

১৫৭৮ খৃষ্টাব্দে আকবর বাদসাহের আদেশক্রমে পারসীরা নওসাড়ী হইতে তাঁহাদের কতকজন বিচক্ষণ ধর্ম্মবাজক দিল্লীতে প্রেরণ করেন। তাঁহারা সম্রাটের নিকট পারসী ধর্ম্মের ব্যাখ্যান ও উপদেশ করেন। উদারমতি আকবর তাঁহাদের উপদেশ শ্রবণে সন্তুষ্ট হইয়া পারসী হত্যায়ি রক্ষা করিবার অনুমতি করেন ও পারসী গুরুকে নওসাড়ীর নিকটস্থ ভূমি সম্পত্তি উপহার দেন। কথিত আছে যে সম্রাট পারসী জামা ও কটিবন্ধ পরিধান করিয়া পারসী ধর্ম্মে দীক্ষিত হইয়াছিলেন।

ইউরোপীয় জাতির আবির্ভাবের পর হইতেই পারসীদের উন্নতি ও শ্রীবৃদ্ধির সূত্রপাত বলিতে হইবে। তাঁহারা দালাল ও মধ্যস্থ হইয়া ইউরোপীয় কুটীওয়ালাদের অনেক কার্য্য করিতেন। ইংরাজদের সহিত প্রথম হইতেই তাঁহাদের বিশেষ ঘনিষ্ঠতা বন্ধন হয়। সম্রাটের বাণিজ্য হ্রাসোন্মুখ হইয়া যখন বোম্বাই সহর শির উন্মোলন করিতে আরম্ভ করে তখন পারসীরা বোম্বাইয়ে আসিয়া কেহ বাণিজ্য ব্যবসা, দোকানদার কণ্ট্রাক্ট-দারের কাজ, কেহ বা পোতনির্মাণ কার্য্যে নিযুক্ত হইয়া সুখ্যাতি

লাভ করেন । ব্রিটিশদের রাজ্য বৃদ্ধি ও ব্রিটিশ বণিকদের প্রাদুর্ভাবের সঙ্গে সঙ্গে পারসীদের শ্রীবৃদ্ধি সম্পাদিত হয় ।

প্রাচীন কাল হইতেই পারসীদের ইংরাজ রাজভক্তির পরিচয় পাওয়া যায় । স্মরাটে যখন ইংরাজ বণিকগণ মোগল কর্তৃ-পুরুষদের অত্যাচারে প্রপীড়িত হন তখন রোস্তম মাংক নামক একজন পারসী ইংরাজদের প্রতিনিধি স্বরূপে ঔরঙ্গজীবের রাজ-সভায় উপস্থিত হইয়া বাদসাহের নিকট ইংরাজদের হইয়া দরবার করেন । তাহারও পূর্বে রোস্তমজী দোরাবজী কিরূপে বোম্বাই নগর রক্ষা করিয়াছিলেন তাহার গল্প বলি শুন । ১৬৯২ খৃষ্টাব্দে বোম্বায়ে এক ভয়ানক দুর্ভিক্ষ ও মড়ক উপস্থিত হয় তাহাতে অনেক ইউরোপীয় বাসন্দা ও দুর্গরক্ষিণী সেনা কালগ্রাসে পতিত হইয়াছিল । এই সুযোগে জিজিরার হাবসী নবাব মহতী সেনা সমভিব্যাহারে বোম্বাই সহর আক্রমণ করেন, পূর্বেই এই ঘটনার উল্লেখ করা গিয়াছে । দ্বীপ ও কেল্লা নবাবের হস্তগত হয় । ইংরাজরা এই মড়কের উপদ্রবে এরূপ হীনবল হইয়া পড়িয়া-ছিলেন যে হাবসীদের সঙ্গে পারিয়া উঠেন নাই । এই ঘোর-তর সঙ্কটে রোস্তমজী রোস্তম-সদৃশ বীরত্ব সহকারে অরিদল বিপক্ষে কটিবদ্ধ হইলেন । ধীবর জাতি হইতে সৈন্য সংগ্রহ করিয়া তিনি আক্রমণকারীদের সহিত যুদ্ধ করেন ও তাহা-দিগকে সংগ্রামে পরাস্ত করিয়া তাড়াইয়া দেন । এই জয়-লাভের বৃত্তান্ত শ্রবণ করিয়া স্মরাট কুটির অধ্যক্ষ বোম্বায়ে আসিয়া রাজ্যভার গ্রহণ করিলেন । একজন পারসীর সাহায্যে

বোম্বাই পুরী এক ভয়ানক বিপদ হইতে উদ্ধার পাইল। কেমন অল্প কারণ হইতে গুরুতর কার্য্য উৎপন্ন হয় এ ঘটনা তাহার এক দৃষ্টান্ত স্থল।

পারসীরা অশেষ বিঘ্ন বিপত্তির মধ্যে তাঁহাদের স্বতন্ত্রতা রক্ষা করিয়া আসিয়াছেন। তাঁহাদের সংখ্যা দিন দিন বৃদ্ধি হইতেছে ও তাঁহাদের বাণিজ্যদক্ষতা দানশীলতা ও সার্ব্বজনিক কার্য্যে উৎসাহ বশতঃ তাঁহাদের যশোরব ভারতভূমিতে প্রসারিত হইতেছে।

পারসী ধর্ম্ম } পারসী জাতি সাধারণতঃ অগ্নিউপাসক বলিয়া প্রখ্যাত কিন্তু ঐ সংজ্ঞা তাঁহাদের প্রকৃত সংজ্ঞা বলা যায় না। যে সকল পণ্ডিতেরা পারসী ধর্ম্ম সবিশেষ অনুশীলন করিয়াছেন তাঁহারা বলেন যে পারসীরা বাস্তবিক একেশ্বর উপাসক, অগ্নি সূর্য্যে ঈশ্বরের বিশেষ প্রকাশ দেখিয়া তাঁহারা ঐ দুই পদার্থে শ্রদ্ধা ভক্তি অর্পণ করেন।

জরতোস্ত } পারসীরা জরতোস্তের শিষ্য ও অনুচর বলিয়া আপনাদের পরিচয় দেন। জরতোস্তের জন্মকাল নির্ণয় করা স্বকঠিন। ডাক্তার হোঁগের মতে নিদান তাহা খৃষ্টাব্দের সহস্র বৎসর পূর্ব্বে নির্দিষ্ট করা অসম্ভব নহে। আবার এরূপ দেখা যায় যে জরতোস্ত নামধেয় ছয় জন মহাপুরুষ ভিন্ন ভিন্ন কালে উদয় হইয়াছেন—তাঁহাদের মধ্যে কাহাকে পারসী ধর্ম্ম প্রবর্ত্তক বলিয়া নির্দেশ করা যায়? যতদূর জানা গিয়াছে তাহাতে বলা যাইতে পারে যে এই জরতোস্ত খৃষ্টাব্দের সহস্রাধিক বর্ষ পূর্ব্বে

পারস্য রাজা গুফ্টাস্পের রাজত্ব কালে প্রাদুর্ভূত হন। তাঁহার সময়ে পারসী ধর্ম ঘোরতর পৌত্তলিকতা ও কুসংস্কারে আচ্ছন্ন হইয়াছিল। তিনি তাহা সংশোধনে ব্রতী হইয়া একেশ্বরবাদ প্রচার করেন। তিনি যে সকল ধর্মগ্রন্থ প্রণয়ন করিয়াছেন তাহা প্রাচীন ইরাণী ভাষায় লিখিত ও তাহার নাম অবস্তা। এই সকল গ্রন্থের অধিকাংশ নষ্ট হইয়া গিয়াছে—অবশিষ্ট অল্প-ভাগ পারসীদের নিকটে পাওয়া যায় ও তদন্তর্গত মন্ত্রাবলী তাঁহাদের মুখে শ্রবণ করা যায়।

জরতোস্তের উপদেশ এই, ঈশ্বর একমাত্র সর্বশক্তিমান জগতের স্রষ্টা পাতা সর্বস্বত্বদাতা। তিনি জ্ঞান স্বরূপ জ্যোতির জ্যোতি। তিনি পুণ্যের পুরস্কর্তা পাপের শাস্তা। তাঁহার নাম অহুরমজ্দ্। আশ্চর্য্য এই যে সংস্কৃত ও সংস্কৃতমূলক সমস্ত ভাষায় ঈশ্বরের নাম দিবধাতু (প্রকাশ) হইতে উৎপন্ন—জেন্দ ভাষায় তাহার উণ্টা দেব শব্দে অহুর বুঝায়। ঈশ্বর অর্থে অহুর শব্দের প্রয়োগ। বেদ ও অবস্তার মধ্যে ইন্দ্র মিত্র বৃত্রহা প্রভৃতি কতকগুলি নামের ঐক্য দেখা যায়—সে সকল নাম যে সমান অর্থে ব্যবহৃত তাহা নহে। বেদের দেবতা হয়ত অবস্তায় দানব হইয়া দাঁড়াইয়াছেন। ইন্দ্র যিনি দেবাধিদেব, অবস্তায় তিনি দানবেশ্বর অহ্রিমানের নিচেই গণনীয়। আবার আশ্চর্য্য এই যে ইন্দের অপর মূর্তি বৃত্রস্ন অবস্তায় দেবতার মধ্যে গণ্য। দেব সংখ্যাতেও দুইয়ের চমৎকার সাদৃশ্য প্রত্যক্ষ হয়। বেদের ত্রয়স্ত্রিশৎ দেবের অনুরূপ অবস্তায় তত জন “রতু” প্রধান আছেন যাহার

জরতোস্ত প্রচারিত অহুর মজ্দের সত্য সংরক্ষণে নিযুক্ত। পারসী-
দের জমসেদ (যমক্ষেত) বেদের যমরাজা—উভয়েরই * পিতৃ-
নাম বিবস্বৎ। বেদে যমরাজার যেরূপ বর্ণনা আছে তাহা
পুরাণের কঠোর বিচারকর্তা দণ্ডদাতা মহিষবাহন রুদ্রানন
যমের সঙ্গে কিছুই মেলে না। বেদের যম মানবকুলের আদি
পুরুষ, যিনি মর্ত্য হইতে স্বর্গের পথ আবিষ্কৃত করিয়াছেন যে পথ
দিয়া তাঁহার বংশজেরা সকলেই গমন করে ও গিয়া তাঁর সেই
সুখ রাজ্যে বাস করে। ইরাণীগ্রন্থে আছে যমসেদ সত্যযুগের
রাজা ছিলেন প্রজারা তাঁহার রাজ্যে বিগত-রোগ-শোক পরম
সুখে বাস করিত।

জগতে মঙ্গল অমঙ্গল দুই আদ্যশক্তি বিদ্যমান তাহার।
অহুর মজ্দের অধীনে কার্য্য করিতেছে। মঙ্গল শক্তির নাম
স্পেণ্টো মৈনুয তাহাই জ্যোতি ও সৌন্দর্য্যের আকর, সমুদয়
সুখকারী ও হিতকারী বস্তুর প্রসবিতা। আর অমঙ্গল শক্তি—
আঙ্গ্রে। মৈনুয সকল অমঙ্গলের আকর—ছুঃখ ক্লেশের জন-
য়িতা—পাপ চিন্তার প্রবর্তক। স্পেণ্টো মৈনুয জীবনদাতা,
আঙ্গ্রে। মৈনুয জীবনসংহর্তা—আলোক একের, অন্ধকার
অন্যের প্রতিকৃতি। এ উভয় শক্তি যদিও পরস্পর বিরোধী
কিন্তু দিবা রাত্রের ন্যায় অবিচ্ছিন্ন ও সৃষ্টি সংরক্ষণ কার্য্যে উভ-
য়েই নিযুক্ত।

জরতোস্ত প্রকৃতির শক্তি অথবা পদার্থ বিশেষে দেবত্ব

* Haug's essays on the Parsis.

আরোপ করিয়া তাহার পূজা করিবার বিধান দেন নাই স্ততরাং তাঁহার ধর্ম পৌত্তলিকতা দোষে দূষিত নহে । সূর্য্য সেই জ্যোতির্ময় ঈশ্বরের প্রতিকূপ—অগ্নি সেই পবিত্র স্বরূপের প্রকাশক ও স্মরণচিহ্ন বলিয়া অর্চনীয় । কিন্তু মূলে যাহা উন্নত ও পবিত্র তাহার স্রোত কাল সহকারে কলুষিত হইয়া যায়—পারসী ধর্মের অবস্থাও কতক ঐরূপ । জ্ঞানীদের ধর্ম এক, আর অজ্ঞান লোকেরা চিহ্নকে যথার্থ মনে করিয়া লইয়া সূর্য্যের স্তবে প্রবৃত্ত হয়—অগ্নিমন্দিরে অগ্নিকেই দেবতা রূপে পূজা করে ।

জরতোস্তের গ্রন্থ সকল নীতিগর্ভ উপদেশে পরিপূর্ণ—তাহার সার তিন কথায় ব্যক্ত হইতে পারে ।

„ হুমাতা, হুখতা, হুরক্টা অর্থাৎ মনোবাক্কার্য্যে পবিত্রতা রক্ষা করিবে । *

পারসী ভিন্ন ইহুদী পোর্তুগীস প্রভৃতি আর কতকগুলি জাতি বোম্বায়ে দৃষ্ট হয় তাহাদের বিবরণ লিখিবার আবশ্যক নাই । এ দেশের পোর্তুগীসদের মধ্যে বিদ্যা সম্পৎ সম্পন্ন নামাক্তিত লোক অল্পই । পোর্তুগীস রাজ্যের ভগ্নাবশেষ যে গোওয়া তাহা হইতে অনেক গোওয়ানীস বোম্বায়ে আসিয়া বাস করিতেছে—ইউরোপীয়দিগের রাঁধুনি ও বট্লর (খান্সামা) এই দল হইতে সংগৃহীত ।

ষষ্ঠ পরিচ্ছেদ ।

পুরাণী ।

অনেকে আগাকে জিজ্ঞাসা করেন বোম্বাই ভাল কি কলিকাতা ভাল সহর । এ প্রশ্নের উত্তর দেওয়া সহজ নহে । কতক বিষয়ে কলিকাতা ভাল—অন্য বিষয়ে আবার বোম্বাইয়ের প্রাধান্য স্বীকার করিতে হয় ।

প্রথমতঃ আবহাওয়া । এ বিষয়ে বম্বের নিকট কলিকাতার আবহাওয়া } হার মানিতে হয় । বঙ্গোপসাগরের প্রচণ্ড বাত্যা হইতে বোম্বাই সুরক্ষিত । এখানে এমন সকল প্রকৃতির উপদ্রব নাই যাহার বলে বাড়ীঘর চূর্ণ, গাছ পালা লগু ভগু ও কাকের মৃত দেহে মেদিনী আচ্ছন্ন হইয়া যায় । বোম্বাইয়ের ঘর বাড়ী সচরাচর যে লঘু উপকরণে নিৰ্ম্মিত এরূপ উপদ্রব উপস্থিত হইলে তাহার অর্ধেক ভূমিসাৎ হয় সন্দেহ নাই । গ্রীষ্মকালে বোম্বাই অপেক্ষাকৃত ঠাণ্ডা । বৈশাখ জ্যৈষ্ঠ মাসে তোমাদের ওখানে উত্তাপের পরাকাষ্ঠা কিন্তু বোম্বাইয়ে সমুদ্র-বায়ুর গুণে উত্তাপের অনেক উপশম হয় । নবেম্বর হইতে মার্চ পর্য্যন্ত শীত ঋতুর প্রাচুর্য্যব । সে সময়ে উত্তর পূর্ব হইতে শীতল বায়ু বহিতে থাকে । তখন বোম্বাই প্রবাস অতীব সুখজনক । রাত্রি শীতল—দিবস অনতি-উষ্ণ ও প্রত্যহ দিবাবসানে সমুদ্র হইতে শীতল বায়ু আসিয়া মৃদু হিল্লোলে বহমান হয় । আকাশ স্বচ্ছ ও নিরভ্র, বৃষ্টির নাম গন্ধও নাই । জুন মাসের প্রারম্ভে দক্ষিণ

পশ্চিম বায়ু বৃষ্টি সঙ্গে করিয়া আনে—জুন হইতে সেপ্টেম্বর ধরিয়া বর্ষার রাজত্ব কাল। সম্বৎসর গড়ে ৮০ ইঞ্চি বৃষ্টি পড়ে। এই প্রচুর বর্ষণ ও সাগর-সান্নিধ্য বশত বোম্বাই পুরী কখনই উষ্ণাতিশয্যে দগ্ধ হয় না। গ্রীষ্মের উত্তাপ কোন সময়েই অসহ্য বোধ হয় না, এমন কি গ্রীষ্ম ঋতুতে পাখার সাহায্য না হইলেও চলে। বর্ষার বারিধারা যদিও প্রচুর কিন্তু এরূপ অবিশ্রান্ত মুসলধারে বর্ষিত হয় না যে তাহার জ্বালায় গৃহ রুদ্ধ রাখিয়া তিতিবিরক্ত হইতে হয়—ইন্দ্রদেব মধ্যে মধ্যে অনুগ্রহ করিয়া ধনুঃ সংযত করেন, চলা ফেরার বড় একটা ব্যাঘাত হয় না। সেপ্টেম্বরের শেষে ঝড় বৃষ্টি কমিয়া যায়—অক্টোবরে একে-বারেই বর্ষার অবসান। আকাশ পুনরায় নির্মল ভাব ধারণ করে—ধরণী শুষ্ক—প্রকৃতির শোভন হরিত বেশ দেখিতে না দেখিতেই রূপান্তর হইয়া যায়। ক্রমে শীত ঋতুর আগমন। শীতকালই সকল ঋতুর সেরা—তখন লোকেরা অন্যান্য স্থান হইতে বোম্বাই আসিয়া আড্ডা করে। গবর্নর সাহেব ও গবর্ন-মেন্টের প্রধান কর্মচারীগণ নবেম্বর হইতে মার্চ পর্য্যন্ত বোম্বাই অধিকার করিয়া বসেন। এই সকল কর্তৃপুরুষেরা ঋতুর সঙ্গে সঙ্গে বাছিয়া বাছিয়া স্থান পরিবর্তন করেন। গ্রীষ্মকালে মাথেরান কিম্বা মহাবলেশ্বর পাহাড়—বর্ষার সময় পুণা আর শীতকালে বোম্বাই এইরূপ যখন যেখানে সুখ স্বাস্থ্য স্বচ্ছন্দতা সেই-খানে তাঁহারা দিব্য আরামে কালাতিপাত করেন। নবেম্বর হইতে চার মাস বোম্বাই সহরে গবর্নমেন্ট বিরাজিত। এ

প্রেসিডেন্সির এক সুবিধা এই যে ভাল ভাল স্বাস্থ্যকর স্থান হাতের কাছেই অবস্থিত, রাজধানী হইতে ছু এক দিনের ব্যবধান মাত্র। পুণা বোম্বাই হইতে ৫, ৬ ঘণ্টার রেলের পথ, মহাবলেশ্বর পুণা হইতে এক রাত্রের মধ্যে পৌঁছান যায়। কলিকাতা হইতে সিমলার পাহাড় যেমন দূর পাল্লা এখানে সেরূপ নয়। কর্তৃপুরুষদের দৃষ্টান্তে অন্যান্য লোকও পার্বত্য-ভ্রমে গ্রীষ্মকাল ও পুণ্য-তীর্থে বর্ষার চতুর্মাস যাপন করেন। বম্বের নীচেই পুণা এ অঞ্চলের রাজধানী।

দ্বিতীয়তঃ, বম্বের প্রকৃতির শোভা প্রশংসনীয়। প্রাকৃতিক প্রকৃতিশোভা } সৌন্দর্য্যের যে দুই প্রধান উপকরণ পাহাড় ও সমুদ্র, তাহা বোম্বায়ে বিদ্যমান। একদিকে মালাবার শৈল, অন্যদিকে সমুদ্রতীরস্থিত বন্দর-নিকর। সমুদ্রতটবর্তী যে সকল স্থান কতক বৎসর পূর্বের ময়লার খণি দূষিত দুর্গন্ধ বায়ুর আবাস ছিল এক্ষণে তাহা পরিষ্কৃত প্রশস্ত সুন্দর ভ্রমণপথে পরিণত হইয়াছে। পদব্রজে ভ্রমণ ও অশ্বারোহণের সুবিধার সীমা নাই। কলিকাতার ধূলি দুর্গন্ধময় সঙ্কীর্ণ পথ-ঘাট ছাড়িয়া একবার এই সমুদ্রতীরের বিশুদ্ধ বায়ু সেবন কর—এ ছয়ের প্রভেদ বুঝিতে পারিবে। যদি বোম্বাই দ্বীপ ও বন্দরের নৈসর্গিক শোভা সন্দর্শন করিবার বাসনা থাকে তবে সমুদ্রধারের রাস্তা দিয়া মালাবার শৈলে আরোহণ কর—তথাকার সর্বোচ্চ শিখর হইতে একবার চৌদিকে চাহিয়া দেখ। দেখিবে, সাগর দ্বীপ গিরি কানন, বন্দরের জাহাজশ্রেণী, নগরের গৃহাবলী মিলিত শোভন দৃশ্য তোমার সম্মুখে প্রসারিত।

যখন অস্তোন্মুখ দিনকর কিরণে এই দৃশ্য সমুজ্জ্বলিত হয় তখন তাহার শোভা অতি চমৎকার । পশ্চিমের আকাশ চিত্র বিচিত্র মেঘজালে রঞ্জিত—নীচে উপসাগরের শাখাদ্বয় কনকবিশ্বে ঝক্ ঝক্ করিতেছে, তাহার ত্রোড়ে মুম্বা-পুরী শয়ান—সাগর-বক্ষে দ্বীপপুঞ্জ ভাসমান ; বন্দরে নোঙর-বন্ধ নানা জাতীয় তরণী, কখন বা এক এক নৌকা পালভরে চলিয়াছে । স্থলে নারিকেল বৃক্ষ-রাজি, মধ্যভাগে তরুরাজির অভ্যন্তরে বিরাজিত সুরাগরঞ্জিত হর্ম্যাবলী—দূর হইতে তাহার সকল দোষ ঢাকিয়া গিয়া একাকারে এক অপূর্ব শোভা প্রকাশিত । প্রান্তভাগে কোঙ্কণের পর্বত-শ্রেণী, সর্বোপরি শুভ্র নীল আকাশ । এখন মনে কর দিনমণি সমুদ্রে ঝাপ দিয়া ডুবিয়া গেলেন—সে দ্বীপ পর্বত জাহাজশ্রেণী ছায়ায় বিলীন হইল । সে লোহিত পীত স্বর্ণ বর্ণের দৃশ্য আর নাই । কি আশ্চর্য্য পরিবর্তন ! আর এক নূতন জগৎ, নূতন রাজ্য আবিষ্কৃত । নিশানাথ তাহার শুভ্র কিরণ-জাল বিস্তার করিয়া গগনমণ্ডলে উদিত—জলস্থল ক্রমে রজত-রঞ্জে রঞ্জিত হইল । এই স্নিগ্ধ বিমল জ্যোৎস্নাতে সমুদ্র-ভ্রমণে কি আরাম । আইস, বন্দরে গিয়া আমরা এক নৌকা করিয়া মাঝীদের গান শুনিতে শুনিতে খানিক দূর বেড়াইয়া আসি, আর ভুমিও তান ছাড়িয়া দিবে

ভাসিয়ে দে তরী তবে

সুনীল সাগর পরি,

বহিছে মৃদল বায়,

নাচিছে মৃদলহরী ।

তৃতীয়তঃ, বোম্বাই সহর কলিকাতার তুলনায় পরিষ্কার পরিচ্ছন্ন। আমার বিশ্বাস এই যে বোম্বাই ম্যুনিসিপালিটি ম্যুনিসিপালিটি } তোমাদের অপেক্ষা স্বাধীন, সারবান্ ও তেজস্বী। বোম্বাই ম্যুনিসিপাল সভার সভ্য সবশুদ্ধ ৬৪ জন। তন্মধ্যে ১৬ জন গবর্ণমেন্ট নিযুক্ত করেন—১৬ জন শান্তিরক্ষক জষ্টিসগণ কর্তৃক নির্বাচিত ও অবশিষ্ট ৩২ জন করদাতা প্রজাবর্গ কর্তৃক নির্বাচিত। এই সাধারণ ম্যুনিসিপাল সভা হইতে এক বিশেষ পৌরসভা (Town Council) মনোনীত হয়। তাহার সভ্য ১২ জন—সভাপতি সমেত চার জন গবর্ণমেন্টের নিযুক্ত ও আট জন সাধারণ সভা কর্তৃক নির্বাচিত। কতকগুলি কার্যভার সাধারণ সভার হস্তে আর কতকগুলি বিশেষ সভার হস্তে সমর্পিত।

পৌরসভা ম্যুনিসিপাল সভার মন্ত্রী স্বরূপ। যে সকল কাজে অর্থব্যয় প্রয়োজন, ১২ জন বাছা বাছা লোক তাহার পর্য্যালোচনায় নিযুক্ত ও তাহার মধ্যে যে সকল প্রস্তাব তাঁহারা সারগত্বে ও যুক্তিসঙ্গত বিবেচনা করেন তাহাই সাধারণ সভার সমক্ষে উপস্থিত করেন। আমার বোধ হয় এইরূপ কার্য নির্বাচনের অভাবেই কলিকাতা ম্যুনিসিপালিটির এমন দুর্দশা। Town Council-এর অনুরূপ খোসা ও জঞ্জাল বাছিয়া ফেলিবার কল প্রস্তুত করিলে কি ভাল হয় না ? *

* এইক্ষণকার ম্যুনিসিপাল আইন পরিবর্তিত ও সংশোধিত হইয়া এক নূতন আইন হইবার প্রস্তাব চলিতেছে—তাঁহাতে পৌরসভার স্মরণ্য ও ওজস্বী নামের পরিবর্তে Standing Committee নাম অনুমোদিত হইয়াছে শুনিতে পাই।

এই ম্যুনিসিপাল তরীর কাণ্ডারী হচ্ছেন ম্যুনিসিপাল
 ম্যুনিসিপাল } কমিসনর। ইনি একজন উচ্চবেতনভুক্ত গবর্ণ-
 কমিসনর } মেণ্টের কর্মচারী। ম্যুনিসিপাল বন্দো-
 বস্তের সমস্ত ভার ইহার হস্তে। ইহার কর্তৃত্ব অপার কিন্তু
 তাই বলিয়া একাধিপত্য নাই। একদিকে যেমন তাঁহার অধি-
 কার অন্য দিকে তেমনি তাঁহার দায়িত্ব। তাঁহার অধিকার ও
 ক্ষমতার অপব্যবহার হইতে পারে না কেননা তাঁহাকে সাধারণ
 ও বিশেষ সভার অধীনে সাবধানে কাজ করিতে হয়। প্রতি
 বৎসর কমিসনর পৌরসভার সমক্ষে আগামী বর্ষের ব্যয়ের এষ্টি-
 মেট উপস্থিত করেন। তাহা সমালোচিত হইয়া কমিসনরের
 সাহায্যে এক বজেট প্রস্তুত হয়। পৌরসভার সভাপতি সেই
 বজেট সাধারণ সভার অধিবেশনে আনয়ন করেন। সাধারণ সভা
 ইহা তাহা মঞ্জুর করেন, আপত্তিজনক হইলে কোন ভাগ অগ্রাহ
 করেন অথবা পুনর্বিচার ও সংশোধনের জন্য পৌরসভার নিকট
 ফেরৎ পাঠান হয়। কয়েক বৎসরের আয় ব্যয়ের হিসাব দৃষ্টে
 বম্বে মিউনিসিপালিটির আয় মোটামুটি ৪০ লক্ষ টাকা * বলা
 যাইতে পারে। †

* ১৮৮২ আয় ব্যয়ের হিসাবে যে দুই সালের বজেট এষ্টিমেট প্রকাশিত হয়
 তাহা এই :

আয়—১৮৮১—৩৯,১৯,২৫০ টাকা। ১৮৮২—৩৮,২২,২৫০।

ব্যয়—১৮৮১—৩৪,৭৬,২৫৫। ১৮৮২—৩৭,৩৫,৬৫০।

১৮৮৬-৮৭ এর আয় ব্যয়ের হিসাব

আয়—৪৫,৩২,৯৫০।

ব্যয়—৪২,৯৫,৯৫০।

† গত বর্ষের আয় ৫০ লক্ষ টাকা।

উল্লিখিত বিবরণ হইতে প্রতীত হইবে বোম্বাই ম্যুনিসিপালিটিতে রাজতন্ত্র ও প্রজাতন্ত্র উভয়েরই সদগুণ ও সুবিধা বর্তমান। উহার ব্যবস্থা ও কার্যশৃঙ্খলা অপর পুরবাসীদিগের দৃষ্টান্তস্থল তাহার সন্দেহ নাই। কথিত আছে যে লর্ড রিপন যখন প্রথমে ভারতবর্ষে পদার্পণ করেন তখন বোম্বাই ম্যুনিসিপালিটির ব্যবস্থার প্রতি তাঁহার দৃষ্টি পড়ে ও তদর্শনে তাঁহার মনে এদেশে স্বায়ত্ত-শাসন-প্রণালী-প্রবর্তন-সংকল্প উদয় হয়।

কলিকাতার ম্যুনিসিপাল কার্য-প্রণালীর ভিতরে অবশ্য কোন গোল থাকিবে *Something rotten in the state of Denmark* নতুবা ছোট লাট সাহেব * তাহার কার্য সমালোচনার জন্য কমিসন বসাইতে ব্যগ্র হইতেন না।

কলিকাতার উৎকৃষ্ট ভাগ চৌরঙ্গী অঞ্চল—সে ত গেল ইংরাজ পাড়া। তোমাদের ওদিকে যেমন ইংরাজ পাড়া বাঙ্গালী পাড়া স্বতন্ত্র এখানে ঠিক সেরূপ নয়। মালাবার শৈল বল, সমুদ্র-তীর বল, সর্বত্রই দেখিবে দেশী ও বিদেশী বাসগৃহ একত্রিত। সে যাহা হউক, এই দুই সহরের বিবাদ ভঞ্জন করিতে হইলে উভয়ের দিশি পাড়ার মধ্যে পরস্পর তুলনা করিয়া দেখা উচিত। দিশি পাড়া অর্থাৎ যেখানে সাধারণতঃ দেশীয়দিগের বাস—ইংরাজদের বসতি প্রায় নাই। এইরূপ তুলনা করিলে আমার মতে বম্বের প্রাধান্য স্বীকার করিতে হয়। কলিকাতা যদিও কএক বৎসর মধ্যে শ্রী ও স্বাস্থ্য সম্বন্ধে বিস্তর উন্নতি লাভ করিয়াছে

* Sir Rivers Thomson.

তথাপি এ বিষয়ে তাহাকে বন্ধের সমকক্ষ বলা যায় না। বোম্বাইয়ের দিশি পাড়ার ঘর বাড়ীগুলি রংচঙ্গে—লাল নীল হরিত পীত—দেখিতে সুন্দর—রাস্তা ঘাটগুলি পরিষ্কার পরিচ্ছন্ন। জনতার মধ্যেও বিস্তর প্রভেদ প্রতীয়মান হয়। পুরুষদের অপেক্ষাকৃত ভদ্র বেশ ও কুলনারীগণ রঙ্গীন বসন ভূষণে বাহির হইয়া নগরীর শোভা সম্পাদন করে। রাত্রে ঘরে দোকানে দীপালোক—রাস্তায় রাস্তায় গ্যাসের আলো—স্থান বিশেষে তাড়িতালোকের বাহার প্রত্যক্ষ হয়। ঐ সম্মুখে বাদ্যের ঘটা, আলো, লোকের ভীড়—কি দেখা যায়? এক বিবাহের যাত্রীদল আসিতেছে সরিয়া দাঁড়াও। প্রথম, মশাল হস্তে কতকগুলি বালক তাহাদের পশ্চাৎ উজ্জ্বল বেশ ভূষায় ভূষিত একদল স্ত্রীলোক। অনন্তর জ্বলন্ত মশাল পরিবৃত্ত বালক বালিকা বর কন্যা, সুসজ্জিত অশ্বপৃষ্ঠে অলঙ্কার-ভরে অবনত। বধু বরের চতুর্দিকে প্রাসাদ উদ্যানের চিত্রাবলী, দম্পতীর ভবিষ্যৎ সুখ সৌভাগ্যের কল্পিত প্রতিমা, লোকস্বক্কে সম্বাহিত।

বোম্বাইয়ের তবে কি সবই ভাল—কলিকাতার সকল বিষয়েই হার? আমি তা বলি না।

সপ্তম পরিচ্ছেদ ।

বাগিচা ।

উদ্যান, বাঁহঘর } ইহা অবশ্য স্বীকার করিতে হইবে যে ইডেন পার্ক কিন্না কোম্পানির বাগানের মত বাগান বোম্বায়ে নাই—আর গঙ্গার মত নদীও নাই । এখানকার প্রধান নগরোদ্যান যে বিক্টোরিয়া উদ্যান তাহা যৎসামান্য । তাহার মধ্যে একটা বাঁহঘর আছে তাহাও কোন কার্যের নয় । কলিকাতার মুজিয়মের সঙ্গে তাহার তুলনা হয় না । বিক্টোরিয়া উদ্যানে হরিণ ব্যাঘ্র ভাল্লুক বানর প্রভৃতি কতকগুলি পশু ধরিয়া রাখা হইয়াছে কিন্তু সে পশুশালার নাম মাত্র । আলিপুরের পশুশালার মত স্থান বোম্বায়ে নাই । কিন্তু তেমনি আবার এখানকার জৈনেরা বলিতে পারে “কলিকাতায় একটাও পশুর হাঁসপাতাল নাই—কি লজ্জা ! বম্বের দেখা দেখি এখন হঠাৎ তোমাদের চৈতন্য হইল !” এই হাঁসপাতালকে “পিঞ্জরাপোল” বলে । রুগ্ম কাণা খোঁড়া অকর্মণ্য অশ্ব গো মেঘ মহিষাদি জন্তুগণ যাহারা পীড়া বার্দক্য বশত মানুষের কোন কাজে আসে না—ইংরাজেরা হইলে যাহাদিগকে গুলি করিয়া মারে সেই সকল জন্তু ইহার মধ্যে রক্ষিত ও প্রতিপালিত হয় । ইহারি বিনা পরিশ্রমে আহার পান পাইয়া পেন্সনজীবির ন্যায় দিব্য আরামে জীবনের শেষ ভাগ অতিবাহিত করে ।

বাগিচা ব্যবসা } বোম্বায়ের লোকেরা বাঙ্গালীদের অপেক্ষা

বাণিজ্য ব্যবসা কার্যে হৃদয়। বাঙ্গলার ধনসম্পত্তি ভূমিতে আবদ্ধ। বোম্বাই অঞ্চলে ভূমির তেমন মূল্য নাই কেননা এ প্রদেশে ভূমি সম্পর্কীয় চিরস্থায়ী বন্দোবস্ত প্রচলিত নাই। এখানে রাইয়তওয়ারী বন্দোবস্তে প্রজার নিজ পরিশ্রম বিনা অন্য কারণজাত জমির উন্নতি, জিনিসের দর বৃদ্ধি ইত্যাদি কতকগুলি কারণানুসারে ৩০বৎসর অন্তর রাজস্ব-পরিবর্তনের নিয়ম আছে—সরকারী খাজনা দিয়া রাইয়তের হাতে সম্ভবত এত অল্প লাভ অবশিষ্ট থাকে যে ভূমি লাভের প্রতি লোকের তেমন আগ্রহ দেখা যায় না। বোম্বায়ে বাণিজ্যই ধনোপার্জনের প্রধান সোপান, “বাণিজ্যে বসতে লক্ষ্মী” একথা বোম্বাই বাসীরা ভাল বুঝে। সপ্তদশ শতাব্দীতে সুরাট পশ্চিম ভারতের প্রধান বাণিজ্যালয় ছিল। ইউরোপের সহিত এদেশীয় বাণিজ্য “সুরাট } কারবার সুরাট বণিকদের হস্তে নিহিত ছিল। ১৬১২ খৃষ্টাব্দে ইংরাজদের কুঠি সুরাট নগরে প্রতিষ্ঠিত হয়। সুরাট হইতে বাণিজ্যস্রোত ক্রমে বোম্বায়ে বিবর্তিত হইল। মোগল রাজ্য পতনের সঙ্গে সঙ্গে সুরাটের ভাগ্যলক্ষ্মী দ্বান ও মুম্বাপুরী উন্নতি সোপানে আরুঢ় হইল। এই শ্রীবৃদ্ধি লাভের অনেক-গুলি কারণ আছে। ইংলণ্ডের সান্নিধ্য—প্রশস্ত হৃদয় বন্দর—পোত নির্মাণ ও সংরক্ষণের সুবিধা ইত্যাদি কারণে বোম্বাই শীঘ্রই নদীতীরবর্তী সুরাট পুরীকে অতিক্রম করিয়া উঠিল। সেকালের আমদানী রপ্তানি এখনকার সহিত তুলনা করিলে বাণিজ্যের কি প্রভূত উৎকর্ষ উপলব্ধি হয়। ১৬৬৮এ ইংলণ্ড

হইতে ছয় খানা জাহাজ এক লক্ষ ৩০০০০ পৌণ্ড মূল্যের বিবিধ দ্রব্য লইয়া সুরাতে উপস্থিত হয়—পর বৎসরের আমদানীর দাম ৭৫০০০ পৌণ্ড। ১৬৭২এ ৪ জাহাজ ১৮০০০ পৌণ্ডের মাল ও মুদ্রা লইয়া আসে, ১৬৭৩এ ১০০,০০০ পৌণ্ডের মাল ও পয়সা সমানীত হয়। তখন রপ্তানীর মধ্যে নীলের খুব আদর ছিল তদ্বিন্ন এদেশ হইতে মরীচ, সোরা, হীরা, তুলা, রেশম ও স্ততার কাপড় ও নানা প্রকার ঔষধীয় সামগ্রী ইংলণ্ডে রপ্তানী হইত। মূল্য সর্বশুদ্ধ বড় জোর বিশ লক্ষ টাকা হইবে। ১৭০৮ হইতে বিশ বৎসরের বাণিজ্যের হিসাব হইতে দেখা যায় এদেশে বার্ষিক আমদানীর মূল্য (সোণারূপা সমেত) ৬৩৪, ৬৩৮ পৌণ্ড। রপ্তানি রেশম, হীরা, সোরা, মরীচ প্রভৃতি মিলিয়া ৭৫৮,০৪২। ইহার সহিত সম্প্রতিকার বাণিজ্য হিসাবের তুলনা করিয়া দেখ। Moore সাহেবকৃত গত বর্ষের * বোম্বাই প্রেসিডেন্সির বাণিজ্য বিবরণ পাঠে অবগত হওয়া যায় যে বোম্বাইয়ের সমুদায় সমুদ্রপথের বাণিজ্য ৮৪,১৩,১৪০০০ টাকা, পূর্ব বৎসর অপেক্ষা ৭৭ লক্ষ অধিক। বিদেশীয় আমদানী প্রায় ৩২ কোটি ২০ লক্ষ, রপ্তানি প্রায় ৩৪ কোটি, আমদানীর ছই তৃতীয়াংশেরও অধিক গ্রেটব্রিটেন হইতে আগত। অন্যান্য দেশের প্রতিদ্বন্দ্বিতা হইতে ইংলণ্ডের অনিষ্ট-সাধন বিশেষ কিছু দৃষ্ট হয় না। ইউরোপের অন্যান্য প্রদেশ হইতে এদেশের বাজারে অনেক জিনিস জমা হয় বটে কিন্তু তাহা ব্রিটিস আম-

দানীর তুলনায় যৎসামান্য। চীনের আমদানী মন্দ নয়—২ কোটি ৬৭ লক্ষ ৩৬ হাজার। তার এক কোটিরও অধিক স্বর্ণ রৌপ্য ছাড়িয়া দিলে রেশম সূতার বস্ত্র, চা ও চিনি মিলিয়া প্রায় এক কোটি অবশিষ্ট থাকে।

রপ্তানি সর্বশুদ্ধ ৩৩,৯৮,২৫০০০ টাকা, ইহার প্রায় তৃতীয়াংশ ব্রিটনের ভাগ্যে গিয়া পড়ে।

তুলা } বোম্বাই তুলার ব্যবসায়-জন্ম প্রাচীন কাল হইতে প্রখ্যাত। এখানে ভারতের নানা স্থান হইতে তুলা আসিয়া বস্ত্র-বন্দী হইয়া ভিন্ন ভিন্ন দেশে প্রেরিত হয়। এক সময়ে বোম্বাই হইতে চীনদেশে অনেক তুলা রপ্তানি হইত। এখন তাহা অনেক কমিয়া গিয়াছে। তাহার কারণ মহারাষ্ট্র যুদ্ধের সময় তুলার ব্যবসা বন্দ হওয়া, ঐ কারণে ও তুলার কারবারে অনেক জুয়াচুরি ধরা পড়িবার দরুণ চীনেরা আপনাদের দেশে তুলার চাস আরম্ভ করে। সেই অবধি বোম্বাই হইতে চীনে তুলা-রপ্তানির হ্রাস দেখা যায়। ১৮০৫ পর্য্যন্ত কোন কোন বর্ষে চীনদেশে ৩ কোটি পৌণ্ড ভার, ৬০ লক্ষাধিক টাকা মূল্য, তুলার রপ্তানি হইত এইক্ষণে বার্ষিক রপ্তানি ওজনে প্রায় ১ কোটি ৬০ লাখ পৌণ্ড।

১৮১৩ পর্য্যন্ত ইষ্টইণ্ডিয়া কোম্পানির হাতে একচেটিয়া বাণিজ্য ছিল—অন্য কেহ বাণিজ্য ব্যবসাতে প্রবৃত্ত হইতে গেলে কোম্পানির পরওয়ানা আবশ্যক হইত, বাণিজ্যের উপর এই শৃঙ্খল ভাঙ্গিয়া যাইবার পর অবধি তাহার প্রকৃত উন্নতির সূত্র-পাত। বোম্বায়ে তুলার ব্যবসার উত্তরোত্তর উন্নতিতেই মুক্ত

বাণিজ্যের ফল প্রত্যক্ষ করা যায়। আমেরিকার যুদ্ধের সময় ঐ ব্যবসা বিশেষরূপে উত্তেজিত হয়। ১৮৬১ হইতে ১৮৬৫ পর্য্যন্ত সেয়ার মেনিয়া } এই পাঁচ বৎসর আমেরিকানদের ঘরাও যুদ্ধের দরুন সে দেশ হইতে তুলার আমদানী বন্ধ হওয়াতে বন্সের সৌভাগ্য-সূর্য্য উদয় হইল, তুলার বাজার এমনি চড়িয়া উঠিল যে ঐ কয়েক বৎসরের মধ্যেই বন্সের লোকেরা নিদান ৭,৮ কোটি মুদ্রা উপার্জন করে। টাকা হইলে তাহা বৃদ্ধি করিবার চেষ্টা হয়—সকলে স্থলভ উপায়ে ধনোপার্জনে মত্ত হইয়া উঠিল, কত ব্যাক্ষ কত অর্থকরী অনর্থকরী কোম্পানী ভেদকছত্রের ন্যায় জন্মধারণ করিল তাহার সংখ্যা নাই। অন্যান্য অর্থোপার্জনের ফন্দীর মধ্যে ‘ব্যাক্ বে’ আদ্যদের এক প্রস্তাব মস্তক উত্তোলন করিল। ব্যাক্ বে উপসাগরের তীরভূমি সমুদ্র হইতে উদ্ধার করিয়া তাহা বাসগৃহের উপযোগী ও অন্য আবশ্যকীয় কার্য্যে প্রযুক্ত করা ঐ প্রস্তাবের উদ্দেশ্য। লোকে ভাবিল বোম্বায়ে জমির মূল্য ত্রিগুণ চতুগুণ বৃদ্ধি হইয়াছে, জনসংখ্যা দিন দিন বৃদ্ধি হইতেছে—দ্বীপের মধ্যে বাসোপযোগী ভূমি দুর্লভ, এ সময়ে ভূমি লাভে নাজানি কতই লাভ—প্রত্যেক কাটা জমির মূল্য ততটা সোণার দর প্রতীয়মান হইল। একটী কোম্পানী উঠিয়া এই কার্য্যে প্রতিজ্ঞাবদ্ধ হইল—ব্যাক্‌বের সেয়ার বিক্রী তাহার কাজ। সেয়ার কেনা ব্যাচা এই এক রোগ জন্মিল। আবালবৃদ্ধ বনিতা সকলেই সেয়ার কিনিবার জন্য ক্ষেপিয়া উঠিল। যে দরিদ্র সে এক রাত্রির মধ্যে ধনী হইবে—যার

স্বচ্ছল অবস্থা সে লক্ষপতি—যে লক্ষপতি সে ক্রোড়পতি হইবে—সকলেই সহজ উপায়ে টাকা করিতে তৎপর। বড় বড় ইংরাজ কর্মচারীরাও এই সাংক্রামিক রোগের হস্ত এড়াইতে পারেন নাই—টাকা করিয়া দেশে পাড়ী দিতে পারিলে হয়—না হয় কর্ম গেল তাহাতে ক্ষতি কি ?

এই রোগ শুধু যে ব্যাক্বে সেয়ারের ব্যাপারেই বদ্ধ তাহা নহে। ব্যাক্বের তীরের সমতুল্য মূল্যবান জমি অথবা তদপেক্ষা আরো কত অমূল্য ভূমি বোম্বাইয়ের স্থানে স্থানে পড়িয়া আছে—মাজেগাম সিউরী প্রভৃতি তীরদেশও উৎকৃষ্ট বন্দরে পরিণত হইতে পারে। এইরূপে নানান ফন্দী বাহির হইল। যে কোন ফন্দী বাহির হয় তাহার পোষকতা ও প্রচার উদ্দেশে আনুমানিক এক এক Financial সমাজ।—তার পর যখন বোম্বাইয়ের ভূমি ভাণ্ডার শূন্য হইল—তু কোম্পানীর গ্রাসো-যুক্ত আর কিছুই অবশিষ্ট নাই—তখন এক নূতন মড়ক আসিয়া উপস্থিত। পোর্ট ক্যানিঙের ব্যাপার তোমার মনে থাকিতে পারে। অর্থনাশের আর এক সুগম পথ আবিষ্কৃত হইল। অন্যান্য কোম্পানির উপর পোর্ট ক্যানিঙ কোম্পানি আসিয়া বোম্বাই বণিকদের ভাণ্ডারে বাহা কিছু বাকি ছিল যথাসর্বস্ব হরণ করিয়া লইল।

আমেরিকার যুদ্ধাবসানের সঙ্গে সঙ্গে এই সুখ-স্বপ্ন ভঙ্গ হইল। যেমন উত্থান তেমন পতন। তুলার দাম যেমন চড়িয়াছিল তেমন উতরিয়া গেল। অনেক বড় বড় কুঠী ফেল

হইল । সে যে ছলুসুল বাধিয়া গেল তাহা বর্ণনাভীত । সকলেই জানিতে পারিল এই সকল অশেষ কোম্পানির মূলধন কেবল কাগজ মাত্র—কেবল সেয়ার লইয়া ইহাদের মৌখিক কারবার । বিপদের সময় দেখা গেল তাহাদের কিছুমাত্র সম্বল নাই—এই অর্জন-স্পৃহার প্রকাণ্ড ইমারত তাসের ছুর্গের ন্যায় এক ধাক্কায় চুরমার হইয়া গেল । তখন লোকের চোখ ফুটিল । দেখিতে পাইল যে তাহারা যে সম্পত্তি ক্রয় করিয়াছে তাহার কোন মূল্য নাই, যে মাটি সে মাটিই রহিল, সোণায় পরিণত হইল না । বাণিজ্য সম্বন্ধে লোকসান অন্যত্রে ঘটয়া থাকে কিন্তু ১৮৬৪-এ বম্বের যে দুর্দশা তাহার তুলনা পাওয়া ভার । সহরজাদা-নাম, লক্ষপতি, ক্রোড়পতি একে একে নিঃসম্বল হইয়া ধূলায় পড়িয়া গড়াগড়ি । এই সেয়ার সাগর মহুনে যে সমস্তই লোকসান—একেবারেই লাভের উৎপত্তি হয় নাই তাহা বলা যায় না । মন্দ হইতে বিধাতা অনেক সময় মঙ্গলের জয় সাধিয়া লন । এই ধাক্কায় অনেক তীরদেশ উদ্ধার—অনেক বড় বড় ইমারত নির্মাণ—স্বরম্য স্নগম রাজমার্গ উন্মোচন প্রভৃতি কার্য্য অনুষ্ঠানে নব্য বম্বের পত্তন বলিলেও অত্যাুক্তি হয় না ।

তুলার } বোম্বাই শুধু তুলার বাজার বলিয়া প্রসিদ্ধ নহে
কারখানা } তাহার বিশেষ গৌরব এই যে তথায় তুলার কার-
খানা হইতে সূতা ও কাপড় প্রস্তুত হইয়া দেশ দেশান্তরে
প্রেরিত হইতেছে । এই সকল তুলা ও কাপড়ের কলে বোম্বাই
সহর সমাকীর্ণ । তাহাদের সংখ্যা দিন দিন বৃদ্ধি হইতেছে ।

মিল কর্তাদের সমাজ (Mill owner's association) কর্তৃক যে বার্ষিক তালিকা প্রকাশিত হইয়াছে তাহা হইতে জানা যায় যে সমুদয় ভারতবর্ষে সর্বশুদ্ধ ৮৭ তুলার কল আছে। তন্মধ্যে বম্বে প্রেসিডেন্সিতে ৬৮, * বম্বে ও আশপাশে ৪৯, ও মফস্বলে ১৯। এই সকল মিলে কাজ করিয়া সর্বশুদ্ধ প্রায় ৫১০০০ লোকের উদর পোষণ হয়। তন্মধ্যে বোম্বাই ও সহরের প্রান্তবর্তী মিল-সমূহে প্রায় ৪২০০০ লোক নিযুক্ত। এই সকল মিলের তত্ত্বাবধানের জন্য প্রত্যেক কারখানায় একজন ম্যানেজার ও তদ্বিধা একজন Weaving master, একজন Spinning master, এঞ্জিনিয়ার ও অন্যান্য সুনিপুণ কারিগর নিযুক্ত। অধিকাংশ মিলের ম্যানেজার ইংরাজ। ৩০০ টাকা ৫০০ টাকা পর্যন্ত তাহার বেতন। কোন কোন মিলে দেশী ম্যানেজারও নিযুক্ত দেখা যায়। দেশী লোকদিগকে নিযুক্ত করিলে কত অল্প ব্যয়ে কার্য্য নির্বাহ হয় তাহা অনেকেই অবগত আছেন ও সুবিধা বুঝিয়া মিলের কর্তৃগণ ক্রমে এ বিষয়ে মনোযোগ দিতেছেন। অনেক মিলে দেশী আপ্রেন্টিস রাখিয়া কাজ শেখাইবার ব্যবস্থা দৃষ্ট হয়। এখানে যদিও শ্রমজীবীদের বেতন অল্প তথাপি জিনিস তৈয়ারির খরচ ইংলণ্ড অপেক্ষা অল্প নয় তাহার কারণ এখানকার

* এই তালিকা ১৮৮৫ অব্দের -১৮৮৬এ মিল-সংখ্যা ৭০।

১৮৮৭এ মিল-সংখ্যা ৭৫।

প্রাত্যহিক মজুর নিযুক্ত।

১৮৮৬—৫৪,১৭৯।

১৮৮৭—৫৪,৭১৫।

লোকেরা তেমন ভাল করিয়া অনেকক্ষণ ধরিয়া কাজ করিতে অক্ষম। একটা মধ্যমাকৃতি মিল ১৫ লক্ষ টাকা মূলধনে স্থাপিত হইতে পারে—তাহাতে ৪০০০০ স্পিণ্ড্‌ল্‌ ৬০০ লুম ও গড়ে ১০০০ লোক (১০০ বালক ১০০ স্ত্রীলোক ও ৮০০ পুরুষ) খাটে। এইরূপ মিলে শ্রমজীবীদের বেতনে মোটামুটি ১৩০০০ টাকা মাসিক ব্যয় ও ইহা হইতে গাসে ১ লক্ষ সের ওজন কাপড় উৎপন্ন হইতে পারে। তাই বলিয়া মনে করিও না যে কাপড়ের বাম্পীয় কলকার-চরখা } খানার সৃষ্টি হওয়াতে হাতের চরখার ব্যবহার বিলুপ্ত হইয়াছে। এই প্রেসিডেন্সির প্রধান প্রধান গ্রামে তুলা হইতে সূতা ও কাপড় হাতে প্রস্তুত হয়। কিন্তু সে সকলি প্রায় মোটা কাপড়, ঢাকাই মলমল কিম্বা শান্তিপু্রে ধুতির মত সূক্ষ্ম কাজ নয়। তৈয়ার হইবার পর অথবা চরখা হইতে নামাইবার পূর্বেই সেই সকল কাপড়ের উপর রং চড়ান হয়। উত্তর গুজরাতে লাল রং সকলের পছন্দ—দক্ষিণ গুজরাত ও মহারাষ্ট্র দেশে লাল হলদের সঙ্গে নীল ও সবুজ বর্ণেরই সমধিক প্রাচুর্য্য। আর এক বিষয়ে মহারাষ্ট্রী ও গুজরাটীদের রুচিতে দৃষ্ট হয়। মহারাষ্ট্রীরা ছাপওয়ালা সূতার কাপড় প্রায়ই ব্যবহার করে না, গুজরাত ও কাটেওয়াড়বাসীদের তাহাই পছন্দ সই। দেশীয় স্ত্রীলোক-দের রং করা কাপড় ভিন্ন সাদা সূতার সাড়ী মনোনীত নহে।

বোম্বায়ে সাড়ী-ছাপওয়ালা অনেক তাঁতির বসতি ও বোম্বে

জরি
কিছাব

} মিলের কাপড়, এই সকল তাঁতির হস্তে রঙ্গীণ হইয়া
দক্ষিণ কোঙ্কণ প্রভৃতি প্রদেশে প্রেরিত হয়।

কিছাব ও জরির রেশমী কাপড় নিজ বোম্বায়ে অল্পই প্রস্তুত হয়। অহমদাবাদ ও সুরাট কিছাবের জন্য প্রখ্যাত। পুণা, নাসিক, যেওলা প্রভৃতি স্থানেও ভাল ভাল জরির কেনারীবিশিষ্ট ফুল-কাটা সাড়ী প্রস্তুত হয়। বোম্বায়ের দোকানে যে সকল রেশমী সাড়ী দেখা যায় তাহার অধিকাংশই চিনাই রেশম ও পারসী স্ত্রীলোকের ব্যবহার্য।

মাটির } এ অঞ্চলে উচ্চ শ্রেণীর মাটির জিনিস তৈয়ার হয়
কাজ } না। সচরাচর যে ঘটা বাটা কলস দেখা যায় তাহাতে চিনাই বাসনের মত চাকচিক্য নাই। সিন্ধুদেশে এই সকল দ্রব্য অপেক্ষাকৃত উৎকৃষ্ট, কুস্তকারের কারুকার্য্য সে দেশে যে কি উৎকর্ষ লাভ করিয়াছিল সেখানকার প্রাচীন মসজিদ ও গোর গৃহে তাহার পরিচয় পাওয়া যায়। মৃত্তিকার উপর চাকচিক্য করিবার কৌশল সিন্ধী কুস্তকার হইতে বংশপরম্পরা চলিয়া আসিতেছে তথাপি এইক্ষণে কাজ তেমন সুন্দর হয় না—জিনিসও তত ভাল পাওয়া যায় না। বম্বে শিল্প বিদ্যালয়ে দেশীয় শিল্পের উন্নতি সাধনের যে চেষ্টা হইতেছে তাহা হইতে এই নক্ট কলা আনাদের পুনরায়ত্ত হইবে এইরূপ আশা করা যায়।

কাঠের } শিশম কাঠের উপর নক্সা কাটা গৃহ দ্রব্য নির্মা-
কাজ } ণের জন্য বোম্বায়ের বিশেষ খ্যাতি। বোম্বাই কারিগরের নির্মিত কাঠের পরদা, টীপাই, ডেক্স প্রভৃতি শিল্প নিপুণ সুন্দর দ্রব্য সকল প্রশংসার যোগ্য। অহমদাবাদ ও

সূরাটে এইরূপ কাঠের সূচার নক্সার কাজ দেখা যায়। চন্দন শিশম কাষ্ঠ এবং হাতির দাঁতের উপর কারুকার্য বোম্বাই ও সূরাটে প্রচলিত কিন্তু কণাটকের কারিগরেরা চন্দন কাঠের উপর যেমন সুন্দর নক্সার কাজ করে তেমন আর কোথাও হয় না।

বোম্বায়ে কাপড়ের মিলের সংখ্যা বৃদ্ধির সঙ্গে সঙ্গে তাহাদের আয় ক্রমে কমিয়া আসিতেছে। আগার বোধ হয় এক্ষণে আর নূতন মিল খুলিবার আবশ্যক নাই নূতন বাজার খুলিবার প্রয়োজন। চীন পারস্য জাজ্জিবার প্রভৃতি অনেক ক্ষেত্র পড়িয়া আছে যেখানে এ দেশের মিলের জিনিস প্রবিক্ত হইলে বিস্তর উপকার দর্শে। নূতন মিল নির্মাণ করিবার পূর্বে এই সকল স্থানে নূতন বাজার খুলিবার বিহিত উপায় অবলম্বন করা কর্তব্য। বোম্বায়ে কাপড়ের মিলের যেমন ছড়াছড়ি সে পরিমাণে অন্তবিধ কল কারখানা দৃষ্ট হয় না। একটা ছোট খাট কাগজের মিল আছে তাহাতে সাধারণ হিসাব পত্র রাখিবার ও জিনিস পত্র বাঁধিবার উপযোগী মোটা কাগজ প্রস্তুত হয়। উৎকৃষ্ট কাগজের কারখানা এ অঞ্চলে প্রতিষ্ঠিত হয় নাই, পুণায় এইরূপ একটা উচ্চ দরের কারখানা খুলিবার প্রস্তাব হইতেছে। * বোম্বায়ে আরো দু একটা নূতন কারখানার সূত্রপাত দেখিয়া দেশহিতৈষীর মনে আহ্লাদ সঞ্চার হয়। এত দিন বিলাতী দেশলাই ভিন্ন আমাদের কাজ চলিত না—সম্প্রতি জনৈক কৃতবিদ্য ডাক্তারের যত্নে বোম্বায়ে একটা দিশি দেশলাইএর কারখানা প্রতিষ্ঠিত হই-

* সম্প্রতি খুলিয়া কার্য্যারম্ভ হইয়াছে।

যাচ্ছে । তথায় স্বীডন বেলজিয়ম ও ইউরোপের অন্যান্য দেশের সমতুল্য দেশলাই প্রস্তুত হয় । দুইটি বাক্সের দাম এক পাই । জ্বালাইবার সামগ্রী সমস্তই দিশি জিনিস ও দেশলাই বাক্স পর্য্যন্ত সমুদয় নির্মাণ ব্যাপার বোম্বে কারখানায় প্রবর্তিত, কেবল দেশলাইয়ের জ্বলন কাঠ বিদেশীয় আমদানী, তাহাও এদেশীয় বন জঙ্গল হইতে সংগৃহীত হইতে পারে এরূপ প্রত্যাশা করা যায় । কাজটা যদিও আসলে সামান্য তথাপি এইরূপ প্রতিদ্বন্দিতা হইতে লোকের চোখ ফুটিয়া অন্য দিকে সফল প্রসূত হইবার সম্ভাবনা । দিশি দেশলাই যদি লাভের জিনিস হইয়া দাঁড়ায় ও তাহার দৃষ্টান্তে ঘাস সাবান মোমবাতি প্রভৃতির দিশি কারখানা সকল উত্তেজিত হয় তাহা হইলে এক মহৎ লাভ সন্দেহ নাই । আমাদের দেশের ছোট লোকেরা অধিকাংশই কৃষি কার্যে রত—মধ্যবিত্ত লোকদের সরকারী চাকরীই এক প্রকার জীবনের অবলম্বন হইয়া পড়িয়াছে । শ্রমের অভিনব দ্বার উন্মুক্ত হইয়া স্বাধীন ব্যবসা ক্ষেত্র প্রসারিত হওয়া ভিন্ন এ দেশের কল্যাণের আর উপায়ান্তর নাই । ঐদিকে আমাদের সুশিক্ষিত কৃতবিদ্য ব্যক্তিদিগের লক্ষ্য যত্ন ও উৎসাহ যতই যায় ততই মঙ্গল ।

অষ্টম পরিচ্ছেদ ।

ঘরবাড়ী ।

সৌধপুরী } ইংরাজি গ্রন্থে কলিকাতা সচরাচর সৌধপুরী
বলিয়া বর্ণিত দেখা যায় । কিন্তু এ নাম কলিকাতা যে কেন
একচেটিয়া করিয়া বসিয়াছে তাহা আমি ভাবিয়া পাই না । এই
দুই সহরের ইমারত শ্রেণীর পরস্পর তুলনা করিলে ত বোধ
হয় না যে বোম্বাই কলিকাতার নিকটে পরাভব পায় । বোরি-
বন্দরের কেসনে নামিয়া একবার বন্দরের ময়দান প্রদক্ষিণ করিয়া
আসিলে কত প্রকাণ্ড সুন্দর হর্ম্যরাজী নেত্রপথে পতিত হইবে
তাহার সংখ্যা নাই । সেক্রেটারী অফিস, হাইকোর্ট, ইউনিব-
সিটি হলের রাজাবাই স্তম্ভ ও পুস্তকালয়, টেলিগ্রাফ ও পোস্ট-
অফিস, আদালত ও কার্য্যালয় সমূহ, সান্নান শিল্পালয়,
সর জমসদজি শিল্প বিদ্যালয়, এল্‌ফিনিউন হাইস্কুল, সেন্ট
জেবির কলেজ, পারসী দাতব্য বিদ্যালয়, আলেকজান্দ্রা স্ত্রী
বিদ্যালয় প্রভৃতি বিদ্যালয় নিচয় ; গোকুলদাস হাঁসপাতাল,
ইউরোপীয় হাঁসপাতাল প্রভৃতি চিকিৎসালয় ; নাবিকাগ্রাম,
হোটেল, পান্থশালা, বিপনী শ্রেণী এই সকল দেখিয়া বোম্বাই
কাহার মনে না স্মরুপা সৌধপুরী বলিয়া প্রতীয়মান হয় ।
যেখানে কেলা ও আফিসাঞ্চলের দিকে রাজমার্গ দ্বিধা হইয়া
গিয়াছে তাহার মুখে মহারাণী বিক্টোরিয়ার শ্বেত পাষাণ প্রতি-
মূর্তি প্রতিষ্ঠিত । রাজ্ঞী উচ্চ সিংহাসনে সমাসীন—সিংহাসন

বিতান মণ্ডপিত—বিতানের মধ্যভাগে ভারত নক্ষত্র, তদুপরি ইংলণ্ডের গোলাপ ও ভারতের নলিনী ; রাণীর পরিচ্ছদ ও আর সব মিলিয়া প্রতিমূর্তিটি সর্বদ্বন্দ্বসুন্দর প্রতিভাত হয়। সেক্রেতার আফিসের পশ্চাদ্ভাগে যুবরাজ প্রিন্স অব ওয়েল্‌সের অশ্বারোহী তাম্রময় প্রতিমূর্তি। মহারাণীর প্রতিমূর্তি হইতে অপর প্রতিমূর্তি সমীপে চলিতে চলিতে পথে ‘লাথ টাকার মূল’ সুন্দর ফ্রিয়ার উৎস দেখিতে পাইবে। এই উৎসের দক্ষিণে প্রসারিত একদিকে সাসুন শিল্পালয়, বম্বে ক্লাব, ন্যাসনাল ব্যাঙ্ক, ট্রীচারের দোকান, বামে পি এণ্ড ও নাবিক কোম্পানির আফিস, বোর্ণেসপর্ডের ফোটোগ্রাফিক চিত্রশালা, ওরিএণ্টেল ব্যাঙ্ক প্রভৃতি বড় বড় ইমারত দৃষ্ট হইবে। এই সকল হর্ম্যাবলী পর্য্যবেক্ষণ করিয়া চল বম্বে নগর শালা (Town Hall) দেখিতে যাই। ঐ সম্মুখে উচ্চ স্তম্ভ রাজীর মধ্য হইতে যে স্তম্ভোভিত অট্টালিকা লক্ষিত হইতেছে তাহাই নগর শালা। অন্তরে প্রবেশ করিয়া মধ্যে প্রকাণ্ড সভাগৃহ, বম্বে এসিয়াটিক সোসাইটির পাঠশালা ও পুস্তকালয়, দরবারশালা প্রভৃতি দোতালার ভিন্ন ভিন্ন প্রকোষ্ঠ দর্শন কর। প্রবেশ পথে সোপানের উপরে ও নিম্নদেশে কতকগুলি বিখ্যাত লোকের পাষণ্ড মূর্তি স্থাপিত—তন্মধ্যে এক পারসী ও এক হিন্দু প্রতিমূর্তি নেত্র আকর্ষণ করে। পারসী খ্যাতনামা ব্যারনেট সর জমসদজী জিজিভাই বাটলীওয়ালা। ‘সর’ ও ‘বাটলীওয়ালা’ তাঁহার এই পদবীদ্বয়ের মধ্যে তাঁহার জীবনের ইতিহাস অভিব্যক্ত। ইহারা বলিয়া দিতেছে কিরূপে

তিনি সামান্য বোতল বিক্রীর ব্যবসায়ে প্রবৃত্ত হইয়া স্বীয় ধৈর্য্য বীর্য্যে, বুদ্ধির প্রাথর্য্যে, ব্যবহার চাতুর্য্যে, নূতন সম্পত্তি উপার্জন পূর্ব্বক অবশেষে ব্রিটিশ নাইট শ্রেণীভুক্ত হইয়া খ্যাতি প্রতিপত্তি সম্পাদন ও সমাজ শিখরে আরোহণ করিলেন। হিন্দু প্রতিমূর্ত্তি জগন্নাথ শঙ্করশেঠের। ইনি জাতিতে স্বর্ণকার কিন্তু জীবদ্দশায় হিন্দুজাতির প্রতিনিধি স্বরূপ গণ্য ছিলেন। সোপানের উপরিভাগে বম্বের ভূতপূর্ব্ব কতিপয় গবর্নরবর্গের প্রতিমূর্ত্তি অধিষ্ঠিত। তন্মধ্যে ভারতের ইতিহাস লেখক মহনীয় কীর্ত্তি এল্‌ফিনিষ্টন, ইহার মূর্ত্তি সকলের শীর্ষস্থানীয় আসন অধিকার করিয়া আছে। ইনিই এ প্রদেশে পাশ্চাত্য সাহিত্য বিজ্ঞান শিক্ষাপ্রণালী উদ্ভাবন করেন ও যে দুই বিদ্যালয় ইহার নাম ধারণ করিতেছে তাহারা প্রত্যেকে নিজ নিজ শ্রেণীর অগ্রগণ্য। এল্‌ফিনিষ্টন হাইস্কুলের ছাত্র মণ্ডলী এক সহস্রেরও অধিক। যে বিদ্যালয়ের নাম ‘হাইস্কুল’ ও যাহার ছাত্রসংখ্যা সহস্রাধিক তাহার আয়তন ও শিক্ষাপ্রণালী সহজে বোধগম্য হইতে পারে। আরো একটা বোম্বায়ের বিশেষ ভূষণার্থ কথ্য বক্তব্য এই যে ইহার প্রধান আচার্য্য পদে ইংরাজ অধ্যাপক না হইয়া বোম্বাই বিশ্ববিদ্যালয়ে অধীত একজন মহারাষ্ট্রীয় পণ্ডিত নিযুক্ত। তাঁহার নাম বামন আবাজী মোডক। এই ত গেল স্কুল—এল্‌ফিনিষ্টন কলেজও সামান্য গৌরবাস্পদ নহে। ইহা বম্বের আদর্শ বিদ্যালয়। সুবিখ্যাত কবিকুলতিলক লোকপ্রিয় Wordsworth সাহেব ইহার প্রধান অধ্যাপক।

নগরশালা হইতে বাহির হইয়া উদ্যানগর্ভ এল্‌ফিনিস্টন
 এল্‌ফিনিস্টন } চক্রের ইমারত শ্রেণী দেখিতে পাইবে।
 চক্র } আচ্ছাদিত বারান্দার মধ্য দিয়া তাহাতে
 প্রবেশ পূর্বক চক্র প্রদক্ষিণ করিয়া এস। এই সকল ইমারত
 সেরয় মেনিয়া কালের স্মরণ চিহ্ন। সেই স্থখ সৌভাগ্যের
 মধ্যাহ্নকালে Sir Bartle Frere গবর্নরের আমলে এই সকলের
 প্রতিষ্ঠা হয়। এই স্থান তখন শূন্য ময়দান, মধ্যে কপোত
 বৃন্দের আবাসস্থান একটি পুরাতন ভগ্নমন্দির মিটমিট করিত,
 এক্ষণে তাহার কি আশ্চর্য্য রূপান্তর !

এই সমস্ত সৌধাবলীর মধ্যে হাইকোর্ট আদালত সর্ব্বা-
 পেক্ষা বিশাল ও গৌরবশালী। ইউনিবর্সিটি গৃহ একটি শিল্প
 রত্ন—কি তাহার নিৰ্ম্মাণ কৌশল কি তাহার কার্য্যকারিতা অন্তর
 বাহ্য উভয়ই ব্যাখ্যান যোগ্য। ইউনিবর্সিটি ঘটিকাস্তম্ভ গগন
 ভেদ করিয়া আর সকলকে ছাড়াইয়া উঠিয়াছে। ইহা আট
 স্তরে বিভক্ত ও ২৬০ ফীট উচ্চ—দিল্লীর কুতবমিনার অপেক্ষাও
 আট ফীট অধিক। আহ্লাদের বিষয় যে এই ইমারতে আমা-
 দের একজন শিল্পনিপুণ দেশী কারিগরের হস্তচিহ্ন বিদ্যমান।
 রায় বাহাদুর মুকুন্দ রামচন্দ্র আসিফউল্লাহ এঞ্জিনিয়ার ইহার তত্ত্বাব-
 ধানে নিযুক্ত ছিলেন ও গ্যালারির উপরিভাগে যে সকল
 খোদিত মূর্ত্তি ঐ স্থানের শোভা সম্পাদন করিতেছে তাহা তাঁহা-
 রই হস্তে সংগঠিত। এই সকল মূর্ত্তি ব্রাহ্মণ, রাজপুত, মহা-
 রাষ্ট্রী, গুজরাতী বণিক, কচ্ছী, কাঠেওয়াড়ী, পারসী প্রভৃতি

বোম্বাইবাসী ভিন্ন ভিন্ন জাতি ব্যঞ্জক। এই স্তম্ভের ঘটিকাযন্ত্র হইতে সময়ে সময়ে তানলয়সমন্বিত শ্রবণমধুর ঘণ্টাধ্বনি বিনির্গত হয়। ইহার শিখরদেশ হইতে বন্দর ও সহরের সর্ব্বাঙ্গীন শোভা এক কটাক্ষে সন্দর্শন করা যায়। এই স্তম্ভ ও পুস্তকালয়ের জন্য শ্রীযুক্ত প্রেমচাঁদ রায়চাঁদ তাঁহার সেয়র-ব্যবসা সজ্জাত অগাধ রত্ন ভাণ্ডার হইতে চতুর্লক্ষ মুদ্রা দান করেন। এই স্তম্ভের নামে তাঁহার মাতার নাম ‘রাজাবাই’ চিরস্মরণীয় হইয়াছে।

এই সমস্ত বিশাল সুন্দর অট্টালিকামালা মুম্বাপুরীর গৌরব বর্দ্ধন করিতেছে। ইহাদের বিশেষ মাহাত্ম্য এই যে এই সকল ইমারত গবর্ণমেন্টেরই সর্ব্বাঙ্গীন দান নহে—পুরবাসীগণের বদান্যতা গুণে ইহাদের অনেকের জন্ম লাভ। এই ১৫ বৎসরের মধ্যে যে কোটি মুদ্রা গৃহাদি নির্মাণ কার্য্যে ব্যয় হইয়াছে তাহার প্রায় চতুর্থাংশ পৌর জনেরা নিজস্ব ধনকোষ হইতে দান করিয়াছেন।

বোম্বাই সহর কত শীঘ্র কি আশ্চর্য্য রূপে বাড়িয়া উঠিয়াছে তাহার প্রমাণ এই যে ১৮৬০ হইতে বিংশতি বৎসরের মধ্যে আবাদ, রাস্তা, সরকারী ইমারত লইয়া সর্ব্বশুদ্ধ প্রায় ৬ কোড় টাকা ব্যয় হইয়া গিয়াছে ও তৎকাল মধ্যে স্বাস্থ্য রক্ষা কার্য্যে মিউনিসিপালিটি প্রায় চতুষ্কোটি মুদ্রা ব্যয় করেন। ১৮৭২ হইতে ১৮৮৩ পর্য্যন্ত অন্যান্য ৩৯২৩ নূতন ইমারত নির্ম্মিত হয় ও তৎকাল মধ্যে প্রায় সাড়ে ছয় মাইল নূতন রাস্তা নির্ম্মিত ও চলাচলের জন্য উন্মুক্ত হয়। তদতিরিক্ত আবার দু মাইল

রাস্তার নির্মাণ কার্য অদ্যাপি চলিতেছে। এই সকল কার্যে যে প্রভূত অর্থ ব্যয় হয় তাহাতে কোন অপব্যয় ঘটে নাই তাহা বলা যদিও অসম্ভব কিন্তু ফলে বিশ্রী দুর্গন্ধ সঙ্কীর্ণ সহর স্বাস্থ্যকর সুন্দর পুরে পরিণত হইয়াছে তাহা অবশ্যই স্বীকার করিতে হইবে।

কলিকাতার Great Eastern-এর তুল্য এখানে কোন উৎকৃষ্ট হোটেল নাই তথাপি ভাল ভাল ইংরাজি দোকান অনেকগুলি আছে তন্মধ্যে ট্রীচারের দোকান নামাঙ্কিত। ট্রীচার বিশ্বসাম-ট্রীচার } গ্রীর ভাণ্ডার। এমন জিনিস নাই বা সেখানে পাওয়া যায় না। এই সকল দোকান দেখিলে আপশোষ হয় যে আমাদের লোকেরা দোকান সাজাইতে জানে না—বহিঃপ্রীতির প্রতি তাহাদের আদবে লক্ষ্য নাই। ইংরাজি দোকানের বাহিরে সাজসজ্জা এক প্রধান আকর্ষণ। ট্রীচারের দোকানের সুসজ্জিত দ্রব্যজাত যখন তাড়িতালোকে আলোকিত হয় তখন সে দৃশ্য কাহার না লোভনীয়? ভিতরে প্রবেশ করিয়া কয়জন লোক লোভ সম্বরণ করিতে সমর্থ হয়—অনেকেই দোকানদারের ফাঁদে পড়িয়া শীঘ্রই রিক্তহস্ত হন সন্দেহ নাই।

ক্রাফোর্ড } কেল্লা ও ময়দানের প্রবেশ পথে ক্রাফোর্ড
মার্কেট } মার্কেট। ষাঁহার নামে ইহার নামকরণ হই-
য়াছে তিনি কয়েক বৎসর বম্বের মিউনিসিপাল কমিসনর ছিলেন
তঁহারি যত্ন ও পরিশ্রমে এই মার্কেট নির্মিত। ইহার বাহ্য
শোভা বল, আভ্যন্তরীণ পরিচ্ছন্নতা শৃঙ্খলাই বল এদেশের আর

কোন মার্কেট ইহার কাছে দাঁড়াইতে পারে কি না সন্দেহ। যিনি এই হাটের রূপগুণ ভাল করিয়া দেখিতে ইচ্ছা করেন তিনি প্রাতঃকালে ৬, ৭ ঘট্টা বেলায় দেখিলে ফল ফুল তরকারি প্রাচুর্য্যে বিস্মিত হইবেন। নবম্বর হইতে মে মাস পর্য্যন্ত ফলের আমদানী। উৎকৃষ্ট লাল কদলী, চাঁপাকলা, বাতাবী নেবু, তরমুজ, খরমুজ, নাগপুরী কমলানেবু, ঔরঙ্গাবাদী ও কাবুলী আপুর, বঙ্গলোরের পাঁচ, মহাবলেশ্বরের ঝুঁবেরি, মস্কটের তাজা ও শুষ্ক খজুর, নারিকেল, আনার (দাড়িম), আঞ্জির (Fig), আতা, পাপিয়া, পেয়ারা ইত্যাদি ফল ভারে তথাকার ভাণ্ডার তখন পূর্ণ। কিন্তু ফলের রাজা আত্রের জন্য বম্বের বিশেষ খ্যাতি। বৈশাখ জ্যৈষ্ঠ মাসে তাহার আমদানী। আত্রের মধ্যে মজগামের আফুস সকলের সেরা। সমুদ্রতীরস্থিত রত্নাগিরি ও গোওয়াতেও ভাল ভাল আম জন্মে কিন্তু বোম্বাই আফুসের কাছে কেহই নয়। অনেক ইংরাজ এদেশীয় ফলের পক্ষপাতী নন—তঁাহারা বলেন এদেশীয় ফল অতিরিক্ত মিষ্ট—মধুরের সঙ্গে অন্য কোন তার মিশ্রিত নাই। তঁাহাদের মতে বিলাতী ঝুঁবেরির মত রুচিকর ফল এদেশে কুত্রাপি দৃষ্ট হয় না—তঁাহারা ঝুঁবেরি ও ক্ষীর মিলিত সুধার আশ্বাদ ভুলিতে পারেন না। আমি এই সকল ইংরাজকে বোম্বাই আফুস চাখিয়া দেখিতে পরামর্শ দি। আর এক কথা এই—একটু ভাবিয়া দেখিলে প্রতীতি হইবে আমাদের দেশের ফলের দ্বারা গরীব-লোকদের জীবিকা নির্বাহ হয়—আত্রের সময় আম খাইয়।

অনেকে উদর পোষণ করে, কলাও পুষ্টিকর—নারিকেল ফলে ক্ষুৎপিপাসা উভয়েরই নিরুত্তি হয় কিন্তু ইংলণ্ডের বেরি (ট্যাপারী) খাইয়া কতদিন জীবিত থাকা যায় ? আমাদের দেশে সুস্বাদু অথচ পুষ্টিকর কত প্রকার ফল আছে তাহাতে যাঁহাদের রুচি না হয় তাঁহাদের রুচি বিকৃত অবশ্যই স্বীকার করিতে হইবে । আমাদের সুগন্ধ পুষ্পের উপরেও অনেক ইংরাজের কটাক্ষ—জুঁই বেল বকুল চম্পকের স্ততীত্র আশ্রাণ ইংরাজ মহিলাদের অসহ—তাহাতে তাঁহাদের মাথা ধরে । এ বিষয় তর্কে মীমাংসা হইবার নয়—এইমাত্র বলা যাইতে পারে “ভিন্নরুচিহি লোকঃ ।” বোম্বাই মার্কেটে ফল ফুলের অভাব নাই । পুণা ও মফস্বলের অন্যান্য স্থান হইতে তরীতরকারিরও প্রচুর আগমনী ।

তুলার বাজার } ক্রাফোর্ড মার্কেটের পর একবার বম্বের তুলার বাজার দেখিয়া আসা কৰ্ত্তব্য । ইহা কেবল হইতে অর্দ্ধমাইল দূর কোলাবা প্রান্তে প্রায় দেড় মাইল স্থান ব্যাপিয়া অবস্থিত । বম্বের বাণিজ্য ঘটা দর্শনাভিলাষী জনের এই বাজার অবশ্য দর্শনীয় । এই স্থান হইতে দশ লক্ষাধিক তুলার বস্তা ভিন্ন ভিন্ন দেশে বার্ষিক রপ্তানি হয় । আমেরিকার New Orleans-এর নিচেই ইহা গণনীয় । দেওয়ালীর অবসান হইতে এই বাজারে তুলার আমদানী আরম্ভ ও মার্চ এপ্রেল মে এই তিন মাস ব্যবসাদারের ভরপুর সমাগম দৃষ্ট হয় । টুপীওয়ালা ইংরাজ বণিক, জরির শাল মণ্ডিত গুজরাতী সরাক প্রভৃতি নানাজাতীয়

লোক, নানা বর্ণের পরিচ্ছদ, ক্রয় বিক্রয়ের কোলাহল মিলিয়া তুলার বাজারে বস্বের বাণিজ্য-শ্রী মূর্তিমতী।

দিশি পাড়া} দিশি পাড়ার মধ্য হইতে পারেল পর্যন্ত চলিয়া গেলে অনেকানেক উচ্চ রঙ্গীন বাড়ীঘর পথিকের নয়ন পথে পতিত হয় কিন্তু বর্ণনাযোগ্য বিশেষ কিছুই নাই। বিষ্টোরিয়া ম্যুজিয়ম ও উদ্যান এবং এল্‌ফিনিফ্টন কালেজ ভয়খলার প্রধান অলঙ্কার। প্যারেলে গবর্ণমেন্ট হোম অধিষ্ঠিত কিন্তু তাহা কলিকাতার মত জমকাল বিরাট অট্টালিকা নয়। পরিশেষে আমার মিনতি এই দর্শকগণ এই সকল ইমারত দেখিয়াই যেন সন্তুষ্ট না থাকেন—দিশি পাড়াটা তন্ন তন্ন করিয়া পরীক্ষা করিয়া দেখা উচিত। এই গিরগাম কামাতীপাড়া খেতবাড়ী কান্ধে-বাড়ী প্রভৃতি স্থানের মধ্যে লক্ষ লক্ষ লোক বাস করিতেছে তাহাদের কেনা বেচা ঘরকন্না সব এইখানে। ইহার মধ্যে অনেক কোঁতূহলজনক নূতন জিনিস দেখিবার আছে—ম্যুনি-সিপাল বন্দবস্ত এই ভাগেই বিশেষ দ্রষ্টব্য। দোকান হাটের ক্রয় বিক্রয়, ট্রাম ঘোড়া ও গরুর গাড়ীর চলাচল, ও অসংখ্য জাতীয় লোক জনের সমাগমে এই স্থানেই সহরের জীবন্ত চলন্ত ভাব প্রতিবিম্বিত।

নবম পরিচ্ছেদ ।

মন্দির ।

হিন্দু মন্দির } মুম্বাতলাওএর সম্মুখস্থ কাংস্যবাজার হইতে
গিরগাম পর্য্যন্ত হিন্দু ও জৈন মন্দিরে সমাকীর্ণ । বোম্বায়ে যে
সকল হিন্দু মন্দির দৃষ্ট হয় তন্মধ্যে বালুকেশ্বর, মহালক্ষ্মী, মুম্বা
দেবী, নাগদেবী ও শ্রীব্যঙ্কটেশ অপেক্ষাকৃত প্রাচীন । তাহা-
দের বয়ঃক্রম প্রায় ২০০ বৎসর । ভিন্ন ভিন্ন সম্প্রদায়ী হিন্দু-
বসতি বিস্তারের সঙ্গে সঙ্গে তাহাদের উৎপত্তি । সে কালে এই
অল্প সংখ্যক কতকগুলি দেবমন্দির হিন্দুদিগের পূজার্কনার পক্ষে
যথেষ্ট ছিল । হিন্দু সংখ্যা বৃদ্ধি সহকারে নব নব মন্দির প্রতি-
ষ্ঠিত হইয়া নগরীর ভিন্ন ভিন্ন প্রদেশ অধিকার করিয়া লয় ।
স্মার্ট হইতে ইংরাজ রাজধানী বোম্বায়ে উঠিয়া আসিবার পর
অবধি ক্রমে বোম্বায়ের প্রজাপুঞ্জ বৃদ্ধি হইতে চলিল । ১৮৩৭
অব্দে মহা অগ্ন্যুৎপাতে স্মার্ট নগরী ভস্মসাৎ হওয়াতে অনেক-
কানেক বাসচ্যুত নিঃস্ব হিন্দু সন্তান উপজীবিকা অর্জনাশয়ে
সপরিবার বোম্বাই আসিয়া বাস করে । অনেকে বাণিজ্য ব্যবসা
সূত্রে বোম্বায়ে আকৃষ্ট হয় । পেশওয়া রাজ্য বিনষ্ট হইবার
পর পুণা, সাতারা ও দক্ষিণের অন্যান্য প্রদেশ হইতে মহারাষ্ট্রা-
দলের আগমন; কচ্ছ, মারওয়াড় ও দেশীয় রাজ সংস্থানের বিভিন্ন
প্রদেশ হইতে বণিক ও শ্রমজীবী লোকের সমাগম ইত্যাদি
कारणे बोम्बोये हिन्दु संख्या बल्लुण विस्तृत हईया सेई सण्णे

নানা সম্প্রদায়ের আরাধ্য দেব দেবীর মন্দির চতুর্দিকে ছড়াইয়া পড়ে। বৈষ্ণব ভাটিয়া ও বণিকদের ব্যয়ে জীবনলালের বল্লভাচার্য্য মন্দির, মারওয়াড়ীদের বালাজী ও জগন্নাথ মন্দির, স্বামী-নারায়ণ সম্প্রদায়ের মন্দির, নানকপন্থী কবীরপন্থী রাধাবল্লভী রামানুজ প্রার্থনা-সমাজ প্রভৃতি প্রত্যেক সম্প্রদায় নিজ নিজ ভজনালয় প্রতিষ্ঠা করিয়া স্ব স্ব মতানুসারে প্রার্থনা ভজন পূজনাদি অনুষ্ঠান করিয়া থাকে।

বালুকেশ্বর } প্রাচীন মন্দিরের মধ্যে বালুকেশ্বর অগ্রগণ্য। ইহা মালাবার শৈলের পশ্চিমে অবস্থিত। প্রবাদ এই যে রামচন্দ্র রাবণ-হৃত সীতাস্থমণে নিজ্জান্ত হইয়া এই স্থানে এক রাত্রি যাপন করেন। তাঁহার শিব পূজার জন্য ভাই লক্ষ্মণ প্রত্যহ বারাণসী হইতে নূতন শিবলিঙ্গ আহরণ করিয়া আনি-তেন। এই রাত্রে তিনি যথানির্দিষ্ট সময়ে উপস্থিত হইতে না পারাতে রাম অধৈর্য্য হইয়া বালুকা হইতে লিঙ্গ নিষ্কাশ পূর্ব্বক পূজার্চনা সমাধা করেন। এই ঘটনা হইতে এই মন্দিরের নাম বালুকেশ্বর। এক্ষণে তাহার মধ্যে যে শিবলিঙ্গের পূজা হয় তাহা বারাণসী হইতে সমানীত লিঙ্গ। কথিত আছে যে পোৰ্তুগীসদের আগমনকালে রামরচিত লিঙ্গ স্বেচ্ছ-দর্শনে সমুদ্রে ঝাঁপ দিয়া অদৃশ্য হইয়া যায়। এই স্থানে একটা সুন্দর ঘাট বাঁধান পুষ্করিণী আছে তাহার নাম বাণতীর্থ। রামচন্দ্র তৃষ্ণা-তুর হইয়া ভূমধ্যে বাণক্ষেপ করেন আর অমনি জলস্রোত উথ-লিয়া উঠে তাহা হইতেই এই জলাশয়ের জন্ম ও নামকরণ।

এই পুষ্করিণীর চারিধারে বড় বড় ছায়া বৃক্ষ, অনেকগুলি মন্দির, ধর্মশালা ও ব্রাহ্মণ বাসগৃহ দৃষ্ট হয়। সমুদ্রতীরস্থিত পাহাড়ে একটা ছিদ্র আছে তাহার মধ্য দিয়া গলিয়া যাইতে পারিলে হিন্দুর পাপক্ষয় হয় ও জনশ্রুতি এই যে শিবাজী রাজা এই উপায়ে পুণ্য সঞ্চয় করিয়াছিলেন। তিনি কৃশাঙ্গ ছিলেন তাঁহাকে ইহার জন্য অধিক কষ্ট ভোগ করিতে হয় নাই।

মসজিদ } কোলাবা হইতে মাহিম পর্য্যন্ত মুসলমানদের সর্ব-
শুদ্ধ প্রায় ৯০ মসজিদ ভিন্ন ভিন্ন স্থানে দৃষ্ট হয়। তন্মধ্যে আট মসজিদ বোরাদের, দুইটি খোজাদের, একটা মোগলদের জন্য নির্দিষ্ট। অন্যান্য মুসলমান বসতির মধ্যে যেরূপ, এখানেও সেইরূপ জুম্মা (শুক্রবার) মসজিদ সর্বপ্রধান। ইহা পুষ্করিণীর ধারে কাপড় বাজারের নিকট প্রতিষ্ঠিত। ইহা এক প্রাচীন মসজিদ ও ইহার বার্ষিক আয় প্রায় ৩০০০০ টাকা। শুক্রবার নামাজ ও বার্ষিক উৎসব ক্রিয়ার জন্য একজন প্রধান মুল্লা, প্রাত্যহিক উপাসনার জন্য অন্য একজন ধর্মযাজক, একজন মুয়েজ্জিন অর্থাৎ নিনাদক, উচ্চৈঃস্বরে লোকদিগকে উপাসনায় আহ্বান করা যাহার কাজ ও অন্যান্য কতকগুলি কর্মচারী এই মসজিদে নিযুক্ত। এই মসজিদে আরবী পারসী ও হিন্দুস্থানী শিক্ষার জন্য একটি বিদ্যালয় আছে। ধর্মশিক্ষা এই বিদ্যালয়ের প্রধান উদ্দেশ্য ও ইহার ব্যয় যত মহম্মদ আলি রোগের দাতব্য ফণ্ড হইতে নির্বাহিত হয়। এই প্রসিদ্ধ মুসলমান বণিক মসজিদের মেরামতে প্রায় এক লক্ষ

টাকা দান করেন। এতদ্ভিন্ন সত্তর, জাকারিয়া, হাজি ইস্মায়ল, মোগল, প্রভৃতি আর কতকগুলি নামাঙ্কিত মসজিদ আছে। তা'ছাড়া প্রত্যেক মুসলমান পাড়ার পৃথক্ পৃথক্ মসজিদ— তাহার ব্যয় নির্বাহের জন্য প্রতি মুসলমান গৃহস্থামীকে বার্ষিক এক টাকা করিয়া দান করিতে হয়। রমজান উৎসবে মুল্লার জন্য অর্থ বস্ত্র প্রভৃতি দান সংগৃহীত হইয়া থাকে।

পারসী } পুরীর ভিন্ন ভিন্ন ভাগে পারসীদের অগ্নিমন্দির
অগ্নি মন্দির } প্রতিষ্ঠিত তাহার সংখ্যা সব মিলিয়া ৩৩।
এতদতিরিক্ত ৯ টা মন্দির কতকগুলি শ্রীমন্ত পারসী পরিবারের নিজস্ব সম্পত্তি, তাহাতে সাধারণের বাইবার অধিকার নাই। এই সকল অগ্নি মন্দির তিন শ্রেণীতে বিভক্ত। প্রথম শ্রেণী আতস বেহরাম, দ্বিতীয় শ্রেণী আতস আদারগ অথবা অঘিয়ারি, তৃতীয় আতস দাদগা। এই সকল মন্দিরের নিৰ্ম্মাণ কোশল বিশেষ কিছুই নাই। মধ্য প্রকোষ্ঠে পূতাগ্নি প্রতিষ্ঠিত তাহার সংরক্ষণে একজন পুরোহিত নিযুক্ত, চন্দনকাষ্ঠ প্রভৃতি খোরাক যোগাইয়া নিরন্তর অগ্নি প্রজ্বলিত রাখা তাঁহার কাজ।

পারসী অগ্নিমন্দিরে অগ্নি প্রতিষ্ঠার যে নিয়ম তাহা কৌতু-
অগ্নি প্রতিষ্ঠা } হলজনক। যে সকল স্থানে অগ্নির জন্ম তথা
হইতে নানাজাতীয় অগ্নি সংগ্রহ করা হয়। বিদ্যুজ্জাত অগ্নি
আহরণ বিশেষ ফলদায়ক। কথিত আছে হোর্মসজি ওয়াডিয়ার
আতস বেহরামের জন্য বিদ্যুতাগ্নি কলিকাতা হইতে বহু কষ্টে
সংগৃহীত হয়। কলিকাতার অনতিদূরে বৃক্ষ বিশেষে বজ্রপাতের

সংবাদ পাইয়া নওরোজী বাঙ্গালী নামক একজন পারসী তথায় সত্বর উপস্থিত হইয়া তাহা হইতে এক তড়িদন্ধ শাখা সংগ্রহ করেন । কাষ্ঠ সংযোগে সেই অগ্নি অনেক দিন পর্য্যন্ত সংরক্ষিত হয়—পরে তাহা স্থলমার্গে পারসী হস্তে বহু যত্নে বোম্বায়ে প্রেরিত ও আতস বেহরামে স্থাপিত হয় ।

এই সকল নানাজাতীয় অগ্নি ভিন্ন ভিন্ন পাত্রে রক্ষিত হইলে পরে তাহা সংস্কৃত ও শোধিত হয় । অগ্নি সংস্কারের নিয়ম এই—অগ্নির উপর একটি দণ্ড বিশিষ্ট ছিদ্রযুক্ত চ্যাপটা ধাতুনির্মিত পাত্র অগ্নি সংস্কার } রক্ষিত হয় । এই পাত্রস্থিত স্তম্ভ চন্দন প্রভৃতি কাষ্ঠখণ্ড তলের অগ্নি সংযোগে দন্ধ হইয়া নবানল উদ্ভূত হয় । এই দ্বিতীয় অগ্নি হইতে তৃতীয়—তৃতীয় হইতে চতুর্থ এইরূপে নবম সংস্কারে যে অগ্নি প্রসূত হয় তাহাই পূতাগ্নি । এই প্রকারে প্রত্যেক জাতীয় অগ্নি সংস্কৃত হইলে সেই সমস্ত অগ্নি একটা বৃহৎপাত্রে রাশীকৃত হইয়া যথানির্দিষ্ট স্থানে প্রতিষ্ঠিত হয় ও সেই পূত ছতাসন আছতি লাভে অহর্নিশি প্রজ্বলিত থাকে ।

এইস্থলে পারসী শবস্তম্ভের উল্লেখ করা যাইতে পারে ।

পারসী } জীবন্ত পারসীর জন্য অগ্নিমন্দির ও মৃতের জন্য
শবস্তম্ভ } শবস্তম্ভ এই দুইটি পারসীদের পরম প্রয়োজনীয় বস্তু । যেখানে পারসী বসতি সেখানেই এই দুই জিনিস দেখিতে পাইবে । ম্যালাবার শৈলের উপর পারসীদের পঞ্চ শবস্তম্ভ প্রতিষ্ঠিত । সেই সকল স্তম্ভ প্রস্তরময় প্রাচীর বেষ্টিত

কতিপয় বিঘা (প্রায় ৮০০০০ গজ) ভূমি অধিকার করিয়া আছে। প্রাচীরের অভ্যন্তরে এক একটা অগ্নিমন্দির অধিষ্ঠিত। পারসী শব শুভ্রবসনে আচ্ছাদিত হইয়া পাহাড়ের উপর সমানীত হয়। আত্মীয় স্বজন বন্ধু শুভ্রবেশ ধারণ করিয়া শবের পশ্চাৎ জোড়ে জোড়ে গমন করে—দুই জনের মধ্যে এক এক করধৃত রুমাল ব্যবধান। পথিমধ্যে এক বিশ্রাম গৃহে শব স্থাপিত হয় ও তথায় উপাসনাদি হইয়া স্তম্ভে সমানীত হয়। স্তম্ভ প্রস্তরময়, ১৬, ১৭ হাত উচ্চ। প্রাচীরের একটি দ্বার দিয়া বাহকেরা প্রবেশ করিয়া দেহটিকে যথাস্থানে আনিয়া রক্ষা করে। স্তম্ভের উপর কোন ছাদ নাই—অন্তর্ভাগে প্রস্তরনির্মিত গোলাকার শ্মশানভূমি। সেই গোল চক্রের তিন স্তর ঢালা গড়ান ভাবে নামিয়া গিয়াছে। মধ্যে এক গভীর গর্ত। পুরুষের দেহ উপরিস্তরে—নারীদেহ মধ্যভাগে ও শিশুদেহ অধঃস্তরে স্থাপিত হয়। যথাস্থানে শবপ্রতিষ্ঠা করিয়া বাহকেরা চলিয়া যায়। একপাল শকুনী প্রাচীরের উপর বসিয়া শীকার প্রতীক্ষা করিতে থাকে দেহ নামাইবামাত্র তাহার উপর ঝাঁকিয়া পড়ে ও দুই ঘণ্টার মধ্যে মাংস নিঃশেষ ভক্ষণ করিয়া অস্থি মাত্র রাখিয়া যায়। কতকদিন পরে বাহকেরা ফিরিয়া আসে ও শুষ্ক অস্থি-খণ্ড সংগ্রহ করিয়া মধ্যবর্তী কুওয়ার মধ্যে নিক্ষেপ করে তাহা বায়ুয়ুষ্টির প্রভাবে ক্রমে লয় প্রাপ্ত হয়। এই সকল শুষ্ক অস্থি খণ্ড ব্যতীত শ্মশানে শবের আর কিছু অবশিষ্ট থাকে না। মৃত দেহের রসাদি নির্গমনের বিহিত উপায় কল্পিত হইয়াছে—

বালুকা ও কয়লার মধ্যদিয়া শোধিত হইয়া তাহা ভূগর্ভে প্রবিষ্ট হয় । পারসীগণ প্রাচীনকাল হইতে এইরূপ সমাধি ব্যবস্থা পালন করিয়া আসিতেছে । ইহার এক গুণ এই যে শ্মশানক্ষেত্র দুর্গন্ধ দূষিত বায়ু হইতে সুরক্ষিত । অপর গুণ এই যে মনুষ্যে মনুষ্যে সাম্যভাব ইহাতে বজায় থাকে ; ধনী দরিদ্র উচ্চনীচ সকলেরই অস্থি একস্থানে মিশিয়া যায় ।

পারসী ধর্ম গ্রন্থে আছে যে জীবাত্মা ৩ দিন পর্যন্ত মর্ত্য-লোক পরিত্যাগ করে না—চতুর্থ দিবসে ইহলোক হইতে অপ-স্থত হইয়া লোকান্তর গমন করে । সেই দিন পারসীরা সামর্থ্য উৎসাহ } অনুসারে মৃতের কল্যাণ উদ্দেশে দানাদি কার্য্য অনুষ্ঠান করিয়া থাকে । এই বিধির নাম ‘উৎসাহ ।’

হিন্দু ও পারসী যে মূলে একজাতি, ঘটনাক্রমে উভয় শাখা পরস্পর বিচ্ছিন্ন হইয়া পড়িয়াছে তাহা এই উভয় জাতির ভাষা ও ধর্ম, মত ও বিশ্বাস, আচার ব্যবহারের তুলনা হইতে স্পষ্ট প্রতীতি হয় । অন্ত্যেষ্টিক্রিয়ার সৌসাদৃশ্য হইতেও এবিষয়ের প্রমাণ সংগ্রহ করা বাইতে পারে । প্রেতাত্মার কল্যাণ উদ্দেশে হিন্দুদের শ্রাদ্ধ তর্পণের নিয়ম পারসী রীতি হইতে ভিন্ন নহে । পারসী সম্বৎসরের শেষ দশাহ প্রেতাত্মার জন্ম উৎসর্গীকৃত । এই দশ দিন গৃহের এক প্রকোষ্ঠ পরিষ্কৃত ও ফলফুলে সজ্জিত হইয়া প্রেতাত্মাদের প্রতি লক্ষ্য করিয়া প্রার্থনা বন্দনাদি অনুষ্ঠিত হয় । এই অনুষ্ঠানকে প্রবর দিগান মুক্তাদ } অথবা মুক্তাদ বলে । ঐ সময়ে প্রেতাত্মাগণ মর্ত্যধাম

দর্শনার্থে আগমন করেন ও সম্ভান সম্ভতিদিগকে আশীর্ব্বাদ করিয়া যান। যদি দেখেন আমরা তাঁহাদিগকে বিস্মৃত হই নাই তাহা হইলেই তাঁহারা সন্তুষ্ট।

অন্ত্যেষ্টিক্রিয়া সম্বন্ধীয় একটা অদ্ভুত রীতি পারসীদের মধ্যে প্রচলিত—সে কি না কুকুর দিয়া শবের মুখাবলোকন করা-সারমের } ইবার রীতি। কুকুরের দৃষ্টি শুভ দৃষ্টি। কুকুরে জীবাত্মাকে সৎপথ প্রদর্শন করিয়া স্বর্গধামে লইয়া যায় ও আহরিমানের অমঙ্গল চেষ্টা নিরাকরণ করে, এই তাহাদের বিশ্বাস। মহাভারতে যুধিষ্ঠিরের কুকুর সমভিব্যাহারে স্বর্গা-রোহণের যে আখ্যান বর্ণিত আছে পারসীক অন্ত্যেষ্টিক্রিয়া পদ্ধতির সহিত তাহার যোগ আছে এইরূপ কোন কোন পণ্ডি-তের মত।

দশম পরিচ্ছেদ।

উৎসব।

উৎসব } বোম্বায়ে হিন্দু মুসলমান পারসী খৃষ্টান প্রভৃতি বিভিন্ন সম্প্রদায়ের মধ্যে যে কত প্রকার উৎসবের উৎস উঠে তাহার অন্ত নাই। মুসলমানদের প্রধান উৎসব মহরম। মহরম } ইহা আলি ও ফতেমার পুত্রদ্বয় হসন হুসেনের শোচনীয় মৃত্যু স্মরণোদ্দীপক বার্ষিক উৎসব। দশ দিন ইহার বিস্মৃতি—দশম দিনে হুসেনের সমাধি মন্দির (তাবুৎ) সমুদ্রে

বিসর্জিত হয়। সিয়া মুসলমানদের বিশ্বাস এই যে আলীই মহম্মদের স্যায় সিংহাসনাধিকারী ইমাম। তাঁহার অভাগা পুত্রদ্বয়ের মৃত্যু স্মরণ করিয়া মহরমের সময় তাহাদের আর্তনাদের সীমা থাকে না। স্ত্রী মুসলমানেরাও মহরমে যোগ দেয় কিন্তু এ তাহাদের আনন্দোৎসব। এক দলের হাহাকারের মধ্যে অপর দলের মহোল্লাস। মহরমের সময় সিয়া স্ত্রীদের ঘোর দলাদলির মধ্যে শান্তিরক্ষা করা দুর্লভ ব্যাপার। আবার কখন কখন এই সময়ে হিন্দুর পরব আসিয়া পড়িলে হিন্দু মুসলমানের জাতীয় বৈর প্রজ্বলিত হইয়া মহা দাঙ্গা হাঙ্গাম বাধিয়া যায়। বোম্বায়ে যে মহরমের সময় শান্তিভঙ্গ হয় না সে কেবল পুলিশের লোকদের অনিবারিত বহু ও দক্ষতা গুণে। বোম্বায়ে সিয়া মুসলমান বিস্তর স্তবরাং এখানে যেমন মহরমের ধূম অশ্রুত্রে প্রায় সেরূপ দেখা যায় না। শেষ দিনে হুসেন বধ নাটক অভিনীত হইয়া থাকে। হুসেন তাঁহার সেনামণ্ডলী-পরিত্যক্ত ও অরিদলে বেষ্টিত হইয়া কয়েক জন বিশ্বাসী অনুচরের সহিত করবালা সমরক্ষেত্রে সমাগত। তাঁহার প্রিয়তমা ভগিনী ফতেমা তাঁহাকে যুদ্ধযাত্রা হইতে নিবারণ করিতে কাতর স্বরে কত অনুনয় করিতেছেন কিন্তু হুসেন কিছুতেই নিবারিত হইবার নহেন। তিনি বলিলেন “ঈশ্বরই একমাত্র ভরসা। আমার পিতা মাতা ভ্রাতা যেখানে গিয়াছেন আমিও তথায় তাঁহাদের পশ্চাদগামী হইব ইহাতে দুঃখ কি ?” তাঁহার বিশ্বাসী সঙ্গীগণ একে একে শত্রুহস্তে নিহত—সব শেষে হুসেনও তরবারি ও

বর্ষাঘাতে ক্ষতবিক্ষত হইয়া ভূতলে লুপ্তিত হইলেন । তাঁহার ছিন্ন মুণ্ড সেনাপতি সম্মুখে আনীত হইলে সেনাপতি মুখের উপর এক বেত্রাঘাত করিল । ইহা দেখিয়া একজন বুদ্ধ মুসলমান বলিয়া উঠিল “আহা ! এই মুখে আমি কতবার মহম্মদের চুম্বন দেখিয়াছি !” যে নাটকের কথা উল্লেখ করিয়াছি তাহা এই ঘটনা অনুসরণ করিয়া অভিনীত হয় । মহরম ভিন্ন মুসলমানদের কত পীরের মেলা ও উৎসব, হিন্দুদিগের কত পূজা পার্বন আছে । বোম্বাই মেলারই রাজ্য ।

হিন্দুদের উৎসব অনেকটা আমাদেরই মত—তথাপি কোন কোন অংশে প্রভেদ উপলব্ধি করা যায় । বাঙ্গালার দুর্গোৎসব এদেশীয় হিন্দুদের জাতীয় উৎসব বলিয়া মনে হয় না । যদিও নবরাত্রি উপলক্ষে কোন কোন হিন্দুগৃহে দুর্গাপূজা হয় ও গুজরাতী রমণীদিগের মধ্যে ‘গরবা’ গানের ধুম লাগিয়া যায় তথাপি ইহা বোম্বাইবাসীদের জাতীয় উৎসবের মধ্যে গণ্য হইতে পারে না । দশমীর দিন (দশাহরা) শারদোৎসবের দশাহরা } প্রধান দিন । সে দিন মুম্বাদেবী ও ভুলেশ্বর মন্দিরে দেবী দর্শনের মহাভীড়—হিন্দুগৃহে আত্মীয় স্বজন বন্ধুর পরস্পর দেখাসাক্ষাৎ, কোলাকুলি ও স্বর্ণছলে শমীপত্রের আদান প্রদান হইয়া থাকে । কথিত আছে পাণ্ডবেরা বিরাট রাজ্যে প্রবেশ কালে সেই দিন শমীরক্ষতলে অস্ত্র শস্ত্র রাখিয়া শমী পূজা করিয়াছিলেন । পাণ্ডবদের দৃষ্টান্তে এ অঞ্চলে বিজয়া দশমীতে শমী পূজার রীতি প্রচলিত । সিন্ধুদেশেও এই প্রথা প্রত্যক্ষ

করিয়াছি । গ্রামের বাহিরে লোকেরা শমী বৃক্ষতলে মিলিত
ও স্বর্ণ জ্ঞানে আগ্রহের সহিত শমীপত্রের আদান প্রদানে তৎপর
হয় । মহারাষ্ট্রদেশে দশাহরার বিশেষ মাহাত্ম্য । এই সময়ে
বর্গীরা শাস্ত্রার্চনা করিয়া মহা ধুমধামে যুদ্ধ যাত্রায় বাহির হইত ।
দশাহরায় অশ্ব সকল বিচিত্র ফুলহারে সজ্জিত হয় ও নীচ
জাতীয় লোকেরা মেষ মহিষাদি বলিদানে মাতিয়া যায় ।
ব্রাহ্মণদের মধ্যে প্রকাশ্যে বলিদান হয় না কিন্তু দেবী রুধির-
প্রিয়, গোপনে কি কাণ্ড হয় কে বলিতে পারে । তাহার দৃষ্টান্ত,
কারওয়ারে আমার একটি পরিচিত ব্রাহ্মণের বাটীতে দুর্গোৎসব
হইয়াছিল—উৎসবের পর সেই বাটীর এক ভৃত্য বালহত্যা
অপরাধে সেসন সোপর্দ হয় । বিচারস্থলে বালহত্যার কারণ
„এই বলা হয় যে গৃহিণী পুত্র সন্তান কামনা করিয়া ভবানীর
নিকট মানত মানিয়াছিলেন, নরবলী দানে দেবীর তুষ্টি সাধন
মানসে ভৃত্যকে দিয়া এই কাণ্ড করান । আরতীর সময়
বালকটিকে দেবীর সম্মুখে ধরা হইয়াছিল ও পরদিন প্রভাতে
গৃহ প্রাপ্তনে তাহার মৃত দেহ আবিষ্কৃত হয় । খুনের উদ্দেশ্য
চুরী নহে কেননা বালকের অঙ্গের আভরণ অক্ষত ছিল—অপর
কোন উদ্দেশ্যও প্রকাশ পায় নাই—বলি অনুমান নিতান্ত অমূলক
বলিয়া বোধ হয় না ।

দেওয়ালী } দশাহরার পর দেওয়ালী । তাহাই পুরবাসীদের
প্রধান উৎসব । এই উৎসবের বিশেষ গুণ এই যে ইহুদি ও
খৃষ্টান ভিন্ন অপর সাধারণ সকল সম্প্রদায়ের লোকে ইহাতে

যোগ দিয়া থাকে। হিন্দু মুসলমান পারসী সকলেই নিজ নিজ গৃহ দীপালোকে আলোকিত করিয়া দীপাবলীর উৎসবে মগ্ন হয়। ধন ত্রয়োদশী হইতে এই উৎসবের আরম্ভ ও অমাবস্যা শেষ। বঙ্গদেশে কালী পূজার সময় এই। কিন্তু এখানে এ উৎসবের অধিষ্ঠাত্রী দেবতা লক্ষ্মী, নৃগুণমালিনী শম্ভুবক্ষ-বিহারিণী লোলজিহ্বা কালী নহে। অমাবস্যার দিন বিক্রম সম্বৎসরের শেষ দিন, সেই দিনই উৎসবের প্রধান দিন। গৃহে গৃহে দীপমালায় গুম্বাপুরী সজ্জিত রঞ্জিত হইয়া ইন্দ্রপুরীর ন্যায় শোভন দৃশ্য ধারণ করে। সে দিন বণিকদের বহি-পূজনে মহা উৎসাহ। তাহারা তাহাদের পুরাতন হিসাব পত্র গুটাইয়া দান ধ্যান দেবার্চনা পূর্বক নবোৎসাহে নববর্ষের কার্য্যে প্রবৃত্ত হয়।

নারেল পুগন } আর একটি উৎসব বোম্বাইবাসীদিগের বিশেষ সেব্য তাহা শ্রাবণী পূর্ণিমা (নারেল পুগম)। এই সময় বর্ষা ঋতুর অবসান বলিয়া ধার্য্য। হিন্দুগণ ছোট বড় সকলে সাজ-সজ্জা করিয়া নারিকেল ও পুষ্পহস্তে সমুদ্রতীরভিমুখে বাহির হয়। ময়দান লোকে লোকারণ্য। এই সময় হইতে নাবিক-দের জন্য (দিশি নাবিক ; P and O Company নয়) সমুদ্র পথ উন্মুক্ত—শুভবাত্রা উদ্দেশে ফল ফুল উপহার দিয়া সমুদ্রের সাধ্য-সাধনা আরাধনা করিতে হয়। ব্যাক্বের তীরে লোকেরা ঝাঁকে ঝাঁকে সাগরার্চনায় সম্মিলিত হয়—পুরোহিত প্রস্তুত—চাউল হুধ নারিকেল প্রভৃতি মন্ত্রোচ্চারণ পূর্বক সমুদ্রে নিক্ষিপ্ত হয়।

তাহার সকলি যে বরুণদেবের ভোগে আইসে তাহা নয়। নারিকেল নিক্সিপু হইবামাত্র একদল কুলী তাহা সাঁতার দিয়া ধরিতে যায় ও কাড়াকাড়ি করিয়া যে পারে বরুণের ধন লুণ্ঠন করিয়া আনে। সমুদ্র তাহাতে বিরক্তি প্রকাশ করেন না—বরং অনেক সময় স্বয়ং উদার তরঙ্গ হস্তে তাহা কাঙ্গালীদের বিতরণ করেন। এদিকে ময়দানে মেলা বসিয়া যায়। মহাধূম। কোথাও খেলনা বিক্রী, কোথাও মিষ্টান্নের দোকান বসিয়াছে, কোথাও বা একদল পালওয়ানের মল্ল যুদ্ধ চলিতেছে ও মধ্যে মধ্যে জেতার প্রতি দর্শকমণ্ডলীর সাবাসধ্বনি উত্থিত হইতেছে। কোথাও একদল নর্তকী নৃত্য করিতেছে। কাঙ্গালীরা ভিক্ষা আদায়ের জন্য কতপ্রকার ফন্দি করিয়া বেড়াইতেছে। ওদিকে একজন গণক ঠাকুর হাত দেখিয়া শুভাশুভ গণিয়া দিতেছেন; তাহার ভাবভঙ্গী দেখিলে বোধ হয় যেন সত্যই দৈব শক্তি তাঁহাতে স্তম্ভিত। অন্যত্র নাগরদোলায় বালকেরা ঘুরপাক দিতেছে। নানাদিক হইতে লোকের যাতায়াত—সকলেই ছু দণ্ডের জন্য আমোদ আহ্লাদে যোগ দিতে তৎপর।

এতদ্ভিন্ন দোলযাত্রা—গণেশ চতুর্থী, নাগপঞ্চমী, গোঁকুলাস্টমী, রামনবমী প্রভৃতি আর যে সকল হিন্দুসব আছে তাহা আর কত বলিব? দোলযাত্রার (হোলির) যে আবীর ক্রীড়া নৃত্য গীত তাহা সর্বত্রই সমান, বর্ণনার আবশ্যক করে না। মহ্লামাররাও গাইকওয়াড় অত্যন্ত হোলিভক্ত ছিলেন। প্রবাদ এই যে তিনি একবার হাতির উপরে এক ক্ষুদ্র কামান রাখিয়া

তাহা হইতে একদল নর্তকীর উপর আবীর বর্ষণ করিয়াছিলেন সেই ভয়ঙ্কর পিচকারীর বলে এক বেচারীর প্রাণ সঙ্কট উপস্থিত। এখন আর এরূপ অত্যাচার ক্ষত হওয়া যায় না। চড়ক পূজার আত্মনির্ঘাতন পর্য্যন্ত নিবারণিত হইয়াছে। এখানকার ঠাকুর দেবতা প্রায় সকলেই কুংসিং কদাকার, আমাদের বাবু-বেশধারী ময়ূর-বিহারী কার্তিকের মুখশ্রী ছল্ভ-দর্শন। দেখা যায় এদেশে ময়ূর সরস্বতীর বাহন। নাট্যাভিনয়ের প্রারম্ভে মধুরহাসিনী মিষ্টভাষিনী ময়ূরাসনা বীণাপাণি নৃত্য করিতে করিতে রঙ্গভূমিতে অবতীর্ণ হন। রামকিঙ্কর হনুমানু সাধারণের উপাস্ত্র-দেবতা—মারুতি-মন্দির যেখানে সেখানে দৃষ্টিগোচর হয়। গণেশ চতুর্থীর উৎসবে এপ্রদেশে সামান্য কাণ্ড হয় না। আমি দেখিতে পাই এদেশে গণেশ ঠাকুরের বিশেষ সম্মান। গ্রামে গ্রামে গণপতির মন্দির ও গণেশ চতুর্থীর সময় গজানন-মূর্ত্তি-পূজা ও বিসর্জনের মহা ঘট। গণেশের সম্মানার্থে স্বতন্ত্র উৎসব বঙ্গদেশে নাই। ভ্রাতৃ দ্বিতীয়াকে এদেশে যম দ্বিতীয়া বলে। ভাই বোনের মেলামেশা ও সদ্ভাব বর্দ্ধন এ উৎসবের উদ্দেশ্য। ভ্রাতা ভগ্নী-গৃহে ভোজনার্থে গমন করে। ভগ্নী ভায়ের কপালে তিলক দিয়া তাঁহাকে বরণ করে—অনন্তর ধনরত্ন উপহার দানে ভগ্নীর যত্নের প্রতিদান ও পরিতোষ সাধন করিতে হয়।

একাদশ পরিচ্ছেদ ।

এলিফান্টা ।

এলিফান্টা অথবা } যিনি বোম্বায়ে বেড়াইতে আসিয়াছেন
ঘারপুরী } তিনি গজদ্বীপ (এলিফান্টা) না দেখিয়া

যেন বাড়ী না ফেরেন । এলিফান্টার অপর নাম ঘারপুরী । এই দ্বীপে যে সকল গুহামন্দির আছে তাহা প্রস্তরময় পাহাড় খুদিয়া নির্মিত । চতুর্শ্মন্দিরের মধ্যে একটাই প্রধান তাহাই বিশেষ দ্রষ্টব্য । আপলো বন্দর হইতে ষ্টীমারে করিয়া এলিফান্টা দ্বীপ একঘণ্টায় যাওয়া যায় । বন্দর বোটে করিয়া গেলে আর একটু বেশী সময় লাগে । এই রকম একটা বোটে অনুকূল জ্বায়ুভরে পাল তুলিয়া যাওয়াতে আরাম বটে কিন্তু বাতাস বন্ধ ও শ্রোত প্রতিকূল হইলে বোটে যাওয়া আসা অনেক ঘণ্টার ধাক্কা । যাত্রীদের সুবিধার জন্য বড় বড় পাথর ফেলিয়া সমুদ্রতীর হইতে গুহামুখ পর্য্যন্ত এক সোপান পথ প্রস্তুত কিন্তু ভাঁটার সময় নৌকা কাছে ঘেঁসিতে পারে না—তীর হইতে অনেক দূরে রাখিতে হয় । নামিবার স্থানে পূর্বকালে একটি হস্তীর বিশাল পাষাণ প্রতিমূর্তি ছিল তাহা হইতেই পোর্ভুগীস লোকেরা এই দ্বীপের নামকরণ করিয়াছে । দ্বীপে এই প্রতিমূর্তির চিহ্নমাত্রও এইক্ষণে দৃষ্ট হয় না, তাহার ভগ্নাবশিষ্ট পিণ্ড বিষ্টোরিয়া উদ্যানে উঠাইয়া রাখা হইয়াছে । সোপানপরম্পরা হইতে উপরে উঠিয়া গুহামন্দিরের সম্মুখস্থ প্রাঙ্গণে উপ-

নীত হওয়া যায়। তথা হইতে কয়েক ধাপ উচ্চে উঠিলে সম্মুখে স্তনীল সমুদ্র, সমুদ্রের ক্রোড়ে কশাই দ্বীপ ও দূরে অর্ণব-পোতপূর্ণ বোম্বাই বন্দর পর্য্যন্ত অতি মনোহর স্তন্দর দৃশ্য আবিষ্কৃত হয়। গুহার প্রবেশ দ্বারটি বেশ বড় ও সারি সারি চারি থাক স্তম্ভের মধ্য দিয়া প্রধান মন্দিরে প্রবেশ করা যায়। এই সকল স্তম্ভ প্রকাণ্ড প্রস্তরময় ছাদ-ভার বহন করিতেছে। স্তম্ভের সংখ্যা ছোট বড় মিলিয়া দ্বাচত্বারিংশৎ। তাহার কয়েকটি ভগ্নদশাপন্ন। মন্দিরের প্রবেশ দ্বার হইতে শেষ পর্য্যন্ত প্রায় ১৩০ ফীট দীর্ঘ ও পূর্বদ্বার হইতে পশ্চিম দ্বার পর্য্যন্ত ততটা প্রস্থ।

এই মন্দির এইক্ষণে নিত্যনিয়মিত পূজার কার্য্যে ব্যবহৃত হয় না—যবনদের দৌরাত্ন্যে অনেক কাল পরিত্যক্ত হইয়াছে। তথাপি কোন কোন শৈব উৎসবে তথায় হিন্দুযাত্রী সমাগত দেখা যায় ও শিবরাত্রির সময় এক হিন্দুমেল্লা প্রবর্তিত হয়। এলিফান্টা যে শৈব মন্দির এই মেলার প্রচলনই তাহার প্রমাণ কিন্তু তাহার আরো স্পষ্ট প্রমাণ মন্দিরের অভ্যন্তরেই প্রাপ্ত হওয়া যায়। ইহার মধ্যে যে সকল খোদিত মূর্তি বিদ্যমান তাহার অধিকাংশই শৈব মূর্তি। মন্দিরে প্রবেশ করিবামাত্র এই সকল পাষাণ মূর্তি ‘আধো আলো আধো ছায়া’র মধ্য হইতে দৃষ্টি পথে পতিত হয়। চতুর্দ্বারবিশিষ্ট একটা প্রকোষ্ঠে শিবলিঙ্গ প্রতিষ্ঠিত। এই প্রকোষ্ঠের বাহিরের চারিদিকে দ্বারপালগণ পিশাচের উপর ভর দিয়া দণ্ডায়মান। উত্তর দিক

হইতে প্রবেশ করিয়া সম্মুখে ব্রহ্মা বিষ্ণু মহেশ্বরের ত্রিমূর্তি দৃষ্ট
 ত্রিমূর্তি } হয়। ব্রহ্মার গম্ভীর প্রশান্ত মূর্তি বিষ্ণু ও মহাদেবের
 মধ্যে বিরাজিত। তাঁহার এক হস্তে সন্ন্যাসীর পান পাত্র।
 বক্ষের অলঙ্কারের শিল্পনৈপুণ্য প্রশংসনীয়। ব্রহ্মার বামে বিষ্ণু
 দক্ষিণ হস্তে প্রস্ফুটিত পদ্ম ধারণ করিয়া আছেন; দক্ষিণে মহে-
 শ্বর—তাঁহার হাস্যদৃষ্টি করস্থিত ফণীফণার উপর নিপতিত।
 নরকপাল ও বিল্বপত্র তাঁহার শিরোভূষণ।

অর্দ্ধনারীশ্বর } ত্রিমূর্তির দক্ষিণে অর্দ্ধনারীশ্বর। বামার্দ্ধ গৌরী
 ও দক্ষিণার্দ্ধ মহাদেবের মূর্তি। মহাদেবের চারি হস্তের এক
 হস্ত নন্দী শৃঙ্গোপরি স্থাপিত। এই মূর্তির দক্ষিণে হংসবাহন
 চতুর্মুখ ব্রহ্মা ও বামে গরুড়বাহন বিষ্ণু। গরুড় এইক্ষণে ছিন্ন
 মস্তক। উপরিভাগে ও পশ্চাতে অগাণ্য দেব দেবদেবগণ
 বিরাজ করিতেছে। ইন্দ্রদেব ঐরাবত পৃষ্ঠে আসীন।

হরপার্বতী } ত্রিমূর্তির বামে হরপার্বতীর বিশাল মূর্তিদ্বয়।
 হরশির হইতে গঙ্গা বনুনা সরস্বতী অভ্যুদিত। মহাদেব
 দণ্ডায়মান—তাঁহার বাহু চতুর্কটের এক বাহু জনৈক পিশাচের
 উপর স্থাপিত তাহার ভারে যেন সে অবনত হইয়া পড়িয়াছে।
 শিবের দক্ষিণে তাঁহার অগাণ্য অনুচরগণ, তত্বপরি ব্রহ্মা ও
 শিবের মাঝে ঐরাবত-বাহন ইন্দ্র। পার্বতী শিবের দিকে
 ঝুঁকিয়া এক পিশাচীর উপর বাহু হস্তে ভর দিয়া আছেন, তত্ব-
 পরি গরুড়াসীন বিষ্ণু। সর্বোপরি ছয়টি মূর্তি তাহার দুইটি
 নারী অন্যগুলি নরমূর্তি।

ত্রিমূর্তির আরো একটু বামস্থিত পশ্চিম প্রকোষ্ঠে হরপার্ব-
 হরপার্বতীর } তীর বিবাহ সভায় উপনীত হইবে। একজন
 বিবাহ } পুরোহিত লজ্জাশীলা বধূকে আগু বাড়াইয়া
 দিতেছেন।

গণেশ } অপর দিকের প্রকোষ্ঠে গণেশ জন্মের অভিনয়।

হরপার্বতী কৈলাস পর্বতে একাসনে উপবিষ্ট—আকাশ
 হইতে তাঁহাদের উপর দেবগণ পুষ্পরষ্টি করিতেছেন। পার্বতীর
 পশ্চাতে একটি বামা একটি শিশু কোলে করিয়া আছে।

কৈলাসতলে } দক্ষিণ হইতে উত্তর মুখে ফিরিয়া অন্য এক
 রাবণ } প্রকোষ্ঠে দেখিবে রাবণ কৈলাস পর্বত সরা-

ইয়া লঙ্কায় লইয়া যাইবার উদ্যোগ করিতেছেন। কৈলাস
 গতিদূরে অবস্থিত বলিয়া রাবণের শিব-পূজার ব্যাঘাত হয়
 তাই তাহা উঠাইয়া নিজ পুরীতে লইয়া যাইবার চেষ্টা।
 এদিকে কৈলাস পর্বত কম্পমান দেখিয়া পার্বতী ভয়ে জড়-
 সড়। মহাদেব তাঁহার পদাঙ্গুলি দ্বারা রাবণের শিরোপরি
 পর্বত এমন জোরে চাপিয়া ধরিলেন যে তাহার তলে দশানন
 দশসহস্র বৎসর চাপা পড়িয়া থাকেন অবশেষে ব্রহ্মার পুত্র
 পুলস্ত আসিয়া তাঁহার উদ্ধার করেন।

ইহা হইতে পশ্চিম দিকের প্রকোষ্ঠে গমন করিলে দক্ষযজ্ঞ
 দক্ষযজ্ঞ } বৃত্তান্ত খোদিত দেখা যায়। অষ্টভুজ কপালমাল
 রুদ্রমূর্তি বীরভদ্র দক্ষনিধনে নিযুক্ত—তাঁহার উপরিস্থিত এক
 লিঙ্গের চতুর্দিকে উপবিষ্ট দেবগণ হত্যাকাণ্ড সভয়ে দর্শন

করিতেছেন । এই লিঙ্গের উপর একটি আকার আছে কোন কোন পণ্ডিত বলেন যে তাহা ওঁ কার প্রতিপাদক চিহ্ন ।

ভৈরব ও মহাযোগী } আরো কতক পা চলিয়া গেলে প্রবেশ
দ্বারের কাছাকাছি মহাদেবের অষ্টভুজ ভৈরব মূর্তি ও যোগাসন-
স্থিত মহাযোগী এই মূর্তিদ্বয় দৃষ্ট হইবে ।

এই সকল খোদিত মূর্তি কল্পনা-যানে আমাদিগকে দেব-
সভায় উপনীত করে । কোথাও দ্বারপালগণ বষ্টিহস্তে পিশাচ
সঙ্গে দণ্ডায়মান—কোথাও হর-পার্বতীর বিবাহোৎসব—
কোথাও তাঁহাদের কৈলাসে ঘরকন্না—কোথাও মহাদেব ভূতগণ
সাথে তাণ্ডব নৃত্যে উন্মত্ত—কোথাও তিনি রুদ্রমূর্তি কপালভৃৎ—
কোথাও বা ধ্যানমগ্ন মহাযোগী—কোন স্থানে দেখিবে কমল-
বাহন ব্রহ্মা—কোন স্থানে শঙ্খচক্রধারী বিষ্ণু—কোথাও ঐরা-
বতপৃষ্ঠে ইন্দ্রদেব, গণেশ, কার্তিক, কামদেব—তিলকধারী জটায়ু,
কৈলাসশিখরতলে রাবণ—কোথাও গঙ্গা লক্ষ্মী সরস্বতী মূর্তি-
মতী । দুঃখের বিষয় যে খোদিত মূর্তি সকল প্রায় সকলি
বিকলাঙ্গ অথবা সম্পূর্ণ রূপে অঙ্গহীন । কালের হস্তে এই
মন্দির ততটা ক্ষতিগ্রস্ত হয় নাই—দুর্দান্ত মুসলমানদের অত্যা-
চারেও ইহার অনিষ্টসাধন হয় নাই—ইহার যে এই দুর্দশা
পাশ্চাত্য যবন দানবের উৎপীড়নই তাহার কারণ । এই
মন্দির পূর্ণ যৌবনে যে কি সুন্দর ছিল তাহার চিত্র কল্পনাতেই
রহিয়া যায় ।

জন্মকাল } এলিফান্টার জন্মকাল নির্ণয় করা সহজ নহে ।

ইহার প্রবেশ পথে যে শিলালেখ্য ছিল তাহা পোর্তুগীস রাজা-জায় লিসবনে প্রেরিত হয়—সে সময়ে সে লেখা পাঠ করিয়া কেহই অর্থ করিতে পারে নাই । ইহা এই মন্দিরের প্রাচীনত্বের এক প্রমাণ । সকল দিক্ বিবেচনা করিয়া ইহার বয়ঃক্রম সহস্র বৎসর অবধারিত করা যাইতে পারে ।

রাত্রিতে এই গুহামন্দির আলোকিত হইলে সুন্দর দেখায় ।

যুবরাজের } যুবরাজ প্রিন্স অফ ওয়েল্‌স্ যখন বোম্বায়ে আগমন
আগমন } করেন তখন তাঁহার সম্মানার্থে এলিফান্টা দ্বীপে
এক ভোজ দেওয়া হয় সেই উপলক্ষে গুহাভ্যন্তর দীপালোকে
সুন্দর রূপে রঞ্জিত হইয়াছিল । মন্দ নয় । শৈবমন্দিরে স্নেচ্ছ
ভোজ—না জানি দেবদেবীগণ কি ভাবে এই অঘোরকৃত্য নিরী-
ক্ষণ করিতেছিলেন !



সিংহলে ভ্রমণ বৃত্তান্ত ।

১২ আশ্বিন, মঙ্গলবার ১৭৮১ শক ।

দুই প্রহরের পঁচিশ মিনিট পূর্বে কলিকাতা ছাড়িয়া চলিলাম । ছাড়িতে না ছাড়িতেই ঘোর ঘটা করিয়া বৃষ্টি আরম্ভ হইল । আমারদের সঙ্গে প্রিয়স্বহৃৎ কেশব বাবু আর কালীকমল বাবু ; তাঁহারা বাষ্পীয় নৌকাতে চড়িয়া তাহার কুঠরির এক কোণে লুকাইয়া রহিলেন । সেখান হইতে উপরে কোন বাঙ্গালিকে দেখিবা মাত্র বাড়ীর লোক মনে করিয়া চমকিয়া উঠিতে লাগিলেন । সকলের চক্ষে ধূলি দিয়া তাঁহারা যে প্রকারে আমাদের সমভিব্যাহারী হইলেন, তাহাতে যে তাঁহারা সর্বদাই সশক্তিত থাকিবেন, তাহার আর আশ্চর্য্য কি ? আর দিন কতক পরেই কেশব বাবুর যে সমস্ত গুরুতর ভার লইতে হইবে, তাঁহার অপটু শরীর কেবল উল্টাডিম্বির দুর্গন্ধ-পূর্ণদূষিত বায়ু সেবন করিয়া সে সমস্ত ভার বহনে কখনই সমর্থ হইত না । ঈশ্বরের নিকটে প্রণত হইতেছি, যে তিনি তাঁহাকে এখানে নির্বিরমে আনিয়াছেন । অদ্যকার দিনের মধ্যে আর কোন বিশেষ ঘটনা হয় নাই ; গঙ্গার যে রমণীয় সূদৃশতা, তাহা অন্য কোন সময়ে যদিও নিতান্ত প্রমোদকর হইত, কিন্তু এক্ষণে সমুদ্রকে মনে করিয়া আর তাহাতে মন যায় না । গঙ্গার স্নানিঞ্চ বায়ু সেবন করিতে করিতে আমাদের সায়ংকাল গত হইল ।

১৩ আশ্বিন, বুধবার ।

প্রত্যুষে ৪ ঘণ্টার সময় উঠিয়া সাজ সজ্জা করিতেই বেলা হইল । বেলা ৯টার পর আমাদের বাষ্পীয় নৌকা লোঙ্গর উঠাইয়া চলিল । অদ্যকার গঙ্গা অতীব প্রশস্ত—সমুদ্রের কিছু কিছু ভাব পাওয়া যায় । গঙ্গা গোলাকৃতি হইয়া চতুর্দিকেই গগনকে স্পর্শ করিতেছে । এক এক দিকে তাহার তীর কেবল রেখার ন্যায় প্রতীয়মান হইতেছে । আজও বৃষ্টি । বৃষ্টির সময় আকাশ আর গঙ্গা একাকার হইয়া যাইতেছে । আমরা রৌদ্রের মধ্যে থাকিয়া সম্মুখে দূরেতে বৃষ্টির পতন দর্শন করিতে করিতে অচিরাতঃ রৌদ্রকে পশ্চাতে রাখিয়া বৃষ্টি-রাশির মধ্যে প্রবেশ করিলাম । ক্রমে সমুদ্রের লক্ষণ প্রকাশ পাইতেছে । কলম্বস যেমন সমুদ্র মধ্যে তটের নানা চিহ্ন দেখিয়া কোন এক নূতন দেশ প্রতীক্ষা করিতেছিলেন ; আমরাও সেইরূপ আগ্রহের সহিত সমুদ্রকে প্রতীক্ষা করিতেছি । এক্ষণে যেন গঙ্গার সমুদ্র—ক্রমে তাহার সীমা-চিহ্ন বিলীন হইতেছে । এখন যে দিকে নেত্রপাত করা যায়, সেই দিকে তরঙ্গময় জল-রাশি ভিন্ন আর কিছুই দেখা যায় না ; কেবল আমাদের অগ্রপশ্চাতঃ এক এক খানা জাহাজ নয়নের সম্মুখে পড়িতেছে । ক্রমে জলের বর্ণ পরিবর্ত হইতেছে । ঘোলা বর্ণ, সবুজ বর্ণ, গাঢ় সবুজ, এই তিন প্রকার বর্ণ একে একে দেখা যাইতেছে । কতক দূরে নীল রেখা । আশ্চর্য্য ! আশ্চর্য্য ! গঙ্গার ঘোলাজল একেবারে স্নিগ্ধ্যাগ করিলাম । এক্ষণে গাঢ় সবুজ, সে নীলবর্ণ আর

দেখা যায় না। গঙ্গার স্থলীল ভাব আর নাই ; সমুদ্রের তরঙ্গ উঠিতেছে, আমাদের বাষ্পীয় নৌকাকে অস্থির করিতেছে। আঃ ! সমুদ্রের কি উদার মূর্তি ! আমি বিশেষ করিয়া দেখিলাম, সমুদ্র দেখিয়া অনন্তভাব কতদূর উদয় হয়। চক্ষু তরঙ্গের উপর তরঙ্গ হইতে বহুদূরে প্রসারিত হয় এবং ততদূরে গিয়া নিবৃত্ত হয়, যেখানে সমুদ্র আকাশ আর মেঘাবলিকে স্পর্শ করিয়াছে ; যেখানে চক্ষু নিবৃত্ত হয়, মন তাহা হইতেও অগ্রগামী হইয়া আরো ধাবমান হয় ; এই রূপে অনন্ত ভাবের উদ্বোধন হইতে থাকে।

সন্ধ্যার সময় সমুদ্র আরো গম্ভীর ও উদার ভাব ধারণ করিল। একে গাঢ় তিমির ; তাহাতে নীল সমুদ্র—তাহার উপরে তাহার শুভ্র ফেন কি আশ্চর্য্য রূপে শোভা পাইতেছে। মেঘদূতে এক স্থানে গঙ্গার ফেনকে তাহার হাস্য রূপে বর্ণিত আছে, কিন্তু এই সময়ে স্থলীল সমুদ্রের ফেনকেই তাহার অপূর্ব্ব হাস্যের মত দেখা যাইতেছে। আমরা অগাধ সমুদ্রের গর্ভে আসিয়াছি। এক্ষণে আকাশ আর সমুদ্র ! বোধ হইতেছে যেন সমুদ্র ভিন্ন আর কিছুই সৃষ্টি হয় নাই।

১৪ আশ্বিন, বৃহস্পতিবার।

অদ্য প্রত্যুষে উঠিয়া সমুদ্রকে দেখিলাম, একেবারে গাঢ় নীলবর্ণ। এমত নীলবর্ণ কল্পনাও করা যায় নাই। গাঢ় নীল ! তাহার নিকটে নীল আকাশ ফীকা হইয়া যায়। বাষ্পীয়-

নৌকা সমুদ্রের গর্ভ বিদারণ পূর্বক যেমন দ্রুত বেগে চলিতেছে, তেমনি তরঙ্গ উঠিয়া তাহার নীল জলকে সবুজ করিয়া দিতেছে, এবং তাহার সহিত শুভ্র ফেন মিশ্রিত হইয়া শোভা পাইতেছে। সূর্য্যকিরণে সমুদ্রের লহরী সকল চক্‌মক্‌ করিতেছে। সমুদ্রের উপরে এক একবার পক্ষযুক্ত মৎস্য-দল দলবদ্ধ হইয়া অল্প অল্প উড়িয়া যাইতেছে; হঠাৎ দেখিলে বোধ হয় যেন পক্ষীরা সমুদ্রের উপরে আহার অব্ধেণে উড়িয়া বেড়াইতেছে। যদিও সমুদ্রের এই শোভা দেখিয়া মনের উল্লাস হইতেছে, তথাপি নৌকার দোলাতে প্রাতঃকাল অবধিই আমার গা বমি বমি করিতেছে। ইহাকেই বলে নমুদ্রপীড়া। আর কিছুই ভাল লাগে না। এক্ষণে কোথায় বা শোভা! কোথায় বা সমুদ্র দর্শন! কোথায় বা আমোদ! এখন সকলই শুষ্ক—সকলই নীরস। সমস্ত দিনই অস্থখে গেল, রাত্রিতে নৌকার কুঠরির মধ্যে বদ্ধ হইয়া রহিলাম।

১৫, ১৬, ১৭ আশ্বিন; শুক্র, শনি, রবিবার।

কিছুই ভাল লাগে না। সমুদ্রের সঙ্গে বড়ই বিরোধ উপস্থিত হইয়াছে। সমুদ্রের নাম শুনিলে, সমুদ্রের উপরে দৃষ্টি করিলে, সমুদ্রের ভাব স্মরণ করিলেও বমি আইসে। আমার সকল অপেক্ষা ছুরবস্থা; কিন্তু কালীকমল ভায়া যেমন তেমনি। শয্যা হইতে উঠিবার সময় শরীরকে আর কোন ক্রমে উঠাইতে পারা যায় না; সমুদ্র জলে স্নান করিয়া আরো অবসন্ন হইয়া

পড়িতে হয় ; আহারের সঙ্গে কোন সম্পর্কই নাই । বড় কষ্ট ! বড় কষ্ট ! আমাকে কেহ জাহাজের উপর হইতে জলে ফেলিয়া দেয় সেও স্বীকার । সমুদ্রে আসিতে কাহাকেও আর পরামর্শ দিতে পারি না । কোন্ দিক্ দিয়া যে কি হইতেছে, কিছুই দেখিতে পাই না ।

১৮ আধিন, সোমবার ।

আমরা তো এত কষ্ট ভোগ করিতেছি, কিন্তু আমাদের জাহাজের আর বিশ্রাম নাই । এর আর রাত্রি দিন বিচার নাই, চলিতেছেই চলিতেছেই—‘ন দিবা ন রাত্রি ন বায়ু বৃষ্টি’ । কত ভয়ানক ভয়ানক তরঙ্গ ইহাকে গ্রাস করিতে আসিতেছে, কিন্তু ইহার কিছুতেই কিছু হয় না । কি আশ্চর্য্য ! এমন অগাধ সমুদ্রের মধ্য দিয়া আমরা কেমন নির্বিঘ্নে নিঃশঙ্ক হইয়া যাইতেছি । এমন যে ভয়ানক সমুদ্র, এও আমাদের কলিকাতার পথের মত আয়ত্ত হইয়াছে । দেশ কালের উপরেই বা মনুষ্যের কি আধিপত্য প্রকাশ পাইতেছে । বিজ্ঞান-বলই বল । আমরা এক্ষণে পরিচালকদিগের হস্তে আমাদের ধন প্রাণ সমর্পণ করিয়া নিশ্চিন্ত আছি । বিশ্বাসের এগনি আশ্চর্য্য গুণ ! আমরা নিশ্চয়ই মনে করিতেছি যে ইহারা আগারদিগকে গম্যস্থানে পৌঁছিয়া দিবে । ইহাদের কেহই যদি না থাকে, আর আমরা সকলেই থাকি, এবং এই বাষ্পীয় নৌকার উপরেও যদি অধিকার হয়, তথাপি আমাদের কি দুর্দশা ! আমরা ইহাকে কোন্ দিক্ দিয়া কোন্ সমুদ্রের গুপ্ত পাহাড়ের

উপরে চূর্ণ করিয়া ফেলি, বলা যায় না। কেবল এক বিশ্বাসের উপরে আমাদের এত নির্ভর! কাপ্তেন সাহেব এবং অন্যান্য লোকের সঙ্গে আমারদের ব্রাহ্মধর্মের কথা হইল। তাহারা মনে করে যে আমরা পৌত্তলিকতা পরিত্যাগ করিয়া খ্রীষ্টান ধর্মের অভিমুখে এক পদ অগ্রসর হইয়াছি। তাহারা অবগত নহে যে তাহাদের দেশস্থ ব্যক্তির মধ্যে অনেকে আমাদের দিকেই আসিতেছে। গত তিন দিবস অপেক্ষা অদ্য অনেক স্বস্থ হইয়াছি। আমরা এক্ষণে কেবল ডাঙ্গা! ডাঙ্গা! করিয়া ব্যস্ত হইতেছি। নীল আকাশ আর ঘননীল সমুদ্র সমানবর্ণ হইলে তাহাদের সীমাচিহ্ন দেখা যাইত না—উভয়ই মিলিয়া থাকিত। সমুদ্রের শোভা সন্দর্শন করিতে অদ্য ইচ্ছা হইতেছে। সূর্যের অন্ত-গমন নিরীক্ষণ করিয়া দেখিলাম। সমুদ্রের মধ্যেই যেন সূর্যের নিলয়—সমস্ত দিবস সে ঈশ্বরের কার্যে ব্যাপ্ত থাকিয়া এক্ষণে বিশ্রাম করিতে গেল। সমুদ্র স্বীয় গর্ভে তাহাকে স্থান দান করিলেন। সূর্য এক্ষণে স্বকীয় রাজবেশ পরিত্যাগ করিয়া এবং সমস্ত মহিমা হইতে ভ্রষ্ট হইয়া অল্পে অল্পে সমুদ্রের মধ্যে প্রবেশ করিতেছে; সূর্য মেদিনীর নিকট হইতে বিদায় লইবামাত্র সমস্ত জগৎ, গ্লান মূর্তি ধারণ করিল। এই সময়ে চন্দ্রমার প্রতি নেত্রপাত করিয়া দেখি যে তিনিও হাস্ত করিতে করিতে উদয় হইতেছেন। কিছু পরেই তাহার সচিব স্বরূপ তারকাগণে পরিবেষ্টিত হইলেন। সমুদ্র রৌপ্য বর্ণে রঞ্জিত হইল। এক্ষণকার এই রঙ্গভূমির মধ্যে চন্দ্রেরই প্রাধান্য দেখা যাইতেছে।

হংসোযথা রাজ্যতি পুষ্করস্থঃ সিংহো যথা রাজ্যতি কন্দরস্থঃ।

বীরো যথা রাজ্যতি সঙ্গরস্থোররাজ চন্দ্রোপি তথাঃস্বরস্থঃ ॥

হংস যেরূপ পুষ্করস্থ হইয়া বিরাজ করে, সিংহ যেরূপ কন্দরস্থ হইয়া বিরাজ করে, বীর যেমন সঙ্গরস্থ হইয়া বিরাজ করে, চন্দ্রও সেই রূপ অম্বরস্থ হইয়া বিরাজ করিতে লাগিলেন।

১৯ আশ্বিন, মঙ্গলবার।

এক সপ্তাহ অতীত হইল। অদ্য কূল দেখা যাইতেছে। আমাদের সম্মুখে বন, উপবন, পাহাড়, পর্বত, বালুতট যেন চিত্রিত রহিয়াছে ; পাহাড়গুলি দূর হইতে মেঘমালার ন্যায় প্রতীয়মান হইতেছে। দূরের পাহাড় দূরস্থিত মেঘের ন্যায় অস্পষ্ট ; নিকটের গুলি ঘন মেঘের মত। দূরবীক্ষণ দিয়া বন-রাজি আরো স্পষ্ট দেখা যাইতেছে। আজি হয়তো সিংহলে পদ নিক্ষেপ করা যাইবে। বিঘ্ন-বিনাশন বিশ্বপাতা আমাদেরিগকে কত প্রকার বিঘ্ন হইতে উত্তীর্ণ করিয়া আনিলেন। জাহাজ একটুকু বিপথগামী হইলে কত ভয়। সমুদ্রতলশায়ী এক পর্বতে ঠেকিলে জাহাজ চূর্ণ হইয়া যায়। এক এক ঝঞ্ঝাতে সমুদ্রই আমাদের মৃত্যুশয্যা হইতে পারে। আমরা বিপদকেই গুরুভার বিশিষ্ট মনে করি, কিন্তু নিমেষে নিমেষে আমরা কত রাশি রাশি বিপদ যে অতিক্রম করিয়া যাইতেছি, তাহার জন্ত ঈশ্বরের প্রতি কৃতজ্ঞ হই না। কি আশ্চর্য্য ! এখন প্রায় বেলা ৩ ঘট্টা, এখনো পর্বতশ্রেণী দেখা যাইতেছে। সিংহলদ্বীপকে ভূচিত্রে দেখিলে ‘ভারতবর্ষের হারের ধুকধুকির’ মত বোধ হয়।

কিন্তু আমরা সমস্ত দিবস ক্রমাগত চলিয়া তাহার এক পার্শ্ব দেশও শেষ করিতে পারিলাম না। সমুদ্রের মধ্য হইতে সিংহলের শোভা দেখিতে অতি সুরম্য হইয়াছে। সমুদ্র প্রান্তের অস্পষ্ট নীলবর্ণ—তাহার উপরে গৌরবর্ণ বালুতট—তাহার পশ্চাতে শ্যামবর্ণ বনরাজি,—পরে মেঘমালায় আয় প্রতীয়মান পর্বতশ্রেণী—এই সকল ভিন্ন ভিন্ন বর্ণের বস্তু মিলিয়া চমৎকার শোভা ধারণ করিয়াছে—আমাদের সম্মুখে ঠিক যেন এক খানি চিত্রপট রহিয়াছে। অদ্যও ‘গাল’ পাওয়া গেল না। অদ্য সমুদ্রের উপরে আমাদের শেষ দিন। এ সমুদ্রের সঙ্গে যদিও বিষম বিবাদ গিয়াছে, তথাপি ইহাকে ছাড়িতে এক্ষণে তেমন ইচ্ছা করিতেছে না। কলিকাতায় শূলি যেমন স্থলভ, এখানে পরিপূর্ণ বায়ুও সেই প্রকার। কলিকাতার সমুদয় ধনীর সমুদয় ধন একত্র করিলেও ইহার একটি হিল্লোলও ক্রয় করা যায় না। স্থষ্টির সমুদয় শোভাই এখানে একত্রীভূত—মনুষ্যের কার্য্য অতি অল্প। কলিকাতাকে ভুলাইয়া রাখিবার বস্তুই অনেক। সেখানে আমরা চন্দ্র, সূর্য্য, আকাশ, নক্ষত্র, প্রত্যহ এই রূপই দেখি, কিন্তু এখানেই তাহাদের আকর্ষণী শক্তি প্রকাশ পায়। কতকগুলি কৃত্রিম শোভা দৃষ্টিকে আর আচ্ছন্ন করিতে পারে না। এই সকল স্থানকে যাহারা শূন্য মনে করে, তাহারা কোন চিত্রলেখার আয় চন্দ্র সূর্য্যেরই শোভা দর্শন করে; কিন্তু যাহারা ইহাকে দেব-মন্দির করিয়া দেখে, তাহাদের নিকটে এ সকল নূতন শোভায় স্রশো-

ভিত হয় । অদ্য দুর্গোৎসবের অষ্টমী পূজা, কিন্তু ধূপধূনায়
স্বাসিত, মেঘমহিষের রক্ত-রঞ্জিত, নৃত্যগীতে আমোদিত,
জনকোলাহলে পরিপূরিত দুর্গোৎসব এখানকার উৎসবের
নিকটে কোথায় আছে ? এখানকার উৎসব নূতন প্রকার ।

গগনমে থাল রবিচন্দ্র দীপক

বনে তারকা মণ্ডল জনক মোতী ।

ধূপমলয়ানলো পবন চমরো করে

সকল বনরাজি ফুলস্তজ্যোতী ।

কৈসী আরতী হোয় ভবখণ্ডন তেরী আরতী ।

অনাহত শব্দ বাজন্ত ভেরী ।

এখানে ঈশ্বরের আরতীতে গগনই থাল ; রবি চন্দ্র প্রদীপ
স্বরূপ—তারকাগণ মণিমুক্তা, মলয়ানল হইতে ধূপ উথিত
হইতেছে, পবন স্বহস্তে চামর ব্যজন করিতেছে, সকল বনরাজি
পুষ্পিত হইয়া রহিয়াছে, অনাহত হইয়াও যেন ভেরীর স্ফীত
কোথা হইতে উথিত হইতেছে ।

২০ আশ্বিন, বুধবার ।

সিংহলদ্বীপের গাল পুরী সম্মুখে । আহা ! কি শোভা !
সমুদ্রতীর পর্য্যন্ত সারি সারি নারিকেল বৃক্ষ সকল উন্নত-মস্তক
হইয়া আছে । আমাদের বাম পার্শ্বে সমুদ্রের তরঙ্গ-রাজি
আকর্ষণনিমগ্ন পর্ব্বতের মস্তকে রোষ পূর্ব্বক আঘাত করিয়া ফেন-
রাশি উদ্গার করিতেছে । মধ্যে মধ্যে এক এক তৃণাচ্ছাদিত উচ্চ-
ভূমি শ্যামশোভা ধারণ করিয়াছে । সম্মুখে সূর্য্যকিরণে উদ্দীপ্ত
এক একটি কুটীর বিনীত ভাবে স্বীয় পরিচয় দিতেছে । রঙ্গভূমির

আবরণ হঠাৎ মুক্ত করিলে যে রূপ বিস্মিত হইতে হয়, আমরা প্রাতঃকালে জাহাজের উপরে উঠিয়া একেবারেই এখানকার এই আশ্চর্য্য দর্শন দর্শন করিয়া সেইরূপ হইতেছি । আমাদের চতুর্দিকে ক্ষুদ্র ক্ষুদ্র তরী মৎস্যের ন্যায় জলের উপরে ক্রীড়া করিতেছে । এক একটি নৌকা আমাদের ডোঙ্গার মত সোরা, কিন্তু প্রায় দেড় হস্ত উচ্চ, তাহার মধ্যে দুইটি পদ কোন প্রকারে রাখা যায় । নৌকার উপর হইতে পরস্পর অন্তরবর্তী দুইটি বাঁস বক্রভাবে এক দিকে হেলিয়া পড়িয়াছে, আর একটি বড় কাষ্ঠ সেই দুই বাঁসের দুই প্রান্তে আবদ্ধ হইয়া ভাসিতেছে, তাহাতেই নৌকা উল্টিয়া পড়িতে পারে না । আজ সোণার লঙ্কায় পদক্ষেপ করা যাইবে, ইহাতে আর আমাদের আনন্দের সীমা নাই । কল্পনা-পথে যে কত কি আসিতেছে, বলিতে পারি না । এক এক নৌকার উপরেই আমরা বিচিত্র ধর্ম্মাবলম্বী লোক দেখিতেছি । কেহ এক টুপি মাথায় দিয়া রোমান্ কেথলিক্ সাজিয়া আছে । কেহ রঙ্গীণ বস্ত্র পরিয়া আপনাকে বৌদ্ধ রূপে পরিচয় দিতেছে । আমরা কূলে যাইবার জন্য ব্যস্ত হইতেছি । নূতন দেশ, নূতন লোক, নূতন শোভা ; সকলই নূতন দেখিব, এই রূপ মনে হইতেছে । দুই প্রহরের পূর্বে আমরা ‘নিউবিয়া’ বাষ্পীয় পোত হইতে বিদায় লইলাম এবং তীরে যাইবার জন্য এক ডিন্জিতে চড়িলাম । গালে উঠিবারাত্র সকলে আমাদের উপরে তাকাইয়া রহিল । আমরা শীঘ্র শীঘ্র এক উত্তরণশালাতে চলিলাম । একি ! গিয়া দেখি সকলই আশার বিপরীত । কলার

গাছ, ভাঙ্গা প্রাচীর, খোলার ঘর ; সকলই নয়ন-তৃপ্তিকর !
 আবার কলিকাতার বন্ধুত্ব। গৃহের প্রাচীর আকাশ বায়ু
 জ্যোতিঃ এ তিনকেই রুদ্ধ করিতেছে। সমুদ্র নিকটবর্তী বলিয়া
 বায়ু কেবল স্বাস্থ্যকর। স্বগিম্ভ্রিয় ব্যতীত আর কোন ইন্দ্রিয়েরই
 তৃপ্তি নাই। সকল দ্রব্যের মূল্য কলিকাতার এইক্ষণকার
 দরের অষ্টগুণ—বারোগুণ। এখানকার সকল ভৃত্যেরাই
 বালক—বাস্তবিক সকলে বালক নহে, কিন্তু ২৫ বৎসর ৩০
 বৎসরের ভৃত্যকেও ‘বালক’ শব্দে সম্বোধন করে। ইহাদের
 মাথায় খোঁপা বাঁধা আর তাহাতে এক একটা কাঁচকড়ার চিরুণি
 গোঁজা। স্ত্রীলোক আর শ্মশ্রু-বিহীন পুরুষকে বাছিয়া লওয়া
 বড় দায়। কোথায় বা সোনার লঙ্কা, কোথায় বা অশোক
 বন, সকলই চমৎকার। কেশববাবু উত্তরণশালায় আসিয়াই
 আপন হস্তে রন্ধনে প্রবৃত্ত হইলেন। ৫ ঘণ্টা যাবৎ অগ্নি কুণ্ডে
 দন্ধ হইয়া এবং ধূম ভক্ষণ করিয়া জ্বর ও শিরঃপীড়াতে আচ্ছন্ন
 হইয়া পড়িলেন। আহারের মত কিছুই হইল না। রজনীতে
 কোন মতে পড়িয়া রহিলাম।

২১, ২২, আশ্বিন ; বৃহস্পতিবার, শুক্রবার।

দিবসের মধ্যে সকলেরই এক এক মনোনীত সময় থাকে—
 সেই সেই সময়কে সকলে আগ্রহপূর্বক প্রতীক্ষা করে। সমস্ত
 দিবসের মধ্যে কেহ ভোজনের সময়ের প্রতি চাহিয়া থাকে,
 কেহ বা রজনীর আমোদ প্রতীক্ষা করিয়া গুরুভারাক্রান্ত দিবসকে
 কোন প্রকারে কৰ্ত্তন করে। আমাদের এ প্রকার কোন সময়ই

নাই । আহারের সময় আর ঔষধ খাইবার সময় সমান । কল-স্নোতে যাইব মনে ছিল, তাহাও দেখিতেছি হইল না । এই গাল দুর্গেই রুদ্ধ হইয়া থাকিতে হইবে । আমাদের কেবল এই পান্থশালা হইতে অন্য পান্থশালাতে যাইবার কথা হইতেছে ; তাহা হইলেও কিঞ্চিৎ সূস্থ হওয়া যায় । এই পান্থশালায় আসিয়া এক দিবস ফ্রীমেসনদের বিষয় কিছু কিছু শুনিয়াছি । এই পান্থশালা-রক্ষক একজন ফ্রীমেসন । তিনি বলিলেন, এই সম্প্রদায়ের কোন বিশেষ ধর্মের সঙ্গে যোগ নাই । সকল ধর্মের লোকই ইহার মধ্যে পরিগণিত হইতে পারে । গোপনই ইহারদের ধর্ম বলিলেও হয় । আরো বলিলেন, ফ্রীমেসনেরা পৃথিবীর সকল স্থানেই বিকীর্ণ হইয়া আছে—তাহারা আপনাদের মধ্যে কতকগুলি সঙ্কেত দ্বারা ই পরস্পরকে চিনিতে পারে । ফ্রীমেসনদিগের মধ্যে যে যত উচ্চ পদ প্রাপ্ত হয়, সে তাহাদের গুণ বিবরণ-সকল ততই জানিতে পারে । আশ্চর্য্য এই যে এখনো তাহাদের রক্ষিত কথা কিছুই প্রকাশ পায় নাই । ‘ঘট্‌কর্ণোভিদ্যতে মন্ত্রঃ’ একথা ইহাদের মধ্যে এখনো প্রয়োগ করা যায় না ।

২৩ আশ্বিন শনিবার ।

এবার সৃষ্টির দুই প্রকাণ্ড কাণ্ড দেখিবারই আশা ছিল—সমুদ্র আর পর্বত ; কিন্তু পর্বতের কিছুই দেখা হইল না । এখানে ৮০০০ ফীট পর্য্যন্ত উচ্চ পর্বত আছে—হিমালয়ের শিমলা পর্বতের সমান ; কিন্তু এখানকার পর্বতে তুষার নাই ।

এখানে এক স্তম্ভবিধা এই যে কয়েক দিবসের মধ্যে সমস্ত দ্বীপটা ঘোরা যায় । এখান হইতে প্রত্যুষে ডাকের গাড়িতে উঠিয়া দশ ঘণ্টায় কলম্বো যাওয়া যায় ; কলম্বো হইতে দশ বার ঘণ্টায় কান্দীতে উত্তীর্ণ হওয়া যায় । কান্দীর নিকটেই সিংহলের দেখিবার বিষয় সকল বিদ্যমান আছে । তাহার অনতিদূরে উচ্চ উচ্চ পর্বত শৃঙ্গে শীতের প্রাচুর্য্য, এবং সেই সকল পর্বত প্রদেশের শোভা ভুবনবিখ্যাত । আদমশৃঙ্গ বলিয়া এক পর্বতের চূড়াতে একটি পদচিহ্ন রহিয়াছে, কেহ বলে সে হনুমানের পদচিহ্ন ; কেহ বলে বুদ্ধদেবের । সিংহলের মধ্যস্থল কান্দী । মেড়ুয়াবাদি আর প্রকৃত হিন্দুস্থানীর মধ্যে যত প্রভেদ, সমুদ্রধারের লোক আর সেখানকার লোকেও তত প্রভেদ । কিন্তু এখানকার বালক পরিচারকগণকে দেখিয়া সিংহলবাসীদিগের প্রকৃত ভাব কিছুই বুঝা গেল না । সিংহলের সমগ্র চিত্র চিত্রিত করিতে হইলে এখানে আমাদের কত প্রকার করিয়া বেড়ান আবশ্যক । পুরাতত্ত্ব-বেত্তার ন্যায় এখানকার পূর্ব পূর্ব বৃত্তান্তের অনুসন্ধান করা ; কবির ন্যায় এদেশের শোভনতম স্থান সমুদয় পর্য্যবেক্ষণ করা ; পর্য্যটকের ন্যায় এখানকার গ্রাম নগরের ভাব দেখা ; বিজ্ঞানবিৎ পণ্ডিতের ন্যায় নূতন বৃক্ষ পল্লবাদি ও নূতন পশু পক্ষী সকল নিরীক্ষণ করা ; দুই এক প্রধান প্রধান লোকের সঙ্গে আলাপ করা ; এখানকার আচার ব্যবহার ও প্রচলিত বৌদ্ধ ধর্ম্মের বিষয় শিক্ষা করা ; এখানে আমাদের সংস্পর্শের মধ্যে এত কার্য্য । কবি, পণ্ডিত,

পর্যটক, পুরাতত্তবেত্তা—ইহারদের এক এক জনের মত হইয়া দেখিয়া বেড়াইতে ইচ্ছা হয় । অদ্য এক নূতন পাণ্ডশালায় আসিয়াছি । আহারের সামগ্রী এখানে অপেক্ষাকৃত উত্তম পাওয়া যায়, আর এখান হইতে সমুদ্রের মাহাত্ম্য দেখিতে পাওয়া যায় । আমাদের ঠিক সম্মুখে সমুদ্রের উপরে নদীর শোভা দেখা যাইতেছে । তাহার মধ্যে কতকগুলি শৈলখণ্ড ইতস্ততঃ বিক্ষিপ্ত রহিয়াছে ; তাহাতে কলকল শব্দ অবিশ্রান্ত শুনা যায় । আমাদের সম্মুখে একটা পাহাড়ের উপরে একটা নারিকেল গাছ একাকী রাজত্ব করিতেছে ; সেখানে তাহার আর কেহই নাই । সন্ধ্যার পূর্বে এক উচ্চ আলোক-গৃহ হইতে সিংহল দ্বীপের শোভা দর্শন করিলাম । কত পাহাড় ও কত পর্বতশ্রেণী ! আমাদের আশা অতি দূরারোহিণী না হইলে এস্থান সর্বতোভাবেই প্রার্থনীয় হইত ।

২৪ আশ্বিন, রবিবার ।

দূর হইতে ক্রেশের গূর্তি অতি মনোহর । উপন্যাস বা পুরাতত্তবে বিপদগ্রস্ত ও দুর্দশাস্থিত মহাত্মাদিগের সঙ্গে আমারদের যেমন প্রণয় হয়, এমন আর কাহারো সঙ্গে হয় না । আমাদের এখানে যে সকল কষ্ট গিয়াছে, তাহা কাহারো নিকটে বর্ণনা করিলে তিনি হয়তো আমাদের সহযোগী হইতে ইচ্ছা করিবেন । আমাদের অবস্থা দেখিয়া কেহ মনে করিতে পারেন—জাহাজ ভগ্ন হইয়া গিয়া আমাদের যেন কোন উপদ্বীপে ফেলিয়া দিয়াছে ; আমরা কোন রূপে দিনপাত করিতেছি ।

আমাদের পাছশালা-রক্ষকের নিকট হইতে বৌদ্ধধর্মের বিষয় কিছু কিছু শ্রবণ করিলাম । লোকেরা ভূত প্রেত বিশ্বাস করে। যে কোন পীড়া ঔষধে আরাম না হয়, তাহার চিকিৎসা ভয়ানক প্রকার । এই প্রকার রোগীকে তাহারা ভূতে পাইয়াছে মনে করে । ভূত নাচাইবার জন্য তাহারা ধূনা জ্বালিয়া বাদ্যোদ্যম আরম্ভ করে ; আর রোগীকে দিবারাত্রি অনাবৃত স্থানে রাখিয়া তাহার অবশিষ্ট জীবনকে শীঘ্রই শেষ করিয়া ফেলে । বৌদ্ধ-পুরোহিতদিগের দ্বারে দ্বারে ভিক্ষা করিয়া জীবিকানির্ব্বাহের বিধি আছে, তাহারদিগের বিবাহ করিতে নিষেধ । এখানেও কিছু কিছু খ্রীষ্টান ধর্মের প্রচার হইয়াছে । খ্রীষ্ট ধর্মের ভিন্ন ভিন্ন নানা সম্প্রদায়ের মত এখানে স্থান পাইয়াছে । মিসনরি-দিগের আক্রমণ হইতে কোন দেশই বিমুক্ত নহে । উহারদের পরিশ্রমকে ধন্যবাদ । এই প্রকার প্রবর্তক যদি আমাদের ধর্মে এক এক জন পাওয়া যায়, তবে সকল পৃথিবীতেই ‘এক-মেবাদ্বিতীয়ং’ ধ্বনিত হইতে থাকে ।

২৫ আশ্বিন, সোমবার ।

বেলা দশটার পর এক ডালচিনির উদ্যান দেখিতে চলিলাম । গিয়া দেখিলাম সে স্থান বড় মন্দ নয় । সম্মুখে এক ক্ষুদ্র নদী বহিতেছে ; তাহার নাম গিজিরা । উদ্যানে নানা জাতীয় বৃক্ষ রোপিত আছে । সকল প্রকার মসলারই গাছ দেখিলাম । ডালচিনির গাছের কিছুই ফেলা যায় না । তাহার মূলে কপূর-তৈল হয়—পত্রে লবঙ্গের-তৈল প্রস্তুত হয়—ডালে

ডালচিনি হয় । কি আশ্চর্য্য ! আমরা কোথায় ছিলাম, ইহার মধ্যে আমরা সাগর পার হইয়া নদীর ধারে এক ডালচিনির উদ্যানে বসিয়া আছি । ফিরিয়া আসিবার সময় এক বৌদ্ধ-মন্দিরে প্রবেশ করিলাম । বৌদ্ধদের মানব দেবতা বুদ্ধ প্রায় ১২ হস্ত উচ্চ আসন করিয়া ধ্যানে বসিয়া আছেন । তাঁহার পার্শ্বে আর দুইটি প্রতিমূর্তি দণ্ডায়মান আছে । পুরোহিতের সঙ্গে আমাদের ভাষাচুরা সংস্কৃত ভাষায় কথা আরম্ভ হইল । প্রতি কথার শেষেই ‘এবং’ বলিয়া ঘাড় নাড়িয়া সায় দিতে লাগিলেন এবং ‘নাস্তি’ শব্দে স্বীয় অনভিমত প্রকাশ করিতে লাগিলেন । উক্ত দুই প্রতিমূর্তির বিষয় জিজ্ঞাসা করাতে জানা গেল যে একের নাম কোনাগম বুদ্ধ, দ্বিতীয়ের নাম কাশ্যপ বুদ্ধ, মধ্যের বৃহৎ বুদ্ধ যিনি তিনি গোতম বুদ্ধ । ইহাদের আবির্ভাব এক সঙ্গে নয় । কোনাগম আদিবুদ্ধ, সর্বশেষে গোতম বুদ্ধের আবির্ভাব । জগৎ নিত্য কি নৃক্ট এই প্রশ্নে পুরোহিত উত্তর করিলেন, ‘সবলই অনিত্য’ জগৎও অনিত্য, ঈশ্বরও অনিত্য, কেবল নির্ব্যাণই নিত্য । নাথাকা, বিনাশ, নির্ব্যাণই সর্বোৎকৃষ্ট মঙ্গল । এক্ষণে কাহারো ধ্যানে অধিকার নাই, ক্ষুধা-তৃষ্ণা থাকিলে সে অধিকার জন্মে না । আমরা এক প্রাচীরে নরক চিত্রিত দেখিলাম । ভয়ানক ! অগ্নি জ্বলিতেছে, আর চারি দৈত্য একটাকে ছিঁড়িয়া কাটিয়া খাইতেছে । এই প্রকার নরকের ভয় দেখাইয়া খ্রীষ্টান ধর্ম্মও রাজত্ব করিতেছে । এই মন্দিরে ব্রহ্মা বিষ্ণু প্রভৃতি অনেক অনেক দেবতারও মূর্তি

রহিয়াছে, কিন্তু ইহাদের পূজার বিধি নাই; কেবল বুদ্ধদেবের পদতলেই পুষ্প বিকীর্ণ রহিয়াছে। রাম রাবণের যুদ্ধের কোন কথাই নাই; বিভীষণের মূর্তি চিত্রিত দেখিয়া রাম রাবণের কথা অনেক জিজ্ঞাসা করিলাম, পুরোহিত তাহার কিছুই বলিতে পারিল না। বৌদ্ধ ধর্ম্মে অহিংসা পরম ধর্ম্ম কি না? জিজ্ঞাসা করিলাম। পুরোহিত বলিলেন, ‘আমরা স্বহস্তে বধ করিয়া কোন জীবকে ভক্ষণ করি না, কিন্তু অগ্নি কেহ বধ করিয়া দিলে সে পশুর মাংস আমরা ভোজন করি।’ পলাইবার বড় সহজ উপায়! অন্যান্য বৌদ্ধদের হিংসা করিবার ধর্ম্মতঃ বিধি কি নিষেধ, ইহা বুঝাইতেও পারিলাম না, বুঝিতেও পারিলাম না; কেবল এইমাত্র উত্তর পাইলাম, অন্য কাহারো বৌদ্ধ ধর্ম্মে নিষ্ঠা নাই। পুরোহিতকে তাহার গুরুর সঙ্গে সাক্ষাৎ করিবার অভিলাষ জানাইলাম; পুরোহিত বলিলেন, গুরু ‘নির্ব্বাণং গতঃ’। আমরা তাহাকে যে তাহার জীবিতবান্ গুরুর কথা জিজ্ঞাসা করিতেছি ইহা অনেক করিয়া বুঝাইয়া দিলাম। সে আমাদের নিকটবর্ত্তী পর্ণশালাতে এক কৃষ্ণবর্ণ কুৎসিত পুরুষের নিকটে লইয়া গেল। আমরা এক খাড়িয়ার উপরে বসিলাম। গুরুর সঙ্গে কোন কথাই হইল না। তিনি গম্ভীর ভাবে দণ্ডায়মান রহিলেন। আমরা শীঘ্র শীঘ্র বিদায় লইয়া আসিলাম। পুরোহিত আমাদের সঙ্গে সঙ্গে আইলেন। তাঁহার গুরুর মৌনভাবের কারণ জিজ্ঞাসা করাতে পুরোহিত বলিলেন, অয়ং মৌনী, কিন্তু তাঁহাদের আপনাদের মধ্যে

বিলক্ষণ কথা চলিতেছিল। আমরা শীঘ্র শীঘ্র বিদায় হইয়া আসিলাম।

২৬ আশ্বিন, মঙ্গলবার।

বেলা দুইটার পর এক পাহাড় দেখিতে চলিলাম। দুধারে বন জঙ্গল, তাহার মধ্য দিয়া রাস্তা গিয়াছে। আমাদের দেশে নারিকেল গাছের ছায়াই হয় না, এখানে নারিকেলের নিবিড় জঙ্গল দেখা যায়। এই পাহাড়ের উপর হইতে চতুর্দিক দেখিতে অতি সুন্দর। বঙ্গদেশ ছাড়িয়া আসিয়াছি, এমন বোধ হয়। চারিদিকে ছোট ছোট পাহাড়—এক এক পাহাড়ে এক একটি কুটার দেখা দিতেছে—নীচে ক্ষেত্র, জলধারা, সকলই এমন ক্ষুদ্র দেখায় যেন কে একখানি ছবি আঁকিয়া রাখিয়াছে। এখানে অল্পক্ষণ থাকিয়া চলিয়া আইলাম। বাগান দেখিবার মূল্য স্বরূপ দুই শিলিঙ্গ দিতে হইল। এখানকার সকল স্থানেই পোঁগু শিলিঙ্গ পেন্স্‌ ভিন্ন আর কথাটি নাই। আসিবার সময় আর একটি বৌদ্ধ-মন্দিরে প্রবেশ করিলাম। বৌদ্ধধর্ম জানিবার আমার বড়ই কৌতূহল। বৌদ্ধ ধর্ম বড় সহজ ধর্ম নহে, পৃথিবীর অধিকাংশ লোকেই এ ধর্মের অবলম্বী। উক্ত মন্দির একটি নির্জন উচ্চ ভূমিতে প্রতিষ্ঠিত, উঠিবার সময় কিঞ্চিৎ কষ্ট বোধ হয়। অদ্যকার মন্দির পরিষ্কার পরিচ্ছন্ন—মন্দির বলিয়া বোধ হয়। বুদ্ধদেবের প্রতিমূর্তি দেখিতে অতি সুন্দর। এই মন্দিরের অঙ্গনে এক স্থানে দেখিলাম যে একটি পুরোহিত বালক বসিয়া পুথি পাঠ করিতেছে; কতকগুলি বুদ্ধা স্ত্রীলোক শ্রোতার

আয় বসিয়া আছে । আমরা কতকক্ষণ পাঠ শ্রবণ করিলাম । তাহাতে ‘পুত্র পৌত্র কলত্র,’ এই প্রকার এক একটা কথা বুঝিতে পারিলাম । পাঠ সাঙ্গ হইবামাত্র শ্রোতাগণ কৃতাজ্জলি হইয়া মৃদুস্বরে কি পাঠ করিতে লাগিল । মন্দিরের নিকটে একটা ‘ভাগোবা’ রহিয়াছে, দেখিতে কোন সমাধি মন্দিরের মত; শুনিলাম তাহাতে বুদ্ধের দন্ত স্থাপিত আছে । সেই স্থানে কতকগুলি স্ত্রীলোক আসিয়া ভক্তির সহিত প্রণাম করিতেছে । বাহা হউক এই মন্দিরকে মন্দির বলিয়া বোধ হয় । পূর্ববৎ এখানে বুদ্ধের তিন মূর্তি দেখিলাম না । কোন প্রশ্ন জিজ্ঞাসা করিবার মতনও কোন লোক পাইলাম না । শীঘ্র বাসগৃহে চলিয়া আইলাম । অদ্য পূর্ণিমা, ‘রজনী কি সুখদায়িনী’ হইয়াছে ! এ রজনীকে দেখিলে বোধ হয়, যেন ইহা নিদ্রার জন্য হয় নাই ।

২৭ আশ্বিন, বুধবার ।

অদ্য প্রত্যুষে উঠিয়া দেখিলাম—

‘যাত্যেকতোস্তশিখরং পতিরোষধীনাং

আবিষ্কৃতারুণপুরঃসরএকতোহর্কঃ ।

ইহার শেষ ভাগে ও কালিদাসের কবিত্ব শক্তি মনে উদিত হইল—

তেজোদ্বয়শ্চ যুগপৎব্যসনোদয়াভ্যাং

লোকোনিয়ম্যতইবান্দদশান্তরেষু ।

একদিচ্ দিয়া চন্দ্রমা অন্তোন্মুখ হইতেছেন, অশ্রু দিকে

অরুণকে সম্মুখে করিয়া সূর্য্যদেব উদয় হইতেছেন ; ইহাদের মধ্যে একের ব্যসন, অশ্রুর উদয় ; ইহাতেই যেন সমুদয় লোকেরা আপন আপন অবস্থায় নিয়মিত হইতেছে । চন্দ্রমার ব্যসন যথার্থই বটে—তাহার মুখশ্রী কি ম্লান ও বিপন্ন ! তাহার আসন্ন বিপদ দেখিয়া তারকাগণ কে কোথায় চলিয়া যাইতেছে ।

“এমন যে বহু তারা, স্বচ্ছন্দে এখন তারা,

তারে ফেলে যায় একে একে ।”

চন্দ্রমাকে যে মেঘের মধ্য দিয়া কোন্ অদৃশ্য হস্ত টানিয়া লইল কিছুই বলিতে পারি না । চন্দ্রমার দুর্দশা দেখিয়া কোথায় সকলে দুঃখ করিবে, না চতুর্দিক আরো প্রসন্ন হইয়া উঠিল । বিপদের সময় এইরূপই বটে । এ প্রদেশ যে আমাদের শরীরের পক্ষে কিরূপ বলিতে পারি না । শুনিলাম, বৎসরের মধ্যে ঋতুর বিশেষ পরিবর্তন নাই । শীতকালে বড় শীত হয় না—দিবসের মধ্যে মেঘ একবার দেখা দিতেই চায় । আমার পিতামহাশয় এক্ষণে কিছু অসুস্থ আছেন । এখানে আসিয়া প্রায় দুই দিবস অনাহারে ছিলেন ; এখনো তাঁহার আহার ভাল হইতেছে না । শরীর কাহার কেমন হয়, তাহার পরীক্ষা কলিকাতাতেই হইবে । এখানে কোন এক সম্ভ্রান্ত সিংহলীর সহিত আলাপ করিবার নিতান্ত অভিলাষ আছে । বৌদ্ধ ধর্ম্মের বিষয় বিশেষ করিয়া জানিতে হইবে । পৃথিবীর অধিকাংশ লোকের মধ্যেই এই ধর্ম্মের প্রাদুর্ভাব ; ইহা অবশ্যই বিশেষরূপে শিক্ষণীয় । আমরা যে স্থানে অবস্থিতি করিতেছি,

এ বড় সামান্য স্থান নয় । সম্মুখে সমুদ্র নয়, ভারতবর্ষীয় মহা-সমুদ্র ! শোভাও অতি মনোহর । চন্দ্রমার প্রভাবে এক্ষণে রজনী জ্যোতিষ্মতী ও লাবণ্যময়ী হইয়াছে । চন্দ্রমা ও তারকা-গণের প্রতি নেত্রপাত করিলে সে সকলকে দূরস্থিত অপরিচিত বস্তুর ন্যায় বোধ হয় না । আমাদের সঙ্গে যেন তাহারদের কি নিগূঢ় সম্বন্ধ আছে । নক্ষত্র তারার উজ্জ্বল পত্রের মধ্যে যাহারা এ পৃথিবীর ঘটনাসূত্র পাঠ করে, তাহাদের নিতান্ত দোষ নাই । দূর হইতে জ্যোতির্গণের মাহাত্ম্য এরূপ দেখায় যে মনুষ্য তাহারদিগকে উপেক্ষা করিতে পারে না ।

২৮ আশ্বিন, বৃহস্পতিবার ।

প্রাতে সিংহলের স্থানের স্থানের বর্ণনা শুনিলাম । এক্ষণে এই প্রকার বর্ণনাতে আমাদের কৌতূহল-অগ্নিতে স্নাত ঢালিয়া দেওয়াই সার হয় । কেবল সমুদ্রের গুণে আমরা এখানে টিকিয়া আছি ; সূর্য্যের উত্তাপ যেৰূপ প্রখর, সমুদ্রবায়ু ব্যতীত এখানে থাকা ভার হইত । সমুদ্রের সংসংসর্গেই ইহার দোষ সকল ঢাকিয়া গিয়াছে । বাহা হউক এস্থান আর ভাললাগে না, এস্থানের নূতনত্ব চলিয়া গিয়াছে । সন্ধ্যার সময় পূর্বোক্ত ডালচিনির উদ্যানে আইলাম । সুন্দর নির্জ্জন স্থান । চতুর্দিক গাছপালায় পরিপূর্ণ—বোধ হয় যেন কোন বনের মধ্যে বসিয়া আছি । এখানে বায়ু শীতল—স্বভাবের সকলই কিছু কিছু আছে । নদী বন সমুদ্র, সমুদ্রের নিনাদ সর্ব্বদাই শুনা যায় । একজন সাহেব উদ্যানরক্ষক ; তাহার নিকটে সিংহলীদের

কথা কিছু কিছু শ্রবণ করিলাম। ছোট লোকদের মধ্যে সততা নাই। মনুষ্যের মধ্যে পরস্পর যে একটি বিশ্বাস, যাহা না থাকিলে পৃথিবীতে এক পদও চলা যায় না, তাহা এখানে অতি অল্প। সে দিন দেখিলাম একজন বালক ছড়ি বিক্রয় করিতে আসিয়া আমাদের ক্রীত ছড়ির মধ্যে কতকগুলি লইয়া পলায়ন করিল। প্রভু আপন ভৃত্যদিগকেও তেমন বিশ্বাস করেন না। যাহারা ধর্মের জন্য সততা অবলম্বন না করে, স্বার্থের জন্যও তাহাদের করা উচিত।

২৯ আশ্বিন, শুক্রবার।

প্রত্যুষে উঠিয়া এক নৌকাতে আরোহণ করিয়া নদীতে চলিলাম। দুই ডোঙ্গা কঞ্চি দিয়া একত্রে বাঁধা, তাহার উপরে নারিকেল পত্রের একটি আচ্ছাদন, এই আমাদের নৌকা হইল। নদীর উপযুক্ত নৌকা বটে—নদী এমত গভীর যে এই নৌকাও এক এক বার চড়ায় আটকিয়া যাইতে লাগিল। নদীটি ঠিক খালের মত, এখানে ইহাকে গিজিরা নদী বলে, কিন্তু সকল স্থানে ইহার নাম সমান নহে; যে স্থান দিয়া গিয়াছে সেই স্থানের নাম ধারণ করিয়াছে। এমন তো ক্ষুদ্র নদী, কিন্তু ইহাতে বড় বড় কুর্ভীর আছে, এই ভয়ে ঘাটের সামনে স্নানের সুবিধার জন্য বেড়া দিয়া রাখিয়াছে। এই নদী কান্দীর পাহাড় হইতে বহমানা হইতেছে এবং প্রায় ৪০ ক্রোশ পর্যন্ত চলিয়া গিয়াছে। এই নদীতে যাইতে যাইতে এক এক স্থানে উত্তম শোভা দেখিলাম। এক এক স্থান দেখিতে সুন্দরবনের

কোন কোন নদীর মত । কত নিবিড় বন, কত কত পাহাড়, কত ইস্কুর ক্ষেত্র দেখিতে দেখিতে এই বক্রগামিনী নদীর মধ্য-দিয়া চলিলাম । নদীর ধারে নারিকেল বৃক্ষের নিবিড় বনও দেখা যাইতেছে । এখানে নারিকেল বৃক্ষই অনেক ; চাল আর নারিকেল ফল ; ইহাতেই লোকদিগের জীবনযাত্রা নির্বাহ হয় । সকল প্রকার রন্ধনের সামগ্রীতেই ইহারা নারিকেল ব্যবহার করে । নারিকেল হইতেই এক প্রকার মদ্য প্রস্তুত হয় ।

গুণিমলঘ নামক এক স্থানে নামিয়া আহাৰাদি করিলাম । এক বৃদ্ধ লোক আমারদিগকে কতকগুলি ভাঙ্গা চৌকি আনিয়া দিয়া যথাসাধ্য আতিথ্য করিল । আহাৰান্তে পুনৰ্বার নৌকায় চড়িয়া বেলা একটার সময় আমাদের গম্যস্থান বাডিগামে পৌঁছিলাম । উঠিয়া এক বিদ্যালয় ও তৎসংলগ্ন এক উপা-সনালয় দেখিলাম । বিদ্যালয়ের কতকগুলি বালিকা বস্ত্র-শিলাই শিখিতেছে । শুনিলাম, তাহারা খ্রীষ্টধর্মাবলম্বিনী—মিশনারিদিগের পরিশ্রমকে ধন্যবাদ । কোন বাধাই তাহাদের নিকটে বাধা নহে । বাডিগাম হইতে অনেকানেক ছোট ছোট পাহাড় দেখা যায় । সূর্য্যের কিরণ পড়িয়া এক একটা পাহাড় উজ্জ্বল সবুজ বেশে স্নশোভিত হইয়াছে ; তাহার নিক-টের পাহাড়গুলি কিরণাভাবে আর তেমন প্রকাশ পাইতেছে না, কিন্তু বিবর্ণ ও মলিন বেশে রহিয়াছে ; আবার অচিরে কিরণের সংস্পর্শ পাইয়া তাহারা যেন জীবন পাইতেছে । বাডিগাম হইতে শীঘ্র শীঘ্র ফিরিয়া আইলাম, আর বিশেষ

কিছু দেখা হইল না । আসিতে প্রায় সন্ধ্যা হইল । রাত্রিতে
স্থখে নিদ্রা গেলাম ; উদ্যানের রক্ষণ আমাদিগকে প্রহরীর
ন্যায় পরিপালন করিতে লাগিল ।

৩০ আশ্বিন, শনিবার ।

নির্বিন্বে রজনী যাপন করিয়া প্রত্যুষে উঠিলাম । এখানে
আমাদের আর কে আছে ? সেই অনন্তস্বরূপই এখানে
আমাদের রক্ষক । এমন দূরদেশে আসিয়াও আহারের জন্য
বিশেষ ভাবিতে হইতেছে না ; এবং শরীর রক্ষার জন্য কোন
বস্তুরই অভাব নাই ।

কাহেরে মন চিতবে উদয় যা আহর হরজীউ পরেয়া ।

শৈল পথরনে জন্ত উপায়ে তাকে রিজক আগে কর ধরেয়া ।

কেন এত চিন্তাকুল হও, ঈশ্বর তোমার জন্য স্বয়ং অন্নপান
পরিবেশন করিতেছেন ; কঠোর শৈলখণ্ডেও যে সকল জন্তু
দেখা যায়, অগ্রে তাহাদের অন্নপানের সংস্থান করিয়া দিয়া
তবে তিনি তাহারদিগকে সৃষ্টি করিয়াছেন ।

আমরা এত দূরে এক নির্জন স্থানে কোথায় এক উদ্যানে
ভ্রমণ করিতেছি, ইহাতে মনে কত ভাবেরই উদয় হয় । যাহারা
নগরের কোলাহলের মধ্যেই জীবনযাপন করে—যাহারা বিষয়-
চেষ্টা বা আমোদপ্রমোদেই সময়কে অতিবাহিত করে—
যাহারা বাহিরের বিষয়েই লিপ্ত থাকিয়া আপনাকে ভুলিয়া
থাকে—যাহারা দুইদণ্ড কাল গোলমালে না থাকিলে কি
করিবে বলিয়া অস্থির হয়, তাহারা তাহাদের অসুখকে ভুলিয়া

থাকুক ; কিন্তু এই সকল নির্জন স্থানে যাহারা আপনাকে একাকী মনে করে, তাহারা অতি বিমূঢ় ! আহারের সময় উদ্যান-রক্ষক সাহেব এক জন্তু শিকার করিয়া আনিয়া উপস্থিত করিলেন । তাহাকে ইণ্ডয়ানা বলে, প্রায় দেড় হস্ত দীর্ঘ, দেখিতে বড় গিরগিটির মত । দুই প্রহরের সময় পিতামহাশয়ের সঙ্গে ব্রাহ্মধর্মের কথা হইল । তিনি বলিলেন, এই ধর্ম-বৃক্ষের বৃদ্ধির জন্য বলিদান চাই । দুই তিন জনের রক্ত পাইলে তবে ইহা সারবান্ হইবে । আমরা যে দেশে আসিয়াছি, এখানকার রাক্ষস সমান লোকের মধ্যে বৌদ্ধ ধর্মের প্রচার কি প্রকারে হইল ? এই ধর্মের প্রচার জন্য কত কত লোক জন্মভূমি পরিত্যাগ পূর্বক দেশবিদেশে নির্ভয়ে ভ্রমণ করিয়া আয়ুশেষ করিয়াছে । প্রচারকদিগের আপনারদের প্রতি কিছুমাত্র দৃষ্টি থাকিলে তাহাদের পরিশ্রম কখনই সফল হয় না । পিতামহাশয় বৃহদারণ্যক উপনিষদ্ হইতে এক নীতি শুনাইলেন । “কোন সময়ে অশ্বরদিগের দমনের জন্য “এক যজ্ঞারম্ভ স্থির হইল । প্রথমে চক্ষু যজ্ঞ করণে প্রবৃত্ত হইল । চক্ষু অন্য সকল ইন্দ্রিয়ের উপকার সাধন করিল, “কিন্তু সে আপন অধিকারে আপনি গর্বিত হইল ; এই জন্য “তাহার যজ্ঞ বিফল হইল । পরে বাক্য তাহাতে উদ্যত হইল ; বাক্য সকলেরই তুষ্টিসাধন করিল, কিন্তু আমি “একজন স্নকথক বলিয়া বাক্যেরও অহঙ্কার হইল ; এই হেতু “তাহার যজ্ঞও সফল হইল না । এই প্রকারে অন্য সকলে হার

“মানিলে প্রাণ যজ্ঞারম্ভ করিল । প্রাণ সাধারণের উপকারী—
 “প্রাণ সমস্ত শরীরের জন্য, কিন্তু আপনার জন্য নয় । প্রাণেরই
 “যজ্ঞ সফল হইল ।” ইহা হইতেই প্রচারকেরা উপদেশ
 গ্রহণ করুন । পিতার জীবন যেমন সকল পুত্রের জন্য সেই
 রূপ যিনি সমস্ত মনুষ্যের জন্য আপনার জীবন দান করিতে
 প্রস্তুত আছেন, তিনিই মহাত্মা । ত্যাগই ধর্ম্মের প্রাণস্বরূপ ।
 সকলই স্বপদে থাকিবে—ধর্ম্ম ও রক্ষা পাইবে ; এ প্রকার করিয়া
 ধর্ম্ম রক্ষা হয় না । মহাত্মা রামনোহন রায় যদি ত্যাগ-স্বীকার
 না করিতেন—জন্মভূমি হইতে নির্বাসিত না হইতেন—বিষয়
 বিভব হইতে বঞ্চিত না হইতেন—লোকের তিরস্কার সহ্য না
 করিতেন, তবে ব্রাহ্মধর্ম্ম বঙ্গদেশে রোপিতই হইত না । বঙ্গ-
 দেশের কি সৌভাগ্য ! দেশ বিশেষে এক এক সময়ে এক
 এক মহাত্মা উদয় হইয়া ব্রাহ্মধর্ম্মানুযায়ী মত প্রকাশ করিয়া
 গিয়াছেন, যথার্থ বটে ; কিন্তু কোন জাতির মধ্যে ঈশ্বরের
 এমন বিশুদ্ধ উপাসনা প্রচার হয় নাই । ব্রাহ্মধর্ম্ম যেমন উচ্চ,
 বঙ্গভূমি তেমন ইহার উপযুক্ত বোধ হয় না । এ ধর্ম্ম-রক্ষা
 এখানে শুদ্ধ হয়, কি ফলে ফুলে সুশোভিত হয়, বলা যায় না ।
 ঈশ্বরে প্রীতি এবং তাঁহার প্রিয়কার্য্য সাধন, এই দুই মহত্ত্বই
 এ ধর্ম্মের মূলধার ; ইউরোপ এবং এদেশের ভাব এ দুইই
 ইহাতে একত্রিত হইয়াছে । বৌদ্ধ ধর্ম্মে যেমন কর্ম্মের অভাব,
 নির্বাণই মুক্তি, আমাদের ধর্ম্মে সেরূপ নহে ; ঈশ্বরের কর্ম্ম
 এবং ঈশ্বরপ্রীতিই আমাদের ধর্ম্মের জীবন । উদ্যানে অনেক-

ক্ষণ থাকিয়া আমরা বাসস্থানে ফিরিয়া আইলাম । সায়ংকাল এখানে কি রমণীয় ! সমুদ্রের গভীর নিনাদ কি উল্লাসকর ! সূর্য্যের অন্ত-গমন কি চমৎকার ! সূর্য্য অন্ত যাইবামাত্র যে তাহার মহিমা চলিয়া যায় তাহা নহে । মৃত্যুর পরেও মহতের কীর্ত্তি তাহার জীবন-স্বরূপ হইয়া থাকে । আকাশ কি বিচিত্র বর্ণে অনুরঞ্জিত হইতেছে ! বায়ুর এক এক হিল্লোল কি শীতল ও তৃপ্তি-জনক ! সন্ধ্যার সময় তিন জন বোম্বাই দেশস্থ পারসীর সঙ্গে দেখা হইল । তাহারা কেমন ভদ্র ও আলাপতৎপর ! তাহারা আমাদিগকে সিংহলের প্রধান প্রধান নগর দেখিতেই উপদেশ দিতে লাগিল । তাহারা জনতা বড়ই ভালবাসে । আমরা বলিলাম কলিকাতা দেখিয়া দেগিয়া আর নগর দেখিতে ইচ্ছা হয় না ; নগর ভিন্ন আর যাহা কিছু দেখা যায়, তাহাই দেখিবার প্রয়োজন । পারসীরা আপনাদের দেশ বোম্বাইর বড় প্রশংসা করিতে লাগিল—তাহারা সিংহলের উপর বড় বিরক্ত । এখানকার সকল বস্তুই অতি মহার্ঘ্য । কোন আগন্তুক ব্যক্তি আসিয়া শীঘ্র বাড়ি ফিরিয়া যাইবার জন্য অভিলাষী হয় । তাহারা আমাদিগকে একবার বোম্বাই দেখিবার জন্য বিস্তর লোভ দেখাইতে লাগিল । আমাদের ধর্ম্মের বিষয় জিজ্ঞাসা করাতে তাহাদিগকে ভাল করিয়া বুঝাইতে পারিলাম না । এখানে যাহার সঙ্গে দেখা হয়, আমাদের ধর্ম্মের বিষয় জিজ্ঞাসা করে । এ ধর্ম্ম এখন সকলের নিকটে এমন নূতন বোধ হয় যে তাহারা ভাল বুঝিতেই পারে না, কি

প্রকারে ইহার প্রচার হইতে পারে। বস্তুতঃ এই প্রকার ধর্মের প্রচারের দৃষ্টান্ত এখনো পর্য্যন্ত কোথাও দেখা যায় নাই। রজনীতে আমাদের এক মহোৎসব হইল। পান্থশালা-রক্ষক আমাদিগকে কোলমেন নামক এক সাহেবের নিকটে লইয়া গেলেন। সাহেব সর্ব প্রকারেই নিপুণ। সেঙ্গপিয়ার গ্রন্থ হইতে ভাল ভাল কবিতা পাঠ করিলেন। সকল কবিতাই ভাবে পরিপূর্ণ—পাঠকও সর্ব প্রকারে মনোরঞ্জক। কালিদাসকে ভারতবর্ষীয় সেঙ্গপিয়ার বলে ; কিন্তু বিচিত্রতাগুণে সেঙ্গপিয়ার অদ্বিতীয় ! কোলমান সাহেব এক একবার আমাদের চিত্তকে উল্লাসিত করিয়াছেন। পাঠের পরে কোঁতুকাবহ গান, কথকতা, এই সকল আরম্ভ হইল। হাসিতে হাসিতে আমাদের নাড়ি ছিঁড়িয়া গেল। দুই প্রহরের সময় ফিরিয়া আসিতে আসিতে মনে করিলাম যে যেখানে রাক্ষসদের বসতি ছিল, কালেতে করিয়া সেখানে সেঙ্গপিয়ার পাঠ হইল ! সভ্যতা একই স্থানে বদ্ধ থাকিবার নয়—কেহই তাহাকে সাধে না, কিন্তু সে দেশ বিদেশ অন্বেষণ করিয়া আপন আধিপত্য বিস্তার করে।

১ কার্তিক, রবিবার।

অদ্য বাটী হইতে স্রসংবাদ পাইয়া নিশ্চিন্ত হইলাম। কলিকাতাকে এখন ছায়ার ন্যায় মনে হয়, কিন্তু স্বপ্নেতে অধিক কালই সেখানে থাকি। সিংহলীদের সঙ্গে আমাদের অনেক বিষয়ে মিল আছে। ভাষার অনেক ঐক্য দেখা যায়। তাহার। অল্প বয়সে বিবাহ করে এবং মৃত দেহকে দাহ করে, ইহা

জানিলাম । যাহারা মৃত্যুর পরে মনুষ্যের পুনর্জন্ম বিশ্বাস করে, সেই সকল জাতির মধ্যে মৃত দেহ দাহ করিবার প্রথা আছে । আর যাহারা দেহ লইয়া পুনরুত্থান বিশ্বাস করে, তাহারা ই গোর দিয়া থাকে ; যেমন ইহুদী খৃষ্টান ও মুসলমানেরা । আমরা সিংহলীদের ভূত নাচান, কি বিবাহ, কি অন্ত্যেষ্টিক্রিয়া কিছুই দেখিতে পাই নাই । সন্ধ্যার সময়টি দিবসের মধ্যে আমাদের ভাল যায় ; অদ্য রুষ্টির জন্য এ সময় উপভোগ করিতে পারিলাম না ।

২ কার্তিক, সোমবার ।

বেলা দুই প্রহরের সময় কতকগুলি সিংহলবাসী ভদ্র লোকদিগের সহিত সাক্ষাৎ হইল । মুদলিয়ার তাহাদের পদবী । তাহাদের মধ্যে এক জন মুদলিয়ার তথাকার বিচারালয়ের অনুবাদক ; অন্য জন আমাদের গাঁয়ের মোড়লের মত—লোক জনের মধ্যে বিবাদ বিসম্বাদ ভঞ্জন করিয়া দেওয়া তাহার কার্য্য । তাহাদের সঙ্গে প্রায় ১ ঘণ্টা পর্য্যন্ত অনেক কথা হইল । তাহারা খৃষ্টান ; কিন্তু আশ্চর্য্য এই যে তাহাদের পরিবারের মধ্যে কেহ কেহ বৌদ্ধ, অথচ তাহাতে তাহাদের সম্ভাবের কিছুই হানি হয় না । মুদলিয়ারদের পোষাক অর্দ্ধেক খৃষ্টানি ও অর্দ্ধেক সিংহলী । তাহাদের মাথায়ও দুইটা চিরুণি লাগান দেখিলাম । চিরুণির প্রকার ও সংখ্যা ভেদেই তাহাদের জাতিভেদ প্রকাশ পায় । ভদ্র জাতি দুইটি চিরুণি ব্যবহার করে, মধ্যম জাতি একটী, নীচ জাতির একটীও ব্যবহার

করিতে পারে না । শুনিলাম, নীচ জাতীয় এক ব্যক্তি চিরুণি ধারণ করাতে কতক লোকে তাহার প্রাণ সংহার করিয়াছে । ইহারদিগের মধ্যে জাতিভেদ ধর্ম সম্বন্ধীয় নহে, কিন্তু সামাজিক নিয়মে নিয়মিত । বিল্লুল সর্বশ্রেষ্ঠ জাতি—টমটমওয়ালা, ধোপা, নাপিত এই প্রকার অনেকানেক জাতি আছে । বিভিন্ন জাতির মধ্যে একসঙ্গে আচার ব্যবহারও চলে না । এক্ষণে অনেক বালক বালিকা শিক্ষা লাভ করিতেছে, আর শুনিলাম জনসমাজে সভ্যতাও বৃদ্ধি পাইতেছে । ধর্মের বিষয়ও আরো কিছু কিছু জানা গেল । বুদ্ধের জন্ম দিনে ইহাদের প্রধান উৎসব হইয়া থাকে । বৌদ্ধেরা জগতের সৃষ্টি বিশ্বাস করে না এবং কোন সৃষ্টিকর্তাকেও স্বীকার করে না । কিন্তু যাহাকে যখন জিজ্ঞাসা করিয়াছি, জগৎকে কে রচনা করিয়াছে, তখন ভগবান্ বুদ্ধের নামই শুনিয়াছি । বুদ্ধই ইহাদের মানব-দেবতা ; আরো সহস্র সহস্র দেবতা আছে, কিন্তু বুদ্ধকেই সকলে পূজা করে । বৌদ্ধেরা মৃত্যুর পরে পুনর্জন্ম, স্বর্গ, নরক, এ সকল বিশ্বাস করে । ইহারদিগের পুরোহিতেরা বিবাহ করে না, স্ততরাং পুরোহিতের পদ বংশ-পরম্পরাগত নহে, কিন্তু যাহার ইচ্ছা সেই আপন পুত্রকে সে পদে নিযুক্ত করিতে পারে ; এই হেতু আমাদের দেশের মত এখানে পুরোহিতের দৌরাত্ম্য থাকিবার সম্ভাবনা নাই । মুদলিয়াদের কথাবার্তায় তেমন সন্তোষ জন্মিল না । এ দেশে ধর্মের ভাব যে অতি শিথিল তাহা বিলক্ষণ বোধ হইল । এই স্থানে ইংরাজদের

অধিক সমাগম হেতু শুদ্ধ সিংহলীদের ভাব বিশেষরূপে বুঝা যায় না। এ স্থানকে তাহারা সম্পূর্ণ পরিবর্ত করিয়াছে, সকল দ্রব্য এবং পরিশ্রমের মূল্য বিস্তর বৃদ্ধি পাইয়াছে। এখানকার প্রধান খানসামার বেতন কলিকাতার একজন কেরাণীর সমান— ২৫ টাকা ; পরিশ্রমের মূল্য প্রতি দিন চারি আনার নীচে নুহে—আটআনাও সাধারণ। সন্ধ্যার সময় একবার বাজার দেখিয়া আইলাম। ফলমূলাদি বিস্তর দেখিলাম। কলা, শঁশা, নেবু, আনারস, ঝিন্বে, বেগুন, আলু, নারিকেল ইত্যাদি অনেক প্রকার। নানা দেশীয় নানা জাতীয় লোক এখানে গোলমাল করিতেছে ; দেশীয় ব্যক্তিদিগকে বাছিয়া লওয়া ভার।

যেমন ভারতবর্ষের পক্ষে কলিকাতা, সিংহলের পক্ষে তেমন কলম্বো ; আর ভারতবর্ষের যেমন শিমলা, এখানকার সেইরূপ কান্দি। যদি আমরা সিংহলীদের ভাব বুঝিতে চাই, তবে কলম্বোতে দিনকতক থাকিলেই হইতে পারে ; আর যদি সিংহলের শোভা দেখিতে চাই, তবে কান্দির নিকটে নিকটে ভ্রমণ করিলেই সে ইচ্ছা পূর্ণ হইতে পারে। এখানে জায়ফল, তাল, আত্র, কাঁঠাল, নেবু, নারিকেল, সুপারি, দাড়িম্ব, কাফি, ডালচিনি প্রভৃতির বৃক্ষ দেখা যায়। সিংহলীদের ভাষা আমাদের সঙ্গে অনেক মেলে। ইংরাজীতে যেমন ক্রিয়া অগ্রে, পরে কৰ্ম্ম ; সিংহলীতে আমাদের মত অগ্রে কৰ্ম্ম পরে ক্রিয়া। সিংহলী আর পালী ভাষা এক নহে। ধৰ্ম্ম-পুস্তক সকল পালী ভাষায়

বিরচিত, কিন্তু পালী ভাষার অনেক ধর্ম-পুস্তক সিংহলীতে অনুবাদিত হইয়াছে। সিংহলীর অনেক কথাও আমাদের সঙ্গে সমান, যথা—

বাঙ্গলা	সিংহলী
চিনি	সিনি
মাতা	আম্বা
পিতা	তাতা
পুত্র	পুত
স্ত্রী	ইস্ত্রি
চন্দ্র	হন্দাই
তার	তারকাওয়া
যাও	পলেয়ন
গিষ্ট	রসাই
হৃৎ	থিরি

ঈশ্বর আশীর্বাদ করুন—দেব আশীর্বাদে দেণ্ডে।

বিশ্বাসী প্রিয়বন্ধু—বিশ্বাসে আদরে তিয়ালোয়া।

তোমার নাম কি—উষে নামা মেককাডে।

মহাশয় কোথায় যাও—কো যানো, মহায়া।

আমরা এখানে কিছুদিন থাকিলেই সিংহলী ভাষা শিখিতে পারি। অদ্য প্রায় সমস্ত দিন বৃষ্টি গিয়াছে। এখানে যে কখন্ কোন্ ঋতু হয় ঠিক পাওয়া যায় না। এখানকার লোক মুখে শুনিলাম যে, যে সময় বৃষ্টি মনে করা যায়, সে সময় হয়তো কিছুই হয় না ; কোন এক অলক্ষিত সময়ে হয়ত অধিক হয়।

৩ কার্তিক, বুধবার ।

প্রত্যুষে উঠিয়া সমুদ্রতীরে বেড়াইতে বেড়াইতে সমুদ্র-বায়ু সেবন করিতে লাগিলাম । নবানুরাগের ন্যায় সমুদ্রের স্ফূর্তি-যুক্ত অনিবার্য নিঃশ্বন, আমার যাবজ্জীবন মনে থাকিবে । এই প্রকার কণবাহী শীতল বায়ু সেবনের জন্য রাজ্য ছাড়িয়া দেওয়া যায় । কি শোভা ! এক পাহাড়ের পশ্চাতে সূর্য্যদেবের সুরাগরঞ্জিত প্রাসাদ দেখা যাইতেছে ! এস্থানে এ সময়ে আমার সকল কষ্টের অবসান বোধ হইতেছে । আজ আমাদের নাপিতকে দেখিলাম, তাহার মাথায়ও দুই চিরুণি রহিয়াছে । কারণ জিজ্ঞাসা করাতে জানিলাম, এখানকার নাপিতদিগের মধ্যে তিনিই নাপিতশ্রেষ্ঠ । জাতিভেদের বিষয় আরো বিশেষ করিয়া জানিলাম । কত জাতি তাহার সংখ্যা নাই ।

বিব্বল—জমিদার, সর্ব্বশ্রেষ্ঠ জাতি ।

ধীবর ।

হালিয়া—ডালচিনির ব্যবসায়ী ।

কারাওয়া—নাবিক ।

মাথ্রি—নাপিত ।

ধোপা ।

ছুরাওরা—শুঁড়ি, তাড়ি-বিক্রেতা ।

চণ্ডাল—স্বর্ণকার ।

বাজন্দার ।

যাগেরি—চিনি-ব্যবসায়ী ।

পাড়ুয়া—কুলি ।

পন্নারা—ঘাস্তড়ে ।

ওলিয়া—নীচজাতি ।

রোডিয়া—সকলের নীচ জাতি ।

এত প্রকার জাতি ! ইহাদের মধ্যে কিসে যে নীচত্ব আর কিসে মহত্ত্ব হইয়াছে, বলা যায় না । ইহাদের মধ্যে সকলে চিরুণি ধরিতে পারে না, এবং সকলে পুরোহিতের পদেও নিযুক্ত হইতে পারে না । বাজন্দার, চিনির ব্যবসায়ী, কুলি, ঘাস্তড়ে, ওলিয়া, রোডিয়া সর্বাপেক্ষা অধম । ইহারা চিরুণিও পরিতে পারে না, পুরোহিতও হইতে পারে না । বিল্বল*, হালিয়া, জালিয়া, ধোপা, নাপিত, নাবিক—ইহাদের উক্ত দুই মহৎ অধিকারই আছে । শুঁড়ি আর স্বর্ণকার পুরোহিত হইতে পারে, কিন্তু চিরুণি ব্যবহার করিতে পারে না । কোন নীচ জাতি পুরোহিত হইলে রাজারা তাহাকে প্রণাম করে না । সিংহলের রাজাদের স্থান কান্দি । এখানকার সকল জাতির মধ্যে জাতিভেদের বিদ্বেষভাব বিলক্ষণ আছে । রোডিয়া প্রভৃতি নীচজাতীয় লোকেরা বিল্বলের গৃহেও প্রবেশ করিতে পারে না । এখানে ধর্ম্মের ভাব বড় শিথিল ! লোকেরা মনে করে যে মুদলিয়ারেরা যে খৃষ্টান হইয়াছে, সে ধর্ম্মের জন্ম নয় ; কিন্তু সাহেবদের প্রিয়পাত্র হইবার জন্ম । এ কথা অনেকের

* আরো ওলিলাম, বিল্বলকে শূদ্র বলে—আমাদের শূদ্র জাতি কি না ঠিক বলিতে পারি না ।

মুখে শুনিয়াছি । আমরা উষাকাল আর প্রদোষকাল এখানে যেমন ভোগ করিতেছি, এমন কখনই করি নাই । আমাদের বাসস্থানের নূতনত্ব গিয়াছে, এখানকার দ্রব্যের আস্বাদও ভাল লাগে না, কিন্তু সমুদ্রও পুরাতন হয় না—সূর্য্যের উদয়াস্তেরও প্রত্যহই নূতন শোভা—বায়ু খাইয়া খাইয়াও স্বাদ মিটে না । অদ্যকার সায়ংকাল যে কি হইয়াছে বলিতে পারি না ! সূর্য্য অল্পে অল্পে সমুদ্রের মুখের মধ্যে প্রবেশ করিতেছে—যেন কোন ভয়ানক জন্তু এমন এক সুন্দর কুমারকে গ্রাস করিতেছে ! এমন ক্রেশকর দৃশ্য দেখিয়া জগৎ জ্ঞানমূর্ত্তি ধারণ করিল এবং কিছু পরে যেন বিবাদঘনে এককালে আবৃত হইয়া গেল ! সূর্য্য অস্ত হইল বলিয়া যে একেবারে চলিয়া গেল তাহা নহে, আবার সে নূতন মাহাত্ম্য ধারণ করিয়া উদয় হইবে । মনুষ্যের মৃত্যুও এই প্রকার, আবার সে নব জীবন প্রাপ্ত হইবে । সূর্য্যাস্ত পরে আকাশ কতই বিচিত্র বর্ণে অনুরঞ্জিত হইল ! সিন্দূরবর্ণ, স্বর্ণবর্ণ, নীলবর্ণ, পাটলবর্ণ মেঘাবলী স্থানে স্থানে বিকীর্ণ হইয়াছে ! এমন শোভা কোথায় দেখা যায় ? যদি কলিকাতার দুর্গন্ধময় গলি হইতে এক ব্যক্তিকে একেবারে এখানে আনা যায়, তবে যে তাহার মনে কি হয়, তাহা বলা যায় না । কি দেখিতেছে, কোথায় আসিয়াছে—সে এককালে বোধ হয় হতবুদ্ধি হইয়া যায় । এই প্রকার স্থান চিত্তকে প্রফুল্ল করে—মনকে উন্নত করে—আত্মাকে আপন মহত্ত্বে পূর্ণ করে ।

৪ কার্তিক, বৃহস্পতিবার ।

আমাদের বাঙ্গলা দেশের সঙ্গে এদেশের অনেক বিষয়ে ঐক্য দেখা যায় । এখানে সেই প্রকার জল বায়ু—সেই প্রকার ফল পুষ্প—লোকদিগের ব্যবহারও অনেক সমান—ভীক-স্বভাবদিগের প্রধান অস্ত্র মিথ্যারও সেইরূপ প্রাদুর্ভাব । কেবল বৌদ্ধ ধর্মের প্রচার জন্য যাহা কিছু বিভিন্নতা দেখা যাইতেছে । জাতিভেদের নিয়মেও অনেক প্রভেদ আছে । ব্রাহ্মণদিগের আধিপত্যের প্রতিকূল হইয়াই প্রথমে বৌদ্ধ ধর্ম উদয় হইয়াছিল, ভারতবর্ষে স্থান না পাইয়া তাহা দেশ বিদেশে ব্যাপ্ত হইয়াছে ; অতএব সে ধর্মে আমাদের মত জাতিভেদ কখনই থাকা সম্ভব হয় না । এখানকার সকলের শ্রেষ্ঠজাতি যে বিলুল সে শূদ্রজাতি ইহা সঙ্গতই বোধ হইতেছে ; কেন না, ব্রাহ্মণের উপর শূদ্রজাতির বিদ্রোহই বৌদ্ধ ধর্মের মূল কারণ । আর এক আশ্চর্য্য এই, এখানে রামরাবণের কথার বিন্দু-বিসর্গও শুনা যায় না । মুদলিয়ারদের কাছে শুনিলাম, উত্তরে ত্রিঙ্গমালীতে ইহার কিছু কিছু সন্ধান পাওয়া যাইতে পারে ; এমন কি, তদ্বিষয়ক গ্রন্থ সকল তথায় বিদ্যমান আছে । ইহার উত্তরে সেতুবন্ধ রামেশ্বর ; সেখানেই সে সকল কথা থাকিবারই সম্ভাবনা ।

বলিতে কি, এক স্থানে থাকিয়া থাকিয়া আর পারা যায় না । আমরা এক্ষণে বাম্পীয় নৌকাকেই প্রতীক্ষা করিয়া রহিয়াছি । বিশেষতঃ আমার পিতামহাশয়ের সকল অপেক্ষা

কষ্ট হইতেছে । আহারও এখানে তাঁহার ভাল হইতেছে না । এখানে রন্ধনের সকল সামগ্রীতে একই প্রকার আশ্বাদ, নারিকেলের রস দিয়া সকলই বিশ্বাদ করিয়া ফেলে । তরকারী অনেক প্রকার পাওয়া যায়—সজনের ডাঁটা, উচ্ছা, শীম, ঝিঙ্গে, পুইশাক, বেগুণ, কুমড়া, ইচড় ; ফলও প্রচুর পাওয়া যায়, পেঁপে, আনারস, নেবু, শাঁশা, কলা, এ সকলই মুখরোচক । এই সকল ফল ও তরকারির নামেই আমাদের দেশ মনে পড়ে, কিন্তু সমুদ্র-বায়ু আর সমুদ্রের শব্দ ছাড়িয়া যাইতেই দুঃখ বোধ হয় । দুই প্রহরের সময় কোন রাত্রিতে নিদ্রাভঙ্গ হইলে যে কি ভীষণ নিনাদ উখিত হয়, তাহা কি বলিব ।

৫ কার্তিক, শুক্রবার ।

এখানে অন্য সকল আহারের সামগ্রী বরং ভাল ; কিন্তু ভাল ছন্ধের বড়ই অভাব—ছন্ধের কেবল সাদা বর্ণ থাকে, এইমাত্র । ভারতবর্ষে ছন্ধের যেমন গোরব এখানে তেমন কিছুই নয় । শুনলাম, গোয়ালাদের জন্য এক পৃথক্ জাতিও নিরূপিত নাই । ছন্ধের অভাব জন্য পিতামহাশয়ের বিশেষ কষ্ট হইতেছে ; এখানকার রন্ধনের কোন সামগ্রীই তাঁহার ভাল লাগে না । এখনো একখানা বাষ্পীয় নৌকা দেখা যায় না । এই পান্থশালা সংক্রান্ত কোন লোককে জিজ্ঞাসা করিলে কেহ বলে ২৬এ, কেহ বলে ওমাসে আসিবে, তাহারা আমাদিগকে আর ছাড়িয়া দিতে চায় না । আমাদের নিকট হইতে প্রত্যহ তাহারা ২৪ টাকা প্রাপ্ত হয় । অদ্য বাজারে গিয়া

এদেশের নৌকা, নারিকেল খোলের এক পাত্র, এই প্রকার কতকগুলি দ্রব্য ক্রয় করিয়া আনিলাম। এখানে আবলুস কাঠের কার্য্যই বিস্তর। বাস, ছড়ি, চৌকি, অনেক আবলুস কাঠে নিৰ্ম্মিত। ত্রিঙ্কমালি হইতে আবলুস কাঠের আমদানি হয়। আর কাঁচকড়া, হাতির দাঁত, সজারুর কাঁটার নানা দ্রব্য আনিয়া লোকেরা আমাদিগকে সৰ্ব্বদাই বিরক্ত করে।

আজ এখানে এক ভয়ানক ব্যাপার দেখিলাম—ভূতের নাচ। কোন ব্যক্তি উৎকট রোগে আক্রান্ত হইলে তাহার শাস্তির নিমিত্তে কতক জন মিলিয়া ভূতের নৃত্য আরম্ভ করে। এই প্রকার নৃত্য দেখিবার জন্য আমাদের বড়ই কৌতূহল জন্মিল; আমরা আমাদের নাপিতের সঙ্গে প্রাতে সকল কথা স্থির করিয়া সন্ধ্যার পর নাচ দেখিবার জন্য পান্থশালা হইতে বহির্গত হইলাম। আমরা সৰ্ব্বশুদ্ধ আট জন। এক স্থানে দাঁড়াইয়া দুইটা গাড়ি ভাড়া করিয়া চলিলাম। প্রথম হইতেই ভূতীয় কাণ্ড! ঘোর অন্ধকার—কেহ কোথাও নাই—শোরুরাস্তা—দুধারে বন জঙ্গল—এক এক স্থানে রাস্তার ধারেই খাল—ভূতে পাছে আমাদের গাড়ি শুদ্ধ শূন্যে উড়াইয়া লইয়া যায়, এই আমাদের ভয় হইতে লাগিল। দূর হইতে কতকগুলি মশালের আলো দেখিয়া আমাদের নাট্যশালা বুঝিতে পারিলাম। গাড়ি হইতে নামিবামাত্র তুরী ভেরী বাজিয়া উঠিল। আমাদের সাপুড়ের মত বংশীর ধ্বনি আর ঢাকের শব্দ শুনিতে শুনিতে এক ক্ষুদ্র বাটীতে উপস্থিত হইলাম। এ সেই

নাপিতের ভ্রাতার বাটী ; অনেক লোক জন জমিয়াছে, সম্মুখে কতকগুলি মশাল জ্বলিতেছে । আমাদের বসিবার জন্য বারাণ্ডায় আর উঠানে চৌকি পাতিয়া দিল । নাপিত আমাদের জন্য পান সুপারী চিনির পান প্রভৃতি আনিয়া দিয়া আমাদের অত্যর্থনা করিল* । আমরা সকলে বসিলে ভূতের নাচ আরম্ভ হইল ! প্রথমে ঢাকের বাদ্য—কি ভয়ানক ! এমন কর্ণকুহর-ভেদী শব্দ ও কুত্ৰাপি শুনি নাই । গায়ে যত জোর আছে তত জোরে এক এক ঘা ঢাকের উপর পড়িতেছে, তাহার চামড়া ছিড়িয়া যায় না, এই আশ্চর্য্য ! চমৎকার বাদ্য, কাণ জুড়াইয়া গেল ! বাদ্য মাঙ্গ হইলে পর ভূতের নাচ আরম্ভ হইল । প্রথমে একজন ছিটের কাপড় পরিয়া আর হস্তীর ন্যায় দুই বহৎ কাণওয়ালা টুপি মাথায় দিয়া, দুই হস্তে দুই মশাল ধরিয়া নাচিতে লাগিল । ঘুরিয়া ফিরিয়া হেলিয়া তুলিয়া মশাল ঘুরাইয়া অনেক প্রকারে নৃত্য করিতে লাগিল । পরে এক ছোট বালক আর এক সঙ সাজিয়া উপস্থিত । তাহার রঙ্গ ভঙ্গি দেখিয়া আমরা আর হাস্য রাখিতে পারিলাম না । তাহার দুই কাঁধ হইতে দুই গুচ্ছ নারিকেল-পত্র ঝুলিয়া পড়িয়াছে, বাদ্যের সঙ্গে তাল রাখিবার জন্য নাচিবার সময় তাহা ব্যবহার করে । পা অবধি মস্তক পর্য্যন্ত তাহার সর্ব শরীর আন্দোলিত হইতে লাগিল । বালকটি আপন কর্ম্মে বড়ই দক্ষ ও

* এখানে আতিথ্য ধর্মের প্রমাণ আরো কোন কোন স্থানে পাইয়াছি ।
তবুও ভাল ।

নিপুণ । এই প্রকারে প্রায় দশ বারটা ভূত আমাদের সম্মুখে একে একে আসিয়া নৃত্য করিল । কাহারও মুখ কুন্তকর্ণের মত—কাহারও নৃসিংহ অবতারের মত—কেহ বা কুক্কটের ভূত সাজিয়া আসিয়া দেখিতে জটায়ুর মত হইয়াছে—কেহ মহা-দেবের স্থায় মস্তকে সর্প ধারণ করিয়াছে—কেহ মুখ ব্যাদান করিয়া ভয়ানক দন্তপাটী বাহির করিতেছে—কেহ মুখের মধ্যে মশাল ধরিয়া গর্ব প্রকাশ করিতেছে । একটি ভূত সকল অপেক্ষা ভয়ানক ! তাহার বিশাল দন্ত সমুদয় বহির্গত—তাহার অর্দ্ধশরীর ভল্লুকচর্ম্মের মত এক বস্ত্রে আবৃত ; সে কখনো বা লক্ষ্মবাম্প দিতেছে, কখনও বা একটাকে ধরিতে যাইতেছে, কখন মশালে ধূনা নিষ্ক্ষেপ করিয়া চতুর্দিক প্রজ্জ্বলিত করিতেছে, কখনও অগ্নি খাইতেছে—এটাই প্রকৃত ভূত । সর্ব্বশেষে আবার বালকটি আসিয়া নৃত্য আরম্ভ করিল । তাহাকে দেখিয়া হাশ্ব ও আক্ষেপ দুইই উপস্থিত হয় ; আক্ষেপ এই জন্য যে এই বালক যে পরিশ্রম ও অধ্যবসায় ও একাগ্রতার সহিত ভূতের নৃত্য শিখিয়াছে, তাহা বিদ্যা-শিক্ষাতে ব্যয় করিলে সে মনকে কত উন্নত করিতে পারিত, আত্ম-শোধনে সেইরূপ তৎপর হইলে মনুষ্য জীবনের কতই মহত্ত্ব লাভ করিত ! কিন্তু এক্ষণে তাহার মন কি সঙ্কীর্ণ স্থানে বদ্ধ রহিয়াছে ! তাহার নৃত্য দেখিয়া লোকে একটুকু হাশ্ব করিলে সে আপনাকে কেমন কৃতার্থ বোধ করিতেছে ! ভূতের ব্যাপার সমাপ্ত হইলে আর এক প্রকার বাদ্য আরম্ভ হইল ।

শুনিলাম, গবর্ণর সাহেব আসিলে সেই বাদ্যে তাঁহার অভ্যর্থনা হইয়া থাকে ! ঢোল, ঢাক, টমটম, বাঁশী একত্রে গোলেমালাে বাজিতে লাগিল । এই প্রকার কর্কশ অশ্রাব্য গানবাজনা, ভূতপ্রেতে এইরূপ বিশ্বাস ; এই সকল দেখিয়া শুনিয়া এখানকার সামান্য লোকের অবস্থা বড় ভাল বোধ হয় না । রাত্রি ১১টার পর ভূতের নাচ সমাপ্ত হইল । যদিও আমরা ভূতের হস্ত হইতে রক্ষা পাইলাম তথাপি সন্ধ্যার সময় যে ফারেষ্ট নামক এক সাহেবের সঙ্গে আলাপ হইয়াছিল, তাহার হস্ত হইতে উদ্ধার হইতে পারি নাই । সেই তত রাত্রিতে তিনি আমাদিগকে এক মুদলিয়ারের বাটীতে লইয়া গেলেন । মুদলিয়ারের সঙ্গেও দেখা হইল । ইনিও খৃষ্টান ; ফারেষ্ট সাহেব হাসিতে হাসিতে বলিলেন, ইনি অর্দ্ধ খৃষ্টান অর্দ্ধ বৌদ্ধ । মুদলিয়ারের নিকট হইতে অনেক কলে কোঁশলে বিদায় লইয়া আসিলাম ।

৬ কার্তিক, শনিবার ।

পান্থগৃহ আমাদের পক্ষে কারাগৃহ হইয়াছে, তাহার রক্ষককে কারা-রক্ষক বোধ হইতেছে । একদৃষ্টে কলিকাতা যাইবার বাষ্পীয় নৌকার প্রতীক্ষা করিতেছি, কিন্তু এখনো তাহার নামগন্ধও নাই । গালের খোলার ঘর, পান্থ-শালায় বিশ্বাস অল্প, আর চতুর্দিকে চিরুণিওয়ালা মাথা, সকলই বিরক্তিজনক হইয়াছে । সকল বিষয়েরই উপযুক্ত সময় আছে । আমাদের এখানে থাকিবার সময় উত্তীর্ণ হইয়া

গিয়াছে । আজ বাষ্পীয় নৌকা আসিলেও হইত । একটা কোন বিঘ্ন না হইয়া যায় না ।

৭, ৮, কার্তিক ; রবিবার, সোমবার ।

আমার কিঞ্চিৎ জ্বরভাব হইয়াছে । বিদেশে রোগ হওয়া বিষম দায় । রবিবারে খৃষ্টানদিগের এক উপাসনালয় দেখিতে গেলাম । এখানে সামগান গুলিন বেশ লাগিল । ছোট ছোট বালকেরা ঈশ্বরের মহিমা কীর্তন করিতেছে ; ইহাদের মুখ হইতে এই সকল সঙ্গীত শুনিতে আরো ভাল লাগিল । সঙ্গীতের এক স্থানে এই ভাব শুনলাম, ‘হে পরমেশ্বর ! আমার জীবন যেন এই প্রকারে গত হয়, যাহাতে আমি মৃত্যু-শয্যাকে শয্যার মত দেখিতে পারি !’ সোমবারে এখানকার বিচারালয় দেখিলাম । লোকজনের ভিড়েতে কিছুই শুনিতে পাইলাম না । বিচারালয় হইতে আসিবার কতকক্ষণ পরে বিলক্ষণ জ্বর বোধ হইল ।

৯, ১০, কার্তিক ; মঙ্গলবার, বুধবার ।

অল্প জ্বরভাব আর যায় না । এক সমুদ্র-পীড়া অতিক্রম করিয়া আবার ডাঙ্গার পীড়া ভোগ করিতেছি । সমুদ্র-পীড়া বরং ভাল, ক্রেশ অধিক বটে, কিন্তু তিন দিবসের পর আবার যেমন তেমনি । সমুদ্র বিশ্বাসঘাতকের ঋায় কার্য্য করে নাই, কিন্তু এ ডাঙ্গা সেইরূপ করিয়াছে । সমুদ্রের সমুদয় কষ্ট এখানে দূর করিব এই মনে ছিল, কিন্তু ঠিক তাহার বিপরীতই হইল । আমরা এখানে রোগ-স্বাস্থ্যতা, জীবন-মৃত্যুর মধ্যেই

লম্বমান রহিয়াছি ; কখন কাহার আধিপত্য হয় কিছুই বলা যায় না। ঈশ্বরের এক নিকৃষ্ট কর্মচারীর মধ্যে গণ্য হইতে পারি, এই আমার ইচ্ছা ; তাহাও কোন প্রকারে হইতে পারিতেছি না। মন যত শরীরকে ছাড়াইয়া চলিতে চায়, শরীর ততই তাহাকে আটেঘাটে বন্ধ করিয়া রাখে। আর কিছুদিন পরে যে শরীর ভস্মীভূত হইবে, তাহার জন্ম যেন কারাবাসীর জন্ম থাকিতে হইতেছে। বুধবার বেলা ১টার সময় এক বাষ্পীয় নৌকা দেখা যাইতেছে, খানিক পরে জানা গেল সে আমাদের নৌকা। এই স্তম্ভবাদ পাইয়াও কিঞ্চিৎ স্তম্ভ হইলাম।

১১ কার্তিক, বৃহস্পতিবার।

আজ কিঞ্চিৎ স্তম্ভ হইয়াছি, তথাপি জ্বর আছে। বাষ্পীয় নৌকাতে উঠিবার জন্য আমরা সকলে প্রস্তুত হইতেছি। আমি আর আমার পিতামহাশয় প্রায় বেলা ১১টার সময় এত দিনের বাস-গৃহ ছাড়িয়া চলিলাম। কেশববাবু আর কালীকমলবাবু সেখানেই রহিলেন। আমরা সিংহলদ্বীপে প্রায় তিন সপ্তাহ কাল অতিবাহিত করিলাম। আমাদের বাস-স্থানকে আমরা প্রায় বাড়ির মত করিয়া ফেলিয়াছি। বাষ্পীয় নৌকাতে উঠিয়া দেখি সাহেব বিবি বিস্তর। এবার আমাদের কুঠরী বেশ প্রশস্ত, ইহাতে সাতটা মাচা আছে। এক একটা মাচার উপরে এক এক জনের বিছানা থাকে। কোন দুর্দান্ত মাতাল সাহেবের সঙ্গে এক কুঠরীতে থাকা বড় দায়। আমাদের সম্মুখ

দিয়া অটাওয়া নামক এক জাহাজ চীনদেশের রণক্ষেত্রে যাত্রা করিল। বিবিরারুমাণ্ ঘুরাইয়া, সাহেবেরা চীৎকার ধ্বনি করিয়া আনন্দ প্রকাশ করিতে লাগিল। বেলা দুইটার পর কেশববাবু আসিয়া উপস্থিত, কিন্তু তাঁহার সঙ্গে কালীকমল বাবুকে দেখিলাম না। কেশববাবু তাঁহার জন্য পান্স্গৃহে দুই-ঘণ্টা অপেক্ষা করিয়া এবং তাঁহার অন্বেষণে লোক পাঠাইয়া তাঁহাকে না পাইয়া চলিয়া আসিয়াছেন। তিনি বেলা দুই প্রহরের সময় বাজার করিবার নাম করিয়া যে কোথায় গেলেন, কেশববাবু তাহার ঠিকানা পাইলেন না। আমরাও নৌকার উপরে তাঁহার জন্য অপেক্ষা করিতে লাগিলাম। ৩ টা, ৪ টা, ৫ টা, বাজিয়া গেল, তথাপি তাঁহার কোন সংবাদ পাইলাম না। শুনিলাম আর অর্ধ ঘণ্টার মধ্যে বাষ্পপোত খুলিয়া যাইবে। কেশববাবু তাড়াতাড়ি করিয়া আমাদের পান্স্শালা-রক্ষককে একখানা চিঠি পাঠাইয়া দিলেন। এই চিঠির উপর যাহা কিছু নির্ভর। আমাদের বাষ্পপোত শীঘ্রই সিংহল ছাড়িয়া চলিল। কালীকমলবাবু একা, বিদেশ, সঙ্গে কিছুই নাই, আপনার মত কেহই নাই—তিনি কি করিবেন, কি দুর্ভিক্ষ-পাকে পড়িয়া আসিতে পারিলেন না, তাঁহার পরিবারেরাই বা কি ভাবিবে; এই সকল বিষয় মনে আসিতে লাগিল। যাহা হউক এক্ষণে আর কি করা যায়, অন্য কোন উপায় নাই।—আমরা সিংহল দ্বীপ ছাড়িয়া যাইতেছি, আর কখন দেখিতে পাইব কি না, বলিতে পারি না।

১২ কার্তিক, শুক্রবার ।

সমুদ্র-পীড়াকে দূর হইতে দেখিয়া জ্বর কোথায় চলিয়া গিয়াছে । আজ উষাকাল অবধি সায়ংকাল পর্যন্ত সমুদ্রকে উপভোগ করিলাম । সমুদ্রের এমন শান্তমূর্ত্তি আর কখনো দেখি নাই, তরঙ্গ প্রায় নাই । যে সমুদ্র এক একবার স্বীয় বেগে পাহাড় পর্বতকে অস্থির করে, তাহা এমন শান্ত হইয়াছে যে এখন সামান্য নৌকা করিয়াও তাহার উপর দিয়া যাওয়া যায় । জলের উপর যেন কে শিল্পকার্য্য করিয়া রাখিয়াছে । বায়ু সমুদ্রের উপর হইতে আসিয়া আমারদিগকে আলিঙ্গন করিতেছে এবং সমস্ত শরীরকে শীতল করিয়া দিতেছে । এখানে সমুদ্রই এক প্রকাণ্ড ব্যাপার—বিশ্বের সমুদয় কার্য্য যেন তাহারই উপর দিয়া হইতেছে, সূর্য্য তাহারই মধ্য হইতে উদয় হইতেছে এবং তাহারই গর্ভে প্রবেশ করিতেছে—জ্যোতিগণ যেন তাহারই সেবায় নিযুক্ত আছে ! আমার সকল চিন্তা সমুদ্রই এক্ষণে হরণ করিতেছে । সমুদ্রকে দেখিলে ইহাকে অনন্তস্বরূপের নিকেতন মনে হয় । ‘অনা-দিমং স্বং বিভূত্বেন বর্তসে যতোজাতানি ভুবনানি বিশ্বা ।’ ইহা অনন্তের কি অপূর্ব্ব আদর্শ—কি অতুল্য প্রতিমা ! এক্ষণে আকাশ আর সমুদ্র ! ইহারা যেন শতমুখে স্তোত্র পাঠ করিতেছে । কিন্তু এই সুদূর-বিস্তৃত প্রশান্ত সমুদ্র, নক্ষত্র-তারা-গ্রহ-সঙ্কুল গগন-বিতান,—ইহাদের সৌন্দর্য্য ও রমণীয়তা যদি আরো সহস্র গুণ হইত, অথচ ভাবগ্রাহক মনের সৃষ্টি না

হইত ; তবে কোথায় বা ইহার শোভা, কোথায় বা ইহার সৌন্দর্য্য থাকিত ! তাহা হইলে সমুদ্র জলরাশি মাত্র থাকিত—আকাশ কতকগুলি জড়পিণ্ডে পূর্ণ থাকিত ।

১৩, ১৪ কার্তিক, শনিবার রবিবার ।

আমরা যেন এক ক্ষুদ্র পুরীর উপরে ভাসিয়া যাইতেছি । পুরীর সজ্জা এখানে সকলই আছে । আমারদের বাষ্পপোত এবার লোকজনে পরিপূর্ণ—কত দেশের আকৃতি একত্র হইয়াছে । সাহেব বিবি বিস্তর । সাহেবেরা বিবি আর খানা লইয়াই আছে । সকলেরই হাতে চিত্র বিচিত্র মলাটের এক এক খানা গল্পের বহি—যাহাতে একটুকু ভাবিতে হয়, এমন পুস্তক প্রায় দেখিতে পাই না ।—আবার আমার সমুদ্র-পীড়া আরম্ভ হইয়াছে, এ সময় আর কিছুই ভাল লাগে না । এবার সে পীড়া পূর্ব্ববারের মত তত প্রবল নয় । কিন্তু একে জ্বরের দুর্ব্বলতা এখনো যায় নাই, তাহার উপর সমুদ্র-পীড়া আমাকে আরো দুর্ব্বল করিয়াছে । এখন সুস্থতা আমার পক্ষে মরীচিকার ন্যায় হইয়াছে—যখন তাহাকে ধরিতে যাই, অমনি দূরে গমন করে । রবিবারে এখানে ইহাদের উপাসনা দেখিলাম । প্রহ্লাদচরিত্রের মত একটি উপন্যাস পাঠ হইল । ডানিয়েল বড়ই ঈশ্বর-ভক্ত ছিলেন ; তাঁহাকে কোন্ রাজা সিংহের গর্ভের মধ্যে ফেলিয়া দিতে অনুমতি করিলেন, কিন্তু ঈশ্বর তাঁহার সহায় হইয়া তাহাকে নির্বিঘ্নে সেখান হইতে উত্তীর্ণ করিলেন । প্রহ্লাদচরিত্রে আমারদের যেমন বিশ্বাস, এই

গল্পে ইহাদেরও বোধ হয় সেই প্রকার বিশ্বাস থাকিবে । ইহাদের উপাসনা-পদ্ধতিতে বাহিরের আড়ম্বরই অধিক, কিন্তু ভক্তিভাব অল্পই দেখিলাম ।

১৫ কার্তিক, সোমবার ।

প্রাতে মান্দ্রাজে আসিয়া উপস্থিত হইলাম । এখান হইতে মান্দ্রাজের বড়ই আশ্চর্য্য শোভা ! সমুদ্র-তীরে অট্টালিকাশ্রেণী বিরাজ করিতেছে । আমারদের নৌকা গোলমালের আলায় হইয়াছে । ইহার কোন স্থানে বিপণী বসিয়াছে, কোন স্থানে বাজীকরেরা ইউরোপীয় দেবীদিগের নিকটে আপনাদের চাতুর্য্য প্রকাশ করিতেছে । কত মান্দ্রাজি নৌকা বাষ্পপোতের কাছে আসিয়া গোলমাল করিতেছে । সমুদ্র-তরঙ্গে সেই সকল নৌকা যেরূপ আন্দোলিত হইতেছে, তাহাতে নামিতেই ভয় হয় । এই সকল নৌকার কাষ্ঠ প্রেকের দ্বারা বদ্ধ নহে, কিন্তু বেত্র-রজ্জুতে বদ্ধ রহিয়াছে । এক একখানা ক্ষুদ্র তরী সমুদ্র-কীটের ন্যায় ভাসিয়া যাইতেছে, তাহার উপরে জল উঠিতেছে, তবুও ডুবিয়া যায় না । বড় বড় দুই কাষ্ঠ বেত্রের রজ্জুতে একত্রে বাঁধা—সমুদ্র-তরঙ্গ তাহার কিছুই করিতে পারে না । মান্দ্রাজকে এখান হইতে দেখিয়া বোধ হয় যে এমন পুরী কোথাও নাই । কিন্তু শুনিলাম, সেখানকার গলি সঙ্কীর্ণ, বসতি বিস্তর, আর লোকজনের অবস্থাও বড় ভাল নয়—আমাদের অট্টালিকাময় পুরী কলিকাতা অপেক্ষা ইহা অনেক অংশে নিকৃষ্ট । আমরা যে দিনে সমুদ্রের কোল হইতে গালপুরীর শোভা

দেখিতেছিলাম, সে দিনের আর অদ্যকার ভাব কত ভিন্ন ! সে দিনে এক এক নারিকেল বৃক্ষ যত ভাবে পূর্ণ ছিল, অদ্য সারি সারি অট্টালিকাও সে প্রকার নয় ; সে দিন এক জন নাবিকের মুখ দেখিয়া মন ঘেরূপ হইয়াছিল, অদ্য শত শত মান্দ্রাজীকে দেখিয়াও সেরূপ হয় না । তখন ভাবিকাল সিংহ-লের উপরেই যেন নৃত্য করিতেছিল, কিন্তু এক্ষণে আবার কলিকাতারই প্রতি প্রতিক্ষণে মন ধাবমান হইতেছে । প্রায় ১ টার সময় মান্দ্রাজ পরিত্যাগ করিয়া চলিলাম । আজ আমাদের কুঠরীতে দুই জন মান্দ্রাজী আসিয়া উপস্থিত । তাহারা আমাদের ঘরের লোক । কোন দুর্দান্ত সাহেব না আসিয়া যে তাহারা আসিয়াছে, এই আমরা বহু করিয়া মানিলাম ।

১৬ কার্তিক, মঙ্গলবার ।

সমুদ্র আবার অশান্ত হইয়াছে । আমাদেরও আবার সমুদ্র-পীড়া আক্রমণ করিয়াছে । দিন আর যায় না । বাড়ি মনে পড়িলে অস্থির হইতে হয় । অভাবেই সকল বস্তুর যথার্থ গৌরব প্রকাশ পায় । সিংহলে বাড়ির সকল বিষয় এক এক-বার ছায়ার ন্যায় মনে হইত, কিন্তু ফিরিয়া আসিবার সময়েই বাড়ির আকর্ষণ প্রবল হইতেছে । কলিকাতার ধূলি দুর্গন্ধ আর মনে আসিতেছে না ; কিন্তু উহার ভাল বিষয় সকলই মনে হইতেছে । আমি বাড়ির সকলকে একে একে মনে করি-লাম ; যতই এই বিষয় লইয়া আন্দোলন করা যায়, ততই যাই-বার ইচ্ছা আরো প্রবল হয় ।

১৭ কার্তিক, বুধবার ।

স্থির সমুদ্র ! নীলবর্ণ গিয়া সবুজবর্ণ দেখা যাইতেছে । এক একটা পক্ষীও এক একবার দেখা দিতেছে । যাইবার সময় যেমন নীলজল দেখিবার জন্য ব্যগ্র হইতেছিলাম, এক্ষণে ঘোলা জলের জন্য সেইরূপ হইতেছি । আজ বঙ্গদেশের স্বাস্থ্যভাব সমুদ্রেতেই বিরাজ করিতেছে । সমুদ্র-পীড়া আমার নিকট হইতে পলায়ন করিয়াছে । বায়ু এক্ষণে স্বস্থতার হিল্লোল বহন করিতেছে । আমি সকাল অবধি সন্ধ্যা পর্য্যন্ত মনের সাধে বায়ু খাইতেছি । এখানে বায়ুকে রোধ করিবারও কিছুই নাই, তাহাকে দূষিত করিবারও কোন বস্তু নাই—‘রাত্রিঃ দিবং গন্ধবহঃ প্রয়াতি ।’ এ বায়ুর বিশ্রাম নাই আর আগারদের সিন্ধুঘোটকেরও বিশ্রাম নাই । এ রাত্রি দিন অবিশ্রান্ত সমান চলিয়াছে ; অন্য যে যাহা করুক, এ আর আপনার কৰ্ম্ম ভুলে না ।—নিশা শুভ্রময়ী জেমাৎস্নাবতী হইয়া শোভা পাইতেছে । সাহেব বিবিরা নৃত্য আরম্ভ করিলেন । তাঁহাদের যেমন গান তেমনি নৃত্য—আমার উহার কিছুই ভাল বোধ হয় না ।

১৮ কার্তিক, বৃহস্পতিবার ।

সাহেবেরা আমোদ প্রমোদে এক প্রকার করিয়া কালক্ষেপ করে । কৰ্ম্মের সময় তাহারা যেমন মনকে গুরুভারে প্রপীড়িত করে, কৰ্ম্ম না থাকিলে আগোদের দিক্রেই তেগনিই ধাবমান হয় । ইউরোপীয় ভদ্রলোক মাত্রেই নাচগানে দক্ষ—নাচিতে না জানিলে তাহারা ভদ্র নাগের যোগ্যই হয় না ।

গল্পের পুস্তক আমোদের আর এক অঙ্গ । গ্রন্থের সঙ্গে আমোদ আমারদের তাস পাশা অপেক্ষা শত সহস্র গুণে ভাল বলিতে হইবে । সভ্যতা বিস্তর বৃদ্ধি না পাইলে আর সাধারণে এমন পাঠ-তৎপর হয় না । বিশ্রাম সময়ে সামান্য ভৃত্যেরও হস্তে এক এক খানা পুস্তক দেখা যায় । এখানকার কর্মচারীরা আমাদের কর্মচারী হইতে যে কত উৎকৃষ্ট, বলা যায় না । আমাদের ভৃত্যেরা নিদ্রা দিতে পারিলে আর কিছু চায় না । এখানকার ৭৮ জনে শতাধিক লোকের কর্ম করিতেছে, আরো তাহাদের হস্তে অন্যান্য কত কর্ম রহিয়াছে । যাহারা সকালে জুতা পরিষ্কার করিতেছে, তাহাদিগকে আবার দেখি রাত্রিতে বাদ্যকর হইয়া বিবি সাহেবদের নৃত্য সাধন করিতেছে !—সমুদ্রে যাহা দেখিবার সকলই দেখা হইল । কেবল তাহাতে প্রবল ঝঞ্জা প্রভৃতি বিপদ দেখা হইল না । সমুদ্রের একই প্রকার ভাব আর কিছুতেই যায় না । আজ আমরা কলিকাতার অতি নিকটে আসিয়াছি । আমাদের বাষ্পপোত এক আড়কাট ধরিবার জন্য বড়ই ব্যগ্র হইতেছে । ইহার সহায়তা ভিন্ন এই সঙ্কট স্থানে এক পদও চলিবার জো নাই । সকলেরই সঙ্গে পারা যায়, কিন্তু আত্মাপহারী চোরের সঙ্গে আর পারা যায় না । সাগুহেড নামক স্থান হইতে চোরা বালির আরম্ভ—এমন সকল বড় জাহাজের বড়ই সাবধান হইতে হয় । আজ সন্ধ্যা অবধি সকলেই আড়কাটের জন্ত চাহিয়া রহিয়াছে । দূর হইতে কোন আলোক দেখিবামাত্র সকলেই তাহা নিরীক্ষণ করিয়া

দেখিতেছে । রাত্রি ৯টার পর চির-প্রার্থিত কর্ণধার পাইলাম, গঙ্গাসাগরের মুখে বাষ্পীয় নৌকা নোঙ্গর করিয়া রহিল ।

১৯ কার্তিক, শুক্রবার ।

প্রাতে জলের বর্ণ ভস্মের মত হইয়া আসিয়াছে । কতকক্ষণ পরে ছোট ছোট পান্‌সী নৌকা সকল দেখা যাইতেছে । কুলিকাতার ‘ওভরলণ্ড মেল’ লইয়া যাইবার জন্য আর এক ক্ষুদ্র বাষ্পপোত আসিয়া উপস্থিত । সে শীঘ্র আপন কৃত্য সমাপন করিয়া চলিয়া গেল । বেলা ৯টার পর খিজরী হইতে ডাকের নৌকা অনেক চিঠি বহন করিয়া আনিয়া দিল । তাহাতে গাল হইতে কালীকমলবাবুর পত্র পাইবার প্রত্যাশা ছিল, কিন্তু কিছুই পাইলাম না । আমরা সকলেই তাঁহার জন্য চিন্তিত রহিয়াছি । আজ আমাদের সাবধানে সাবধানে জোয়ার ভাঁটা দেখিয়া চলিতে হইতেছে । কয়খালিতে দুই ঘণ্টা কাল অপেক্ষা করিলাম । বেলা দুই প্রহরের পর জোয়ারের সময় আমাদের ইষ্টিমার ছাড়িয়া দিল । গঙ্গার দুই পার্শ্বই দেখা যাইতেছে । গঙ্গা স্থায়ী শুভ্র বসন পরিধান করিয়াছেন । এক স্থানে আসিয়া দেখি, আমাদের কুঠরীর জালনা বন্ধ করিতেছে । শুনিলাম, এই স্থানে এই সকল গবাঙ্ক হইতে জল উঠিয়া বড় এক জাহাজ ডুবিয়া গিয়াছে । বৈকালে কলাগেছে ছাড়াইয়া গেলাম । সূর্য্য গাছপালার অন্তরালে অস্ত গেলেন, সমুদ্রের মধ্যে নয় । চতুর্দিক্ হইতে দেশের গন্ধ আসিতেছে । সেই গঙ্গা, সেইরূপ দৃশ্য, সমুদ্র-বায়ু আর নাই,

ভীজা শীতল বায়ু বহিতেছে—এখন এই বাষ্পপোত ছাড়িয়া এক নৌকায় উঠিলেই ঠিক হয় । সন্ধ্যার সময় কলিকাতা হইতে হাত পাঁচ ছয় অন্তর আছিপুরে নোঙ্গর করিয়া রহিলাম ।

২০ কার্তিক, শনিবার ।

অদ্য গঙ্গাস্নান করিয়া শরীর শীতল হইল । সমুদ্র-জলে স্নানকে স্নানই বোধ হয় না । স্নানের জন্ত আমরা আমাদের বাষ্পপোতের দণ্ড-চক্রের কাছে বসিলে সমস্ত সমুদ্রেই আমাদের উপরে আসিয়া পড়ে ! আজ যদিও ইহার বেগ মান্য আর জলও অল্প অল্প উঠিতেছে, তথাপি অন্য দিনের অপেক্ষা অদ্যকার স্নানে বড়ই আরাম । আজ আমাদের ব্রত উদযাপন হইল । প্রায় ৪০ দিনের ব্রত—কঠোর ব্রত বলিতে হইবে । সমুদ্রের উপরে ভোগী অপেক্ষা রোগীর ন্যায়ই অধিক দিন যাপন করিয়াছি । গালভূর্গে যতদিন ছিলাম, ততদিন কষ্ট-ভোগ বিলক্ষণ হইয়াছে । ভোগীর পক্ষে পর্যটনের কোন আরামই নাই । যাহারা শরীর সেবাতেই অর্দ্ধজীবন যাপন করে, বেড়ান তাহাদের জন্য নয় । যাহারা এই মনে করিয়া বাহির হয় যে ভাল খাওয়া, ভাল থাকা, সকলই সুবিধা মত হইবে, তাহারা যেন গৃহ হইতে বাহির না হয় । পর্যটনের লক্ষ্য ও ফল অন্যান্যরূপ । আমার শারীরিক যে সকল কষ্ট গিয়াছে, এক সমুদ্র দর্শনেই সে সকল কষ্টের অবসান । সমুদ্রের মহান্ গভীর উদার মূর্তি দেখিয়া মন উন্নত হয় এবং আত্মা সেই ভূমার প্রতি উজ্জীন হয় । ইচ্ছক ধূলি ও জনতা

হইতে নিবৃত্ত হইয়া স্থিতির সঙ্গে আলাপ করা মহৎ সুখের কারণ । এই ক্ষুদ্র ভ্রমণে অনেক প্রকার লোকের সঙ্গেও দেখা হইয়াছে । মনুষ্যকেই শিক্ষা করা মনুষ্যের যথার্থ শিক্ষা । আমরা দুই পান্থশালা আর দুই বাষ্পপোতে থাকিয়া যেন চারিটি ক্ষুদ্র পুরী বেড়াইয়া আসিয়াছি । গালপুরীতে প্রায় তিন সপ্তাহ থাকিয়া সিংহলীদের ভাব অনেক জানিতে পারিয়াছি । আমাদের সঙ্গে তাহাদের অনেক বিষয়ে এমন ঐক্য দেখিয়াছি, যে তাহারদিগকে ভিন্ন জাতীয় বলিয়াই মনে হয় না । বৌদ্ধ ধর্মের বিষয়ে এত অল্প দিনে যাহা কিছু জানা গিয়াছে, তাহাতে সেখানে সে ধর্মের হীনাবস্থাই বোধ হয় । এই প্রকার দেশ-ভ্রমণে যাহা কিছু ক্ষুদ্র এবং পরিমিত এবং সঙ্কীর্ণ তাহা গিয়া উন্নত এবং বিস্তৃত বিষয়েই মন যায় । মনুষ্যের প্রতি সদ্ভাব এবং সৌহার্দ্য বিস্তৃত হয় । সকলকেই এক পিতার পুত্র—ভ্রাতা সমান জানিয়া তাহারদিগের মন্দ পরিত্যাগ করিয়া ভাল বাছিয়া লইতেই ইচ্ছা হয় । এক্ষণে বাড়ী হইতে কিছুকালের জন্য দূরে থাকিয়া তাহাকে আরো প্রিয়তর বোধ হইতেছে । সকলেরই সঙ্গে নূতন সৌহার্দের সহিত দেখা হইবে । আবার নূতন অনুরাগের সহিত ঈশ্বরের কার্যে প্রবৃত্ত হওয়া যাইবে । মন এতকাল বিশ্রাম করিয়া নূতন উৎসাহ ও একাগ্রতার সহিত কৰ্ম্ম আরম্ভ করিবে । শরীরের বিষয় ঠিক জানি না, কিন্তু বোধ হয়, সেও মনোযোগী ভূত্যের ন্যায় আমার কার্য্য করিতে থাকিবে ।

পরিশিষ্ট ।

ভারতবর্ষীয় ইংরাজ ।

ইংরাজেরা এদেশ জয় করিয়া শতাব্দীর অধিক কাল আমাদের উপর রাজত্ব করিতেছে কিন্তু এদেশীয়দিগের সহিত এখনও তাহাদের সদ্ভাবের কোন চিহ্ন দৃষ্ট হয় না। ইহা যেমন আফ্রিকার বিষয় তেমনি অনিবার্য ঘটনা বলিতে হইবে। আমাদের দেশের যে কোন ব্যক্তি ব্রিটিশ-সিংহকে তাহার নিজ গহ্বরে দর্শন করিয়াছে সেই তাহার মহান্ উদার ভাব দেখিয়া বিমোহিত হয় কিন্তু সেই সিংহ যখন বিদেশে আসিয়া বিচরণ করে তখন তাহার তর্জন-গর্জনকারী বিকট মূর্তি দর্শন করিয়া লোক-সকল শশব্যস্ত হয়। যে ইংরাজ সেই ইংলণ্ডে, সেই ইংরাজ এই ভারতে—তবে তাহার অবস্থান্তর হইবার কারণ কি? শুধু আমরা নই—কিন্তু তাহাদের আপনাদের লোকেরাও এই পরিবর্তন দেখিয়া অনেক সময় বিস্ময়াপন্ন হয়। এদেশে এক জন ইংরাজ যে সকল ঘটনার মধ্যে নিপতিত হয় তাহা একপ বিসদৃশ—যে ইহার মধ্যে পড়িয়া কতক বৎসরের মধ্যেই তাহার প্রকৃত মহৎ ভাব অন্তর্হত হয় ; অথবা তাহাদিগের সমাজ-প্রণালীর একপ শাসন যে তাহাতে সে বাধ্য হইয়া সভ্যতার আরণে তাহার প্রকৃত নীচতাব স্বদেশে গোপন করিয়া রাখে, বা প্রকাশ করিবার অবসর পায় না—কিন্তু যখন সে বিদেশে গিয়া স্বীয় সামাজিক বন্ধন হইতে মুক্ত হয় তখনই সে নিজ মূর্তি ধারণ করে—আঙ্গো-ইণ্ডিয়ান নামে এক নূতন জীব হইয়া দাঁড়ায় এবং “এই বিড়াল বনে গেলেই বন বিড়াল হয়” এই প্রবাদটির সত্যতা প্রকারান্তরে প্রমাণ করে।

যে কারণেই হউক, ইংলণ্ডবাসী ইংরাজের স্বভাব এক প্রকার—ভারতীয় ইংরাজের ভাব অন্ত প্রকার বলিয়া আমাদের চক্ষে প্রতীয়মান হয়। বিলাতে গিয়া ইংরাজদের সঙ্গে সমানভাবে মিশিলে মেশা যায়। তাহাদের ভোজনালয়ে বসিয়া একত্রে আহাৰাদি কর—ক্রীড়াকাননে তাহাদের সহিত একত্র আমোদ

আহ্লাদ কর—ইংরাজ-পরিবারে প্রবিষ্ট হইয়া তাহার গৃহিণীগণের সহিত মন খুলিয়া আলাপ কর, সকলি সম্ভবে। কত আদরের সহিত তাহারা তোমাকে গ্রহণ করিবে—সখা বলিয়া তোমার প্রতি হস্ত প্রসারিত করিবে—অভ্যাগত বলিয়া আতিথ্য-সংকারের ক্রটি করিবে না। যিনি কোন ইংরাজ-পরিবার মধ্যে বাস করিয়া প্রাতঃকালে গৃহিণীর সহাস্য বদনে স্নুপ্রভাত অভিবাদন ও রাত্রে শয়নের পূর্বে সৌরাত্র অভিবাদনে অভিনন্দিত হইয়াছেন তিনি তাহা কখন বিস্মৃত হইতে পারেন না। ইংরাজ-স্ত্রী হইতে বিদেশীয়গণ যে সেবা শুশ্রূষা পান তাহাতে তাঁহাদের ইংলও-বাস প্রবাস বলিয়াই বোধ হয় না। ভারতবর্ষীয় মাত্রই সে দেশে সম্মানের সহিত গৃহীত হয়—ভারতবর্ষীয় ধনাঢ্য ব্যক্তি তথায় যুবরাজ বলিয়া সমাদৃত হন।

ঐ এক ছবি—এদেশে দেখ আর এক চিত্র। সেই ইংরাজদের সহিত এদেশে আলাপ করিতে যাও দেখিবে তাহাদের আর সে ভাব নাই। তাহাদের গৃহদ্বার বন্ধ। হাস্যালাপের পরিবর্তে ক্রকুটি। তাহারা আপনাদের দলবল লইয়া যে ব্যুহ বন্ধন করে সাধ্য কি যে, এদেশীয় কোন ব্যক্তি তাহার মধ্যে প্রবেশ করিতে পারে। তাহাদের রাত্রি আমাদের দিন—আমাদের দিন তাহাদের রাত্রি। তাহাদের আমোদ আহ্লাদ স্বতন্ত্র—আমোদ প্রমোদের স্থান স্বতন্ত্র। তাহাদের ক্রবে আমাদের প্রবেশের অধিকার নাই। ইংলণ্ডে গিয়া আমাদের মধ্যে যে সকল ব্যক্তি তাহাদের ধনাঢ্য কুলীনদিগের সহিত একাসনে উপবেশন করেন এখানে হয়ত তাঁহারা সামান্য ইংরাজ-সমাজ হইতেও পরিচ্যুত। তাহাদের গার্হস্থ্য-জীবনের সহিত এদেশীয়দিগের কোন সম্পর্ক নাই। আমরা ইংরাজদের যাহা কিছু দেখিতে পাই তাহা কেবল কর্মক্ষেত্রে। ইংরাজ বিচারাসনে—আমরা উকীল হইয়া তাঁহার সম্মুখে দণ্ডায়মান হই; ইংরাজ প্রভুপদে—আমরা দাস হইয়া তাঁহার সেবা করি; ইংরাজ শাসনকর্ত্তা—আমরা ঘোড়-হস্তে তাঁহার দরবারে উপস্থিত হই। মুসলমানদের রাজত্ব-কালে হিন্দু মুসলমানে পার্থক্য ছিল সন্দেহ নাই কিন্তু ক্রমে সে ভাব অনেক শিথিল হইয়া আসিয়াছিল।

মুসলমানদের আচার ব্যবহার হিন্দুদের আচার ব্যবহারে অনেক সৌন্দর্য্য ছিল। মুসলমান রাজা হিন্দুগদ্যীর পরামর্শ লইতে সঙ্কুচিত হইতেন না, হিন্দু দীরকে সেনাপতি পদে নিযুক্ত করিতে কুণ্ঠিত হইতেন না। যেমন তাঁহাদের পরস্পর মধ্যে দেয়াগি প্রজ্বলিত ছিল তেমনি সখ্য বন্ধনেরও নানা উপকরণ বিদ্যমান ছিল। কিন্তু ইংরাজ ও এদেশীয়দের সম্বন্ধ অন্য প্রকার—তাঁহাদের পরস্পর বিচ্ছিন্ন ভাব বোধ হয় না যে কোন কালে বিদূরিত হইবে।

• সে দিন আমার দুইটি মহারাষ্ট্রীয় বন্ধুর মধ্যে এবিষয়ে কথোপকথন হইতেছিল। একজন বলিলেন “ইংরাজেরা আমাদের দেশ স্বেচ্ছাসন করিতেছেন তাহা কি বোধবিশিষ্ট ব্যক্তি নাহেই স্বীকার না করিয়া থাকিতে পারেন? দেখ তাঁহারা না থাকিলে আমাদের কি চরুশাই হইত। আমরা পরস্পর পরস্পরের উপর খড়াঘাত করিয়া দেশকে রক্তে প্লাবিত করিতাম—বাহার বল তাহারই রাজ্য—অধঃশ্রমই জয়। রাজবিদ্বেষ, অরাজকতা—প্রজাপীড়ন—ঠগি ডাকাতি এই সকল সামাজিক অমঙ্গল হইতে ভারতের অধঃপাতে বাইবার উপক্রম হইয়াছিল—ইংরাজ-তরবার ভারতভূমিকে এ সকল বিপত্তি হইতে উদ্ধার করিয়াছে। ইংরাজদের আগমনে এদেশে স্বশৃঙ্খল রাজ্য সংস্থাপিত হইয়াছে—দস্যু তরুরের ভয়—বর্গাদিগের অত্যাচার—পিণ্ডারীগণের আক্রমণ-ভয় বিদূরিত হইয়াছে। ধন প্রাণ সুরক্ষিত—পরিশ্রম স্বেচ্ছাধীন ও বন্ধন-শূন্য, স্ত্রতরাং প্রত্যেকে আপন আপন শ্রমের ফল নির্বিঘ্নে উপভোগ করিতেছে। বাণিজ্য-ব্যবসা বিস্তারে দেশের ক্রিয়াকলাপ বৃদ্ধি হইয়াছে। কত জঙ্গল পরিষ্কৃত হইয়াছে—কত মরুভূমিতুল্য স্থান আবাদ হইয়াছে। গোহ-পথ ও বাষ্পপোর্টের দ্বারা চলাচলের সুগম হইয়াছে। প্রবাসস্থ বঙ্গুগণের নিকট হইতে পত্রাদি পাইবার কেমন সুযোগ—আকাশের তড়িৎ পর্য্যন্ত একাধো নিযুক্ত। আবার দেখ আমরা বিদ্যাদানে আমাদের রাজপুরুষের কেমন নিঃস্বার্থ যত্ন। আমাদের চক্ষু ফুটাইলে পাছে তাঁহাদের ভবিষ্যতে কোন হানি হয় ইহার প্রতি লক্ষ্য না করিয়া তাঁহারা আমাদের বিদ্যাশিক্ষা দিবার জন্য কত শত বিদ্যালয় স্থাপন

করিয়াছেন। ধর্মের উপর, সমাজের রীতিনীতির উপর তাঁহারা হস্তক্ষেপে বিরত। বুদ্ধি ও চিন্তা-শক্তির উপর কোন শৃঙ্খল নাই। এ রাজ্যে বাস করিয়া মন খুলিয়া আপনাদের সুখ দুঃখ প্রকাশ করিতে পারিতেছি। সর্বসাধারণের হিতজনক রাজ-নিয়ম-প্রভাবে প্রত্যেকে আপন মনের ক্ষুধিত্তিতে স্বচ্ছন্দে ইচ্ছামত কার্য্য করিতে ও জগতের হিতসাধনে নিযুক্ত হইতে পারিতেছি। আর কি চাও? এত উপকার প্রাপ্ত হইয়াও তোমরা ইংরাজ-রাজ্যের বিপক্ষে লেখনী চালনা করিতে ক্ষান্ত নহ? আর ইহাও যে করিতে পার সে কেবল ইংরাজ রাজ্যের অনুগ্রহে, তাঁহারা মনে করিলে মুহূর্ত্তের মধ্যে সমস্ত দেশীয় সংবাদপত্রের মুখ-বন্ধ করিয়া দিতে পারেন। অতএব এই সকল উপকার স্মরণ করিয়া আমাদের রাজপুরুষদের প্রতি কৃতজ্ঞ হওয়া উচিত।”

আমার অপর বন্ধু উত্তর করিলেন—“এই সকল যুক্তি আমাদের হৃদয়ঙ্গম হয় না। বিদেশীয় রাজার প্রতি রাজ-ভক্তি উদয় হওয়া সহজ নহে। তবে যদি / তাঁহারা স্বদেশীয় রাজার ন্যায় পিতৃ-ভাবে শাসন করেন, তবেই তাহা সম্ভব, নচেৎ নয়। দেখ এই বিদেশীয়দিগের দ্বারা ভারতের যথাসর্বস্ব অপহৃত হইতেছে কি না। বিলাতে এক গবর্ণমেন্ট—এদেশে এক গবর্ণমেন্ট—ওদিকে মন্ত্রী দল-পরিবেষ্টিত সেক্রেটারি অফ্‌স্টেট, এদিকে রাজপ্রতিনিধি গবর্ণর-জেনারেল, গবর্ণর, লেফট-নেণ্ট গবর্ণর, কমিসনর প্রভৃতি অধিপতিগণ আমাদের দেশ হইতে কত কোটি কোটি টাকা লুটিয়া লইতেছেন। বিদেশীয় সৈন্য-রক্ষার জন্য কত ব্যয় হইতেছে। রাজপুরুষদের ধর্ম্মবাজকগণ ‘হীদেন’ প্রজা-নিষ্পীড়িত ধনকোষ হইতে অবাধে অর্থ সংগ্রহ করিতে কিছুই মনে করেন না। কত দিক দিয়া ভারতের রক্ত শোষণ হইতেছে তাহার ঠিকানা নাই। পিণ্ডারীদের উপদ্রব নাই সত্য বটে কিন্তু প্রজা-গণের দারিদ্র্য-নিবন্ধন কষ্ট তেমনি প্রবল। কত প্রকার রাজস্বের সৃষ্টি হইতেছে তাহার সীমা নাই। আমাদের উপর যে ভূরি ভূরি আইন বর্ষণ হইতেছে তাহাতে আমাদের বাস্তবিক উপকার কি অপকার তাহা নির্ণয় করা সুকঠিন। সর্বত্রই শুনা যায় যে, পূর্বে আমাদের পরস্পর-ব্যবহারে যে সত্য ও সরলতা ছিল তাহা

একালে আর নাই। পূর্বে আমাদের এক কথার যে মূল্য ছিল, এখনকার শত দলিল দস্তাবেজের সে মূল্য নাই। যে প্রদেশে ইংরাজি আদালত প্রতিষ্ঠিত হইয়াছে—ইংরাজি আইন প্রচলিত হইয়াছে সেখানেই কপটতা—কুটিলতা—জাল—মিথ্যাশপথ প্রশ্রয় পাইতেছে। চোর ডাকাতের ভয় নাই সত্য কিন্তু আমরা নিরস্ত্র ও আত্মসংরক্ষণে অসমর্থ হইয়া ক্রমেই বলবীৰ্য্যহীন নির্জীব হইয়া পড়িতেছি। পাশ্চাত্য সভ্যতার প্রত্যাপে আমাদের জাতীয় গৌরব হ্রাস হইতেছে। বিদেশীয় বাণিজ্য ব্যবসা বৃদ্ধি পাইতেছে বটে কিন্তু তাহার প্রতিদ্বন্দ্বিতায় ক্রমে আমাদের দেশীয় ব্যবসায়ের লোপাপত্তি হইতেছে—কত কত দেশীয় শ্রমোপজীবির অন্ন মারা যাইতেছে। এ সকল সম্বন্ধেও অবশ্য স্বীকার করিতে হইবে যে, ইংরাজশাসনে আমাদের দেশের অনেক উপকার সাধিত হইয়াছে—কিন্তু ইহাও বলিতে হইবে যে সে শাসন ভয়ের উপর প্রতিষ্ঠিত, প্রীতির উপর নহে। আমাদের সঙ্গে ইংরাজদের মমতা নাই। পূর্বপশ্চিমের মধ্যে ভাবের কেমন অমিল। বাজা যখন বিদেশী—জেতু-বিজিতের মধ্যে যখন এত বিষয়ে অনৈক্য তখন আমাদের সঙ্গে তাঁহাদের সম্বন্ধ কেবল স্বার্থ-সম্বন্ধ বলিয়াই প্রতীতি হয়। আমরা বলি ইংরাজেরা আমাদের জন্য বাহা করিতেছেন তাহা হয় দায়ে পড়িয়া নতুবা স্বার্থসাধন উদ্দেশ্যে। তাঁহাদের রাজ্য—রাজ্যের স্ফুজালা আবশ্যক। তাঁহারা সভ্যজাতি—সভ্যতার অনুবোধে আমাদিগকে বিদ্যা শিক্ষা দিতে হইতেছে। এদেশীয় লোকে শিক্ষিত না হইলে রাজকার্য্য চলিবে কি প্রকারে? তথাপি দেখা যাইতেছে তাঁহারা সহজে আমাদিগকে সমান অধিকার প্রদানে সন্মত নহেন। আমাদিগকে উচ্চপদে প্রতিষ্ঠিত করিতে সহজে তাঁহারা স্বীকৃত হন না। সিভিল সার্ভিস সর্ব সাধারণের জন্য মুক্ত কিন্তু সে কেবল নামমাত্র। সিভিল সার্ভিসে প্রবেশের নিয়মাবলী এরূপ কল-কৌশলে সংরচিত যে এদেশীয়দের জন্য তাহার প্রবেশদ্বার অবরুদ্ধ বলিলেও অতুক্তি হয় না। সৈনিকদলের মধ্যে প্রবিষ্ট হইবার পথ আমাদের সম্বন্ধে একেবারেই রুদ্ধ। এই সকল দেখিয়া আমাদের মধ্যে অনেক কৃতবিদ্য ও মনে করেন যে ইংরাজেরা মুখে বাহাই বলুন, তাঁহাদের আস্তরিক

ইচ্ছা এই যে আমরা প্রভুদাসের সম্বন্ধ যেন কখন বিস্মৃত না হই। তাঁহাদের ইচ্ছা যে আমরা অনাবৃত পদে, গলগলীকৃত বস্ত্রে, সেলাম করিতে করিতে তাঁহাদের সম্মুখে দণ্ডায়মান হই। এবিষয়ে আমার বক্তব্য এই যে, ভয় অপেক্ষা প্রীতির আকর্ষণী শক্তি অধিক। শস্ত্রের বলে ভারতের কোটি কোটি প্রজাপুঞ্জকে বশে রাখা সহজ নহে। দেশীয় বিদেশীয়দের মধ্যে যাহাতে প্রীতি ও একতা স্থাপিত হয় তাহাই স্থায়ী মঙ্গলের সোপান। আমরা চাই যে ইংরাজেরা আমাদের সহিত ভদ্র ব্যবহার করুন, এদেশীয়দিগকে আপনাদের সঙ্গে সমান অধিকার প্রদান করুন, কৃষ্ণ শ্বেত বর্ণের মধ্যে প্রভেদ যতদূর সাধ্য বিলুপ্ত করুন, এদেশীয়দের উপর কঠোর বিচ্ছিন্নতাব না রাখিয়া তাহাদের সহিত সখ্য ও সমতা বন্ধন করুন, আমরা আর অধিক কিছু প্রার্থনা করি না। তাঁহারা যদি সৎভাবে আমাদের দিকে একপদ অগ্রসর হন, আমরা শতপদ অগ্রসর হইয়া তাঁহাদিগকে ভ্রাতৃত্বাবে আলিঙ্গন করিতে প্রস্তুত।”

তৎপরে তিনি আমাকে মধ্যস্থ মানিয়া জিজ্ঞাসা কবিলেন “তুমি ত ভাই ইংরাজদের সঙ্গে অনেক মিশিয়াছ, তোমার মনে তাঁহাদের গুণাগুণ কিরূপ দাঁড়াইয়াছে?” আমি উত্তর করিলাম, “মানুষ অপূর্ণ জীব—দোষ গুণ সকল মানুষেরই আছে, ইংরাজদের চরিত্রও এনিয়মের বহির্ভূত নহে, কিন্তু আমার মনে হয় যে তাঁহাদের সঙ্গে আমাদের একগুণকার অপেক্ষা ঘনিষ্ঠ সম্বন্ধ হইলে উভয় পক্ষেরই মঙ্গল। আমি অনেক সময় মনে করিয়া দেখি এদেশীয় ইংরাজদের মধ্যে আমার কেহ বন্ধু আছে কি না? তাহাদের সঙ্গে আমি একত্র পানভোজন করিয়াছি, ক্রীড়ালয়ে একত্রে ক্রীড়া করিয়াছি, কর্মকাজ প্রসঙ্গে অনেক সময় মিলিত হইয়াছি, তাদের সঙ্গে দেখা সাক্ষাৎ আলাপ পরিচয় আমার সর্বদাই হইয়া থাকে, কিন্তু তৈ, একজনকে এমন দেখি না যাহাকে আপনার বন্ধু বলিয়া আলিঙ্গন করিতে পারি, সখ্য বলিয়া যাহার নিকট আপনার মনের দ্বার মুক্ত করিতে পারি। একজন ভদ্র ইংরাজ আমার সম্মুখে হয়ত আমার স্বজাতির নিন্দা করিতে বিরত হইতে পারেন কিন্তু আমার পশ্চাতে কি করেন তাহা জানাই

আছে। দেখা হইলে ‘ভাল আছেন’ বলিয়া অভিবাদন অথবা সময়ে সময়ে ভোজনের নিমন্ত্রণ অথবা ভদ্র-রীতি-অনুসারে কথোপকথন—ইহা অপেক্ষা অধিক অনুরাগ সঞ্চারের কোন সম্ভাবনা দেখি না। তবে অবশ্য বলিব যে কর্তব্য-জ্ঞান ইংরাজ-প্রকৃতির এক অসাধারণ গুণ। কর্তব্যের অনুরোধে ইংরাজেরা সকল প্রকার কষ্ট সহ করিতে প্রস্তুত, সকল প্রকার ত্যাগস্বীকার করিতে তৎপর।” আমার বন্ধু বলিলেন, “ইংরাজেরা আমাদের সঙ্গে ভাবে মিলিয়া চলিবে ইহা সম্ভবপর নহে। আমাদের আশা অতদূর উঠিতে সাহস করে না। তাহারা যে এদেশীয়-দিগকে আপনাদের জাত-ভায়ের সঙ্গে সমান চক্ষে দেখিবে অথবা সমান অধিকার প্রদান করিবে এরূপ আশা ছরাশা মাত্র। আমরা আর অধিক কিছুই চাই না, আমরা তাঁহাদের একটুকু ভদ্র ব্যবহারেই সন্তুষ্ট। নিতান্ত ‘নিগার’ বলিয়া আমারদিগকে ঘৃণা না করেন তাহা হইলেই যথেষ্ট। কিন্তু ততটুকু দাক্ষিণ্যভাবও হ্রলভ। হুঃখের কথা কি কহিব, সে দিন আমার কন্যার বিবাহোপলক্ষে কলেঙ্কর সাহেবের নিকট রাস্তা দিয়া বাদ্য বাজাইয়া যাইবার অনুমতি প্রার্থনা করিলাম। তিনি আবশ্যকমত পরওয়ানা দিতে স্বীকৃত হইলেন। কিন্তু আমি সমস্ত আয়োজন করিয়া সময়-কালে দেখি যে, সাহেবের অনুতাপ উপস্থিত। তিনি পুলিশদৃত কর্তৃক বলিয়া পাঠাইলেন যে তাঁহার মাডামের শরীর ভাল নাই, টম্ টম্ বাদ্য তাঁহার বাটীর নিকট দিয়া বাজাইয়া যাইবে ইহা তাঁহার সহ হইবে না, অতএব পরওয়ানা বন্ধ করিতে বাধ্য হইলেন। বাদ্যের অভাবে বিবাহের উৎসব ভঙ্গ হইল ও আমার গৃহের স্ত্রীগণের হৃদয়ে কিরূপ আঘাত লাগিল তাহা বুক্তিতেই পার। এক মিনিটের জন্ত এই বাদ্য তাঁহার মাডামের শ্রুতিকর্কণ বোধ হইবে এই আশঙ্কায় সাহেব আমার সমুদয় কুল-কামিনীকে বিষাদে মগ্ন করিতে কিঞ্চিৎ-অত্রও কুণ্ঠিত হইলেন না। এইরূপ স্বার্থপরতা দেখিয়া ইংরাজদের প্রতি আমাদের অশ্রদ্ধা হয়। তাঁহারা আমাদের রীতিনীতি এত অল্প জানেন ও সেই অন-ভিজ্ঞতা নিবন্ধন সময়ে সময়ে এমনত অদ্ভুত নিয়ম-জারী করেন যে আমাদের বুখা মনকোভ জন্মানো ভিন্ন আর কিছুই তাহার উদ্দেশ্য বোধ হয় না। তাহার দৃষ্টান্ত

দেখ—এক পাছুকা লইয়া মধ্যে মধ্যে কত গোলযোগ উপস্থিত হয়। তাঁহারা ভদ্র-সমাজে গেলে টুপি খুলিয়া যান, আমরা মন্তক আবৃত রাখি কিন্তু তাঁহারা মনে করেন যে বড়লোকের সঙ্গে সাক্ষাৎ করিতে গেলে অনাবৃত পদে যাওয়া আমাদের ভদ্ররীতি। এই সকল ভাবিয়া চিন্তিয়া এইক্ষণে তাঁহারা নিয়ম করিয়াছেন যে ইংরাজ-মহলে বুট পরিয়া যাইবার বাধা নাই কিন্তু দেশীয় পাছুকা ব্যবহার নিষিদ্ধ। জান ত পারসীরা কেমন রাজভক্ত, তাহাদের আপনাদের রাজ-ভক্তির কতই গৌরব করে! সে দিন পুনর গবর্ণরের এক দরবারে একজন সম্ভ্রান্ত পারসী পুরোহিত উপস্থিত হন। গিয়া দেখেন প্রবেশের অনুমতি নাই—অপরাধের মধ্যে তিনি দেশীয় পাছুকা পরিয়া গিয়াছিলেন। দ্বারপাল-কর্তৃক নিষিদ্ধ হইয়া তিনি প্রাইবেট সেক্রেটারির নিকট বলিয়া পাঠান। তাহার উত্তর—দেশী জুতা পরিয়া যাইতে গবর্ণর সাহেবের হুকুম নাই!! অনেক কাকুতি মিনতিতে কিছুই ফলোদয় হইল না। একে পারসী, তাহাতে পারসী পুরোহিত, তিনি এ অপমান গ্রাহ্য না করিয়া রাজদ্বারে যাইবার উপায় চিন্তা করিতে লাগিলেন। তাঁহার হৃদমণীয় রাজভক্তি কিছুতেই পরাজিত হইবার নহে, কি করেন, অবশেষে তাঁহার এক বন্ধুর নিকট হইতে এক জোড়া ইংরাজী বুট ধার করিয়া গবর্ণর সাহেবকে সেলাম করিয়া আসেন। আমরা ত ইংরাজদের পদানত প্রজা কিন্তু তাঁহারা এদেশীয় রাজা-রাজড়ার সঙ্গে মধ্যে মধ্যে যেরূপ ব্যবহার করেন তাহা দেখিয়া অবাক হইতে হয়। বোধপুরের রাজাকে রাজদরবার হইতে কিরূপে বহিষ্কৃত করা হইয়াছিল তাহা তোমার মনে থাকিতে পারে। সে দিন এক মহারাজ্জ পত্রে আর একটা বিবরণ পাঠ করিলাম, তাহা এই;—সম্প্রতি বোম্বায়ে গবর্ণর সাহেব কোম্বাপুর পরিদর্শন করিতে যান ও তত্পলক্ষে কোম্বাপুর মহারাজার প্রাসাদে এক দরবার হয়। মহারাজা ও দরবারে নিমন্ত্রিত সৈনিক ও অগ্ৰাণ্ড ভদ্র লোক আসন গ্রহণ করিলে দক্ষিণ মহারাজ্জ সম্পর্কীয় জ্ঞৈনিক ইংরাজ সৈনিক, পুরুষ দরবারে আসিয়া উপস্থিত হন। তাঁহাকে দেখিবামাত্র মহারাজা আসন হইতে উঠিয়া তাঁহাকে বিনীত ভাবে সেলাম করেন। মহারাজকে উঠিতে

দেখিয়া স্বয়ং গবর্ণর সাহেব ও সভাস্থ সকলে উঠিয়া দাঁড়ান ও মহারাজ সৈনিক—
কৰ্ম্চারীকে বসাইয়া নিজে আসন গ্রহণ করিলে তবে তাঁহারা স্ব স্ব আসনে পুন-
র্বার উপবিষ্ট হন। এই ব্যাপার দর্শন করিয়া সভাস্থ সকলে ও নিজে গবর্ণর
সাহেব পর্য্যন্ত বিস্মিত হইয়াছিলেন। গবর্ণর সাহেব এই বিস্ময়জনক ব্যাপারের
কারণ জিজ্ঞাসা করাতে মহারাজ উত্তর করিলেন যে, তিনি তাঁহার ইংরাজ গুরু-
দিগের নিকট হইতে এই উপদেশ পাইয়াছেন যে যখন কোন ইংরাজ দেখিলে
অমনি আসন হইতে উঠিয়া তাঁহাকে সেলাম করিবে। ইংরাজদের এইরূপ
ব্যবহারে আমরা চটিয়া যাই। বাস্তবিক ত আমরা চিরদিন পরাধীন পরাজিত
জাতি, কিন্তু মৃতের উপর খজাঘাতের প্রয়োজন কি? একটুকু বাহু ভদ্রতায়
উভয় পক্ষেরই মঙ্গল। বাস্তবিক তরবারির বলে আমাদের দেশ জিত হইয়াছে কিন্তু
তাহা সর্বদা আমাদের চক্ষের সামনে ধরিয়া রাখিবার আবশ্যক কি? বল অপেক্ষা
প্রীতিতে রাজ্যের ভিত্তি নিৰ্ম্মাণ করা অধিক শ্রেয়স্কর ইহা অবশ্যই স্বীকার করিতে
হইবে। শস্ত্র অপেক্ষা শাস্ত্রের বল অধিক—সত্যজাতিকে একথা বলা বাহুল্য।
নূতন নূতন পদবী-বৃষ্টিতে, রাজ-সভার বৃথা আড়ম্বরে, শস্ত্রের বলে, অথবা রাজ-
নীতির কৌশলে যাহা না হয়, ইংরাজেরা দেশীয়দের প্রতি একটুকু আন্তরিক
সম্ভাব ও মমতা দেখাইয়া তাহা করিতে পারেন। ছুৰ্ভিক্ষ-প্রপাতিত লোকদিগের
কষ্ট নিবারণে সাহায্যদান, অথবা কোন দেশহিতকর কার্যে উৎসাহ প্রদান
কিন্তু দেশীয় কোন মহাত্মার বিয়োগে শোক প্রকাশ দ্বারা, ভারতের হৃদয়কে
ইংরাজ রাজ্যের প্রতি তদপেক্ষা সহস্রগুণে আকৃষ্ট করিতে পারেন। কঠোর
লৌহ-শৃঙ্খল ক্ষণভঙ্গুর, কিন্তু প্রেমের মোহন-শৃঙ্খল ভগ্ন হইবার নহে। ইংরাজেরা
যদি আমাদের প্রীতি আকর্ষণ করিতে চান ত আমাদের সঙ্গে সমান ভাবে—
আপনার মত ব্যবহার করুন, কৃষ্ণবর্ণের জন্ত এক নিয়ম, শ্বেত বর্ণের জন্ত স্বতন্ত্র
নিয়ম, এ ভাব পরিত্যাগ করুন। আমরা সকলেই সেই এক সাম্রাজ্যীর প্রজা,
অতএব আমরা সকলে সম্ভাবে মিলিয়া কার্য্য করিলে রাজ্যের যথার্থ গৌরব
রক্ষা হয়।”

ইংরাজ-ভক্ত গোবিন্দরাও বলিলেন—“বিদেশীয় রাজা বলিয়া যাই বল, ইহা অবশ্যই স্বীকার করিতে হইবে যে, ইংরাজদের আগমনে আমাদের দেশ সুখাবস্থা হইতে উত্থিত হইয়া উন্নতির পথে অগ্রসর হইতেছে। ব্রিটিশ-ভারতবর্ষ ও দেশীয় রাজ্য—এ উভয়ের অবস্থা আলোচনা করিয়া দেখিলে তাহা সহজে হৃদয়-ঙ্গম হইবে। দেশীয় রাজ্যে রাজকার্যের কিরূপ বিশৃঙ্খলা, রাজার কিরূপ অত্যাচার, প্রজাগণের কি দুর্দশা! ইংরাজরাজ্য কি তাহা অপেক্ষা শতগুণে উৎকৃষ্ট নহে? আমরা যদি আপনাদের রাজ্য আপনারা চালাইতে পারিতাম, তাহা হইলে ত কোন কথাই নাই। কিন্তু আমাদের মধ্যে ঐক্য কোথায়? জাতীয় বন্ধন কোথায়? আমরা আত্ম-সংরক্ষণে অক্ষম বলিয়াই ত ইংরাজেরা এ দেশ জয় করিয়াছে, নতুবা তাহাদের রাজ্য প্রতিষ্ঠিত হইত না। আমাদের স্বাধীন রাজ্য-স্থাপনের ক্ষমতা নাই বলিয়াই বিদেশীয় রাজার শরণাগত হইতে হইয়াছে। তোমার ভাবের ভাবুকগণ বিদেশীয় রাজ্যের প্রতি দোষারোপে তৎপর, কিন্তু তাহার বিনিময়ে কি পাইবে? স্বাধীন রাজ্য? জাতীয় গৌরব? না অরাজকতা, অত্যাচার, পরস্পর বিদ্বেষ, পরস্পর বিবাদ বিচ্ছেদ; ব্রিটিশ তরবারি এই সকল হইতে আমাদের রক্ষা করিতেছে—সুতরাং বিদেশীয় রাজ্য-রক্ষা-নিবন্ধন যে অধিক অর্থ ব্যয় ও আর আর কতক বিষয়ে ক্ষতি তাহা অবশ্য আমাদের দায়ে পড়িয়া স্বীকার করিতে হইতেছে। আমাদের সঙ্গে ইংরাজদের ভাবে মেলে না,—আমাদের পরস্পর মমতা নাই, কি করা যায়, তাহার কোন উপায়ান্তর নাই। যত দূর পারা যায় মন্দের মধ্য হইতে ভালটুকু বাছিয়া লইতে হইবে। যে পাশ্চাত্য জ্ঞানস্বরূপ উদয় হইয়াছে, তাহার আলোক যথাসাধ্য বিকীর্ণ কর। পাশ্চাত্য সভ্যতা হইতে যে স্বাধীনতার ভাব যে উন্নতির ভাব লাভ করা যায়, তাহা শিক্ষা করিয়া স্বজাতির উৎকর্ষ সাধনে নিয়োগ কর। সভ্যজাতিকে সভ্যতার অস্ত্রে বশ করিয়া যতদূর সাধ্য দেশের কল্যাণ সাধন কর। গতানুগতিক নীতির ফল? যাহা অবশ্যসম্ভাবী তাহার প্রতিরোধের চেষ্টা বৃথা। বর্তমান সময়ের উপযোগী শিক্ষা লাভ করিয়া দেশহিতকর কার্যে ব্রতী হও। স্বপ্ন-

রাজ্যে বিচরণ করায় লাভ কি ? ভারতের ভাগ্য নিন্দা করিয়া বৃথা আক্ষেপের প্রয়োজন কি ?”

‘ দেশান্তরাগী দাদাজি ক্ষণকাল স্তব্ধ থাকিয়া অধীর স্বরে উত্তর করিলেন—
“আমাদের আর আছে কি ? যাহা ছিল সকলই গিয়াছে। এক সময় ভারত স্বাধীন ছিল ও স্বতেজে পৃথিবীকে আলোকিত করিয়াছিল,—এখন সে পরাধীন। স্বাধীনতার সঙ্গে সঙ্গে তাহার সকলি গিয়াছে। তাহার সম্মানগণের আক্ষেপ ভিন্ন আর কি গতি ? সে পথটুকুও কি বন্ধ করিতে চাও ? বালকের বল ক্রন্দন—
আমাদেরও তাই। আমরা ত নিরস্ত্র “নিঃসস্ত্রপরাণ” হইয়াছি। তুমি চাও যে, আমরা আপনাদের অবস্থা ভুলিয়া থাকি, কিন্তু তাহা পারি কৈ ? তুমি বলিতেছ আমাদের জাতীয় বন্ধন নাই, জাতীয় ঐক্য নাই, সেটি কিসে হয় তাহা দেখিতে হইবে। ধনাঢ্য ব্যক্তির মোসাহেব হইয়া থাকিলে খাওয়া পরার কোন ভাবনা থাকে না সত্য বটে, কিন্তু সেই কি সুখের অবস্থা ? স্বাধীন ভাবে শাকার আহার করিয়া দিনপাত করা ভাল, পরাধীন হইয়া রাজপ্রসাদ উপভোগ করাও কষ্টকর, এ কি তুমি অস্বীকার করিতে পার ? আমাদের দেশের যদি প্রকৃত স্থায়ী উন্নতি সাধন করিতে চাও, ত তাহা আমাদের স্বতেজে, নিজ বলে, আপনাদের মধ্য হইতেই করিতে হইবে। পরের উপর নির্ভর করিয়া তাহা সাধিত হইবে না। বিদেশীয় রাজা যতই প্রজাবৎসল হউন না কেন, সে রাজ্যের এক প্রধান দোষ এই যে, তাহাতে বাস করিয়া আমাদের আত্মনির্ভর, স্বাধীনতা, স্বাবলম্বন ক্রমেই শিথিল হইতে থাকে, জাতীয় ভাব ক্রমেই নিস্তেজ হইয়া যায়। পরের অনুগ্রহের উপর সকল নির্ভর, আমরা আপনার জন্ত কিছুই করিতে পারি না। গবর্ণমেন্ট যাহা করিয়া দিবেন, তাহাতেই আমাদের নিস্তার। যদি দেশের কোন অমঙ্গল নিবারণ করিতে চাহি, কোন সামাজিক উৎকর্ষসাধন করিতে ইচ্ছা করি, তাহার জন্ত গবর্ণমেন্টের দ্বারে গিয়া বলি—ভিক্ষাং দেহি। ইহা অপেক্ষা কোন জাতির অধিক হীনাবস্থা আর কি হইতে পারে ? ইংরাজদের রাজত্ব এতকাল রহিয়াছে, তাহার বিধ-ফল আমরা

বিলক্ষণ অনুভব করিতেছি। আমরা সভ্যতার নামমাত্র গ্রহণ করিয়া বাহ্য আচার ব্যবহার পরিবর্তনের প্রতিই উন্মুখ রহিয়াছি। আহার পান বিষয়ে যথেষ্টাচারই আমাদের সভ্যতার পরাকাষ্ঠা। পশ্চিমবাসীদের সহিত সংশ্রব হইয়া আমরা তাহাদের কতকগুলি বাহ্য আড়ম্বরেই মুগ্ধ থাকি। তাহাদের বাহ্য সভ্যতাই আমাদের দেহ-মনকে আকর্ষণ করিতেছে। এক সভ্য জাতি অন্য এক দুর্বল জাতির উপর আধিপত্য বিস্তার করিলে যে সকল অনিষ্ট ঘটবার সম্ভাবনা, আমাদের দেশে তাহার ভূরি ভূরি প্রমাণ দৃষ্টিগোচর হইতেছে। এই আকর্ষণ বলে এ দেশের যে সকল আধ্যাত্মিক উন্নত ভাব, তৎসমুদায় ক্রমে অন্তর্গত হইতেছে। আমাদের জাতীয়তা ক্রমেই বিলুপ্ত হইতেছে। পরাধীনতা-অন্ধকারে আমরা একরূপ আবৃত রহিয়াছি যে, কি ভাল কি মন্দ তাহা আমরা ইংরাজের চক্ষু দিয়াই দর্শন করি। আমরা মানমর্যাদা প্রতিষ্ঠার জন্য ইংরাজদের উপরেই তাকাইয়া থাকি। আমাদের দেশের কি উপযোগী ও প্রকৃত কল্যাণকর সে বিষয়ে আমরা বাস্তবিক অন্ধ। ইহা অপেক্ষা অধিক দুর্বলতা আর কি হইতে পারে? বিদেশীয় রাজার স্বার্থ এই যে, প্রজাগণ নিঃস্ব স্ব দুর্বল হইয়া তাহার উপরেই সম্পূর্ণ নির্ভর করিতে শিখুক, প্রজারাও যদি সেই দিকেই ধাবিত হয়, তাহারা যদি সেই শ্রোতের প্রতিকূলে সন্তরণ করিতে না চায়, তবে তাহাদের উদ্ধারের আর উপায় নাই। ইংরাজদের নিকট হইতে আমরা যে সকল উপকার প্রাপ্ত হইয়াছি, তাহার জন্য কৃতজ্ঞ হও, আমি 'না' বলিব না, কিন্তু ভাই, তাই বলিয়া তোমরা স্বজাতির প্রকৃত অবস্থা বিস্মৃত হইও না। রোগী যদি রোগের যতনা অনুভব করিতে না পারিয়া আপনাকে সুস্থ মনে করিয়া কার্য্য করে, ত নিশ্চয় জেনো তাহার আসন্ন কাল উপস্থিত। জাতির পক্ষেও এই নিয়ম। তুমি ভাই যাই বল, আমি ত কখনই মনে করিতে পারি না যে, ইংরাজ-রাজ্যে আমাদের সুখের পরাকাষ্ঠা। গণ্ডের উপর আবার বিস্ফোটক, একে পররাজ্য, তাহাতে আবার ইংরাজদের উদ্ধত স্বভাব, তাহাদের ও আমাদের মধ্যে ভাবের অমিল। তাহাদের জাতীয় স্বার্থপরতা, অনুদারতা, অহঙ্কার দেখিয়া আমাদের

বিদ্বানল সততই প্রজ্বলিত থাকে । ইহা যেন মনে থাকে যে, আমাদের যেকোন অবস্থা, তাহাতে রাজার স্বার্থ এবং প্রজার স্বার্থ পরস্পর-বিরোধী । সুতরাং রাজ-ভক্তির মূলেই কুঠারাঘাত । দেশীয় বাণিজ্য ব্যবসায়ের শ্রীবৃদ্ধি হইলে মাফে-ষ্টর হইতে হাহাকার উঠে । আমাদের মধ্যে উচ্চ শিক্ষা প্রচার হইলে রাজ-পুরুষদের ভয় হয় পাছে আমরা তাহাদের সমকক্ষ হইতে সাহসী হই, পাছে তাহাদের অধিকৃত উচ্চ কর্মস্থানগুলি অধিকার করিয়া লই । ইংরাজ-রাজ্য হইতে আমাদের ইষ্টানিষ্টের তুলনা করিলে বেশীর ভাগ কি দাঁড়ায়, তাহা নির্ণয় করা সহজ নহে । এই সম্বন্ধে মহাত্মা সর টমস্ মন্রোর নিম্নলিখিত হৃদয়-ভেদী কথা-গুলি আমাদের প্রণিধান যোগ্য—

ব্রিটিশ রাজ্য হইতে এদেশীয় লোকদিগের লাভালাভ তুলনা করিয়া দেখিলে দেখা যাইবে যে, লাভের ভাগ যত অধিক হওয়া উচিত তাহা হয় নাই । বাহিরের, যুদ্ধ বিগ্রহ অথবা আভ্যন্তরীণ বিপ্লবাদি হইতে তাহারা সুরক্ষিত সন্দেহ নাই তাহাদের ধন প্রাণ পূর্য্যাপেক্ষা অধিক সংরক্ষিত, কর্তৃপুরুষদের দ্বারা তাহাদের বিনাপরাধে দণ্ড অথবা অর্থাপহরণের সম্ভাবনা নাই, আর তাহাদের করভারও অপেক্ষাকৃত লঘু । কিন্তু আর একদিকে দেখ, তাহাদের জন্য যে সকল আইন হইতেছে, তাহার রচনাতে তাহাদের কোন হস্ত নাই ও কনিষ্ঠ পদের কর্মচারীদের যতদূর সম্ভবে তড়িৎ সেই সকল আইন জারী করিবারও তাহাদের অধিকার নাই । সিবিল অথবা সৈনিক বিভাগের উচ্চ পদবীতে আরোহণে তাহারা অসমর্থ । তাহারা দেশের প্রাচীন কর্ত্তা ও নেতা, তাহারা হীন পরাধীন জাতিরূপে, দাস ও অনুচররূপে সর্বত্র পরিগণিত ।

দেশীয়দিগকে ন্যায়াবহ রাজনিয়ম ও লঘু করের সুফল প্রদানেই যথেষ্ট হইল তাহা নহে । তাহাদের জাতীয় স্বভাব উন্নত করিবার চেষ্টা করিতে হইবে । কিন্তু বিদেশীয় রাজার রাজ্যে তাহাদের অবনতির এত রাশি রাশি কারণ রহিয়াছে যে, অধঃপতন হইতে তাহাদিগকে তুলিয়া রাখা দুষ্কর । এক প্রাচীন উক্তি আছে, “He who loses liberty loses half his virtue” যে ব্যক্তি স্বাধীনতা হারা-

ইয়াছে, সে অর্ধেক ধর্ম হারাইয়াছে, ইহা যেমন প্রতিজ্ঞনের পক্ষে তেমনি জাতির পক্ষেও খাটে। যে ব্যক্তির কিছুই সম্পত্তি নাই, সে যেমন কৃপাপাত্র, যে জাতির সমুদয় সম্পত্তি পররাজ্যের অধীন, সে তদপেক্ষা ন্যূন নহে! ক্রীতদাস যেমন স্বাধীন জীবের অধিকার হইতে বিচ্যুত, পরাজিত জাতি সেইরূপ জাতীয় অধিকার হইতে বিচ্যুত। সে অধিকার কি, না আপনাদের জন্য করস্থাপন, আপনাদের জন্য আইন-বন্ধন, স্বরাজ্যের রাজকার্য্য পরিচালন; ব্রিটিশ ভারতবর্ষ এই সকল অধিকার হইতে বঞ্চিত। পর-রাজ্য সুখময় হইলেও স্বজাতীয় রাজার একাধিপত্য ততোধিক প্রার্থনীয়। যদি অধীনতাই স্বীকার করিতে হয়, ত বিদেশী অপেক্ষা দেশীয় রাজার আধিপত্য স্বীকার করা বিজিত জাতির অধিক গৌরবের বিষয়। রাজ্য প্রজাতন্ত্রই হউক আর সাম্রাজ্যই হউক, তাহাদের বিদেশীয় শত্রুর আক্রমণ হইতে রক্ষা করিবার জন্য তাহার প্রজাগণ সর্বদাই তৎপর থাকে। এই আক্রমণ প্রতিরোধ করিতে গিয়া জাতীয় ভাব উত্তেজিত হয়, এবং এইরূপ সঙ্কট-স্থলে প্রজাগণ ঐ উভয়বিধ রাজ্যরক্ষাতেই প্রাণপণে যত্নশীল হয়। বিদেশীয় রাজার অধীনতা স্বীকার করিলে যেমন জাতীয় ভাবের ও জাতীয় গৌরবের নাশ হয়, দেশীয় রাজার যদৃচ্ছ শাসনে তেমন হয় না। যখন জাতীয় ভাব বিনষ্ট হইল, তখন সমাজগত ব্যক্তিগত জীবনে যাহা কিছু মহৎ যাহা কিছু প্রশংসনীয়, সকলই সমূলে শুষ্ক হয়, এবং জাতীয় ভাবের অধোগতির সঙ্গে সঙ্গে ব্যক্তিগত স্বভাবেরও অধঃপাত হয়।”

আমার বন্ধুদ্বয় শাসন-প্রণালী সম্বন্ধে যেরূপ তর্ক উত্থাপন করিয়াছেন, তদ্বিষয়ে আমি আর অধিক কিছু বলিব না। ভারতবর্ষীয় ইংরাজদের আচার ব্যবহার সমালোচনা করিতে মনস্থ করিয়াছি, এক্ষণে তাহাতেই প্রবৃত্ত হওয়া গেল।

আংলো-ইণ্ডিয়ানের প্রকৃত ভাব যদি দেখিতে চাও, ত মফস্বলের কোন এক নামাক্তিত নগরে তাহাদিগকে দর্শন কর। সেখানে হয় ত একদিকে ইউরোপীয় অথবা দেশীয় দুই এক সেনাদল প্রতিষ্ঠিত ও তৎসম্বন্ধে কয়েকজন সৈনিক পুরুষ অবস্থিত আছে, অপর দিকে জজ কালেক্টর প্রভৃতি সিভিলিয়ানদল রাজত্ব করিতে-

ছেন, একদিকে লালকোট, অন্যদিকে কালকোট । সেনাদলের মধ্যে লেফটেনন্ট, কাপ্তেন, মেজর, লেফটেনন্ট কর্নেল, কর্নেল ও সর্বোচ্চ-শিখরে সৈন্যাধ্যক্ষ জেনেরল সাহেব বিরাজিত । তাঁহাদের মধ্যে অনেকেই অবিবাহিত, অল্পসংখ্যক ব্যক্তি সঙ্গীক হইয়া রাজ্যভোগ করেন । মিলিটারিদিগের মধ্যে সকলে নিজ নিজ বাটীতে আহাৰাদি করেন না । “মেস্” নামক তাঁহাদের সাধারণ ভোজনালয় প্রতিষ্ঠিত দেখিতে পাইবে । যেখানে সৈনিক দলের আবাস, সেখানে এক কিম্বা একাধিক মেস্ প্রতিষ্ঠিত । যাহারা বিবাহিত তাঁহারা প্রায় নিজ নিজ বাটীতে আহাৰাদি করেন, তন্মিন্ন আর আর সকলে প্রায় প্রতিদিন মেসেই আহাৰাদি করিয়া থাকেন । ইহা সাধারণের মিলিবার স্থান । মধ্যে মধ্যে বাহিরের লোকদের নিমন্ত্রণ হয় । সেই নিমন্ত্রণ-রাত্রে অপেক্ষাকৃত অধিক সমারোহে ভোজনাদি কার্য সম্পন্ন হয় । মেস যেমন মিলিটারিদের জন্য, ক্লব তেমনি সর্ব-সাধারণ ইংরাজের জন্য প্রতিষ্ঠিত । কলিকাতা মাদ্রাজ বোম্বাই পুণা প্রভৃতি প্রধান প্রধান নগরে ইংরাজদিগের সাধারণ-সন্মিলন স্থান এক একটি ক্লব দৃষ্ট হয় । মিলিটারি, সিবিলিয়ন ও ইংরাজদের মধ্যে আর আর বাছাগোছা লোক তাহার অঙ্গীভূত । এই সকল ক্লবে “নেটিব”দের প্রবেশের অধিকার নাই । ইংলণ্ডে গিয়া তুমি হয়ত বিক্টোরিয়া সাম্রাজ্যীর সহিত একাসনে বসিয়া আহাৰ করিয়া আসিবে, কিন্তু এখানকার এক সামান্য ক্লবে তোমার প্রবেশের দ্বার বন্ধ । এই সকল ক্লবে বাসের নিয়ম, গৃহ সজ্জা, আহাৰাদির পারিপাট্য, পরিষ্কার পরিচ্ছন্নতা, ভৃত্যদের কার্যদক্ষতা দেখিয়া শতযুখে প্রশংসা করিতে হয় । আমরা বিলাতে যে এই সকল চাকচিক্য দেখিয়া মুগ্ধ হইয়া যাই তাহা আশ্চর্য্য নহে । এদেশে আমাদের চক্ষে এ সকল সচরাচর পতিত হয় না বলিয়া আমরা এক প্রকার অস্থির থাকি, ইংলণ্ডে গিয়া ইংরাজ-মহলে প্রবেশ করিয়া আমাদের মন্তক এরূপ ঘূর্ণিত হইয়া যায় যে, আপনারা আপনাকে স্থির রাখিতে পারি না । স্বদেশের প্রতি মমতা চলিয়া যায়, দেশীয়দিগের উপর অসভ্য বর্বর বলিয়া ঘৃণা জন্মে । যাহা ইংরাজী তাহাই সেব্য, যাহা দেশীয় তাহাই ত্যজ্য । হায় ! ভারতবর্ষে

ফিরিয়া আসিয়া আমাদের চক্ষু ফুটে, আমরা দেখিতে পাই যে, এ জাহুর রাজ্য আমাদের নহে, আমরা যে ইংরাজের পদধূলি লইতে যাই, তাহাদের পদাঘাত পাইয়া আমাদের অবশেষে চেতনা হয় ।

এখানকার অধিকাংশ ইংরাজেরা কাজকর্মের সমস্ত দিবস ব্যস্ত থাকে । তাহাদের পরস্পর দেখা সাক্ষাৎ আলাপ পরিচয়ের বিশেষ বিশেষ নিয়ম আছে । যখন কোন ব্যক্তি কোন এক নূতন ষ্টেসনে বাস করিতে আসেন, তাঁহার উচিত যে, তিনি প্রথমে বাসন্দাগিরের বাটীতে গিয়া তাহাদের সহিত সাক্ষাৎ করেন । বিশেষতঃ বিবাহিত লোকদের বাটী গিয়া মহিলাগণের সহিত পরিচিত হওয়া তাঁহার প্রধান কার্য । তিনি নিজে যদি অবিবাহিত হন, ত কোন ভদ্রস্রী তাঁহার বাড়ী আসিয়া তাঁহার সহিত সাক্ষাৎ করিবেন না । তিনি যদি কোন পুরুষের সহিত সাক্ষাৎ করেন, ত তাঁহার নিকট হইতে প্রতिसাক্ষাৎকার প্রত্যাশা করেন, যদি কোন পরিবারের সহিত সাক্ষাৎ করিতে যান, তবে হয় পুরুষের নিকট হইতে প্রতিসাক্ষাৎকার, নয় গৃহিণীর নিকট হইতে ভোজনের নিমন্ত্রণ লাভ করেন । যদি বিবাহিত পুরুষ কোন এক ষ্টেসনে আসিয়া বাস করেন, ষ্টেসন-বাসীদিগের কর্তব্য যে, তাঁহার জ্বরী সহিত প্রথমে গিয়া সাক্ষাৎ করেন । এ নিয়মের ক্রটি হইলে ইহাদের সহিত আলাপ পরিচয়ের সম্ভাবনা নাই । দস্তুরের বাহিরে ইংরাজেরা এক পা চলেন না । যদি কোন সাহেবকে জিজ্ঞাসা কর, অমুক লোকের সহিত আপনার পরিচয় আছে ? হয় ত তাহার উত্তর করিবেন, সেত আমার জ্বরী সঙ্গে এখনো দেখা করিতে আসে নাই ! এই সকল নিয়মিত দেখা সাক্ষাৎ করিবার সময় আপনার নামের এক কিম্বা একাধিক কার্ড পাঠাইয়া দিতে হয় । মেমসাহেবের যদি দেখা করিবার ইচ্ছা না থাকে ত বলিয়া পাঠান, মেমসাহেব ঘরে নাই । তোমার যদি কাহারো সহিত দেখা করিবার ইচ্ছা না থাকে, অথচ নিয়ম রক্ষা করা চাই, ত গৃহস্বামী অথবা গৃহিণী ঘরে না থাকেন এমন সময় বুঝিয়া যাউতে হয়, ও তোমার নামের কার্ড রাখিয়া আসিলেই যথেষ্ট । এই সকল সাক্ষাৎকার সম্বন্ধীয় নিয়মাবলী বিষয়ে জ্ঞান লাভ

করা সহজ নহে। কত প্রকার সাক্ষাৎকার ও তৎসম্বন্ধীয় বিশেষ বিশেষ নিয়ম আছে বলা যায় না। আগন্তকের প্রথম সাক্ষাৎকার, ভোজন-নিমন্ত্রণ-বিনিময় সাক্ষাৎকার, বন্ধুতার সাক্ষাৎকার, শোক-সংজ্ঞাপক সাক্ষাৎকার, অভিনন্দন-সাক্ষাৎকার ইত্যাদি। কোন কোন সময় তুমি নিজে না গিয়া তোমার নামের কার্ড পাঠাইয়া দিলেও সাক্ষাৎকার সমাধা হইতে পারে। সাহেবেরা এইরূপে ভৃত্য-হস্তে কার্ড পাঠাইয়া কখন কখন দেশীয়দের সাক্ষাৎকারের প্রতিদান করিয়া থাকেন।

আহারের নিমন্ত্রণে ইংরাজদিগের সামাজিকতার বিশেষ পরিচয়। ভাল খাওয়া ও খাওয়ান ইংরাজ-জীবনের মধ্যবিন্দু। তাঁহাদের আমোদ প্রমোদ, দেখা সাক্ষাৎ, হাস্য পরিহাস, আলাপ পরিচয়ের স্থান ভোজনালয়। আমাদের ভিন্ন ভিন্ন জাতির মধ্যে আহার পানের নিয়ম নাই, তাঁহাদের মধ্যেও সেইরূপ; তবে জাতিভেদের নিয়মমাত্র ভিন্ন। জাতি-ভেদ-প্রথা যে তাঁহাদের মধ্যে অত্যন্ত প্রবল, তাহা তাঁহাদের পরস্পর পান-ভোজনের নিয়মে বিলক্ষণ প্রকাশ পায়। সামাজিক মান মর্যাদায় সমান সমান ভিন্ন তাঁহারা একত্রে পান আহার করেন না। আমাদের মধ্যে অনেকে ইংরাজী খানাপিনা আরম্ভ করিয়াছেন, কিন্তু এমন মনে করিবেন না যে, আপনাদের সঙ্গে ইংরাজেরা একাসনে বসিয়া আহার করিতে সহজে সম্মত হইবেন। এমন কি, অনেক বড় হোটেলে দেশীয়দের প্রবেশের অধিকার নাই। আমার একজন পারসী বন্ধু বলিলেন যে, তিনি আপনার কয়েকটা বন্ধুবান্ধবকে নিমন্ত্রণ করিয়া অমুক হোটেলে আহারের আয়োজন করিয়াছিলেন, সেখানে গিয়া দেখেন যে, তাঁহাদের জন্য নির্ঝাঁত বিজ্জী গুদামের মত এক কোণের ঘরে আহার প্রস্তুত। তিনি হোটেল-কর্তাকে ডাকাইয়া সাধারণ-ভোজনালয়ে তাঁহাদের স্থান দিতে অনুরোধ করিলেও তাঁহার প্রার্থনা গ্রাহ্য হইল না। অবশেষে তিনি প্রস্তুত খাদ্যসামগ্রী ফেলিয়া বুভুক্ষিত বন্ধুবান্ধবসহ অন্যত্র চলিয়া যান। সে বা হোক, এখন ইংরাজদের ভোজনালয়ে প্রবেশ করা যাক্। ভোজনের নিমন্ত্রণে জীপুরুষ বেশভূষা করিয়া একত্রিত

হন। মিলিটারিদের মধ্যে কাহারো লাল, কাহারো অন্যরূপ জরির কাপড়, সিবিలిয়ানদের লাক্স-ল-বিশিষ্ট কাল বনাতের কোট, বিবিদের নানা প্রকার চিত্র বিচিত্র সাজ। ১৩ জন এক টেবিলে একত্র হওয়া অলক্ষণ বলিয়া ইংরাজদের এক সংস্কার আছে, তন্নিমিত্ত ঘর ও টেবিলের পরিমাণ বুঝিয়া নিমন্ত্রিতের সংখ্যা নিরূপিত হয়। নিমন্ত্রিত ব্যক্তিগণ উপস্থিত হইলে ভৃত্য আসিয়া বলে খান প্রস্তুত। পরক্ষণেই এক একজন সাহেব এক একজন বিবির হাতে হাত দিয়া খানার টেবিলে লইয়া আপনার পার্শ্ববর্তী আসনে উপবেশন করাইয়া নিজে উপবিষ্ট হন। বসিবার সময় স্বামী স্ত্রী পাশাপাশী বসিতে না পারেন এই নিয়মটি রক্ষা করিয়া বসিতে হয়। কোন্ সাহেব কোন্ বিবিকে টেবিলে লইয়া যাইবেন তাহার নিয়ম আছে। অভ্যাগতের মধ্যে যিনি সকল অপেক্ষা বড় বিবি, তাঁহাকে গৃহস্বামী লইয়া যান—আর যিনি সকল অপেক্ষা বড় সাহেব তিনি গৃহিণীকে লইয়া যান। এইরূপে স্ত্রীপুরুষের মানমর্যাদা অনুসারে এক এক জন বিবি এক একজন সাহেবের হস্তে সমর্পিত হন। স্ত্রীলোকের মান তাঁহার স্বামীর পদের উপর অনেকটা নির্ভর। এইরূপ মর্যাদা রক্ষার ক্রটি হইলে মহা গোলযোগ উপস্থিত হয়, আর স্ত্রীপুরুষের যথাযোগ্য বিলি বন্দেজের ব্যতিক্রম না হয় তাহার প্রতি কর্তা ও গৃহিণীর বিশেষ দৃষ্টি থাকে। নিমন্ত্রিত ব্যক্তিগণকে যথা স্থানে উপবেশন করাইতে একটু বিবেচনা আবশ্যিক। যদি অভ্যাগতের মধ্যে কোন এক বিদ্বান্ কি সম্বন্ধা উপস্থিত থাকেন, তবে যেখানে বসিয়া তিনি সকলের সঙ্গে কথা কহিতে ও আলাপ করিতে পারেন—এমন মধ্যস্থানে তাঁহাকে উপবেশন করাইতে হয়। দুই জন সমব্যবসায়ীকে পাশাপাশি বসান যুক্তিসঙ্গত নহে, কেননা তাঁহারা হয়ত আপনার কাজ-কর্ম-সংক্রান্ত কথোপকথন করিয়াই কালহরণ করিবেন, তাহাতে অল্প কাহারো মনোরঞ্জন হইবার সম্ভাবনা নাই। আহারের সময় কিরূপে কাঁটা চামচা ধরিয়া আহার করিতে হয়, পরিবেশনের নিয়ম কি, কোন্ সময় কোন্ জিনিস খাইতে হয়, কোন্ সামগ্রীর সহিত কোন্ মদ্য পান করা বিধেয়, কিরূপ শব্দ পরিহার্য্য, কিরূপ ব্যবহার ভদ্র ও অভদ্র

বলিয়া পরিগণিত এ সকল বিষয় বলিতে গেলে প্রস্তাব বাহুল্য হইয়া পড়ে, সুতরাং এ সকল বিষয়ে প্রবেশ করিলাম না। আহাৰান্তে জীর্ণ আহারের টেবিল হইতে উঠিয়া সমীপবর্তী উপবেশন গৃহে আসন গ্রহণ করেন। বিবিরা উঠিয়া গেলে সাহেবগণ অবসর পাইয়া মনের সাধে পান ও পরস্পর আলাপাদি করিতে পারেন। কিন্তু ইহা বলিতে হইবে যে, ভদ্র-সমাজে পানাতীশ্য এক্ষণে প্রায়ই দৃষ্ট হয় না। বিবিদের টেবিল হইতে অগ্রে উঠিয়া যাইবার নিয়ম কেবল ইংরাজ জাতির মধ্যে প্রচলিত—অন্যান্য ইউরোপীয়দিগের মধ্যে এ প্রথা প্রচলিত নাই। তাঁহারা জীসহবাস হইতে বঞ্চিত হইয়া টেবিলে বসিয়া আমোদ প্রমোদ করা নিতান্ত অসম্ভ্যতার কার্য জ্ঞান করেন। ওদিকে বিবিরা পুরুষদের সহবাস হইতে পরিচ্যুত হইয়া কিরূপে আলাপাদি করেন, তাহা জানিতে অনেকের কৌতূহল হইতে পারে, কিন্তু তাঁহাদের সে সকল গুপ্ত কথা কি প্রকারে প্রকাশিত হইবে? সে স্ত্রীসভাতে কত কাপড়, কত গয়নার কথা, কত বিবাহের পরামর্শ, কত লোকের চরিত্র সমালোচন, কত পরাধিকারচর্চা উত্থাপিত হয় কে বলিতে পারে? এই বিষয়ে এক গ্রন্থ রচিত হইলে কত না জানি পুরুষদের শিক্ষোপযোগী বিষয় তাহাতে উপলব্ধি করা যায়।

পরচ্ছিদ্রাঘেষণ ইংরাজদের এক জাতীয় ধর্ম, তাহার দৃষ্টান্ত অন্বেষণ করিলে অনেক পাওয়া যাইতে পারে। বড় বড় ষ্টেশনে সন্ধ্যার সময় সকলের যে মিলিবার স্থান তাহার নাম Scandal point (নিন্দালয়)। দিবসের কাজকর্ম হইতে অবসৃত হইয়া আংলো-ইণ্ডিয়ান স্ত্রীপুরুষ এই স্থানে সম্মিলিত হইয়া আলাপাদি করেন। সাহেবেরা কেহ অস্থপৃষ্ঠে কেহ পদব্রজে গাড়ীতে উপবিষ্ট এক একজন বিবির সহিত মধুরালাপে মগ্ন। মধ্যে মধ্যে ব্যাণ্ড বাদ্যধ্বনি উখিত হইতেছে। “ঈশ্বর! রাণীকে রক্ষা করুন” এই তান উঠিলে জানা গেল যে, গৃহে যাইবার সময় হইয়াছে। এতদ্ভিন্ন পরস্পর মিলিবার স্থান ক্রীড়ালয়। ইংরাজদের অধিকাংশ ক্রীড়া ব্যায়াম-সমন্বিত, আর যাহার সঙ্গে শারীরিক পরিশ্রমের যোগ নাই, উৎসাহ বর্দ্ধনের জন্য সে সকল ক্রীড়াতে বাজী রাখা হয়। হয় শারীরিক পরিশ্রম, নয়

মানসিক উত্তেজনা এ ছয়ের এক না থাকিলে ক্রীড়া মনস্থ হয় না। Cricket (গুলিডাণ্ডা) প্রভৃতি প্রথমে দৃষ্টান্ত, ঘোড়দোড়, তাস দ্বিতীয়ের উদাহরণ। ইংরাজদের জাতীয় খেলার মধ্যে প্রধান ক্রিকেট। তাহাদের দৃষ্টান্তে এক্ষণে পারসীরা এই খেলায় একরূপ ব্যুৎপত্তি লাভ করিয়াছে যে, তাহাদের সঙ্গে খেলিয়া ইংরাজদেরও অধোবদন হইতে হয়, ও এইরূপ শুনা যাইতেছে যে, এক দল পারসী ক্রীড়ক ইংলণ্ডে জনবুলের সঙ্গে বাজী রাখিয়া খেলিতে যাইবে। ক্রিকেট আমাদের গুলিডাণ্ডারই প্রকারান্তর খেলা। ইহা হইতে কোমলতর আর এক প্রকার ক্রীড়ার নাম ক্রোকে; ইহার বিশেষ গুণ এই যে, বিবিরাও ইহাতে যোগ দিতে পারেন। কিন্তু শারীরিক পরিশ্রমের তত উপযোগী নয় বলিয়া ক্রমে ইহার গৌরব হ্রাস হইয়া আসিতেছে। ব্যাডমিন্টন নামক খেলা এক্ষণে ক্রোকের স্থান অধিকার করিয়াছে। পক্ষযুক্ত খেচর গুলি, ডাণ্ডা দ্বারা আকাশে বিক্ষিপ্ত হইয়া প্রতিপক্ষের ডাণ্ডা দ্বারা তাহা আহত হয়—এইরূপে ঘাত প্রতিঘাতে গোলা এদিক্ ওদিক্ চলাচল করিতে থাকে; যে পক্ষের লোক ধরিতে না পারে তাহাদের হয় হাত উঠিয়া যায়, কিম্বা প্রতিপক্ষকে এক পয়েন্ট দিতে হয়। এইরূপ এক এক সংখ্যা লাভ করিয়া যে দল নির্দিষ্ট সংখ্যায় আগে পৌঁছিতে পারে তাহাদের জিত। ইহাতে হার জিত যে পক্ষেরই হউক শারীরিক পরিশ্রম উভয় দলেরই সমান। আর এক রকম খেলা আছে, তাহার নাম skating rink। শীতকালে যখন কোন জলাশয়ের জল জমিয়া কঠিন হয়—তখন সেই বরফের উপর দিয়া চলাচল করার নাম স্কেটিং। শীত-প্রধান দেশে ইহা এক মহা আমোদ, কিন্তু এই উষ্ণ দেশে জল তরলভাবে সহজে পরিত্যাগ করে না সুতরাং এখানে স্কেটিং কিরূপে সম্ভবে? এই সমস্যা ভেদ করিয়া এই সকল দেশের জ্ঞান স্থলস্কেটিং নামে এক নূতন ক্রীড়ার সৃষ্টি হইয়াছে। এক খণ্ড ভূমি পরিষ্কৃত ও পদার্থ বিশেষের সংযোগে বরফতুল্য মন্থণ চিকণ করিয়া এক প্রকার চক্রবিশিষ্ট পাত্ৰকা পরিয়া তাহার উপর দিয়া সহজে চলিতে ফিরিতে পারা যায়। ইহাতে শরীরের ভার রক্ষা করিয়া চলা অনেক অভ্যাসের কৰ্ম্ম। অনভ্যস্তদিগকে অনেক সময় ধরনীতে লুপ্তিত হইয়া

ভগদেহতরী হইতে দেখা যায় । ষাঁহারাই ইহাতে ব্যুৎপত্তি লাভ করিয়াছেন তাঁহারাই যখন সহজ ভাবে হেলিয়া ছলিয়া নানা প্রকার চিত্র কাটিতে কাটিতে চলিয়া ফিরিয়া বেড়ান, তখন মনে হয় যেন তাঁহারাই আকাশ-পথে বিচরণ করিতেছেন, দুঃখ হয় মানুষের কেনই বা পক্ষ হইল না—হইলে কি আরামে উড়িয়া বেড়ান যাইত । এখন যেন ধরণীর সহিত যুদ্ধ করিয়া আমাদেরকে প্রতিপদ অগ্রসর হইতে হয় । এই সকল ক্রীড়াস্থলে নিয়মিত সময়ে বিবি সাহেব একত্রিত হন । এই সকল ব্যায়াম-চর্চার দৃষ্টান্ত যদি আমরা ইংরাজদের নিকট হইতে গ্রহণ করি ত বিস্তর উপকার হয় সন্দেহ নাই । আমরা মনে করি যে, বালস্তাবৎ ক্রীড়াসত্ত্বঃ—বাল্যকালই ক্রীড়ার কাল ; যুবক ক্রীড়ায় যোগ দিতে সঙ্কুচিত হন । ইংরাজদের এভাব নাই । আবালবৃদ্ধবনিতা সকলেই খেলা ধুলায় শারীরিক শ্রম-সাধন ও মনের আয়াস নিবৃত্তি করেন । আমাদের এরূপ ক্রীড়া অতি বিরল । শীতকালে অর্ধেক্রোশ পদচালনা—বাবুদের ব্যায়ামের এক শেষ । বাবু নামের সঙ্গে সঙ্গে গদিতে হেলান দিয়া পান তামাক, গল্পসল্প, আমোদ করা, এই ভাবই মনে উদয় হয় । ইংরাজদের মধ্যে ব্যায়াম-শিক্ষা শিক্ষার এক প্রধান অঙ্গ । অধারোহণ, অস্ত্র-চালনা, ঘুদিমারা, সাঁতার, নাচ, পদচারণা এই সকল না শিখিলে ইংরাজ-ভদ্র-সমাজের উপযোগী শিক্ষা সম্পূর্ণ হয় না । ইংরাজেরা যেখানেই একত্রিত হউক না কেন, তাহাদের বহিষ্কার-ক্রীড়ার বিশেষ উৎসাহ দৃষ্ট হয় । আঙ্গো-ইণ্ডিয়ানদের ক্রীড়ালয়ের নাম জিমখানা । এই জিমখানার কার্য্য বৎসরের মধ্যে একবার সমারোহে সম্পন্ন হইয়া থাকে । এ উৎসব সপ্তাহ খানিক চলে । ইহাই তাহাদের জাতীয় দুর্গোৎসব । এ সময়ে তাহাদের উৎসাহের আর সীমা থাকে না । বাহিরের নানা স্থান হইতে নিমন্ত্রিত লোকজনের সমাগম হয় ও অতিথিসৎকার খানাপিনার ধুম লাগিয়া যায় । এই উপলক্ষে ঘোড়দৌড়, ক্রিকেট, ব্যাডমিন্টন, নৃত্যগীত-অভিনয়, নানা প্রকার ক্রীড়াকলাপের আনন্দ-ধ্বনি উঠিতে থাকে । নৃত্যশালায় ইহাদের যে আমোদ তাহার বর্ণনা কি করিব । নাচগৃহ ইন্দ্র-ভবনের ন্যায় আলোকিত ও সজ্জিত হয়—বিবিরা উৎকৃষ্ট মনোহর

বেশে স্বর্ণের পরি ও অঙ্গরার ন্যায় সাজিয়া আসেন ও নিজ নিজ সহচরের সহিত নৃত্য ও প্রেমমালাপে মগ্ন থাকিয়া সমস্ত রজনী যাপন করেন । মধ্যে একবার পান-ভোজনে সকলের শ্রান্তি দূর হইলে নবীন উৎসাহ সহকারে নৃত্য আরম্ভ হয় ও উষার সঙ্গে সঙ্গে মজলিস ভঙ্গ হয় । বর্ষার সময় যখন ষ্টেশন পূর্ণ থাকে, তখন আঙ্গ্লে-ইণ্ডিয়ানদের মধ্যে এই সকল আমোদের শ্রোত বহিতে থাকে—বর্ষান্তে সিবিలిয়ানদের দল বাহিরে চলিয়া গেলে ষ্টেশন পূর্ববৎ শান্তভাবে ধারণ করে ।

শরীরের জন্য জিমখানা—মনের জন্য এক এক পুস্তকালয় ও প্রতি রবিবার, ঈশ্বরারাধনার জন্য এক ভজনালয় । কার্যালয়, ভজনালয়, ভোজনালয়, পুস্তকালয় ও জিমখানা—এই পঞ্চতীর্থে আঙ্গ্লে-ইণ্ডিয়ানগণ তাহাদের প্রবাস যাপন করে ।

ইংরাজেরা শীতপ্রধান দেশের লোক, অথচ এত উষ্ণদেশে তাঁহাদের প্রবাস, কিন্তু ভারতে তাঁহাদের বাসোপযোগী স্থান নাই এমত নহে । এ দেশে ভিন্ন ভিন্ন ভাগে জলবায়ু বিভিন্ন ; কোথাও বায়ু অতি উষ্ণ, কোথাও বা স্রম্যা, স্রশী-তল, স্বাস্থ্যকর । বোম্বাই অঞ্চলে দেখ । নিজ বোম্বাই সহর সমুদ্রের ধারে, কোন সময়েই গ্রীষ্মের আতিশয্য হয় না । মালাবার হিল প্রভৃতি সাগর তটস্থ স্থানে অবস্থিতি করিলে গ্রীষ্ম কাহাকে বলে প্রায়ই জানা যায় না । যদি কোন ব্যক্তি শীতকালে বোম্বাই, বর্ষা ঋতুতে পুণা ও গ্রীষ্মকালে কোন পর্বত প্রদেশে বাস করিতে পারেন তবে তাঁহাকে গরমীর উপদ্রব কখনই সহ করিতে হয় না । ইংরাজদের মধ্যে তাহাদের সঙ্গতি ও সুবিধা আছে তাঁহারা বোম্বাই অঞ্চলে এইরূপে সুখে জীবনক্লেপ করেন । আরাম (comfort) কাহাকে বলে, তাহা যেমন ইংরাজে বুঝে, আমাদের লোকেরা তাহার কিছুই অবগত নহে । ভাল খাওয়া, ভাল পরা, ভাল থাকা,—এর কৌশল শিখিবার যদি আবশ্যক হয়, তাহাদের নিকট হইতে শিক্ষা কর । মালাবার হিলে তাহাদের বিবিধ সামগ্রী-সজ্জিত বৃক্ষলতায় শোভমান বায়ু-সঞ্চার-যোগ্য গৃহাবলী দর্শন করিলে কে না তাহাদের বাস নৈপুণ্যের প্রশংসা করিবে । আঙ্গ্লে-ইণ্ডিয়ানগণ এদেশে যে অর্থ

উপার্জন করে, তাহার অধিক ভাগই তাহাদের নিজ নিজ আহার পান শারীরিক সুখ স্বচ্ছন্দতা সম্পাদনেই ব্যয় হয়। আমরা এরূপ করাকে অপব্যয় মনে করি। তাহারা আপনার শরীর পোষণে যে অর্থ ব্যয় করে, তাহাতে আমাদের কত দুঃস্থ পরিবারের ভরণ পোষণ হয়। অবসর পাইলে ইংরাজেরা পর্বতের আশ্রয় গ্রহণ করিতে ক্রটি করেন না। আমাদের দেশের উৎকৃষ্ট পার্কভ্য প্রদেশ ইংরাজদের বাসগৃহে পরিপূর্ণ। অবকাশ পাইলে তাঁহারা তথায় গিয়া বিশ্রাম করেন। হিমালয়, নীলগিরি, দারজিলিং প্রভৃতি পর্বত-শ্রেণী আংলো-ইণ্ডিয়ানদের আমোদধ্বনিতে প্রতিধ্বনিত দেখা যায়; তাঁহাদের অভাবে এ সকল স্থান হয় ত দুর্গম বিজন বন হইয়া থাকিত। বোম্বায়ের এইরূপ দুই প্রধান সুগম সুরমা পর্বত-প্রদেশের নাম—মাথেরান ও মহাবলেশ্বর। মহাবলেশ্বর সমুদ্র-পৃষ্ঠ হইতে প্রায় ৪০০০ ফীট উচ্চ ও শোভা-সৌন্দর্য্যে পরিপূর্ণ। মহাবলেশ্বর হইতে প্রতাপ-গড় নামক পাহাড় দৃষ্ট হয়, সেখানে মহারাষ্ট্রাধিপতি শিবজী নবাব অফজুল খাঁকে প্রতারণা পূর্বক ব্যাঘ্রনখ দ্বারা হত্যা করিয়াছিলেন। শিবজীর সিংহগড় প্রভৃতি অন্যত্র দুর্গম দুর্গও এক্ষণে সুরমা বাসস্থলে পরিণত হইয়াছে। এই সকল পর্বতধাম ইংরাজদের প্রিয় আবাসস্থান। ইহাদের জলবায়ু ফল ফুল তাহাদের স্বদেশে স্মরণ করাইয়া দেয়। যে সকল সাহেব কার্যের অতুরোধে নিজে এ সকল স্থানে আসিতে না পারেন, তাঁহারা অন্তত তাঁহাদের স্ত্রীদিগকে পাঠাইয়া দেন। কেহ কেহ আপনার জন্ত এক এক গৃহ কিনিয়া রাখেন। এই সকল স্থানে ইংরাজদের সমাগমে এ দেশের বিশেষ লাভ এই যে, তাঁহাদের প্রসাদে অনেক দেশীয় শ্রম-জীবীর অল্প লাভ হয়। যে কয় মাস তাঁহারা পর্বতে বাস করেন, সে কয় মাস মুটে, মজুর ও অন্যান্য শ্রমজীবী গরীব লোক যথেষ্ট অর্থ উপার্জন করে ও সন্তোষের মত উপজীবিকা করিয়া লইয়া তাঁহাদিগকে আশীর্বাদ করিতে থাকে, সন্দেহ নাই।

কোন জাতির আচার ব্যবহারের বিষয় লিখিতে হইলে তাহাদের উদ্ধাহ-প্রণালী সর্বাগ্রে বর্ণন করা আবশ্যিক। আংলো-ইণ্ডিয়ানদের অধিকাংশই অবিবা-

হিত। এ দেশে অবিবাহিতা কন্যা আসিলে তাঁহাকে অধিক কাল অনুচ্চা থাকিতে হয় না। যে সকল স্ত্রীলোকের ভাগ্যে স্বদেশে বর না জোটে, তাঁহারা এদেশে বিবাহার্থে আগমন করেন, ও শীঘ্রই তাঁহাদের মনস্কামনা সিদ্ধ হয়। আঙ্গ্লে-ইণ্ডিয়ানদের বিবাহক্রিয়া তাঁহাদের মূল সমাজের নিয়ম অনুসারে সম্পন্ন হয়, এ দেশে ভিন্ন আকার ধারণ করে নাই। ইংরাজদের মধ্যে পিতামাতা বিবাহের সম্বন্ধ স্থির করেন না। তাঁহাদের বিবাহ সংঘটনে কোন ঘটক বা মধ্যস্থের আবশ্যক হয় না। স্ত্রীর উপার্জন করিতে যুবকদিগের স্বচেষ্টা ও স্বাবলম্বন প্রয়োজন। যুবতীগণের রূপগুণই বিবাহের দৌত্য কার্য সম্পাদন করে। পিতামাতার মতে বিবাহ, আর স্বল্পসম্বৃত বিবাহ ইহার মধ্যে কোন্ প্রথাটি জন-সমাজে অধিক হিতকর, তাহা লইয়া অনেক বাদানুবাদ চলিতে পারে। ইংরাজদিগের উদ্ভাহ-ক্রিয়ার তিন অঙ্ক, প্রথম সাধনা, দ্বিতীয় প্রস্তাব ও সম্মতি, তৃতীয় বিবাহ। আপনি দেখিয়া শুনিয়া বিবাহ করিতে গেলে পুরুষের সাধ্যসাধনার প্রয়োজন ইহা বলা বাহুল্য। যুবকের যদি কোন স্ত্রীলোকের প্রতি আসক্তি জন্মে ত তাহার অভিলষিত যুবতীর চিত্তভূর্গ ভেদ করা তাঁহার প্রধান লক্ষ্য। কিসে তাঁহার মনোরঞ্জন ও গুণ-আকর্ষণ করিতে পারেন, কায়মনোবাক্যে তাহারই যত্ন করিতে থাকেন। এইরূপ সাধ্যসাধনার নাম কোর্টশিপ্। যদি যুবতী নিতান্ত চঞ্চলা, বিলাসিনী ও প্রতারণা-পরায়ণা না হন, ত তাঁহার প্রেমাসক্ত যুবক অবশ্যই বুঝিতে পারেন, তাঁহার সাধনা সিদ্ধ হইবার কতদূর সম্ভাবনা। পরে তিনি অবসর বুঝিয়া প্রিয়র নিকট আত্মনিবেদন করেন। পুরুষের নিকট স্ত্রীলোকের স্বীয় মনের ভাব প্রকাশ করিবার রীতি নাই। বিবাহের প্রস্তাব করা পুরুষের কার্য। পুরুষ বরপ্রার্থী—নারী বরদায়িনী। বিবাহের প্রস্তাব করায় একটু কৌশল ও চাতুর্য্য চাই। পুরুষ যদি সম্বন্ধা হন, যদি মনের কথা ভাল করিয়া বলিতে পারেন, তিনি যদি রূপবান হন, ও হাব, ভাব রূপ, লাবণ্যে জয়লাভের আশা থাকে, ত তিনি নিজে যুবতীর নিকট গিয়া মুখেই প্রস্তাব করেন। হয়ত বলেন—

“সুন্দরি! তুমি কি আমার হইবে? তোমার সুখের ভার কি আমার হস্তে সমর্পণ

করিবে? তোমা ভিন্ন আমি আর কাহাকেও জানি না, আমার সমুদয় সুখ সমুদয় আশা ভরসা তোমার এক কথার উপর নির্ভর করিতেছে। আমাকে নিরাশা করিও না। বল তুমি আমার।” প্রিয়ার লজ্জাবনত রক্তিম মুখ-মণ্ডলে অনুকূল উত্তর পাঠ করিয়া যুবক আকাশের চন্দ্র হস্তে পান, তাঁহার জীবন এক নূতন রাগে রঞ্জিত হইয়া উঠে। কিন্তু সকল সময়ে আশাহীনরূপ ফল প্রাপ্ত হওয়া যায় না, প্রেমরাজ্যেও এই নিয়ম।

• যুবক আপনার প্রণয় ব্যক্ত করিবার মানসে প্রত্যাষে প্রিয়ার দ্বারে উপস্থিত। সমস্ত রাত্রি ভাবিয়া ভাবিয়া তাঁহার নিদ্রা হয় নাই। কল্পনায় কত কি চিত্র করিতেছেন, তিনি আশা ভয়ে আন্দোলিত হইয়া প্রেমসীর সম্মুখে উপবিষ্ট হইলেন। কামিনীর কথার ধরণে বোধ হইল যেন তিনি কিছু বিরক্ত।

যুবক। কেন ভাই তুমি কি আমার উপর রাগ করেছ? কেন বল দেখি আমার সঙ্গে এরূপ ব্যবহার করছ?

স্ত্রী। না, আর কিছু নয়। তা সময় নেই অসময় নেই, এই কি দেখা করিবার সময়? সকালের দিকটা একটু ঘুম এসেছিল, এমন সময় ডাক পড়িল, আমি তাড়াতাড়ি করে উঠে কাপড় পরে নীচে আসছি, কাজে কাজেই চটতে হয়।

যুবক। চটই আর যাই কর, আমার উপর ওঁদাস্য করো না। সুন্দরি! আমি তোমার প্রেমের ভিখারী, তোমার একটুকু ভালবাসার উপর আমার সমুদয় সুখ নির্ভর করছে।

এই বলিয়া যুবক রমণীর হস্ত ধারণ করিতে গেলেন। যুবতী তাঁহার হস্ত প্রক্ষেপ করিয়া একটু দূরে গিয়া বসিলেন ও তাঁহার প্রতি উগ্রভাবে দৃষ্টি করত বলিলেন—“আর যাই কর—ভালবাসার কথা বলে আমাকে বিরক্ত করো না।”

যুবক চারিদিক অন্ধকার দেখিলেন—জগৎ সংসার তাঁহার নিকট অশানভূল্য প্রতিভাত হইল।

“তবে কি এই তোমার শেষ কথা—ইহার আর কোন অশুভা হইবে না?”

রমণী। যদি ভালবাসা বল তবে তাই। তোমার প্রতি আমার কোন বিরক্তি কি মন্দ ভাব নাই।

যুবক নিরাশ হইয়া গৃহে ফিরিয়া গেলেন। স্বদেশের প্রতি তাঁহার অনাস্থা জন্মিল—নিয়মিত কাজকর্ম ছাড়িয়া দিলেন ও বিদেশে গিয়া নবজীবন আরম্ভ করিতে কৃতসঙ্কল্প হইলেন।

পুরুষ যদি লজ্জাশীল হন—অসম্মতি প্রকাশে নিতান্ত মনঃক্লম্ব হইয়া আপনাকে আপনি সামলাইতে পারিবেন না—তাঁহার যদি এইরূপ ভয় থাকে তবে লেখনীর• আশ্রয় গ্রহণ করা কর্তব্য। যুবতী তাঁহার প্রণয়ীর প্রস্তাবে সম্মতি কি অসম্মতি ঘাহা হয় প্রকাশ করেন। সম্মতি পাইলে যুবক কামিনীর পিতামাতার সম্মতি প্রার্থনা করেন। পিতামাতার অনুমতি হইলে তিনি তাঁহার প্রেয়সীকে আপনার প্রেমনিদর্শন নানা প্রকার উপহার প্রেরণ করেন। বহুমূল্য উপহার গ্রহণে যদি কোন আপত্তি থাকে—ত পুষ্পাঞ্জলি প্রদানে তিনি প্রিয়ার প্রতি স্বীয় অনুরাগ প্রকাশ করিতে পারেন। প্রণয়ীর নিকট হইতে পুষ্প-উপহার গ্রহণে কোন বাধা নাই। অবিবাহিতা কুলকামিনীদিগের পরপুরুষের নিকট হইতে পুষ্পোপহার গ্রহণ করা বিহিত নহে। বিবাহের দিন স্থির করা কামিনীর অধিকার।

বিবাহের পূর্বে এ বিবাহে কাহারো কোন আপত্তি আছে কি না জানিবার জন্য অনেক সময় এক ঘোষণা-পত্র প্রকাশিত হয়—তাহা উপর্যুপরি তিন রবিবার চর্চে পঠিত হইয়া থাকে—

“অমুক অমুকের বিবাহ সম্বন্ধীয় ঘোষণাপত্র প্রকাশ করিতেছি। যদি তোমাদের কাহারো এই উভয়ের বিবাহ বিষয়ে কোন আপত্তি থাকে, তাহা ব্যক্ত করিবে। এই প্রথমবারের (দ্বিতীয় অথবা তৃতীয় বারের) বিজ্ঞাপন দেওয়া যাইতেছে।”

বিবাহ-কালে কন্যার সহিত দুই জন হইতে বার জন সখী উপস্থিত থাকেন। কন্যার ভগিনীগণ অথবা বরের নিকট সম্পর্কীয় কয়েকটা স্ত্রী সখী-পদে নিযুক্ত

হন। সখীগণ ও কন্যার পরিবারস্থ লোকেরা যাত্রীদলের প্রথম কন্যা ও তাঁহার পিতামাতা যাত্রীদলের শেষ—এইরূপে যাত্রীগণ শ্রেণীবদ্ধ হইয়া চলেন। বর ও সখীগণ ভজনালয়ে প্রথম গিয়া কন্যার জন্য অপেক্ষা করিতে থাকেন। কন্যা তাঁহার পিতার হাত ধরিয়া বেদীর সম্মুখে উপস্থিত হন। কন্যা বরের বামপার্শ্বে দাঁড়ান ও বামহস্তের দস্তানা খুলিয়া লন--বর তাঁহার দক্ষিণ হস্তের দস্তানা মোচন করেন। পরে পুরোহিত বেদী হইতে বলেন *—

• “প্রিয়তম ভ্রাতৃগণ, আমরা ঈশ্বরের সমক্ষে, এই উপাসক-মণ্ডলীর সমক্ষে এই পুরুষ ও এই স্ত্রীকে পবিত্র উদ্বাহ-সূত্রে বন্ধ করিবার জন্য এখানে সম্মিলিত হইয়াছি। উদ্বাহ-সংস্কার বহুমানাপদ। মনুষ্যের নির্দোষাবস্থায় ইহার সূত্রপাত। ঈশা ও তাঁহার ভক্তমণ্ডলীর মধ্যে যে নিগূঢ় সম্বন্ধ, ইহা তাহার সংজ্ঞাপক। অতএব ইহাতে প্রবৃত্ত হইতে হইলে অনবধানতা, অবিবেচনা ও যদৃচ্ছাপূর্বক প্রবৃত্ত হওয়া বিধেয় নহে। প্রজ্ঞাহীন পণ্ডর স্থায় মনুষ্যের প্রবৃত্তি চরিতার্থ করা ইহার উদ্দেশ্য নহে। বুদ্ধি পূর্বক, বিবেচনা পূর্বক, ভক্তির সহিত, নম্রভাবে, ঈশ্বরের উপর ভয় রাখিয়া, কি উদ্দেশ্যে উদ্বাহ-প্রথার সৃষ্টি হইয়াছে তাহা স্মরণ রাখিয়া ইহাতে প্রবৃত্ত হওয়া কর্তব্য।

প্রথমতঃ, বিবাহের উদ্দেশ্য সন্তানোৎপত্তি, ঈশ্বর-নির্দিষ্ট ধর্মপথে রাখিয়া সন্তানগণের প্রতিপালন ও শিক্ষাদান।

দ্বিতীয়তঃ, বিবাহের উদ্দেশ্য যাহাতে মানবসমাজে ব্যতিচার-দোষ প্রবেশ না করে। যাহারা ইন্দ্রিয়-সংযমে অক্ষম, তাহারা দার-পরিগ্রহ করিয়া খুষ্ঠ-সমাজে আপনাদিগকে পবিত্র রাখিতে সমর্থ হয়।

তৃতীয়তঃ, বিবাহের উদ্দেশ্য সুখ দুঃখ সম্পৎ বিপদে স্ত্রী পুরুষের পরস্পর সহবাস লাভ, পরস্পর সাহায্যদান ও সন্তোষ সাধন। এই পবিত্র দাম্পত্য-ব্রতে ব্রতী হইবার মানসে এই দুই জন উপস্থিত হইয়াছেন। ইহাঁদের বিবাহে যদি কাহারো কোন আপত্তি থাকে, ত এইবেলা প্রকাশ করুন, নতুবা ভবিষ্যতে যেন ইহার বিরুদ্ধে কেহ কোন কথা না বলেন।”

* English Marriage Service.

যদি কাহারো কোন আপত্তি দর্শাইবার না থাকে, ত পুরোহিত বরকে সম্ভাষণ করিয়া বলিবেন—

“তুমি কি এই স্ত্রীর সহিত ঈশ্বর-প্রণীত পবিত্র উদ্ধাহ-সূত্রে বদ্ধ হইয়া ইহাঁকে পত্নীরূপে গ্রহণ করিবে? তুমি কি ইহাঁকে ভালবাসিবে, যত্ন করিবে, ইহাঁকে সুখী করিতে তৎপর থাকিবে, রোগে অরোগে ইহাঁকে রক্ষা করিবে ও আর সকল পরিত্যাগ করিয়া যাবজ্জীবন ইহাঁর প্রতি অনুরক্ত থাকিবে?”

বর উত্তর করিবেন, হাঁ থাকিব।

পরে কত্বাকে সম্ভাষণ করিয়া বলিবেন,—

“তুমি কি এই পুরুষের সহিত ঈশ্বর-প্রণীত পবিত্র উদ্ধাহ-সূত্রে বদ্ধ হইয়া ইহাঁকে পতিত্বে বরণ করিবে? তুমি কি ইহাঁর বশে থাকিবে, ইহাঁর সেবা করিবে, ইহাঁকে ভালবাসিবে, রোগে অরোগে ইহাঁকে রক্ষা করিবে ও আর সকল পরিত্যাগ করিয়া যাবজ্জীবন ইহাঁরই প্রতি অনুরক্ত থাকিবে?”

কত্বা উত্তর করিবেন, হাঁ থাকিব।

পরে পুরোহিত বলিবেন—

“এই পুরুষকে এই কন্যাদান কে করিতেছেন?”

তৎপরে পুরোহিত কন্যাকে তাঁহার পিতার হস্ত হইতে গ্রহণ করিয়া বরের দক্ষিণ হস্তে কন্যার বাম হস্ত যোগ করিয়া বরকে এইরূপ বলিতে বলিবেন—

“আমি তোমাকে পত্নীরূপে গ্রহণ করিতেছি, ভালই হউক মন্দই হউক—সম্পদে বিপদে, রোগে অরোগে, অদ্য হইতে আমি তোমারই থাকিব ও যতদিন বাঁচিয়া থাকি তোমাকে ভালবাসিব ও যত্ন করিব, ইহাতে আমার সত্যবচন দিতেছি।”

পরে তাঁহাদের হস্ত খুলিয়া লইবেন ও কন্যা তাঁহার দক্ষিণ হস্তে বরের বাম হস্ত ধারণ করিয়া পুরোহিতের পরে পরে বলিবেন—

“আমি তোমাকে পতিত্বে বরণ করিতেছি। ভালই হউক মন্দই হউক, সম্পদে বিপদে, রোগে অরোগে, অদ্য হইতে আমি তোমারই থাকিব ও যতদিন

বাঁচিয়া থাকি তোমাকে ভালবাসিয়া যত্ন ও সেবা করিব, ইহাতে আমার সত্যবচন দিতেছি।”

তদনন্তর বর কন্ডার বাম হস্তের চতুর্থ অঙ্গুলিতে এক অঙ্গুরীয় পরিধান করা-
ইয়া সেই অঙ্গুরীয় স্পর্শ করত পুরোহিতের কথা মত বলিবেন—

“এই অঙ্গুরীয়ে সহিত তোমাকে বিবাহ করিতেছি, আমার দেহের সহিত
তোমার অর্চনা করিতেছি, আমার ধন সম্পত্তি তোমাকে সমর্পণ করিতেছি।”

পরে দম্পতী জাহ্নু পাতিয়া বসিলে পুরোহিত আশীর্বাদ ও প্রার্থনা করিবেন
ও প্রার্থনার পর দম্পতীর হস্তে হস্ত মিলাইয়া বলিবেন,—

“ঈশ্বর ঐহাদের সংযুক্ত করিয়াছেন, কোন মনুষ্য যেন তাঁহাদের বিযুক্ত না
করেন।”

অনন্তর পুরোহিত সমাজের প্রতি লক্ষ্য করিয়া বলিবেন,—

“অমুক অমুক ঈশ্বরের সমক্ষে ও এই সমাজের সমক্ষে পবিত্র উদ্বাহে বন্ধ হইয়া
পরস্পরকে সত্যবচন দিয়াছেন ও অঙ্গুরীয় দান ও প্রতিগ্রহ দ্বারা ও হস্তে হস্ত
যোগ করিয়া তদ্বিষয়ে আপনাদের মনোগত অভিপ্রায় প্রকাশ করিয়াছেন, এক্ষণে
আমার বক্তব্য এই ইহারা স্বামী স্ত্রী রূপে একত্রে সহবাস করুন।”

তৎপরে প্রার্থনা সঙ্গীত উপাসনা ও আশীর্বাদে অনুষ্ঠান সমাপ্ত ।

অনুষ্ঠানের পর দম্পতীকে রেজিষ্টারে নাম স্বাক্ষর করিতে হয়। তদনন্তর বর
ও কন্যা এক গাড়ীতে বসিয়া কন্যার বাটী গমন করেন। বরযাত্রী ও কন্যাত্রী-
গণ তাঁহার পশ্চাৎ পশ্চাৎ আসিয়া গৃহে প্রবেশ করেন। সেখানে সকলে মিলিত
হইলে মধ্যাহ্ন-ভোজন মহা সমারোহে সম্পন্ন হয়। আহারান্তে বর-কন্যার স্বাস্থ্য
ও কল্যাণ উদ্দেশে বক্তৃতা ও পানাদি সমাপন হইলে সকলে স্ব স্ব স্থানে প্রস্থান
করেন। পিতামাতা কন্যা-ভার হইতে মুক্ত হইলেন। দম্পতী তাঁহাদের মধুচন্দ্র
যাপন করিতে এক্ষণে বাহির হইলেন। ইংরাজদের অদ্ভুত প্রথা অনুসারে তাঁহা-
দের পশ্চাতে পুরাতন পাছকা নিষ্কিপ্ত হইল। বিবাহের পালা সাজ হইল।

পাঠকের মধ্যে কেহ কেহ জিজ্ঞাসা করিতে পারেন, বরকন্যার স্বাস্থ্য-

উদ্দেশ্যে বক্তৃতা—ইহার অর্থ কি? কোন বিশেষ কার্যোপলক্ষে ভোজননের নিমন্ত্রণ হইলে ভোজনান্তে ব্যক্তি ও সম্প্রদায় বিশেষের স্বাস্থ্য ও কল্যাণ উদ্দেশ্যে সুরাপান ও বক্তৃতা করিবার রীতি ইংরাজদের মধ্যে প্রচলিত আছে। প্রথম গণ্ডুষ রাণীর স্বাস্থ্য উদ্দেশ্যে পান করিতে হয়। সভাপতি বলিয়া উঠেন “মহাশয়েরা পাত্র পূর্ণ করুন। মহারাণী ভিক্টোরিয়া ষাঁহার রাজ্যে স্বর্ঘ্য কখন অন্তমিত হয় না, অত্যাচার অত্যাচার স্থান পায় না, ষাঁহার সুরাশাসনে শত্রুদের গর্ব খর্ব ও প্রজাগণের সুখ সমৃদ্ধি দিন দিন বর্দ্ধিত হইতেছে, যিনি আপনার পবিত্র চরিত্র ও অমায়িক প্রজাবাৎসল্যে সকলেরই প্রীতি ভক্তি আকর্ষণ করিতেছেন, তাঁহার প্রতি ইংরাজদিগের রাজভক্তি উদ্দীপন করিবার জন্য অধিক বাক্যব্যয় আবশ্যক করে না। সকলে জয় জয় শব্দে রাণীর স্বাস্থ্য উদ্দেশ্যে পান করুন।” রাণীর পর যুবরাজ ও তাঁহার মহিষী, তৎপরে ক্রমান্বয়ে সৈন্যদল, নাবিকদল, পার্লামেন্ট সভার সভ্যগণ, রাজমন্ত্রী, আচার্য্য, পুরোহিত, ন্যায়াধীশ ইত্যাদির, অবশেষে “মধুরেণ সমাপয়েৎ” এই বচন অনুসারে “মহিলাগণের” স্বাস্থ্যপানের প্রস্তাব করা হয়। এই বিষয়ের প্রস্তাবক যেমন উৎসাহের সহিত বক্তৃতা করেন, শ্রোতৃগণও তেমনি উৎসাহের সহিত তাহা অনুমোদন করত পান করেন। এই ভাবে বক্তৃতা হয়, যথা—“সভাপতি ও মহোদয়গণ, আমার উপর যে ভার অর্পিত হইয়াছে, তাহা কষ্টের নহে, আনন্দের ভার। তাহা এই যে, মহিলাগণের স্বাস্থ্যপানের প্রস্তাব করা, ইহা অপেক্ষা সুখকর, উৎসাহকর প্রস্তাব আর কি হইতে পারে? কিন্তু কোথায় সেই অতুল-গুণ-নিধান অপ্রতিম-সৌন্দর্য্যখণি কামিনী-কুল, আর কোথায় আমার এই দুর্বল নিস্তেজ বাক্য, কিরূপে তাঁহাদের বর্ণন করিব? যে সকল সদগুণে মানবপ্রকৃতি উন্নত ও অলঙ্কৃত হইয়াছে, তাহা জীজাতিতেই প্রচুর পরিমাণে বিদ্যমান। রমণীর কমনীয় জ্যোতি বিহীন হইলে পুরুষ-সমাজ কি নীরস, কি কঠোর হইয়া পড়ে। নারীগণই পুরুষদের সুখ-সৌভাগ্যের একমাত্র সেতু। ‘দ্বিষঃ শ্রিয়শ্চ গেহেষু ন বিশেষোহস্তি কশ্চন,’ জী ও ত্রীতে কিছুই বিশেষ নাই। শৈশবকালে মাতার যে অকৃত্রিম স্নেহে ও যত্নে আমরা

লালিত পালিত হই, ভগিনীর নিঃস্বার্থ ভালবাসা, পতিব্রতা সতীর পবিত্র প্রেম, যে প্রেম ও ভালবাসা কালে ক্ষয় হয় না, দূরে হ্রাস হয় না, সহস্র কলঙ্কেও যাহাকে কলঙ্কিত করিতে পারে না, তাহা কাহার না স্মরণ হইবে? যখন আমরা অনাহারে অনিদ্রায় দুঃসহ যাতনা ভোগ করিয়া রোগশয্যায় শয়ান হই, তখন জীলোকের সুকোমল স্পর্শ ভিন্ন কে আমাদের সেই বিষম তাপের উপশম করিতে পারে? সে সময়ে কাহার পদবিক্ষেপ এমন নিঃশব্দ? কাহার বাক্য এমন সুস্বনাবহ? কাহার হাস্য এমন মধুর? কাহার অশ্রুজল এমন দুঃখ-নাশন? কাহার প্রার্থনা এমন ফলদায়ী? জী ভিন্ন কে আমাদের জীবনপথের নিত্য সঙ্গী, সম-দুঃখ-সুখ অচলা সখী? আমরা যেন আমোদে মত্ত হইয়া তাঁহাদের স্নেহ প্রেম ভুলিয়া না যাই। আইস দেখি তোমরা যে ঘোষিকুলের নিকট চির-কৃতজ্ঞতা ধ্বংসে আবদ্ধ রহিয়াছ, তাহার কিরূপে প্রতিশোধ দাও।”

এই সকল উপলক্ষে জীরা প্রায় উপস্থিত থাকেন না, কিন্তু তাঁহাদের প্রতিনিধি কোন ললনা-ভক্ত পুরুষ তাঁহার হইয়া প্রস্তাবককে সাধুবাদ কবেন।

আংলো-ইণ্ডিয়ানদের আচার ব্যবহার সম্বন্ধে আর অধিক বলিবার আবশ্যক করে না। যাহা বলা গেল তাহা অনেকেরই জানা কথা, আর অধিক বলিতে গেলে প্রস্তাব বাহুল্য হইয়া পড়ে। তবে এখনো আর একটি কথা বক্তব্য আছে, তাহা বলিয়াই প্রস্তাবের উপসংহার করিব।

ইংরাজদের আচার ব্যবহারে ভাল মন্দ মিশ্রিত আছে। তাহা কতক আমাদের জাতীয় ভাবের ও দেশের উপযোগী, কতক অনুপযোগী। এস্থলে বক্তব্য এই যে, ভালর সঙ্গে সঙ্গে যেন আমরা মন্দটা গ্রহণ না করি। যদি অনুকরণ করাই আবশ্যক হয় তবে দেখিয়া শুনিয়া বিবেচনা খাটাইয়া যেন অনুকরণ করি। এমন মনে করিও না যে, ইংরাজী রীতি নীতি অবলম্বন করিলে ইংরাজ-সমাজে সমাদৃত হইবে। বরং তাহাতে তোমার একুল ওকুল দুকুল যাইবারই সম্ভাবনা। এই প্রসঙ্গে আমার একটা কথা মনে পড়িল। আমার বিলাত-ফেরতা এক মহারাজীয় বন্ধু দেশীয় বস্ত্র পরিত্যাগ করিয়া ইংরাজী পরিচ্ছদ পরিধান করিতে আরম্ভ করি-

রাছেন। তাঁহার এক ইংরাজ নাচ-মজলিসে নিমন্ত্রণ হয়। তিনি কি কাপড় পরিয়া যাইবেন ভাবিয়া স্থির করিতে পারেন না। পরে এই সকল মজলিসে ইংরাজেরা যে লাক্সলু-বিশিষ্ট কোট ব্যবহার করে, তাহার অনুরূপ কোট পরিয়া যাওয়াই ধার্য্য হইল। একজন দরজিকে ডাকাইয়া কোট ফতুই প্রভৃতি তাঁহার মনের মত পোষাক প্রস্তুত করিয়া সং সাজিয়া গিয়া উপস্থিত। আমি তাঁহাকে ইংরাজদের পরিহিত পরিচ্ছদের সঙ্গে তাঁহার কাপড়ের তুলনা করিয়া দেখাইয়া দিলাম যে, তাহার সঙ্গে ইহার অনেক অমিল—ইহা দেখিয়া তিনি কিছু অপ্রতিভ হইলেন। ইহা অপেক্ষা তাঁহার নিজের মহারাষ্ট্র-বেশে তাঁহাকে শতগুণ মানা-ইত ও এরূপ মনঃকুণ্ণ হইতে হইত না। বিদেশীয় রীতির অনুকরণ করিতে গিয়া আমাদের অনেক স্থলে এই বিপদে পড়িতে হয়। ভারতকুলবালা যদি গৌন ও পেটিকোট ব্যবহার করেন, তবে তাঁহাদের পদে পদে অপদস্থ হইতে হয় সন্দেহ নাই। বিবির সাজ সাজিতে হইলে কাল-সহকারে যে ফ্যাসানের পরিবর্তন হয়, তাহার উপর বিশেষ লক্ষ্য না রাখিলে সভ্য-সমাজে হাস্যাস্পদ হইতে হইবে, এটা যেন তাঁহাদের মনে থাকে।

প্যারিসে কখন কোন্ নূতন ‘ফ্যাসনের’ সৃষ্টি হইল—কোন্ পুরাতন ‘ফ্যাসন’ উঠিয়া গেল—আজিকার ধরণ ‘ক্রিনলীন’ কি মার্জ্জনী গোণ, হে বিবিয়ানা-পরায়ণা ভারত-কুল-ললনা, এসকল নিগূঢ় তত্ত্বের প্রতি উদাসীন থাকিও না। ফ্যাসনের ব্যাকরণ যেন তোমার কণ্ঠস্থ থাকে—ফ্যাসনের স্রোতের সঙ্গে তোমায় মীতর দিতে হইবে—নতুবা বিলাত-সমাজে উপহাস্যস্পদ হইবার বিলক্ষণ সম্ভাবনা। কিন্তু সংপরামর্শ গ্রহণ কর ত ওপথে যাইও না।

ইংরাজ ও দেশীয়দের মধ্যে যে বিচ্ছিন্ন ভাব, তাহা প্রকৃতিতে এরূপ বদ্ধমূল যে, বোধ হয় না তাহা কোন কালে অপনীত হইবে। ইহার কারণ অহুসন্ধান করিতে গেলে অনেকগুলি কারণ উপলব্ধি হয়।

প্রথমতঃ, ইংরাজদের সহিত আমাদের জেতৃজিত সম্বন্ধ। তাঁহারা রাজার জাতি—আমরা পরাজিত প্রজার জাতি। খেতাব ও কৃষবর্ণের মধ্যে যে পর-

স্পর বিদ্বেষ ভাব, তাহা পৃথিবীর সকল স্থানেই দৃষ্ট হয়। যুদ্ধেই হউক—বসতির জায়গায় হউক—বাণিজ্য ব্যবসার উদ্দেশ্যেই হউক—যে কোন কারণে এই দুই জাতি একত্রিত হয়—স্বেতাঙ্গ পুরুষ আপনাদের শ্রেষ্ঠতার পরিচয় দিতে ক্রটি করেন না। তাঁহার কৃষ্ণবর্ণ ভ্রাতার সহিত আপনাদের সামাজিক সম্মিলনের পথ আটে-ঘাটে বন্ধ করিয়া রাখেন। বৈদিক কালে আর্য ও দ্রাবিড়ের মধ্যে এই কারণেই বিশেষ বিদ্বেষ লক্ষিত হয়। এই বর্ণ-ভেদের সঙ্গে সঙ্গে ইংরাজ ও ভারতবাসী-দিগের মধ্যে ভাষা, ধর্ম, আচার ব্যবহার বিষয়ে সম্পূর্ণ বিভিন্নতা। এই জাতিগত বৈষম্য হইতে বিদ্বেষ ভাব উৎপন্ন হওয়া স্বাভাবিক। এ ভাব যে কোন কালে সম্পূর্ণ বিলুপ্ত হইবে তাহার কোন চিহ্ন দেখা যায় না।

দ্বিতীয়তঃ, ইংরাজেরা এদেশে চারি দিনের যাত্রী, কতক দিন বাস করিয়া টাকা করিয়া স্বদেশে চলিয়া যান। ইউরোপ ও এদেশের মধ্যে যাতায়াতের এক্ষণে যেরূপ সুবিধা হইয়াছে তাহাতে ভারতবর্ষের উপর ইংরাজদের টান থাকিবার অল্পই সম্ভাবনা। পূর্বে এক এক জন ইংরাজের দেশীয়দের উপর সময়ে সময়ে বিলক্ষণ মমতা দেখা যাইত—তাহার কারণ এই, তাঁহারা ভারতবর্ষে অধিক কাল বাস করিয়া এদেশকে স্বদেশতুল্য জ্ঞান করিতেন কিন্তু এক্ষণে আর সে ভাব নাই। ইংরাজেরা এখানে প্রবাসীর মত থাকিয়া চলিয়া যান। দেশ-ভ্রমণে দুই চারি দিনের জন্য যাহার সহিত দেখা সাক্ষাৎ হয় তাহার সহিত বিশেষ সখ্যতা সচরাচর ঘটে না। “নানা পক্ষী এক বৃক্ষে, নিশিতে বিহরে স্নুখে, প্রভাত হইলে দশ দিকেতে গমন।” বিশেষতঃ ইংরাজদের যেরূপ স্বভাব তাহাতে তাঁহারা বিদেশীয়দের প্রিয়পাত্র কখনই হইতে পারেন না। ইংরাজেরা যখন বিদেশে ভ্রমণ করেন তখন তাঁহাদের ‘জনবুল্’ ভাব সকলেরই অপ্রীতিকর হইয়া উঠে। স্বকীয় রীতি-নীতি হইতে যাহা ভিন্ন তাহা ইংরাজের চক্ষে নিতান্ত ঘৃণা-স্পদ। তাঁহার সেই ‘রোষ্টবীফ’ ও বিয়রমদ্য ভিন্ন প্যারিসের উৎকৃষ্ট হোটেলেও তৃপ্তি হয় না। ইংরাজেরা পৃথিবী জুড়িয়া আপনাদের রাজত্ব বিস্তার করিতেছেন, কিন্তু আশ্চর্য্য এই যে, তাঁহারা তাঁহাদের সঙ্গীর্ণ দ্বীপোচিত ক্ষুদ্রভাব পরিত্যাগ

করিয়া ভিন্ন জাতির সঙ্গে মিশিতে পারেন না, তাঁহাদের স্বভাবই এরূপ নয়। ইংরাজ ও ইউরোপীয় অন্যান্য জাতির মধ্যে যখন এমন অমিল তখন এদেশীয়দের ত কথাই নাই। ইউরোপে ভাষা রীতি নীতি আচার ব্যবহারে অনেক সাদৃশ্য আছে, কিন্তু এখানে তাহার সম্পূর্ণ বিপরীত। আগা গোড়া সকল বিষয়েই অমিল। আমাদের বর্ণ রীতি নীতি সকলই ভিন্ন। এমন সাধারণ ঐক্য-স্থল নাই যাহার উপর পরস্পরের প্রীতি সৌহার্দ্য স্থাপিত হইতে পারে। ‘যে যাহাকে দেখিতে পারে না, তাহার চলন বাঁকা,’ ইংরাজ ও দেশীয় মধ্যে এইরূপ স্ফুট। ইংরাজ এদেশকে কখনই আপনার বলিয়া মনে করিতে পারেন না। ইহার জল বায়ু তাঁহার সহ্য হয় না, ইচ্ছা করিলেও এদেশে অধিক কাল বাস করিতে অক্ষম। পিতা-মাতা, পুত্র কন্যাকে অল্প বয়সেই আপনাদের ভারত-গৃহ হইতে বিযুক্ত করিয়া ইংলণ্ডে প্রেরণ করিতে বাধ্য হন। মাতা ভারত হইতে ইংলণ্ডে, ইংলণ্ড হইতে ভারতে যাতায়াত করিয়া জীবন যাপন করেন। ‘স্বামীকেও নিতান্ত একলাটি রাখিতে পারেন না—সন্তানগণেরও মধ্যে মধ্যে তত্ত্বাবধান আবশ্যিক। পিতাও হয়ত অনতিকাল বিলম্বে ‘লিবর’ রোগে আক্রান্ত হইয়া তাঁহার জী পুত্র পরিবারের সহিত গিয়া মিলিত হন। এদেশে তাঁহারা অর্থ উপার্জন করিতে আসেন, অর্থ সঞ্চয় করিয়া স্বদেশে প্রস্থান করেন। এ দেশ কর্মক্ষেত্র, স্বদেশ ভোগালয়—এ দেশে আয়, সে দেশে ব্যয়—শরীর এখানে, মন ওখানে—সুতরাং দেশীয় ও ইংরাজ মধ্যে প্রণয়-বন্ধন কি রূপে প্রত্যাশা করা যাইতে পারে ?

আমি বলিয়াছি ইংরাজেরা যেখানেই যাক, তাহাদের জাতীয় ক্ষুদ্র ভাব পরিত্যাগ করিতে পারে না। এ দেশে তাহাদের আচার ব্যবহারে ইহার ভূরি ভূরি প্রমাণ প্রাপ্ত হওয়া যায়। যৎকালে নিদাঘ-তাপের আতিশয্যে সমস্ত প্রাণী আকুল, মনুষ্যেরা ঘর্ম্মাক্ত-কলেবর হইয়া ত্রাহি ত্রাহি করিতেছে, তখন ইংরাজেরা তাহাদের বনাতের কোট পান্টলুন পরিধান করিয়া গ্রীষ্মের কষ্ট দ্বিগুণিত করে। প্রথর রৌদ্রের সময় তাহারা মহা সাজসজ্জা করিয়া পরস্পরের

সহিত দেখা সাক্ষাৎ করিতে বাহির হয়। এদেশে সকল ঋতুতে বিশেষতঃ গ্রীষ্মকালে বিগুহ্ন সুশীতল বায়ু সেবনের সময় প্রাতঃকাল ৫টা হইতে ৭টা পর্য্যন্ত; কিন্তু রাত্রের খানা-পিনা নৃত্য-গীত আমোদ-প্রমোদে রাত্রি জাগরণ করিয়া উষার সঙ্গে সঙ্গে পাত্রোখান করা কিরূপে সম্ভবে? আবার এদেশে প্রচুর আমিষ ভক্ষণ ও সুরাপান শরীরের উপযোগী নহে, ইহা সকলেই স্বীকার করিবে। ভারতবাসীদের অনেকেই নিরামিষাশী, উদ্ভিদ-ভোজী, কোন কোন জাতির তণ্ডুলমাত্র জীবনের একমাত্র অবলম্বন; এইরূপ মিতাহার এদেশে স্বাস্থ্য-রক্ষার প্রধান উপায়; কিন্তু ইংরাজদের আহারের রীতি দেখিলে বোধ হয় না যে, তাঁহারা উষ্ণ দেশে বাস করিতেছেন। প্রাতঃকালে ৬টা ৭টার সময় চা, রুটি, মাখন, ডিমসিদ্ধ প্রভৃতি ‘ছোট্টা হাজরি’—৯টা ১০টার সময় মদ্য মাংস সমেত ‘বড় হাজরি’—২টার সময় ঠাণ্ডা গরম মাংস মিষ্টান্ন ফলারের টিফিন—৪টা ৫টার সময় চা বিস্কিট ইত্যাদি—৭৮টার সময় মদ্য মাংসের ভুরি ভোজন, সময় বিশেষে মধ্য-রাত্রির সপর—এই ত তাহাদের পানাহারের নিয়ম, পানীয় মধ্যে ব্রাণ্ডি আর সোডা নর্বাগ্রগণ্য। ইহার অর্থ জনৈক ফরাসি পরিব্রাজক Count Goblet D’Almeida এইরূপ করেন যে, আরম্ভে অল্প ব্রাণ্ডি অধিক সোডা ও শেষে অধিক ব্রাণ্ডি অল্প সোডা। ইহার আর এক নাম ‘Pog’ খুঁটি অর্থাৎ জীবনের অবলম্বন। এইরূপ অপরিপাক্য আহার-পানে যে তাহাদের স্বাভাবিক বলিষ্ঠ সুস্থ শরীর ‘লীবর’ ও অশ্রান্ত পীড়ায় অক্রান্ত হইয়া তাহা-দিগকে বায়ু পরিবর্তনের জন্ত স্বদেশে বাইতে বাধ্য করে, তাহাতে বিচিত্র কি? কেমন করিয়া এত দিন টিকিয়া থাকে এই আশ্চর্য্য!

তৃতীয়তঃ, জাতিতে জাতিতে সখ্য-বন্ধন হইবার পূর্বে আচার ব্যবহারের কতকটা মিল চাই, কিন্তু তাহার কিছুই নাই। তাহারাও যেমন আমাদের দূরে রাখিতে চায়, আমরাও তেমনি তাহাদের হইতে দূরে থাকিতে চাই, তাহারা আমা-দিগকে পরাজিত জাতি বলিয়া অবজ্ঞা করে, আমরাও তাহাদিগকে স্বেচ্ছ বলিয়া ঘৃণা করি। অতএব আমাদের পরস্পর সদ্ভাবের সঞ্চার কোথা হইতে হইবে?

চতুর্থতঃ, ইংরাজের স্বভাবই কতকটা সামাজিকতার বিরোধী। শুদ্ধ আমাদের সম্বন্ধে কেন—তাহাদের আপনাদের মধ্যেও পরস্পরের ব্যবহারে এই পার্থক্য প্রকাশ পায়। ইংরাজেরা আমাদের জাতিভেদ-প্রথা অনিষ্টকর বলিয়া বর্ণন করে, কিন্তু ইংরাজ-সমাজে বিশেষতঃ ভারতবর্ষীয় ইংরাজ-সমাজে যে জাতিভেদ বিলক্ষণ প্রবল, পদে-পদে তাহার পরিচয় পাওয়া যায়। তবে তাহাদের জাতিভেদ ধন ও পদ-মর্যাদার উপর প্রতিষ্ঠিত, আমাদের জাতিভেদ বংশ-মর্যাদার উপর প্রতিষ্ঠিত। একজন নীচ বংশোদ্ভব কমিসনর হয়ত আপনা হইতে উচ্চকুলজাত সহকারী কমিসনরের সহিত একত্রে ভোজন করিতে সম্মত হইবেন না। চিহ্নিত পদস্থ কর্মচারী ও অচিহ্নিত পদস্থ কর্মচারীদিগের মধ্যে যে সামাজিক স্বতন্ত্রতা তাহা ত জানাই আছে। অচিহ্নিত পদের লোকেরা রূপে গুণে কুলে শীলে যেমনই হউন না কেন, তাঁহাদের হয় জ্ঞান করা চিহ্নিত পদারূঢ় কর্মচারীর স্বাভাবিক ধর্ম্য। কলেঙ্কটর সহকারী কলেঙ্কটরের সহিত সমকক্ষ হইয়া চলিবেন, কেন না তাঁহারা উভয়েই চিহ্নিত দলের লোক, কিন্তু অচিহ্নিত ডেপুটির সহিত তাঁহার স্বতন্ত্র ব্যবহার।

ইংরাজ ও আমাদের মধ্যে সহজ ভাবে দেখা সাক্ষাৎ আলাপ পরিচয় হইবার আর এক প্রতিবন্ধক এই যে, তাঁহাদের হাতে কর্মচারী নিয়োগের সমস্ত ভার অর্পিত। আমাদের মধ্যে অনেকে কেবল কর্ম-প্রার্থী হইয়া ইংরাজের সহিত সাক্ষাৎ করিতে যান। আমাদের সম্বন্ধে তাঁহারা এই দাতা ও প্রার্থীর ভাব ভুলিতে পারেন না। দেশীয় কোন ভদ্র লোক যে নিঃস্বার্থ ভাবে আলাপ করিবার মানসে তাঁহাদের সহিত সাক্ষাৎ করিতে যাইবেন, ইহা সহজে তাঁহারা বিশ্বাস করিতে পারেন না। তাঁহার সাক্ষাৎকারে কোন না কোন স্বার্থ-লাভ অভিসন্ধি থাকিবে, ইহা তাঁহারা আগে থাকিতে স্থির করিয়া লন। সুতরাং তাঁহারা আমাদের সকলেরই নিকট হইতে ‘সেলাম’ প্রত্যাশা করেন, স্বাধীন ভাবে তাঁহাদের সহিত দেখা করিতে যাওয়া পণ্ডশ্রম মাত্র, কেন না তাহার কোন প্রতিদান নাই।

তুমি একজন সাহেবের বাটীতে গিয়া তাঁহার সহিত সাক্ষাৎ কর, তিনি কি কখন তোমার বাটীতে তোমার সহিত সাক্ষাৎ করিতে আসিবেন? এরূপ প্রত্যাশা বৃথা। ঘরাও রকমে সাহেবদের সহিত আলাপ পরিচয় হয়, ইহা যদিও অনেক কারণে প্রার্থনীয়, কিন্তু সম্ভবপর নহে। আমরা গৃহে কিরূপে বাস করি, আমাদের আন্তরিক ভাব কি, আমাদের গার্হস্থ্য প্রণালী রীতি নীতি কিরূপ, সমস্ত জীবন ভারতবর্ষে কাটাইয়া কোন ইংরাজ তাহা জানিতে পারেন কি না • সন্দেহ। যখনি তাঁহাদের সহিত সাক্ষাৎ করিতে হয়, তখনি আমরা বেশভূষায় সজ্জিত হইয়া মনের শোক দুঃখ সম্বরণ করিয়া সহানু্য বদনে তাঁহাদিগকে দর্শন দিই। আমাদের প্রকৃত অবস্থা তাঁহাদের দৃষ্টিপথের বহির্ভূত, আমাদের গৃহদ্বার তাঁহাদের প্রতি রুদ্ধ। আমরা ভিক্ষুক হইয়া তাঁহাদের দ্বারে উপস্থিত হই, তাঁহারা দাতা হইয়া আমাদের কৃতজ্ঞতা-উপহার প্রত্যাশা করেন।

যুবরাজ যখন ভারতবর্ষে আগমন করেন তখন তিনি ইংরাজ ও এতদেশীয়-দিগের মধ্যে বিবেচ্যভাব দর্শন করিয়া বিশেষ অসন্তোষ প্রকাশ করেন। এতাব যে কিসে বিদূরিত হইবে, তাহার উপায় আবিষ্কার করা সহজ নহে। দুই পক্ষেরই কিছু কিছু দোষ, ইহা অবশ্য স্বীকার করিতে হইবে। দুই পক্ষের লোকেরা কিছু কিছু ত্যাগ স্বীকার না করিলে সম্ভাব সম্ভারের সম্ভাবনা নাই। বিশেষতঃ ইংরাজেরা রাজার জাতি, তাঁহারা অল্প প্রয়াসেই আমাদের সম্ভাব আকর্ষণ করিতে পারেন। তাঁহাদের মনে রাখা উচিত যে, কোটি কোটি প্রজা-গুঞ্জের সহিত এই ভারতবর্ষ জয় করিয়া সেই সকল প্রজাকে সুখী করা ও তাহাদের প্রীতি আকর্ষণ করা তাঁহাদের অবশ্য কর্তব্য। প্রজা রঞ্জন রাজার প্রধান ধর্ম। তাঁহারা যদি একপদ অগ্রসর হইয়া আসেন আমরা সহস্র পদ অগ্রসর হইয়া তাঁহাদের নিকট বাইতে প্রস্তুত। আমাদের যদি কোন বিষয়ে দোষ থাকে ত তাঁহারা ক্ষমাদৃষ্টিতে দেখুন, কেন না “শক্তানাং ভূষণং ক্ষমা।” তাঁহারা বিদ্যা বুদ্ধিতে আমাদের অপেক্ষা উচ্চতর সোপানে আরোহণ করিয়াছেন, তাঁহাদের উচিত যে, আমাদের হস্ত ধারণ করিয়া তাঁহাদের সঙ্গে সঙ্গে লইয়া যান।

যদি কখন এমন সময় আসে যে, তাহাদিগকে এ দেশ ছাড়িয়া যাইতে হয়, তখন তাঁহারা গৌরবের সহিত বলিতে পারিবেন যে, আমরা তোমাদিগকে শিক্ষিত ও স্বাধীন করিয়া দিয়াছি, এখন তোমরা আগনাদিগকে আপনারা রক্ষা কর। তখন তাঁহারা কোটি কোটি লোকের আশীর্বাদের পাত্র হইবেন। এমন সময় উপস্থিত হইলে আমরা সন্তাবের সহিত পরস্পর বিযুক্ত হইব ও তাঁহাদের রাজত্ব-কালে যে বহুবিধ উপকার লাভ করিয়াছি, তজ্জন্য তাঁহাদের নিকট চিরকাল ঋণজালে বদ্ধ থাকিব। ভারতের সহিত ইংলণ্ডের যোগ দ্বন্দ্বের মঙ্গলেরই জন্য বিধান করিয়াছেন, কিন্তু ইহা হইতে যত শুভ ফল প্রসূত হইতে পারে, তাহার জন্ত উভয় জাতিরই যত্ন ও চেষ্টার আবশ্যক। ইংরাজেরা আমাদের নিকট অনেক বিষয়ে শিক্ষা দিতে পারে, তাহারাও আমাদের নিকট অনেক শিক্ষা লাভ করিতে পারে; বিশেষতঃ ইংরাজমহিলা আমাদের স্ত্রীগণ হইতে অনেক বিষয়ে শিক্ষা পাইতে পারেন। কিন্তু এদেশীয় ইংরাজমহিলারা কোন বিষয়ে আমাদের স্ত্রীগণের আদর্শ হইতে পারেন না। এদেশে ইংরাজদের গার্হস্থ্য বিধানের আমরা কিছুই দেখিতে পাই না। যদি এদেশীয়দিগের সহিত তাঁহাদের মমতা থাকিত, তাহা হইলে তাঁহাদের সময় কাটাইবার জন্ত বৃথা আমোদ অব্বেষণ করিতে হইত না, কিন্তু এক্ষণে কি দেখা যায়? ইংরাজ রমণীগণ কিরূপে সময়ক্ষেপ করেন? স্বামী সমস্ত দিবস কাজকর্ম্বে ব্যাপ্ত থাকিয়া সূখালাপে বঞ্চিত ও শ্রান্ত ক্লান্ত হইয়া সন্ধ্যার সময় গৃহে প্রত্যাগমন করেন। স্ত্রী একাকিনী সময়ের ভার বহন করিতে থাকেন। সমস্ত দিনের মধ্যে ঘরের বাহির হইবার উপায় নাই। সন্তানগণ ১৫ বৎসর বয়ঃক্রমে শিক্ষার জন্য ইংলণ্ডে প্রেরিত হয়, তিনি তাঁহার সন্তান হইতেও বিযুক্ত। বৎসরের মধ্যে কয়েক মাস হয়ত তিনি স্বামী হইতে দূরে কোন পর্কত প্রদেশে বাস করেন, স্বামী সত্বেও তাঁহাদের বৈধব্য-যন্ত্রণা * ভোগ করিতে হয়। কোন বিশেষ জন-হিতকর কার্য্য হস্তে নাই যে, তাহাতে মনোনিবেশ করিয়া সূখী হইবেন। স্বামীর অগাধ ধন-কোষ তাঁহার

* এইরূপ বিধবাকে ইংরাজিতে grass-widow কহে।

হস্তে রহিয়াছে, এমন কোন ভোগের সামগ্রী নাই যাহা তাঁহার দৃষ্টাপ্য, ইচ্ছামত আপনার সমুদয় প্রবৃত্তি চরিতার্থ করিতে পারেন, অথচ তিনি স্খুধী নহেন। যে গরীব প্রজাপুঞ্জ দ্বারা তিনি পরিবেষ্টিত, তাহাদের অস্তিত্বের প্রতিও তিনি সন্দিহান। এই অবস্থায় তিনি যে আমাদের মহিলাগণের আদর্শ ও উপমাংশল হইবেন এরূপ আশা করা বৃথা।

• ইংরাজ ও ভারতবর্ষীয়দের সম্বন্ধে পূর্বোল্লিখিত ফরাসিস্ পরিব্রাজক আপনার সদ্য-প্রণীত ভ্রমণ-বৃত্তান্ত *L'Inde et Himalaya* গ্রন্থে যাহা লিখিয়াছেন, তাহা উদ্ধৃত করিয়া দিলাম—

“আমার ভারতবর্ষে অবস্থিতি কালে অনেক ইংরাজ আমাকে জিজ্ঞাসা করিয়াছে, ‘কি দেখিয়া তোমার সকল অপেক্ষা আশ্চর্য্য বোধ হইল?’ আমি ইহার উত্তরে বলিতে পারিতাম, ‘এ দেশে তোমাদের দেখিয়া, বিশেষতঃ তোমরা এখানে এত দিন তিষ্ঠিয়া রহিয়াছ তাহা দেখিয়া।’ বিবেচনা করিয়া দেখিলে এ কথা সামান্য প্রশংসার কথা নয়, কেন না ৬০ হাজারের অনাধিক ইউরোপীয় সৈন্য দ্বারা বশীভূত ২৫ কোটি হিন্দুর উপর যে দুর্দর্শ অটল রাজত্ব-স্থাপন, ইহাতে শুদ্ধ প্রজাগণের অসাধারণ সহিষ্ণুতা প্রকাশ পায় তাহা নহে, কিন্তু ইহা হইতে ইংরাজ-দিগের প্রভাবশালী অথচ বিচক্ষণ শাসনপ্রণালী উপলব্ধি করা যাইতে পারে। সোঁসাগ্যক্রমে এইরূপ জয়লাভের উপযোগী যে সকল গুণ, এমন কি যে সকল দোষ থাকা আবশ্যক তাহা তাহাদের আছে। মূলনীতি রক্ষা করিতে গিয়া আসল-কাজ-ভুলিয়া-না যাওয়া কার্য্যদক্ষতা; একাধিপত্যও থাকিবে অথচ তাহা যথেষ্টাচারে পরিণত হইতে পারিবে না, এরূপ রাজনীতি-কুশলতা, শাসন সম্বন্ধে কঠোর ন্যায়রক্ষা ও সত্যপালন, বিজাতীয় ধর্ম্মের প্রতি চিরাত্যস্ত সমদর্শিতা, দ্রুতগতি না হউক স্থায়ী উন্নতির নিদানভূত আমূল সংস্কারের বশবর্ত্তিতা, প্রজাগণের কল্যাণ-সাধনে মনের সহিত যত্ন করেন এতটুকু ধর্ম্মজ্ঞান, প্রজাগণের অভ্যস্ত তোষামোদ ও আভ্যন্তরিক অসন্তোষ এ উভয়কেই উপেক্ষা করিতে পারেন এতটুকু অহঙ্কার,—এই সকল গুণে ভারতবর্ষের উপর অটল রাজ্য-স্থাপন বিদেশীয়

রাজার যতদূর সাধ্যায়ত্ত, ইংরাজেরা তাহাতে কৃতকার্য হইতে পারিবেন । ভারত-বর্ষের জল বায়ু ইউরোপীয় প্রকৃতির অনূপযুক্ত বলিয়া এদেশ তাঁহাদের স্থায়ী বসতির উপযুক্ত স্থান নহে ; স্তত্রাং তাঁহাদিগকে স্বদেশ হইতে নিত্য নূতন নূতন লোক আনাইয়া শাসনকার্য্য নির্বাহ করিতে হয়, ইহাতে রাজা-প্রজার পার্থক্য-ভাব দূরীভূত হয় সন্দেহ নাই, কিন্তু পূর্বে পূর্বে যে সকল জাতি ভারতের উপর আধিপত্য স্থাপনান্তর দুর্গতিগ্রস্ত হইয়াছে তদনুরূপ দুর্গতি হইতে পরিত্রাণ পাইবার ইহা এক প্রধান কারণ বলিতে হইবে । এই কারণে রক্ষণশীলতা ও শাসনানু-রাগরূপ স্বর্গীয় অগ্নি ইংরাজদের হৃদয়ে নিরন্তর প্রজ্বলিত দেখা যায় ।”

“যে প্রভু তাঁহার আজ্ঞাধীন ভৃত্যকে তাহার নিজের ইচ্ছা-বিরুদ্ধে স্থখী করিতে চাহেন, সে প্রভু কখন ভৃত্যের প্রিয়পাত্র হইতে পারেন না । যে জাতি চিরন্তন প্রথানুসারে সহজ ও অকৃত্রিম শাসনের অভ্যাসাধীন, তাহাদের মধ্যে কঠোর ও কৃত্রিম শাসন-প্রণালী প্রচলিত করিতে যে সম্বর্ষণ উপস্থিত হয়, তাহা ত ইংরাজদিগের জনসাধারণের নিকট অপ্রীতিভাজন হইবার এক কারণ, কিন্তু তাহা ছাড়িয়া দিলেও দেখিতে পাইবে যে, ইংরাজদের এমন কিছুই গুণ নাই যাহাতে তাহারা পরাজিত জাতির শ্রদ্ধা আকর্ষণ করিতে সমর্থ হয় । তাহারা তাহাদের উচ্চতর সভ্যতার গুণে ভারতের ত্রিবুদ্ধিসাধনে তৎপর বটে, কিন্তু তজ্জনিত অহঙ্কার প্রকাশেও তাহারা নিরন্তর নহে । ইংরাজেরা ন্যায়ী, কিন্তু ভদ্র নহে, ইহা সকলেরই মুখে শুনা যায় । কলিকাতা, বোম্বাই, সিংহল, যেখানেই হউক, যখন শিক্ষিত ও স্বাধীনতা-প্রিয় দেশীয় ভদ্রলোকের সহিত আলাপ করি-য়াছি, আর তাহারা আমাকে বিদেশী জানিয়া অসঙ্কোচে আমার নিকট তাহাদের মনের ভাব ব্যক্ত করিয়াছে, তখন ঐরূপ উক্তি শ্রবণ করিয়াছি । উচ্চপদস্থ দেশীয়দের সহিত ইংরাজেরা বেক্রপ ব্যবহার করে, তাহা আমাদের দেশে একজন সমান্য ভৃত্য কি গাড়োয়ানও সহ করিয়া থাকিতে পারে না । কাজকর্ম্মের সম্বন্ধে ইংরাজেরা দেশীয়দের সহিত সাধু ও ভদ্র ব্যবহারে সচরাচর ত্রুটি করে না বটে, কিন্তু ভারতবর্ষবাসীদিগের সহিত ঘরাও ভাবে মিলিতে তাহারা কোন ক্রমেই

সম্মত নহে। তাহারা আপনাদের সমাজ-দুর্গ দেশীয়দিগের আক্রমণ হইতে প্রাণ-পণে রক্ষা করে ও সাধ্যমতে দেশীয়দের সংশ্রব হইতে দূরে থাকিতে চেষ্টা করে—এমন কি বাষ্পশকটে ভ্রমণ-কালীন ইউরোপীয় ও দেশীয়দের এক গাড়ীতে একত্রে উপবেশন, ইহাও দুর্লভ-দর্শন। বোধ হয় যেন ইংরাজেরা দেশীয় সমাজে ঘোরতর বিপ্লব উপস্থিত করিয়া আপনাদের এক নূতন সম্প্রদায় সৃষ্টি করিয়াছেন, সে সম্প্রদায় পূর্বতন প্রথাভূষায়ী ধর্ম-সংস্কারের উপর স্থাপিত নহে, কিন্তু বিভেদ ও জাত্যভিমানের উপর প্রতিষ্ঠিত। বিজয়ী ও পরাজিত জাতির ভদ্র কুলের মধ্যে আদান-প্রদানের পথ একেবারে অবরুদ্ধ—এরূপ উদাহরণ ইতিহাসে আর কোথাও পাওয়া যায় কি না সন্দেহ। মিশ্র ফিরিঙ্গিজাতি,—ইউরোপীয় ও দেশীয় রক্তের সম্মিশ্রণে বাহাদের উৎপত্তি,—তাহারা কোথায় এই উভয় জাতির সন্ধিস্থলে দণ্ডায়মান হইয়া তাহাদের একতা সম্পাদন করিবে, না উভয় জাতিরই সমাজ হইতে তাহারা বহিস্কৃত। যে দিকে নেত্রপাত করি, এ দুই জাতির মধ্যে মমতা বা সামাজিক ও রাজনীতি সম্বন্ধীয় একতা দৃষ্টি-গোচর হয় না। লক্ষের অনধিক ইউরোপীয় কর্তৃক পরিরক্ষিত এই দুই শত পঞ্চাশ কোটি আসিয়াবাসী যখন আপনাদের বল ও অধিকার বিষয়ে চেতনা লাভ করিবে, তখন যে কিরূপে ইংরাজ-রাজ্য রক্ষিত হইবে বলা যায় না। একমাত্র ভরসা এই যে, ইংরাজেরা যে গুরুতর শিক্ষাকার্য্যের ভার গ্রহণ করিয়াছেন ও যাহা তাঁহাদেরই দ্বারা সুসম্পন্ন হইবার দৃষ্টাবদ, তাহারা যেন তাহার পরিপক্বতা সাধন করিবার সময় পান; তাঁহাদের রাজ্য যেন অকালে বিনাশ প্রাপ্ত না হয়।”

ইংরাজেরা যেমন পুলিশ কোর্টে আমাদের রীতি নীতি স্বভাব চরিত্র শিক্ষা করেন আমরাও তেমনি হয়ত লালবাজারের গোরাহকে ইংরাজ জাতির আদর্শ-রূপে গ্রহণ করি। আমি পূর্বেই বলিয়াছি যে, কস্মিক্ষেত্রে তাহাদের সঙ্গে আমাদের যাকিছু আলাপ পরিচয়, কিন্তু তাহারা আপনাদের মধ্যে কিরূপে জীবন যাপন করে, তাহাদের গার্হস্থ্য-প্রণালী সামাজিক রীতি নীতি কিরূপ, তাহা এদেশে আমরা নভেল পড়িয়া যাহা কিছু জানিতে পারি, লৌকিক ব্যবহারে অল্পই

দেখিতে পাই। ইংরাজেরাও আমাদের ভিতরকার ভাব অল্পই দেখিতে পান। তাঁহারা আমাদের যেরূপ ভাবে দেখেন তাহা আমরা মেকলে-কৃত ওয়ারেন হেস্টিংস প্রস্তাবে বঙ্গবাসীদিগের চরিত্র পাঠে কতক অবগত হইতে পারি। দেশীয় সম্বন্ধে তাঁহাদের মতামত বিবেচনা করিতে গেলে তাঁহাদিগকে সামান্যতঃ ছই দলে বিভক্ত করা যাইতে পারে। এক দলের মত দেশীয়দিগের প্রতি সদ্যবহার, ভারতবর্ষের শুভ উদ্দেশ্যে ভারতবর্ষ শাসন, উপযুক্ত হইলে তাহাদিগকে উচ্চ পদ উচ্চ অধিকার প্রদান। অপর দলের ভাব স্বার্থপরতা—“হিন্দুস্থান তাঁহাদেরই ভোগের বস্তু, হিন্দুরা কখনই স্বাধীনতার উপযুক্ত নহে, চিরকালই তাহাদের সঙ্গে বালকের ন্যায় ব্যবহার করিতে হইবে। ইংরাজদের সঙ্গে সমকক্ষ হইয়া চলিতে যাওয়া তাহাদের স্পর্ধা মাত্র। এদেশ ইংরাজেরা তরবারির বলে জয় করিয়াছে, তরবারির বলে তাহাদের রক্ষা করিতে হইবে। প্রীতি মৌহাদ্য ভ্রাতৃত্ব স্বাধীনতা এ সকল কেবল মুখে বলিবার জিনিস, কাজের নহে। কৃষ্ণবর্ণ জাতি কখন খেতাজদের সমান অধিকার লাভের যোগ্য নহে, যদি হইত ত ইংরাজদের এদেশ অধিকারের ক্ষমতা থাকিত না। তাহাদিগকে সমান অধিকার দিলে ইংলণ্ডের মর্যাদার হানি হইবে। যাহারা আপনাদের শরীর পতন করিয়া ভারতবর্ষ জয় করিয়াছেন, তাঁহাদিগের নিজ সম্মান সম্মতিগণকে উপেক্ষা করিয়া দেশীয়দিগের মর্যাদা রক্ষা নিতান্ত অবিচারের কার্য। দেশীয়দিগকে অস্ত্রশিক্ষা দিয়া, দেশীয়দিগকে স্বাধীনতা শিক্ষা দিয়া, আপনাদের পদচ্যুতির সোপান করিয়া দেওয়া নিতান্ত মূর্থতার কার্য। এরূপ নিঃস্বার্থ উপদেশ দেওয়া ভণ্ডামি মাত্র।” হুংথের সহিত স্বীকার করিতে হইবে ভারতবর্ষীয় ইংরাজদের মধ্যে এই শেষোক্ত দলের সংখ্যাই অধিক। ইংরাজি সংবাদ পত্র সকলকে যদি এই ছই দলের প্রতিনিধি বলিয়া গণ্য করা যায়, তাহা হইলে এই ছই দলের আপেক্ষিক বল ও সংখ্যা সহজে অবধারিত হইতে পারে।

আর কতকগুলি ইংরাজ আছে (সংখ্যা তাহাদের অল্পই) এক কথায় যাহাদের মত এই যে ভারতবর্ষ ইংলণ্ডের গলগ্রহ মাত্র, আর সে এমন গলগ্রহ যে তাহা

হইতে নিষ্কৃতিরও উপায় নাই। এই সম্বন্ধে ইংলণ্ডের এক মাসিক সমালোচনী পত্রিকায় (The Fortnightly Review,—“The foriegn dominions of the Crown”) পার্লামেন্ট সভার সভ্য সুবিখ্যাত লো সাহেব স্বীয় অভিপ্রায় বাহা ব্যক্ত করিয়াছেন তাহার মর্ম্ম পাঠকদিগের গোচরার্থ নিম্নে উদ্ধৃত করা যাইতেছে,—

“প্রথমে বাহারা ভারতবর্ষে ব্রিটিশ রাজ্য সংস্থাপন করিতে প্রবৃত্ত হইয়াছিল। তাহাদের স্বার্থ-সাধন ভিন্ন আর কোন উদ্দেশ্য ছিল না। ইংলণ্ডের গৌরব-বৃদ্ধি অথবা ভারতবর্ষবাসীদিগের কল্যাণসাধন—এরূপ কোন ভাব তাহাদের মনে উদয় হয় নাই। এক দল ব্যবসায়ীর কস্মকর্ত্তা হইয়া তাহাদের ভারতবর্ষে প্রবেশ—তাহারা বিলক্ষণ অবগত ছিল যে বাহা কিছু করিয়া লইতে হইবে সে কেবল তরবারির বলে। কত কত দেশ উচ্ছন্ন গেল—কত রাজ্য ও রাজা বিনষ্ট হইল—কত লুটপাট আরম্ভ হইল—ইংলণ্ডের সেনাগণ ক্রীত ডাকাতির কার্য্যে নিযুক্ত হইল—নিরপরাধী নিরীহ স্ত্রীগণ লুণ্ঠিত হইল—দৈব মানব সকল প্রকার নিয়ম পদতলে দলিত হইল—এ সকল অর্থোপার্জন উদ্দেশ্যে। ওয়ারেন হেস্টিংসের বিরুদ্ধে যে সকল অভিযোগ উপস্থিত হইয়াছিল তাহার প্রত্যেক অভিযোগ সমর্থনে অকাট্য প্রমাণ বর্ত্তমান। উপায় যেমনই নির্ভর ও কলঙ্কিত হউক না কেন—জয়লাভ তেমনি সম্পূর্ণ হইয়াছিল। যদি ক্লাইব কিম্বা হেস্টিংসকে জিজ্ঞাসা করা যাইত—তোমাদের ভারতবর্ষে হলু স্থূল বাধাইবার অভিসন্ধি কি? তাঁহারা অনায়াসে উত্তর দিতে পারিতেন—কোম্পানি বাহাহুরের আয় বৃদ্ধি। আর যদি অকপট ভাবে উত্তর করিতে ইচ্ছা করিতেন তবে ইহাও বলিতে পারিতেন—“আর আমাদের নিজেরও যৎকিঞ্চিৎ কাজ গোছান”। কিন্তু এ ভাব স্থায়ী হইতে পারে নাই। তাহাদের কার্য্য-প্রণালী সময়োচিত হয় নাই। যদিও হেস্টিংস নির্দোষ সাব্যস্ত হইলেন, তাঁহার বিচারে যে সকল ব্যাপার প্রকাশিত হইল তাহাতে অবশেষে ইংলণ্ডের ধর্ম্ম-বুদ্ধি জাগ্রত হইল। ক্রমে এই সকল অত্যাচার অত্যাচার সংশোধিত হইল—বল ও যথেষ্টাচারিতার পরিবর্ত্তে শ্রায় ও সুবিচার

সংস্থাপিত হইল। বিজয়ী কোম্পানিকে প্রথমে ব্রিটিশ রাজ্যের অধীনতা স্বীকার করিতে হইল ও পরে তাহার অস্তিত্ব পর্য্যন্ত বিনাশ প্রাপ্ত হইল। যদি রোমীয়-দের রাজ্য হইত ত তাঁহারা ভারতবর্ষ হইতে বার্ষিক ২০ কোটি টাকা আদায় করিয়া লইতেন—ব্রিটিশ রাজ্য নিজের জন্য এক পয়সাও গ্রহণ করেন না। প্রত্যুত ইংলণ্ডের নাবিকগণ ভারতবর্ষ রক্ষার জন্ত বিনা বেতনে যে কৰ্ম্ম করে তাহা ধরিতে গেলে তজ্জন্ত ও অন্ত্যাত্ত বিষয়ে ভারতবর্ষের উপর আমরা ত্রায়ত অনেক টাকার দাবী করিতে পারি সন্দেহ নাই। ভারতবর্ষকে করদ রাজ্যরূপে গণ্য করা দূরে থাকুক আমরা উল্টা তাহাকে সাহায্য দানে সমুৎসুক। যদিও তাহার রাজস্বের সংখ্যা ৫০ কোটি পৌণ্ড, আর ধনীরা তাহাতে প্রায় কিছুই দেন না, তথাপি ভারতবর্ষীয় গবর্ণমেন্টের সাধ্যায়ত্ত নিজ কর্তব্য সাধনে (ছুর্তিক মোচন) সাহায্য দিবার জন্ত আমরা চাঁদা করিয়া টাকা উঠাইতে প্রস্তুত,—আরো গুনা যাইতেছে শতকরা দুই এক টাকা স্তদ বাঁচাইবার জন্ত আমরা তাহার ছুর্তিক নিবারণ কার্যে টাকা ধার করিয়া উঠাইতে প্রস্তুত—আর ইংলণ্ডীয় করদাতা প্রজাগণ, যাহাদের উপর তাহাদের নিজের দরিদ্র-ভরণের ভার সমর্পিত, তাহাদের হইয়া ভারতবর্ষকে সমুদায়ে ৫০ কোটি টাকা উপঢৌকন দেওয়া হয়, এরূপ প্রস্তাবও শ্রবণ করা যায়।

“ভারতবর্ষ হইতে লুটপাট মারপীট অন্যান্য অত্যাচার সকল উঠিয়া গিয়াছে শুধু তাহা নয়, ভয় হইতেছে পাছে তাহার জন্ত আমাদের অর্থ লুণ্ঠন আরম্ভ হয়। ভারতভূমি আমাদের কতই আদরের ধন—সোহাগের বস্তু—নাই পাইয়া নষ্ট শিশু তুল্য হইয়া দাঁড়াইয়াছে। এইরূপ যে চিরকালই আমাদের উপর তাহার নির্ভর করিয়া থাকিতে হইবে—কেবল তাহা নহে, সে আমাদের নিকট হইতে কত আদর কত যত্ন পায়, আর যে সকল উপনিবেশ আমাদের নিজের সৃষ্টি তাহাদের গতি কি হয়, তাহার প্রতি আমাদের আক্ষেপও নাই।

“ভারতের উপর আমাদের ত এইরূপ স্নেহ-দৃষ্টি। ইহার উপর আমাদের যতটা অনুরাগ ও মমতা, ইহা হইতে তদুপযোগী লাভ উৎপন্ন হয় কিনা জিজ্ঞাসা

করা যাইতে পারে । এক এই বলা যাইতে পারে যে ভারতের সহিত আমাদের যেরূপ ব্যবহার তাহাতে পৃথিবী-গুরু লোকে আমাদের পরোপকার-ব্রত ও নিঃস্বার্থ ভাবের সম্পূর্ণ পরিচয় পাইতেছে । আমরা এইক্ষণে ভারতের সঙ্গে যে ভদ্র ব্যবহার করিতেছি তাহাতে আমাদের পূর্বপুরুষদের সকল দোষের প্রায়শ্চিত্ত যতদূর সাধ্য তাহা হইয়াছে । আমরা জগৎকে দেখাইতেছি যে অল্প সংখ্যক ইউরোপীয় কর্তৃক কিরূপে কোটি কোটি প্রজাপুঞ্জের মধ্যে শান্তি স্ননিয়ম সৌরাজ্য বিস্তার হইয়া তাহাদের অবস্থার সর্বপ্রকার উন্নতি সাধিত হইয়াছে—যাহা তাহাদের আপনাদের যত্নে কখনই হইতে পারিত না ও আমাদের সাহায্য বিনা এক বৎসর কালও স্থায়ী হইত না । এই সুদৃশ্যটি আমরা পৃথিবীর সম্মুখে প্রকাশিত করিয়া আপনাদিগকে যথার্থ গৌরবান্বিত মনে করিতে পারি । কিন্তু একথা থাক—ভারতবর্ষ হইতে আমাদের পুণ্য লাভের কথা হইতেছে না—আসল প্রশ্ন জিজ্ঞাস্য এই, তাহা হইতে আমাদের বৈষয়িক লাভ কতদূর হইতেছে ?

“এক এই লাভ অবশ্য স্বীকার করিতে হইবে যে আমাদের মধ্যে অনেক গুণবান ও কৰ্ম্মিষ্ঠ লোক, যাহাদের কৰ্ম্মক্ষেত্র আমাদের দেশে অতি সঙ্কীর্ণ, তাহাদের জন্ত ভারতবর্ষে অনেক গুলি উচ্চ অর্থকর যশস্বর পদ উন্মুক্ত রহিয়াছে । ইহা পেঞ্চাও অধিকতর লাভ এই যে, ভারতবর্ষীয় সিবিল সর্বিস সাধারণের জন্য মুক্ত হওয়াতে বিদ্যাশিক্ষার বিশেষ উত্তেজনা লাভের এবং গুণ ও পরিশ্রমের পুরস্কার প্রদানের এক প্রকৃষ্ট উপায় যোজনা হইয়াছে । আমরা ভারতবর্ষের প্রশস্ত কার্যালয়ে প্রবেশ করিয়া যে সকল নিয়ম বন্ধন করিয়াছি তাহাতে আমাদের গুণবান্ বিদ্বান্ যুবকগণ যেমন তাহাদের উপযুক্ত কৰ্ম্ম-ভূমি পাইতেছে সেই অনুসারে ভারতবর্ষীয়দেরও উপকার সংসাধিত হইতেছে ।

“ভারতবর্ষীয় রাজস্বের সব্যয় ও শৃঙ্খলা-বন্ধন আমাদের সামান্য গৌরবের বিষয় নহে । লবণের উপর অযথোচিত কর ও গুরু আদায় সপক্ষে আর যে কতকগুলি দোষ ও অন্ধতা দৃষ্ট হয়, কালে তাহা বিলুপ্ত হইবে । যাহা ইউক্, ইহা মুক্তকণ্ঠে বলা যাইতে পারে যে, বার্তা শাস্ত্রের নিয়ম বহির্ভূত যে সকল গুরু

ইউরোপের প্রধান প্রধান রাজ্যের রাজস্ব-প্রণালীর কলঙ্ক স্বরূপ তাহা হইতে আমরা ভারতবর্ষকে মুক্ত রাখিয়াছি। মানবজাতির এমন বিস্তৃত জন-সংখ্যার মধ্যে যে আমরা শান্তি ও মর্যাদা রক্ষা করিতেছি—যে সকল শক্তি পরস্পরের প্রতিঘাত ও বিনাশ সাধনে নিয়োজিত হইত তাহা যে পরিশ্রম ও বাণিজ্য ব্যবসায় নিযুক্ত করিতে পারিয়াছি ইহাও বিশেষ প্রশংসার বিষয় বলিতে হইবে। প্রজার প্রতি রাজার কর্তব্য কি—প্রজাদের পরস্পর বিরুদ্ধে সদ্ভাবে চলা কর্তব্য তাহার উচ্চ আদর্শ আমরা আর আর জাতির সম্মুখে ধারণ করিয়া জগতের কল্যাণ সাধনে সমর্থ হইতেছি। ভারতরাজ্য হইতে আমাদের যাহা কিছু উপকার লাভ হইতেছে তাহার তালিকা এক প্রকার প্রদর্শিত হইল। আর অধিক কিছু ভাবিয়া পাওয়া যায় না। এখন অন্য দিকটা দেখা যাউক—এই সকল উপকার সাধনের জন্য আমাদের কতটা ক্ষতি স্বীকার করিতে হইতেছে।

“কোন কোন জ্ঞানবান বিচক্ষণ ব্যক্তির মত এই যে, ভারতবর্ষ অধিকারে আমাদের মহা কার্যদক্ষতা ও দূরদর্শিতা প্রকাশ পাইতেছে। তাহার উত্তর এই—যদি ইহা হইয়া থাকে ত তাহা আমাদের ভাগ্যের গুণে বুদ্ধিবলে নহে, কেন না ভারত-বিজয় ইংলণ্ডের মতামত-সাপেক্ষ ছিল না। ব্রিটিশ গবর্ণমেন্ট ও প্রজাগণ, ভারত-বিজয়ে যাহাদের প্রকৃত ইষ্টানিষ্ট, তাহাদের সে বিষয়ে কোন হস্ত ছিল না। পলাসীর যুদ্ধ হইতে একবার আমাদের রাজত্ব স্থাপিত হইবার পর, বিগ্রহের পর সন্ধি, সন্ধির পর বিগ্রহে দেশীয় রাজ্য সকল ক্রমে আমাদের পদতলে বিদলিত হইল। আমরা প্রথম হইতে একেবারে হস্তক্ষেপ না করিতাম সে এক, কিন্তু কতক দূর অগ্রসর হইয়া এখন ‘ধামা যাক্ আর কাজ নাই’ এরূপ বলিবার আর আমাদের সামর্থ্য রহিল না। এখন ত আমাদের অবস্থা যারো ভয়ানক হইয়া উঠিয়াছে। এখন আর আমাদের পিছু হটিবার যো নাই। এই কোটি-কোটি প্রজাপুঞ্জ যে রাজ্যের অধীন ছিল তাহা আমরা স্বার্থ-সাধন-দ্বন্দ্বের বিনষ্ট করিয়া তাহাদের উপর রাজত্ব স্থাপন করিবার ভার লইয়াছি। ইহা নিশ্চয় যে এখন আর আমাদের মত পরিবর্তনের উপায় নাই, আমরা স্বহস্তে

দেশীয় রাজ্য উচ্ছিন্ন করিয়া এক্ষণে প্রজাদিগকে অরাজকতার অন্ধকূপে পুনরায় নিক্ষেপ করিতে প্রবৃত্ত হইতে পারি না। বহু দূরস্থ ভবিষ্যকালেও কখন যে এমন সময় আসিবে যখন ভারতবর্ষ স্বাধীন ভাবে স্বরাজ্য পরিচালনে সক্ষম হইবে তাহারও কোন সম্ভাবনা দেখা যায় না। ভারতবর্ষের সহিত আমাদের বিচ্ছেদ হই কারণে হইতে পারে, হয় ভিতর হইতে বিদ্রোহোৎপত্তি—অথবা বাহির হইতে শত্রুর আক্রমণ। ভারতের সহিত আমাদের ভাগ্য একরূপ সন্নিষ্ট হইয়া গিয়াছে যে ইচ্ছা করিলেও আমরা সে সম্বন্ধ ভগ্ন করিতে পারি না। ইহা আমাদের সামান্য বিপদ নহে। দূরদর্শী রাজা এমন কোন কার্য্যে হস্তক্ষেপ করেন না যাহাতে স্বীয় রাজ্যের ভাবী ভাগ্যের উপর নিজের অধিকার একেবারে তিরোহিত হয়। ভারতবর্ষ সম্বন্ধে আমরা এইরূপ কার্য্যে হস্তক্ষেপ করিয়াছি সন্দেহ নাই।

“ভারতবর্ষের রাজত্ব সম্বন্ধেও আমাদের ঘোরতর দৃষ্টি উপস্থিত হইতে পারে। ভারতবর্ষীয় গবর্ণমেন্টের কথার উপর নির্ভর করিয়া কোটি কোটি মুদ্রা ধার দেওয়া হইয়াছে—পার্লমেন্ট পর্য্যন্ত এই ঋণের সঙ্গে জড়িত। মনে কর, ভারতবর্ষীয় গবর্ণমেন্ট কোন কারণে এই ঋণের টাকা প্রদানে অসমর্থ হন। তখন যদি উত্তমর্গগণ ব্রিটিশ ধনকোষের উপর দাবী করিতে প্রবৃত্ত হয় ত তাহা খণ্ডন করা আমাদের পক্ষে সহজ হইবে না। বলা যাইতে পারিবে যে পার্লমেন্টের অধীনস্থ ব্রিটিশ রাজ্যের রাজমন্ত্রীগণ স্বয়ং এই টাকা কৰ্জ্জ করিয়াছেন ও ঐ টাকা পরিশোধের জন্য রাণী নিজে কথা দিয়া দায়ী হইয়াছেন।

“ভারতবর্ষ অধিকার করিয়া—শুধু অধিকার করিয়া নয়, তথায় শান্তি ও সুশৃঙ্খলা স্থাপন করিয়া আমাদের এক লাভ এই হইয়াছে যে, সে দেশে আমাদের বাণিজ্য ব্যবসায় নিরীক্সে চলিবার সুবিধা হইয়াছে। পৃথিবীর ভিন্ন ভিন্ন দেশের সহিত ইংলণ্ডের বাণিজ্য ব্যবসায় ঘটিত সম্বন্ধ—সেই সকল দেশে রাজ্যের সুব্যবস্থা শান্তি ও ধন সমৃদ্ধি স্থায়ী হইলে তাহাতে ইংলণ্ডের নিজের স্বার্থ সন্দেহ নাই। কিন্তু এই স্বার্থের পূর্ণ ফল লাভের জন্য ইহা আবশ্যক যে অন্যান্য স্থানে

তাহারা যে মূল্যে যে প্রকার সামগ্রী পাইতে পারে আমরা তাহা অপেক্ষা উৎকৃষ্ট সামগ্রী অল্প মূল্যে আনয়ন করি। কিন্তু ইহা সকল সময় হইয়া উঠে না। ভারত-বর্ষে শ্রমের মূল্য অপেক্ষাকৃত স্নলভ, এই জন্য এবং অন্যান্য কারণে ভারতবর্ষীয়-গণ আমাদের ঘোরতর প্রতিদ্বন্দ্বী হইয়া উঠিতেছে। অতএব বাণিজ্য সম্বন্ধীয় লাভ অপ্রতিহত ও স্থায়ী লাভ বলিয়া গণ্য হইতে পারে না।

“এই সম্বন্ধে আর একটি গুরুতর বিষয় বিবেচনা করা আবশ্যক। ভারতের উপর আমাদের যে অধিকার তা কিসের বলে? বাহির হইতে বিদেশীয় শত্রুর আক্রমণের ভয় বিচার-যোগ্য কিন্তু তাহা দূরে থাকুক, ইহা ত অপ্রকাশ নাই যে আমাদের রাজত্ব রক্ষাহেতু সেই উষ্ণদেশে প্রায় ৭০০০০ ব্রিটিশ সৈন্য রাখিবার প্রয়োজন হইতেছে। আমরা দেশীয়দের সম্ভাব রক্ষা ও প্রীতি আকর্ষণ করিবার জন্য যতই চেষ্টা করি না কেন তথাপি ব্রিটিশ সৈন্যের সাহায্য ব্যতীত আমাদের চলে না। আর কোন কালে যে তাহা ছাড়িয়া চলিবে তাহারও কোন সম্ভাবনা নাই। এই সকল সৈন্য রক্ষার জন্য যে ব্যয়ের আবশ্যক তাহা ভারতবর্ষীয় রাজস্ব হইতে নির্বাহিত হয় সত্য, তথাপি এই কারণে আমাদের অল্প ক্ষতিগ্রস্ত হইতে হয় না। আমাদের রাজ্য সম্বন্ধীয় স্বাধীনতা এইরূপ যে, আমরা কোন প্রজাকে তাহার ইচ্ছা-বিরুদ্ধে সৈন্যদলে ভুক্ত করিতে পারি না। আমরা যে কেবল লোক-সংখ্যায় দরিদ্র তাহা নয় কিন্তু অপরাপর স্থলে অধিক বেতনে কৰ্ম লাভের বৈরূপ সুবিধা তাহাতে সৈন্য-সংখ্যা হ্রাস হইবার আর এক প্রধান কারণ বিদ্যমান রহিয়াছে। ভারতবর্ষ তাহার নিজের সম্মানগণকে ভক্ষণ করেন না বটে কিন্তু ইউরোপীয় রাজপুরুষদের উপর তাহার এরূপ কটাক্ষ যে ঐদেশের জলবায়ুর গুণে ইউরোপীয়দের যে ধ্বংস, তাহা অনেক ঘোর রক্তশ্রাবী যুদ্ধ-জনিত নিপাতের সমতুল্য। ১৮৫৭ সালের সিপাই বিদ্রোহের ফল কি হইয়াছিল বিবেচনা কর। আমরা তৎপূর্বে যে যুদ্ধে ব্যাপ্ত ছিলাম তাহাতে আমাদের সৈন্য-সংখ্যা ক্ষীণ হইয়া আসিয়াছিল। আমাদের ভারতবর্ষীয় সৈন্যদলও নানা কারণে ক্ষীণতা প্রাপ্ত হইয়াছিল ও সে ক্ষতি পূরণ না হইতে হইতেই ভারতবর্ষে এক মহা

বিদ্রোহানল প্রজ্বলিত হইল। কত কষ্টে কত সাহসী ও অহুরাগী ব্রিটিশ সৈন্যের অতুল বীর্য উদ্যম সাহস পরাক্রমে—কি ভয়ানক হত্যাকাণ্ডের পর তবে আমাদের রাজ্য প্রলয়-দশা হইতে উদ্ধার পাইল। ইহা যেন কেহ মনে না করেন এইরূপ সঙ্কট চলিয়া গিয়াছে, আর আসিবে না। যদি ইংলণ্ড আর এক যুদ্ধে প্রবৃত্ত হন ত আমাদের সৈন্যাব্যাব তেমনিই উপলব্ধি হইবে—তেমনি বিপদ উপস্থিত হইবে। মনে কর সিপাই বিদ্রোহ আর এক বৎসর পূর্বে সম্ভটিত হইত অথবা ক্রাইমিয়ার যুদ্ধ আর এক বৎসর অধিক স্থায়ী হইত তাহা হইলে কি হইত ? তাহা হইলে রুসিয়ার রণক্ষেত্রে আমাদের আরো অধিক সৈন্য পাঠাইবার আবশ্যক হইত। আবার এদিকে ভারতবর্ষে আমাদের অল্পসংখ্যক প্রেপীড়িত সৈন্য-দলের সাহায্যে লোক না পাইলে সিবিগিয়ন দলের ইংরাজগণ ও তাহাদের অসহায় স্ত্রীপুত্রদের সমূহ বিপদ উপস্থিত—এরূপ স্থলে কি করা যাইত ? উভয় পক্ষ রক্ষা করিতে কি আমরা কৃতকার্য হইতাম ? তাহা না হইলে কোন্ পক্ষকে কাল-কবলে ছাড়িয়া দিতে প্রবৃত্ত হইতাম ?

“যে সকল লেখক ও বক্তা ভারতবর্ষকে ইংলণ্ডের রাজমুকুটের মহামূল্য মণি বলিয়া বর্ণনা করে তাহাদের বাক্যের সত্যতা বিষয়ে এখন আমরা বিবেচনা করিতে পারি। তাহাদের মতে ভারতবর্ষ গেলে ইউরোপীয় রাজ্য-মণ্ডলীতে ইংলণ্ডের প্রাধান্য বিনষ্ট হইবে। আমাদের মত ইহার সম্পূর্ণ বিপরীত। যদি কখন আমাদের বিপদে পড়িতে হয় ত সে কেবল ভারতবর্ষেরই জন্য। আমরা অতীত ঘটনা হইতে যে শিক্ষা ও বহুদর্শিতা লাভ করিয়াছি তাহা ইউরোপীয় জাতিদের সহিত ব্যবহারে কার্যে আসিতে পারে। আমরা আমাদের পরস্পরের ভাব বুঝিতে পারিয়াছি—“আমাদের মতাবিভিন্ন উদ্দেশ্য অনেকটা সমান। কিন্তু ভারতবর্ষীয়দের মনোগত অভিপ্রায় বোধে আমরা কত দূর কৃতকার্য হইয়াছি ? এইরূপ শুনা যায় যে ভারতবর্ষীয় মুসলমানদের বিশ্বাস এই যে আমরা তুর্কির সুলতানের করদ আশ্রিত প্রজা। চর্বিযুক্ত কাটিজে যেমন সিপাহি বিদ্রোহের হত্বপাত হয়—পাগড়ীর আকার পরিবর্তনে যেমন

বেলোরে বিদ্রোহ সমুদ্ভূত হয়, কে বলিতে পারে কখন এইরূপ কোন সামান্য কারণে আমাদের ভারতবর্ষীয় রাজ্যে মহা হুলস্থূল বাধিয়া যাইবে ?”

সম্পূর্ণ ।

বিজ্ঞাপন ।

এই গ্রন্থের সকল প্রবন্ধ (একটি ছাড়া) ‘ভারতী’ ও ‘বালকে’ সময়ে সময়ে প্রকাশিত হইয়াছে, এইক্ষণে গ্রন্থাকারে পুনর্মুদ্রিত হইল । “সিংহলে ভ্রমণবৃত্তান্ত” আমার বাল্যকালের রচনা ; তদ্ভিন্ন আর যতগুলি লেখা সে সকলি আমার বোম্বাই-প্রবাস-সঙ্গিনী লেখনী হইতে অবসর মতে প্রসূত ! এই যোগসূত্রে “ভারতবর্ষীয় ইংরাজ” অত্র প্রবন্ধমালায় গ্রথিত হইল । “সিংহলে ভ্রমণ” ও “ভারতবর্ষীয় ইংরাজ” ছাড়িয়া দিলে অবশিষ্ট সমস্তই বোম্বাইকাহিনীতে পূর্ণ ।

শ্রীসত্যেন্দ্রনাথ ঠাকুর ।

